

माओ त्से तुंग

ना संकलित रचनांग

ग्रंथ 3



अनुवाद - जनी

दुनिया ता मजदूरलोer उंदी आयमूट!

दुनिया ता मजदूरलोर उंदी आयमूट!

माओ त्सेतुंग
ना
संकलित रचनांग
ग्रंथ-3

पहली गोंडी संस्करण 2022



5 | माओ त्से तुंग संकलित रचनांग ग्रंथ 3

पहली संस्करण 1973 पेकिंग
पहली गोंडी संस्करण 2022

इद ग्रंथ किन पीपुल्स पब्लिसिंग हाउस पेकिंग, अगस्त 1952 ते प्रकाशित कित्ता “माओ त्सेतुंग ना संकलित रचनांग”, ग्रंथ 3 चीनी संस्करण ता हिंदी अनुवाद आंदू। विदेशी पहला संस्करण ता जरूरत अनुसार नोट्स कुना लोप्पा उचुन बदलाव कित्ताद मंता। चीन लोक गणराज्य लोप्पा प्रकाशित आसी मत्ता पहली संस्करण 1973 ता इदु दूसरा संस्करण आंदू।

पहली बेरा हिंदी तल गोंडी लोप्पा अनुवाद – 2022

अनुवाद – जनी

जंगोम प्रेस



毛泽东

विषय सूची

प्रकाशक ना पोल्लो.....	11
“देहातों की जांच-पड़ताल” प्रस्तावना ओसो पिस्ता पोल्लोंग	16
पिस्ता पोल्लोंग.....	20
व्यक्तिगत अध्ययन लोप्पा सुधार किमूटश	24
दूरपूर्वी म्यूनख (शहर) बने कीयाना षड़यंत्र ता पर्दाफाश कीमुट	37
फासीवाद-विरोधी.....	40
अन्तरराष्ट्रीय संयुक्त मोर्चा ता बारे ते.....	40
शेनशी-कानसू-निंगश्या हंदी इलाका ता प्रतिनिधि-सभा लोप्पा भाषण...	42
पार्टी ता कार्यशैली ते सुधार कीमूट.....	48
घिसेपिटे पार्टी-लेखन ता विरोध कीमुट	73
येनान ता कला-साहित्य गोष्ठी लोप्पा भाषण	98
उंदी वेल्ले महत्वपूर्ण नीति	143
दूसरी विश्वयुद्ध ता मोड़.....	148
अक्तूबर क्रांति ता पच्चीसवी जंयती कालम ते	156
जापानी आक्रमण विरोधी युद्ध लोप्पा आर्थिक ओसो वित्तीय समस्यांग	157
नेतृत्व ता तरिकांग संबंध ते उचुक सवालकु.....	166
क्वोमिंगतांग पोरो उचुक आलोचनात्मक सवाल	175
आधार इलाकांग लोप्पा लगान कम कीयाना, उत्पादन बेरसी कीयाना ओसो “सरकार ता समर्थन कीयाना ओसो जनता संगे संबंध बेरसी कीयाना” आंदोलन किन विस्तार कीमुट.....	185

क्वोमिंगतांग ता केंद्रीय कार्यकारिणी कमेटी ता ग्यारहवा पूर्ण अधिवेश ओसो तीसरी जन रणनीतिक परिषद ता दूसरा अधिवेशन ता बारे ते समीक्षा	192
संगठित आयमूट!.....	212
मावा अध्ययन ओसो वर्तमान परिस्थिति.....	225
जनता ना सेवा क्रियमूट!.....	245
10 अक्तूबर ता तिहार ते च्यांग काई-शेक हिता भाषण ता बारे ते.....	248
सांस्कृतिक कार्य लोप्पा संयुक्त मोर्चा	255
माटु आर्थिक काम कियाला करियाना	259
उत्पादन-कार्य छापामार इलाकांग लोप्पा संभव मंता	269
चीन ता रेंडु रकम ता पिस्वल	275
संयुक्त मोर्चा सरकार बारे ते	279
बकवल मुयतोर, मेड्वांग कारतोर.....	375
सेना आत्मनिर्भरता काजे कीयाना उत्पादन ता बारे ते अनि दोष-निवारण ओसो उत्पादन ता महान आंदोलन ता महत्व ता बारे ते	380
हरले ओसो च्यांग जोडी ता नाटक फेल आत्ता	387
हरले ना नीति ता खतरा ता बारे ते.....	393
कामरेड विलियम जेड. फोस्टर ना पोरोल ते चिट्टी.....	396
जापानी आक्रमणकारिरा खिलाफ आखरी युद्ध.....	398

प्रकाशक ना पोल्लो

“माओ त्सेतुंग ना संकलित रचनांग” पोरोल ते छप्पेमात्ता इंजेटा संस्करण (Edition) लोप्पा कामरेड माओ त्सेतुंग ना चीनी क्रांति लोप्पा अलग-अलग कालम ते रास्ता महत्वपूर्ण लेख शामिल मंतांगा। इगे उचुक सालकुने वेल्ले जागाने “माओ त्सेतुंग” ना बचुको चीनी संस्करण छपेमात्तांगा। मति लेखक (रासानोर) इविनगडल बदे संस्करण तुन छपेमायना मुन्ने पढ़ेमायवा मत्तोर। छापे कित्ता लेख बेस कीत्तद हिल्ला मत्ता, प्रिंटिंग लोप्पा उचुन शब्दकु गलत मत्तांग, ओसो उचुक महत्वपूर्ण लेख किन विडस्ताद मत्ता। इंजेटा पुस्तक ता विषय किन समय हिसाबते, 1921 ते चीन कम्युनिस्ट पार्टी ता स्थापना आतस्केडल ताना इतिहास ता मुख्य कालम अनुसार सुधरे कित्ताद मंता। इद संस्करण लोप्पा इदिनकु मुन्ने बदे संस्करण लोप्पा हिल्ला महत्वपूर्ण लेख किन वेन्ने परताचोन शामिल कीतद मंता। लेखक इद संस्करण ता सब्बे लेख किन पढ़े मातोर, ओसो उचुक जागा ने शब्द कुना बदलाव कित्तोर। ओसो उंदी-रेंडु लेख कुना लोप्पा बदलाव ओसो संशोधन वेन्ने कीत्तद मंता।

इद प्रकाशन ता संबंध ते दोड़ रास्ता पोल्लोंग किन स्पष्ट कीयाना जरूरी मंता।

- 1) वर्तमान संकलन (रचना) पूरा आत्ताद हिल्ले। बारांकु इत्तेके क्रांतिकारी दस्तावेज किन क्वोमिंगतांग प्रतिक्रियावादी लोर नष्ट कित्तोर लेवेके वेल्ले समय एवनल ताकता युद्ध लोप्पा मायतांग, अदिन के माटु कामरेड माओ त्सेतुंग ना सबे रचनांग किन संकलित किया परवोम, खासकर ओना रास्ता लेक्का हिल्ला चिंटिंग किन ओसो टेलिग्राम किन शामिल किया परतद हिल्ले। इद ओरु रास्ता लेख कुना लोप्पा बेहरा हिस्सा मत्ता।
- 2) वेल्ले प्रचार आत्ता उचुक लेख कुन (उदा. “नाहकुना जांच-पड़ताल” लेक्कटा) लेखक ना सुझाव अनुसार ते इद संकलन लोप्पा शामिल कित्ताद हिल्ले, ओसो अदिन काजे “आर्थिक ओसो वित्तीय

समस्यांग” पोरोल ता लेख ता पहला अध्याय (“मावा मुन्ने कित्ता कबस्कुना बुनियादी सार”) किने इगा शामिल कीतद मंता।

- 3) इंजेटा संकलन लोप्पा उचुक व्याख्यात्मक (विस्तारते वेहना) नोट किन जोड़े कीतद मंता। हेडिंग किन स्पष्ट कीयाना उचुक नोट्स लेख ता पहली पन्ना ता दोड़ हित्तद मंता, ओसो पिस्ता राजनीतिक लेवेके दूसरा नोट्सकु हर लेख ता आखरी ते हित्तद मंता।
- 4) इंजेटा चीनी संस्करण उंदी पुस्तक ता रूप ते हिल्वेके नालुंग पुस्तक कुना उंदी सेट ता रूप ते मंता। सेट ता पहली पुस्तक लोप्पा पहली क्रांतिकारी गृहयुद्ध ता कालम ओसो दूसरी क्रांतिकारी गृहयुद्ध ता कालम शामिल मंता, दूसरा ओसो तीसरा पुस्तक लोप्पा जापानी-आक्रमण-विरोधी युद्ध ता कालम शामिल मंता, ओसो चौथा पुस्तक लोप्पा तीसरी क्रांतिकारी गृहयुद्ध ता कालम शामिल मंता।

चीन कम्युनिस्ट पार्टी केंद्रीय कमेटी ता
माओ त्सेतुंग ना संकलित-रचनांग प्रकाशन समिति
25 अगस्त 1951

अनुवादक ना बगिल तल

11-12 साल उमर ते मंदानास्केटल बेहरोर वड़कना पोल्लॉंग केंजसोरे बेरसताना। बेरसोरे दायना संगे इव पोल्लॉंग कुन पाटांग ओसो भाषण कुना लोप्पा वेने केंजा वात्ता। नन्ना सुडलास्केटल मंदाना नाटे ओसो नावा नालुंग बगिल ता वातावरण लोप्पा इद्रम ता बेहरा-बेहरा ओसो मावा रोज ता पिस्वल संगे जुडेमासी मत्ता पोल्लॉंग केंजवा मत्तांकु, नावा लोप्पा इविन पुंदाना गिर्दा बेरससोर हत्ता। नावा काजे इव वेल्ले पूना पोल्लॉंग मत्तांगा।

सिर्फ केंजसिए बदे पोल्लो तुन पुंदाला कोशिश कियाना वेल्ले मुशिकल मंता। बारांकु इत्तेके हर बेरा, हर विषय, हर सवाल ता जवाब हियाला काजे वरोर सही मानेय संगे मदाना मुशिकल मंता। अदिनके नन्ना उचुन पढ़ेमायला अनि रासिला करियताना।

नावा इद यात्रा लोप्पा वेल्ले लोकुरा योगदान मंता। सबसे मुन्ने नावा यायाल मंता, अदु नाकिन कम से कम साईन कियानाचोन स्कूल करियाना इंजी सपना हूड़ता। मति अदिना सपना अदु हूड़ता लेक्का पूरा आया परवो आत्ता। बारांकु इत्तेके उंदी पेरके अरसी मत्ता इलाका ओसो नाटे स्कूल-कालेज पढ़ाई ता रिवाजे हिल्ले। इदिनकु बेहरा समस्या गरीबी ते पिस्वल पिस्नदु मंता।

इद्रम ता परिस्थिति ते मंदानास्के नावा पिस्वल लोप्पा वरोर गुरुजी वात्तोर, नावा जीवा ता 'दादाल', नावा गुरुजी। ओरु नाकिन ओरा वेल्ले कीमती समय तिंची नावा काजे समय तेंडानोर, नाकिन प्राथमिक शिक्षा हियानोर, नाकिन जीवा कियानोर। नावा जीवा गरे मत्ता 'मीना' दीदी नाकिन हिंदी भाषा रास्ला ओसो पढ़ेमायला करिहत्ता। इदे आयवा 'गोड़ा ते ताकना स्कूल' ता वेल्ले योगदान मंता। इदे आयवा बच्चोनों दादा-दीदीरा योगदान मंता। इव सब्बे पुस्तकिंग अनुवाद कीसोरे ओर सब्बे तोरकिन नन्ना सुरता कीदान। ओरा लोप्पा बच्चोनों जन इंजे माकिन विड़िसी हत्तोर। वेर सब्बेतोर इद यात्रा लोप्पा नावा संगे मंदानोर, ओसो वायना कालम ते वेने नावा संगे मंदानोर। ओरा बारे ते बच्चोने पुस्तकिंग रासमुड़ आयर।

माटांग ओसो पाटांग लोप्पा केंजता पोल्लोंग, पुस्तक पढ़ेमायनास्के पुस्तक लोप्पा दोरकतास्के नावा गिर्दा तुकू हंदी हिल्ले आत्ता। नावा लेक्का पूना पोल्लोंग करियाला आल्सानोर ओसो केंजता पोल्लोंग कुन पुंदाला कौशिश कियानोर वेल्लेतोर मंतोर। मति पोरो नन्ना वेहता लेक्का हर बेरा, हर विषय, हर सवाल ता जवाब हियाला सही मानेय 'जीवा ता दादाल' दोरकना मुशिकल मंता। अदिनके इद साहित्य ता परताचोन हिंदी तिंची गोंडी भाषा ते अनुवाद कियाना इंजी आल्सताना।

मावा गोंडी भाषा वडकानोर आंध्रा, ओडिशा, छत्तीसगढ़, महाराष्ट्र, मध्यप्रदेश, उत्तरप्रदेश लेक्कटा राज्यकुने अलग-अलग जागा ने पिस्सा मंतोर। अदिनके मावा गोंडी भाषा पोरो अलग-अलग राज्यकुना भाषांग ना वेल्ले प्रभाव मंता। नावा गोंडी पोरो हिंदी, मराठी ओसो छत्तीसगढ़ी ता प्रभाव ज्यादा मंता। अनुवाद कियानास्के नाकिन पूना शब्द बने कियाना वेल्ले कटला वात्ता, इत्तेके गोंडी लोप्पा पारिभाषिक शब्द कुन वेहाला शब्द हिल्ले, अदिनके वेल्ले शब्द हिंदी ता इस्तेमाल कित्ताना। वायना कालम ते जनता लोप्पा हंजी ओसो ज्यादा गोंडी ता शब्दकु करियसी इदिन उचुन सुधरे कीमुड आयर। मति भाषा ता प्राकृति अनुसार दूसरा भाषा तल शब्द पोयाए लागिता। अनुवाद कियानास्के नन्ना अंग्रेजी ओसो हिंदी रेंडु पुस्तकिंग ना मदद एतित्ताना।

नावा इद कब्बड़ लोप्पा संगे-संगे ताकसोर मत्ता नावा जीवन साथी ना वेन्ने योगदान मंता। वीरु नाकिन इद काम कियाला गिर्दा कींतोर। नावा लोप्पा जीवा मत्तादु सुरता किसींतोर, नावा कै पोयसी ताकिंतोर। वीरू इदिन पुस्तक लेक्का डिजाईन कियाना ओसो प्रूफ कियाला मदद हित्तोर।

इव सब्बे पुस्तकिंग जनता नडमा ओयला काजे जंगोम प्रेस पोरोल ते उंदी प्रकाशन पोरोल हित्तोमा इद पोरोल मावा वीर पडियोर, गोंड जनता ना हीरो, गड़चिरोली भूमि ता मरी वीर बाबूराव शेडमाके ना सेना तल पोयत्तोमा सब्बे शहीदीर किन सुरता कीसोरे इव सब्बे पुस्तकिंग इंजे मीवाव आत्तांग।

इद यात्रा जारी मंदियर.... इव पुस्तकुना गोंडी अनुवाद, डिजाईन पोरो सब्बेतोरा सुझाव ओसो आलोचनाकुना वेल्ले जरूरत मंता। मीटू ओसो बदे पुस्तक ता अनुवाद कीतेके बेस आयर इंजी वेने सुझाव हीतेके बेस आयर।

जीवा ता जोहार

मीवा - जनी

जापान आक्रमण
विरोधी युद्ध कालम
(2)

“देहातों की जांच-पड़ताल” प्रस्तावना ओसो पिस्ता

पोल्लोंग

मार्च - अप्रैल 1941

प्रस्तावना

17 मार्च 1941

पार्टी ता वर्तमान ग्रामीण नीति इंजे दस साल कुना गृहयुद्ध ताकनास्के मत्ता लेक्कटा भूमि-क्रांति ता नीति आयवा, जापान विरोधी राष्ट्रीय संयुक्त मोर्चा ता निर्माण कीयाना ग्रामीण नीति आंदू। पूरा पार्टी 7 जुलाई ओसो 25 दिसम्बर 1940 ता केंद्रीय कमेटी आदेशकु¹ ओसो वायाना कालम ते ताकना सातवीं राष्ट्रीय कांग्रेस ता आदेश कुना अनुसार ताकना। कामरेड्स किन समस्यांग कुना अध्ययन कीयाना तरीका परहकला काजे मदद कीयाना उद्देश्य ते दोड़ रास्ता विषय किन प्रकाशित कीयाना काम ताका मंता। मना वेल्ले कामरेड्स ना काम कीयाना तरीका इंजे वेने अपरिपक्व ओसो लापरवाहीपूर्ण मंता। ओरू परिस्थिति किन बेस समझेमायना कोशिश किवोर आंतोरा। ओरू दोड़ स्तर ता परिस्थितिंग ना बारे ते बिल्कुले पुनवा मत्तेकाई काम-ताकी कीयाना जिम्मेदारी एतसी मंदितोरा। इद्रम ता परिस्थिति वेल्ले खतरनाक मंदिता। चीनी समाज लोप्पा अलग-अलग वर्ग कुना असल परिस्थितिंग ना बारे ते सही ओसो ठोस ज्ञान दोरकी कियवा लेवा बदे वेने नेतृत्व सही तरीका ते नेतृत्व आया परवो आंता।

परिस्थिति ना जानकारी दोरकी कियाला काजे सामाजिक जांच-पड़ताल कीयाना ओसो हर सामाजिक वर्ग ता असली पिस्वल परिस्थिति किन विश्लेषण कीयाना। बोरा हट्टा पोरो कार्य-संचालन (नेतृत्व) ता जिम्मेदारी मंतायो, ओरू परिस्थिति ना जानकारी दोरकी कियाला काजे उंदी योजना अनुसार उचुक शहरकु लेवेके ग्रामीण इलाकांग लोप्पा तन्ना ध्यान केंद्रित कीसि मार्क्सवादी बुनियादी दृष्टिकोण किन इतेके वर्ग विश्लेषण ता तरीका किन इस्तेमाल किसोरे बचोनो बेरा पूरा जांच-पड़ताल कीयाना। इद्रम कितेकेने माटु चीन ता सामाजिक समस्यांग ना बारे ते सबसे प्राथमिक ज्ञान दोरकी किया परितोम।

इद्रम कियाला काजे सिर्फ तल्ला पोरो तेहची मोय्योल पोरोने हूडना मुन्ने दोड़ हूडला करियाना। मनम बस्के एवनल दोड़ हूडला करियोम ओसो इद्रम कियाला संकल्पबद्ध मन्नोमो, अस्के एवनल माटु चीन ता परिस्थिति किन सही तरीका ते समझेमाया वेने परवोम आंतोम।

जांच-पड़ताल ता दूसरा तरीका मीटिंग कीयाना। सिर्फ हिकके-हक्के कोंडा तिरहची वड़कता-केंजता पोल्लोंग नगडल बदे वेने चीज ता बारे ते वेने पूरा ज्ञान दोरकी किया परमूडायो। हूनान इलाका ओसो चिंगकांगशान लोप्पटा सामग्री नन्ना जांच-पड़ताल संगे दोरकी कीसि मत्तान मति अदु बेगानो मायता। इगा प्रकाशित कित्ता सामग्री मुख्य रूप ते शिंगक्वो ता जांच-पड़ताल, ओसो “छाएशी श्यांग ता जांच-पड़ताल” सामग्री आंदू। जांच-पड़ताल मीटिंग कीयाना सबसे हल्को, सबसे ज्यादा व्यवहारिक ओसो सबसे ज्यादा विश्वासनीय तरीका मंता। इदिना नन्ना वेल्ले फायदा एततान, इदु बदे वेने विश्व विद्यालय तुकू बेसता विद्यालय (स्कूल) आंदू। इव मीटिंग लोप्पा शामिल आयनोर मध्यम लेवेके निम्न स्तर ता असल अनुभवी लेवेके साधारण लोकर मंदाना। हुनान ता पांच काउन्टिंग ओसो चिंगकांगशान ता रेंडु काउन्टिंग ना जांच-पड़ताल कीयानास्के नन्ना हर काउन्टी ता मध्यम स्तर ता जिम्मेदार कार्यकर्ता लोरकिन कलियतान, श्युनऊ ते जांच-पड़ताल कीयानास्के नन्ना मध्यम ओसो निम्न स्तर ता कार्यकर्ता लोर ओसो वरोर गरीब श्यूछाए², वरोर व्यापारी संघ ता पाइना

अध्यक्ष ओसो काउंटी ता मालगुजारी वसूली काम कियानोरा इनचार्ज, वरोर सेवादार सुडला क्लर्क किन कलियतान। वीर सब्बे तोर नाकिन, नन्ना इदिनकु मुन्ने बस्केने केंजवा मत्ता वेल्ले पोल्ल्लोंग वेहतोर। नाकिन पहली बेरा चीन जेलकुना खराब परिस्थिति ना बारे ते वेहतोरो ओरू वरोर साधारण जेलर मत्तोर। ओना संगे नावा मुलाकात हुनान प्रांगशान काउंटी ता जांच-पड़ताल कीयानास्के आता। शिंगक्वो काउंटी ओसो छांगकांग, छाएशी श्यांगो ता जांच-पड़ताल कीयानास्के नन्ना श्यांग ना स्तर ते काम कीयाना कामरेड्स ओसो साधारण किसान लोरकिन कलियातान। वीरू कार्यकर्ता, किसान, श्यूछाए, जेलर, व्यापारी ओसो मालगुजारी-क्लर्क सब्बेतोर नावा आदरणीय शिक्षक मत्तोर। ओरा छात्र लेक्का मंजी नाकिन ओरा बारे ते वेल्ले सम्मानजनक मेहनती ओसो कामरेड लोरा लेक्कटा रुझान लागू कियालागनादु। लेवेके ओरू नावा बगिल ध्यान हीवोर आसी मन्नेर ओसो जानकारी मत्तेकाई नाकिन वेहोर आसी मन्नेरा वेहतेकाई वेने ओरू पूरा जानकारी हिया परवोर आए। जांच-पड़ताल काजे वेल्ले बेहरा मीटिंग कीयाना जरूरत मन्नो आंता, मूंड, हेय्युंग, सात लेवेके आठ लोकुरा मीटिंग कित्तेके वेने हालिंता, इदे आयवा, माटु खुद वेने सवाल पूछेमायना, ओरू बद पोल्लो वेहिनोर अदिन नोट किसोर दायना, मीटिंग लोप्पा मत्ता लोकुरा संगे विचार-विमर्श किया लागिंता। अदिन काजे माटु बस्के एवनल सही जांच-पड़ताल किया परवोमो लेवेके बेस जांच-पड़ताल किया परवोम अस्के एवनल मना लोप्पा उत्साह (गिर्दा) पैदा आयो आंता। बस्के एवनल खुद ता नजर दोड़ तासना संकल्प पैदा आयो, ज्ञान दोरकी कीयाना इच्छा पैदा आयो ओसो बस्के एवनल माटु झुठा घमंड कीयाना बंद कीसि वरोर ज्ञान दोरकी कीयाना इच्छा तासना छात्र बनेमायोम अस्के एवनल इनपड़े जांच-पड़ताल किया परवोम। जनताए असली वीर मंदिंतोर इंदाना पोल्लो किन हमेशा सुरता तासिसी समझेमायना। इद पोल्लो किन समझेमायवा लेवा एकदम शुरुआती रकम ता ज्ञान वेने दोरकी कीयाना संभव मन्नो आंता।

नन्ना इंजे इद विषय किन प्रकाशित कीयाना मावा मुख्य उद्देश्य, निम्न स्तर ते मत्ता परिस्थितिग ना जांच-पड़ताल कियाला काजे उंदी तरीका वेहाना आंदु इंजी ओसो उंदी बेरा वेहिंताना इदिना उद्देश्य कामरेड्स विशिष्ट सामग्री लेक्का सुरता तासना, अदिनगडल निष्कर्ष तेंडनायो। साधारण रूप ते चीन ते पैदा आसोर मत्ता पूंजीपति वर्ग सामाजिक परिस्थितिग ना बारे ते इंजे एवनल बोरे वेने प्राथमिक सामग्री पेश किया परताद हिल्ले ओसो बस्केने किया परमूडायो वेने। योरोप, अमेरिका ओसो जापान ता पूंजीपति वर्ग कित्ता लेक्काने मंता, अदिन काजे मनगा सामाजिक परिस्थितिग ना बारे ते खुद सामग्री जमा कीयाना विड़चसी दूसरा बदे हरीं हिल्ले। मुख्य रूप ते व्यवहारिक काम कीयाना लोकर बदले मासोरे मत्ता परिस्थितिग ना जानकारी हमेशा दोरकी किसोर मंदाना। इद काम काजे बदे वेने देश ता कम्युनिस्ट पार्टी दुसरोरा पोरो निर्भर आसी मन्नो आंता। अदिन काजे, व्यवहारिक काम कीयाना हर मानेय दोड़ ता स्तर ते हंजी परिस्थितिग ना जांच-पड़ताल कीयाना। इद्रम ता जांच-पड़ताल कीयाना मुख्य रूप ते, सिद्धांत पुंजी मत्तेकाई वेने असली परिस्थिति किन पुनवा मत्तोर काजे जरूरी मंता, बारांकु इत्तेके ओरू सिद्धांत किन व्यवहार संगे जोड़े किया परवोर आंतोर। नावा “बिना जांच-पड़ताल कियवा बोनकिने वड़कना अधिकार हिल्ले” इंदा पोल्लो किन “संकीर्ण अनुभववाद” ता पोरोल हिसी मजाक उड़े कित्तोर, मति ओरा मजाक तले नेंड एवनल नावांग कोडेंग करवताद हिल्ले। नन्ना नेंड वेने पूरा जोर वाटसी वेहिंतान-बोरू जांच-पड़ताल कीवोर ओनकु वड़कना अधिकार बिल्कुले हिल्ले इंजी। वेल्लेटोर “सरकारी गाड़ी तल रेयतेकेने” कोलार कीयाना शुरू कींतोर, अंधाधुंध राय हियाना शुरू कींतोर, बोनाए पोरो वाद-विवाद कींतोर लेवेके बोनाए निंदा कीयाना शुरू कींतोर, मति असल इत्तेके इद्रम तोर सब्बे तोर किन असफलताए दोरकिंता। बारांकु इत्तेके बद विचार ओसो आलोचनांग पूरा जांच-पड़ताल पोरो आधार आसी हिल्लेंग अवु सिर्फ अंगडमता पोल्लेंगे मंदिंतांग। इद्रम हक्के-हक्के वेलियसोर मंदाना “शाही दूत” लोरा कारण ते मना पार्टी किन गिनती

हिल्वाचोन बेरा नुकसान एता लागिंता। स्तालिन वेहत्ता लेक्का, “सिद्धांत किन क्रांतिकारी व्यवहार संगे जोड़े कियवेके अद सिद्धांत ता उद्देश्य हिल्वा लेक्का आंता।” ओरू ओसो उंदी पोल्लो वेहितोर, “मना व्यवहार ता हर्ी क्रांतिकारी सैद्धांतिक रूप ते वेड़चते वायवेके, मना व्यवहार हीकट तेने लेसिसी वेलियसोर मंदिता।”³ दिशा-ज्ञान ओसो दूरदृष्टि तासवा लेवा मंदाना हीकट ते वेलियसोर मंदाना “व्यावहारिक मानेय” किन विड़चसी, बोराई मानेयना पोरो “संकीर्ण अनुभववाद” लेबल चिपके कीयानायो।

नेंडु वेने नावा हिसाब ते चीन ओसो दुनिया ता समस्या ना बारे ते पूरा छान-बीन कीयाना वेल्ले जरूरत मंत्ता। इदिना संबंध चीनी समस्यांग ओसो दुनिया ता समस्यांग ना बारे ते नावा कमजोर ज्ञान संगे मंत्ता। इतेके हर चीज ता बारे ते नन्नाए पुत्तान ओसो बाकी सब्बतोर पुन्नोर इंजी आयो। नन्ना छात्र (करियानोर) लेक्काने मंजी बाकी पार्टी-कामरेड्स ना संगे कलियसी जनता तल करियसोर मंदाना इंजी आल्लसंताना।

पिस्ता पोल्लोंग

19 अप्रैल 1941

10 साल ता गृहयुद्ध कालम ते दोरकी कित्ता अनुभव वर्तमान जापान आक्रमण विरोधी युद्ध कालम काजे वेल्ले काम वातांग। मति इदिना संबंध सिर्फ माटु बद्रम खुद किन जनता संगे काल्पना ओसो जनता किन दुश्मन खिलाफ गोलबंद कीयाना इंदानदिना संगेने मंत्ता, कार्यनीतिक कार्यदिशा संगे आयो। पार्टी ता वर्तमान कार्यनीतिक कार्यदिशा मुन्नेटा कार्यनीतिक कार्यदिशा तल सैद्धांतिक रूप ते अलग मंत्ता। मुन्ने, पार्टी ता कार्यनीतिक कार्यदिशा जर्मीदार ओसो प्रतिक्रांतिकारी पूंजीपति वर्ग ता विरोध कीयाना मत्ता। इंजे, जापान ता प्रतिरोध कीयाना ता खिलाफ हिल्वा मत्ता सब्बे जर्मीदार ओसो पूंजीपति वर्ग ता सदस्य लोरा संगे एकता कीयानादु मंत्ता। उंदी बगिल प्रतिक्रियावादी सरकार ओसो राजनीतिक पार्टिंग 10 साल ता गृहयुद्ध समाप्त आयनास्के वेने मना पोरो सशस्त्र आक्रमण किसोर मत्ता ओसो दूसरा बगिल मनाए शासन लोप्पा पूंजीवादी स्वरूप वाले सब्बे

सामाजिक समूह कुना पोरो अलग-अलग नीतिंग लागू कियवा मंदानदु गलत मत्ता। संगेने प्रतिक्रियावादी सरकार ओसो राजनीतिक पार्टी लोप्पा मंदाना अलग-अलग गुट कुना काजे अलग-अलग नीतिंग लागू कियवा मंदाना वेने गलत मत्ता। अद कालम ते किसान ओसो शहरी निम्न-पूंजीपति वर्ग ता दोड़ मत्ता समूह किन विड़चसी समाज ते सब्बे समूह पोरो (सिर्फ संघर्ष) ता नीति लागू कित्ताद मत्ता, इदु इत्तेके बदे डावुट हिल्ला गलत नीतिंग मत्ता। भूमि-नीति लोप्पा, 10 साल कुना गृहयुद्ध ता शुरू ते ओसो नडमा कालम⁴ ते जमींदार वेने खेती काम कीयाना, विस्थापन आतेके डाकु बनेमासी मेट्टाने हंजी सार्वजनिक व्यवस्था किन तहस-नहस कियानुर इंजी आल्लिससी किसान लोरा बराबरे जमींदार लोर किन वेने जमीन तूसला काजे लागू कित्ता सही नीति किन खंडन कीयाना वेने गलत मत्ता। पार्टी नीति इंजे “सिर्फ संघर्ष कीयाना एकता बिल्कुल कीयानायो” इंदाना नीति हिल्ले। “सिर्फ एकता कीयाना संघर्ष बिल्कुल कीयानायो” इंदाना नीति वेने हिल्ले। इंजेटा नीति 1927 ते छन तू-श्यूवाद मत्ता लेक्का आयवा जापान साम्राज्यवाद विरोधी सब्बे सामाजिक समूह ना संगे एकता कीयाना नीति मंता। इवु समूह संगे संयुक्त मोर्चा बने कियमूडंता मति वीरा लोप्पा दुलमुलपन ओसो प्रतिक्रियावाद ता खिलाफ-दुश्मन मुन्ने आत्मसमर्पण कीयाना ओसो कम्युनिस्ट पार्टी, जनता ना विरोध कीयाना रुझान कु मंदितांग। इव रुझान कु बोनाए लोप्पा कम मंदितांग अनि बोनाए लोप्पा ज्यादा मंदितांग, अदिन काजे इविना खिलाफ संघर्ष वेने अलग-अलग मात्रा तेने ताकी कीयाना। इद नीति “एकता” ओसो “संघर्ष” रेंडु कलियसी मंदिता। श्रम-नीति लोप्पा इदु उंदी बगिल मजदूर लोरा रहन-सहन ता स्तर किन पूर्ण रूप ते पोरो तेहना इंजी वेहिंता ओसो दूसरा बगिल पूंजीवादी अर्थव्यवस्था ता सही विकास किन नुकसान तल बचे कीयाना इंजी वेने वेहिंता। भूमि-नीति लोप्पा इदु उंदी बगिल जमींदार लोरगडल लगान ओसो सूद कम कीयाना इंजी वेहिंता अनि दूसरा बगिल किसान लोरगडल कम कित्ता लगान ओसो सूद निहतना इंजी वेने वेहिंता। राजनीतिक अधिकार कुना लोप्पा इदु जापान-विरोधी जमींदार ओसो पूंजीपतिर किन

वेने मजदूर ओसो किसान लोरा लेक्का व्यक्तिगत अधिकार, राजनीतिक अधिकार ओसो सम्पत्ति संबंध ते अधिकार हींता। मति संगेने वीर कीयाना प्रतिक्रांतिकारी कार्यवाहिंग किन रोमीह वेने कींता।

सरकारी ओसो सहकारी अर्थव्यवस्था ता विकास कीयाना, मति ग्रामीण आधार इलाकांग लोप्पा मुख्य आर्थिक व्यवस्था नेंडु सरकारी आयवा निजी व्यवस्था मंता। अर्थव्यवस्था ता गैर-इजारेदारी पूंजीवादी तत्व किन विकसित आयना मौका हियाना ओसो अदिन जापान साम्राज्यवाद अनि अर्ध-सामंती व्यवस्था ता खिलाफ इस्तेमाल कीयाना। नेंडु चीन काजे इदु सबसे ज्यादा क्रांतिकारी नीति आंदू, तीना विरोध कीयाना लेवेके अमल कीयाना लोप्पा बाधा वाटना गलत आया। पार्टी सदस्य लोरा कम्युनिस्ट शुद्धता किन वेल्ले गंभीरता ओसो दृढ़ता ते निल्पी कीसि तासना। सामाजिक अर्थव्यवस्था ता पूंजीवादी तत्व कुना फायदा मत्ता हिस्सा किन बचे कीयाना ओसो अदिन किन सही तरीका ते विकसित आयला हियाना। इव रेंडासी जापान आक्रमण विरोधी युद्ध कालम ते उंदी जनवादी गणराज्य ता निर्माण कीयानास्के मना काजे अनिवार्य कर्तव्यकु मंदितांग। इद कालम ते उचुन कम्युनिस्ट पूंजिपति वर्ग ता व्यवहार भ्रष्ट आया परिंता ओसो पार्टी-सदस्य लोरा नडमा पूंजीवादी विचारकु वायना शुरू आया परिंतांग, इद्रम ता परिस्थिति ते मनम इव विचार कुना खिलाफ संघर्ष कीयाना। मति मनम पार्टी लोप्पा पूंजीवादी विचारकुना खिलाफ कीयाना संघर्ष किन पुनवालेवाए सामाजिक अर्थव्यवस्था लोप्पा ओसी अर्थव्यवस्था ता पूंजीवादी तत्व कुना विरोध कीयानायो। मनम रेंडासी ना नडमा उंदी स्पष्ट विभाजन-रेखा पिडंगना। चीनी कम्युनिस्ट पार्टी उंदी जटिल वात्तावरण लोप्पा काम किया मंता। इद्रम ता परिस्थिति ते हर पार्टी सदस्य ओसो विशेषकर हर कार्यकर्ताल तन्ना किन मार्क्सवादी कार्यनीति तुन बेस समझेमायना लेक्काटा योद्दाल बने कीयाना। समस्यांग ना बारे ते उंदी बगिल तल ओसो वेल्ले सरलता ता रुझान बस्के वेने क्रांति किन जीडिह कीयाना बगिल ओया परवो आंता।

नोट

1. 7 जुलाई 1940 ता केंद्रीय कमेटी ता निर्देश “चीनी कम्युनिस्ट पार्टी ता केंद्रीय कमेटी वर्तमान परिस्थिति ओसो पार्टी नीति बारे ते निर्णय” आंदू 25 दिसम्बर 1940 ता केंद्रीय कमेटी निर्देश “माओ त्सेतुंग ना संकलित रचनांग”, ग्रंथ-2 लोप्पा मत्ता “नीति ना बारे ते” पोरोल ता लेख आंदू।
2. श्यछाए पाड़ना चीन लोप्पा शाही परीक्षांग लोप्पा सबसे दोड़ ता डिग्री दोरकी कीयाना मानेय मत्तोरा।
3. जे. वी. स्टालिन, “लेनिनवाद ता आधारभूत सिद्धांत” ता तीसरा भाग लोप्पा मत्ता।
4. 10 साल ता गृहयुद्ध ता शुरूआत 1927 आखरी तल 1928 आखरी एवनल मत्ता, इदिन साधारण रूप ते चिंगकांगशान कालम इंजी इंतोरा नडमा कालम 1929 शुरूआत तल 1931 इरंगम कालम एवनल मत्ता, इत्तेके केंद्रीय लाल आधार-इलाका ता स्थापना कीयानास्केटल “घेराव कीयाना ओसो विनाश कीयाना” अभियान ता खिलाफ तीसरा जवाबी अभियान सफलतापूर्वक समाप्त आयना जोमः ओसो आखरी कालम 1931 आखरी दिव्यानल 1934 आखरी दिव्यंग एवनल इत्तेके तीसरा जवाबी अभियान ता सफलता पूर्वक समाप्त आयनास्केटल पोयसी पार्टी ता केंद्रीय कमेटी ता क्वेइचओ इलाका लोप्पटा चुनई पोरोल ता जागा ते केयता राजनीतिक ब्यूरो ता विस्तृत मीटिंग एवनल मत्ता। जनवरी 1935 लोप्पा आता चुनई मीटिंग (1931 तल 1934 एवनल ताकता) पार्टी लोप्पा “वामपंथी” अवसरवादी कार्यदिशा ता प्रभुत्व किन खत्म कित्ता अनि पार्टी लोप्पा ओसो उंदी बेरा सही कार्यदिशा ता स्थापना कित्ता।

व्यक्तिगत अध्ययन लोप्पा सुधार किमूटश

मई 1941

इदु कामरेड माओ ना येनान लोप्पा कार्यकर्ता लोरा संगे कित्ता मीटिंग लोप्पा पेश कित्ता रिपोर्ट आंदू। इद रिपोर्ट ओसो “पार्टी ता कार्यशैली लोप्पा सुधार कीमुट” ओसो “घिसेपिटे पार्टी-लेख कुना विरोध कीमुट” हेडिंग मत्ता रेंडु लेख दोष-निवारण आंदोलन ता बारे ते कामरेड माओ त्सेतुंग ना बुनियादी रचनांग आंदुंग। इव रचनांग लोप्पा कामरेड माओ त्सेतुंग मुन्ने हंजी विचारधारात्मक स्तर ते पार्टी ता कार्यदिशा ता बारे ते हत्ता कालम लोप्पा पार्टी लोप्पा मत्ता मतभेद कुना निचोड़ तेंडतोर अनि मार्क्सवाद-लेनिनवाद नकाब वाटसी पार्टी लोप्पा फैलेमासी मत्ता निम्न-पूँजीपति वर्ग ता विचारधारा ता कार्यशैली ता विश्लेषण कित्तोर। इदु मुख्य रूप ते मनोगतवादी ओसो संकीर्णतावादी रुझान लोप्पा दिसिंता अनि इव रेंडासी रुझानकुन तोहना तरीका घिसापिटा-लेखन मत्ता। मार्क्सवाद-लेनिनवाद ता विचाराधारात्मक उसूल कुना रूप ते कार्यशैली लोप्पा सुधार कियाला काजे कामरेड माओ त्सेतुंग मार्क्सवाद-लेनिनवादी शिक्षा ता पूरा पार्टी-व्यापी आंदोलन ताकी कीयाना आह्वान कित्तोर। ओना आह्वान ता कारण ते पार्टी लोप्पा ओसो बाहर सर्वहारा विचारधारा ओसो निम्न-पूँजीपति वर्ग ता विचारधारा नडमा तुरंत उंदी बेहरा वाद-विवाद शुरू आतु। अद्रमासी पार्टी लोप्पा ओसो बाहर सर्वहारा विचारधारा ता परिस्थिति सुदृढ़ आता ओसो कार्यकर्ता लोरा व्यापक पांत विचारधारा ता दृष्टि संगे ओसो उंदी डाका मुन्ने वाटतोर अनि पार्टी ता एकता उंदी अभूतपूर्व स्तर ते एवता।

मनम मना पूरा पार्टी लोप्पा अध्ययन ता तरीका ओसो अध्ययन प्रणाली लोप्पा सुधार कीयाना इंजी नावा विचार मंता। इदिना कारण दोड़ रास्ता लेक्का मंता:

1. चीनी कम्युनिस्ट पार्टी ता 20 साल कुना लोप्पा मार्क्सवाद-लेनिनवाद ता आम सच्चाई किन चीनी क्रांति ता ठोस व्यवहार संगे परताचोन काल्पताद मंता। मनम मना पार्टी शुरूआत ते मार्क्सवाद-लेनिनवाद ओसो चीनी क्रांति ता बारे ते मना समझदारी बचोन मत्ता इंदानदु हूडतेके माटु मुन्ने तुकु नेंडु बचोनो गहरा ओसो भरपूर समझदारी मत्तादु हूडितोमा संकट ते मत्ता चीनी राष्ट्र ता वेल्ले श्रेष्ठ

पेकोर देश ओसो जनता ना सेवा किया परना लेक्कटा सच्चाई ता खोज ते सौ साल एवनल संघर्ष कीसि तम्मा जीवा ना बलिदान हितोर, शहीद आतोरा जागा ते पूना-पूना लोकुर वासी मुन्ने-मुन्ने हतोर। इद पोल्लो तल माटु प्रभावित आंतोम, इद पोल्लो तल माटु खुश वेने आंतोम ओसो दुखी वेने आंतोम। मति सबसे बेहरा सच्चाई ओरू तम्मा राष्ट्र किन मुक्त कियाला काजे सबसे बेसता हथियार ता रूप ते मार्क्सवाद-लेनिनवाद ता बारे ते पहली विश्वयुद्ध ओसो रूस ता अक्तूबर क्रांति पेके पुत्तोर। चीनी कम्युनिस्ट पार्टी इद हथियार ता इस्तेमाल कीयाना लोप्पा उंदी प्रवर्तक, प्रचारक ओसो संगठनकर्ता बनेमाता। चीनी क्रांति ता ठोस व्यवहार ता सम्पर्क ते वासी मार्क्सवाद-लेनिनवाद ता सर्वव्यापी सच्चाई चीनी क्रांति किन एकदम पूना रंग ते रंगे कित्ता। जापान आक्रमण विरोधी युद्ध ता शुरुआत तले मना पार्टी मार्क्सवाद-लेनिनवाद किन व्यापक सच्चाई ता आधार बने कीसि मत्ता अनि युद्ध ता ठोस व्यवहार ता बारे ते, नेटा चीन ओसो विश्व ता बारे ते तम्मा अध्ययन किन बेरसी किसोरे चीनी इतिहास ता अध्ययन वेने शुरु कित्ता। इव सब्बे वेल्ले बेसता लक्षणकु आंदुंगा।

2. मति मना लोप्पा इंजे वेने वेल्ले बेहरांग कमजोरिंग मंतांगा। नावा हिसाब ते बस्के एवनल इव कमजोरिंग किन दूर किवोम अस्के एवनल मना काम ओसो मार्क्सवाद-लेनिनवाद ता व्यापाक सच्चाई किन चीनी क्रांति ता ठोस व्यवहार संगे काल्पना मना महान कार्तव्य मुन्ने दाया परवो आयारा।

मुन्ने, वर्तमान परिस्थिति ता अध्ययन सवाल किन पोय्यटु। वर्तमान स्थानीय ओसो अंतरराष्ट्रीय परिस्थिति ना बारे ते मना अध्ययन लोप्पा माटु उचुन सफलता जरूर दोरकी कीतोम, मति अविना हर पहलू ता बारे ते इत्तेके राजनीतिक, सैनिक, आर्थिक लेवेके सांस्कृतिक पहलू मत्तेकाई वेने मना लेक्कटा बेहरा राजनीतिक पार्टी काजे बद सामग्री जमा कित्ताद मंता अदु आंशिके मंदिमता ओसो बद खोज कार्य माटु कित्ताद मंता, अदु

तितर-बितर आसी मंदिता। साधारण रूप ते इव पहलु ना बारे ते जानकारी जमा कीयाना ओसो अध्ययन कीयाना दिशा ते माटु हत्ता 20 साल लोप्पा सही ओसो गंभीरता ते काम कित्ताद हिल्ले। वास्तविक परिस्थिति ता जांच-पडताल कीयाना ओसो अदिन अध्ययन कीयाना वात्तावरण मना लोप्पा कम मत्ता। “कोंडा ते पट्टी दोहची पिट्टेंग पोय्यना मानेय” ना लेक्का लेवेके “कीकेंग मेर्सकनोरा” लेक्का व्यवहार कीयाना, अंगडम ओसो लापरवाही ते काम कीयाना लेक्का आंता। अंगडम ता पोल्लोंग इस्तेमाल किसोर मंदाना सिर्फ पोरो-पोरो टा ज्ञान तिंची खुश आयना लेक्का आंता। मना पार्टी ता बचोनो कामरेड्स इंजे वेने लागू किसोर मत्ता कार्यशैली वेल्ले खराब कार्यशैली मंता। इदु मार्क्सवाद-लेनिनवाद ता बुनियादी भावना ता बिल्कुल विरुद्ध मंता। मार्क्स, एंगेल्स, लेनिन ओसो स्टालिन मनाकिन परिस्थितिग ना गंभीरता ते अध्ययन कीयाना ओसो मनोगतवाद किन आयवा ठोस वास्तविकता किन आधार बने कीयाना जरूरी मंता इंजी करिहतोर। मति मना बचोनो कामरेड्स इद सच्चाई ता सीधा-सीधा उल्लंघन कीसि काम कींतोर।

दूसरा, इतिहास ता अध्ययन ता सवाल मंता। उचुन पार्टी सदस्य लोर ओसो समर्थक लोर इद काम ता शुरूआत कीतेकाई इदिना नेतृत्व सुसंगठित (सही) तरीका ते कित्ताद हिल्ले। चीन ता इतिहास ता बारे ते, इत्तेके हत्ता नूर साल कुना इतिहास आई लेवेके पाडना कालम ता इतिहास मत्तेकाई बचोनो पार्टी सदस्य लोर इंजे वेने पुत्ताद हिल्ले। बचोनो मार्क्सवादी-लेनिनवादी विद्वान प्राचीन यूनान ता पोरोल एतवा लेवा उंदी वेने पोल्लो वडका परबोर आंतोर। मति खुद ओरा पुरका नोरा बारे ते ओर इनपडे मरगंताद मंता इंजी वेल्ले दुक्कम पोय्या मंता। वर्तमान परिस्थिति ता लेवेके भूतकालीन इतिहास ता गंभीर रूप ते अध्ययन कीयाना वात्तावरण मना कामरेड्स लोप्पा वेल्ले कम मंता।

तीसरा, अंतरराष्ट्रीय क्रांतिकारी अनुभव, मार्क्सवाद-लेनिनवाद नालुंग बगिल फैले मासी मत्ता सच्चाई ता अध्ययन कीयाना सवाल मंता। बचोनो कामरेड्स मार्क्सवाद-लेनिनवाद ता अध्ययन क्रांतिकारी व्यवहार ता

जरूरत किन पूरा कियाला काजे आयवा सिर्फ अध्ययन कियाला काजे कींतोर। अद्रमासी ओरू अदिन पढाई तो कींतोर मति अदिन हजम किया परवोर आंतोर। ओरू मार्क्स, एंगेल्स, लेनिन ओसो स्टालिन ना रेंडु-मूंड उद्धरण कुना एकतरफा तरीका ते ने रासा परितोर। चीन ता वर्तमान परिस्थिति ओसो अदिना इतिहास ता ठोस विश्लेषण कीयाना अनि हल कियाला काजे मार्क्स, एंगेल्स, लेनिन ओसो स्टालिन ना दृष्टिकोण ओसो तरीका किन लागू किया परवोर आंतोर। मार्क्सवाद-लेनिनवाद ता बारे ते इद्रम ता रुझान लागू कीयाना वेल्ले नुकसानदायक मंदिता। खासकर मध्यम ओसो उच्च स्तर ता कार्यकर्ता लोरा काजे इत्तेके इदु वेल्ले नुकसानदायक मंता।

इव मूंड पहलुंग वर्तमान परिस्थिति, इतिहास ओसो मार्क्सवाद-लेनिनवाद किन लागू कीयाना लोप्पा नजरअंदाज कीयाना सबसे खराब कार्यशैली ता अंग आंदू। इद कार्यशैली ता प्रचार मना बचोनो कामरेड्स किन नुकसान कित्ता।

मना लाईन लोप्पा इद कार्यशैली कारण ते हरीं लेसता कामरेड्स निज्जमे मंतोरे। ओरू तम्मा देश, प्रांत, काउंटी लेवेके जिला लोप्पा ओसो बाहर ता ठोस परिस्थितिंग ना सही ओसो गंभीरता ते जांच-पड़ताल ओसो अध्ययन कियाला तैयार मन्नोर आंतोर। ओरू सिर्फ आदेश हीसोर मंदितोर, इदिना कारण ओरा लोप्पा मत्ता वेल्ले कम ज्ञान ओसो कम समझदारी आयवा दूसरा बातल मन्नो आंता “इदु पोल्लो नाकिन इद्रमे दिसिंता अदिन काजे इद्रमे मंदाना इंजी” इत्ता लेक्का मंता। इदु मनोगतवादी कार्यशैली मना बचोनो कामरेड्स लोप्पा इंजे वेने हिल्ले या?

मना इतिहास ता बारे ते उचुन वेने जानकारी तासवा लेक्काटा लेवेके वेल्ले कम जानकारी मत्तांकु लज्जा हिल्ला लेक्का गर्व कीयाना लेक्का कामरेड्स वेने मंतोर। विशेष रूप ते चीनी कम्युनिस्ट पार्टी ता इतिहास ओसो अफीम युद्ध पेरकेटा नूर साल कुना चीन ता इतिहास किन पुंदानोर वेल्ले कम मंतोर। हत्ता नूर साल कुना आर्थिक, राजनीतिक, सैनिक ओसो सांस्कृतिक इतिहास ता अध्ययन किन गंभीरतापूर्वक कैदे पोयताद हिल्ला

लेक्का मंता। उचुन मुल खुद तम्मा देश ता बारे ते पुनवालेवा सिर्फ प्राचीन यूनान ओसो दूसरा देशकुना कहानिंग केंजी किया परितोर। ओरा इद ज्ञान वेने वेल्ले जीवा नोयना लेक्का मंदिता, बारांकु इत्तेके तीना लोप्पा पाड़ना विदेशी पुस्तक कुना उश्टाए मंदिता।

बचोनो दशाब्दिंग एवनल विदेशी शिक्षा एतसी स्वदेश मलना विद्यार्थीर इद बीमारी ता शिकार आया मंतोर। योरोप अमरीका लेवेके जापान तल शिक्षा एतसी स्वदेश वातेके सिर्फ विदेशी पोल्लोंगे कियमूड़ंता मिट्टू लेक्का। ओरू ग्रामोफोन (उंदि रकम ता स्पीकर) लेक्का बनेमांतोर अनि पूना चीजकुन समझेमायना, अविना सृजन कीयाना तम्मा कर्तव्य किन मरंगितोर। इदु बीमारी कम्युनिस्ट पार्टी लोप्पा वेने फैलेमातादु मंता।

मनम मार्क्सवाद ता अध्ययन कींतोम, मति मना लोप्पाटल वेल्लेटोरा अध्ययन कीयाना तरीका सीधा मार्क्सवाद तुकू उल्टा मंदिता। इत्तेके मार्क्स एंगेल्स, लेनिन ओसो स्टालिन लोर मना किन वेल्ले गंभीरता ते वेहता उंदी बुनियादी नियम सिद्धांत ओसो व्यवहार ता एकता किन उल्लंघन कींतोर। इद नियम ता उल्लंघन कीसि ओरू खुद तम्मा उंदी विपरीत नियम, इत्तेके सिद्धांत किन व्यवहार तल अलग कीयाना नियम किन बने कींतोर। विद्यार्थीर ओसो काम कीयाना कार्यकर्ता लोर किन शिक्षित कीयाना लोप्पा दर्शनशास्त्र ता शिक्षक चीनी क्रांति ता तर्क अध्ययन कियाला काजे विद्यार्थीरा मार्गदर्शन किवोर आंतोर। अर्थशास्त्र ता शिक्षक चीनी अर्थव्यवस्था ता विशेषतांग कुना अध्ययन कियाला काजे ओरा मार्गदर्शन किवोर आंतोर। राजनीतिक-विज्ञान ता शिक्षक लोर चीनी क्रांति ता कार्यनीतिंग ना अध्ययन कियाला काजे ओरा मार्गदर्शन किवोर, सैन्य-विज्ञान ता शिक्षक लोर चीन ता ठोस विशेषतांग ना अनुसार रणनीति ओसो कार्यनीति ता अध्ययन काजे ओरा मार्गदर्शन किवोर आंतोर। अद्रमासी गलतिंग फैलेमासोरे दांतांग अनि लोकुर किन वेल्ले नुकसान एता लागिंता। येनान लोप्पा करियता पोल्लोंग फूश्येन¹ लोप्पा बद्रम लागू कीयाना इंजी पुनवा मत्ता मानेय वेने मंदिंतोर। अर्थशास्त्र ता प्रोफेसर (शिक्षक) हंदी इलाका ता मुद्रा ओसो क्वोमिंगतांग-मुद्रा ता आपसी

संबंध² किन समझेमाया परवोर आंतोर। अदिन काजे विद्यार्थिरे वेने इदिन समझेमाया परवोर आंतोर इंदाना पोल्लो साधारणे मंता। इद्रमे बचोने विद्यार्थिंरा लोप्पा उंदी गलत मनोभावना पुट्टतादु मंता: चीन ता समस्यांग ना बारे ते ध्यान हियाना ओसो पार्टी ता आदेश कुना पोरों गंभीरतापूर्वक अमल कीयाना विडचसी ओरू तम्मा शिक्षक लोरगडल करियता दीर्घकालीन ओसो अपरिवर्तनशील कठमुल्ला-सूत्र संगे ने टुंडसी मंदितोर।

बदे डारुट हिल्ला, नन्ना इंजे वेहत्ता पोल्लोंग मना पार्टी लोप्पा मत्ता वेल्ले खराब उदाहरणकु आंदुंग, ओसो इवु मना पार्टी लोप्पा व्यापक रूप ते मंतांग इंजी इन्नोने। मति इद्रम तोर पक्काए मंतोर: इदिन वेने ज्यादा, ओरू वेल्ले बेहरा संख्या ते मत्तांकु ओरगडल वेल्ले बेहरा नुकसान तेहा लागिंता। अदिन काजे माटु इदु समस्या किन हल कियाला वेल्ले सख्त रुझान लागू कीयाना।

3. इद विचार किन स्पष्ट कियाला काजे नन्ना रेंडु विपरित रुझान कुना तुलना कियाला आल्सा मंता।

पहला रुझान मनोगतवादी रुझान मंता।

इद रुझान किन लागू कियानोर वात्तावरण ता सही ओसो गंभीरता ते अध्ययन कियवा लेवा मनोगत भावना ते वासी काम कींतोर। ओरा दिमाग ते नेटा चीन ता परिस्थिति स्पष्ट मन्नो आंता। इद रुझान किन लागू कीसि ओरू इतिहास किन अलग-अलग टुकड़ांग कींतोर। ओरू सिर्फ प्राचीन येनान ता बारे तेने पुंजी मंदितोर, चीन ता बारे ते बिल्कुले पुनवा मंदितोर। ओरू निन्ने (हत्ता दिथ्या) ओसो मन्ने दिया ता चीन ता बारे ते पुनवा लेवा हीकट ते मत्ता लेक्का मंदितोर। इद रुझान किन लागू कियानोर भावनात्मक रूप ते ओसो उद्देश्यहीन आसी मार्क्सवाद-लेनिनवादी सिद्धांत ता अध्ययन कींतोर। ओरू मार्क्स, एंगेल्स, लेनिन ओसो स्टालिन ना सिद्धांत कुना अध्ययन ओरा दृष्टिकोण ओसो ओरा तरीकांग परहकला काजे अध्ययन कीवोर आंतोर। इत्तेके चीनी क्रांति ता सैद्धांतिक ओसो कार्यनीतिक समस्यांग किन हल कियाला काजे मदद आयना लेक्का आयवा सिर्फ सिद्धांत काजे सिद्धांत ता अध्ययन कींतोर। ओरू टार्गेट

वाटसी काड़ी एस्सवा लेवा टार्गेट हिल्वाए काड़ी एस्संतोरा। मार्क्स, एंगेल्स, लेनिन ओसो स्टालिन लोर मना किन भौतिक सच्चाई किन आधार बने कीसि मना कार्यवाही ता मार्गदर्शन किया परना लेक्कटा नियमकु बने कियाला करिहंतोरा। इद उद्देश्य काजे, मार्क्स वेहत्ता लेक्का मनम जानकारी किन विस्तार ते कैदे पोयना ओसो अदिना वैज्ञानिक विश्लेषण, संश्लेषणात्मक अध्ययन कीयाना।³ मना बचोनो लोकर इद तरीका ते काम कियवा लेवा अदिना उल्टा काम कींतोरा। ताना लोप्पाटल वेल्ले लोकर जांच-पड़ताल काम किया मंतोर मति नेटा चीन लेवेके पाड़ना कालम ता चीन ता अध्ययन कीयाना ता बारे ते ध्यान हियवा लेवा ओरू वास्तविकता संगे संबंध हिल्वा पोल्ले लेक्काटा “सिद्धांत” कुना अध्ययन कीयाना पोरो ध्यान हींतोरा। वेल्ले लोकर व्यवहारिक काम ते मंतोर, मति ओरू वेने वास्तविक परिस्थितिंग ना अध्ययन कीयाना बगिल ध्यान हियवा लेवा इमोशनली (भावावेश) ते वासी काम कींतोर ओसो नीति ना जागा ते तम्मा व्यक्तिगत भावनांग किन प्रतिष्ठित कींतोरा। वीरु रेंडु रकम ता लोकर मनोगत तत्व पोरो निर्भर मंदितोर ओसो भौतिक सच्चाई ता अस्तित्व किन नजरअंदाज कीसिंतोरा। भाषण हियानास्के हेडिंग कुना लंबा लाईन क, ख, ग, घ, 1, 2, 3, 4, ता इस्तेमाल कींतोर ओसो लेख रासनास्के लंबा-चौड़ा पोल्लोग कींतोर। ओरा लोप्पा तथ्य कुना संगे सत्य ता खोज कीयाना विचार मन्नो आंता ओरू सिर्फ होशियारी ते वाहवाही लूटे कीयाना विचार तासिंतोरा। ओरू उंदी मांजना चीज लेक्का मत्तेकाई वेने निज्जम मन्नोर, सख्त मत्तेकाई वेने मजबूत मन्नोर आंतोर। ओरू तम्माकिन हमेशा सही समझेमांतोर, ओरू तम्मा किन दुनिया लोप्पा सबसे ऊंचा दर्जा ता विद्वान ओसो हर जागा ते दखल हियाना वरोर “शाही दूत” लेक्का समझेमांतोर। मना लाईन लोप्पा उचुन कामरेड्स कुना कार्यशैली इद्रमे मंता। इद कार्यशैली संगे तम्मा व्यवहार निर्धारित कीयाना इत्तेके ओरकिन नुकसान कीयाना आंता। इदिन किन दूसरो किन करिहना इत्तेके ओरकिन नुकसान कीयाना आंता। इदिन क्रांति ता निर्देशन कियाला काजे इस्तेमाल कीयाना इत्तेकेने क्रांति किन नुकसान कीयाना आंता। संक्षिप्त रूप

ते विज्ञान ओसो मार्क्सवाद-लेनिनवाद ता विरुद्ध मत्ता मनोगतवाद तरीका कम्युनिस्ट पार्टी ता उंदी बेहरा दुश्मन आंदू। मजदूर वर्ग ता दुश्मन आंदू, जनता ओसो मना राष्ट्र ता बेहरा दुश्मन आंदू, इदु पार्टी-भावना लोप्पा अशुद्धता किने तोहिंता। मना मुन्ने बेहरा दुश्मन नितसी मंतोर मनम अदिन किन तेहकसी वाटना। मनोगतवाद किन तेहकसी वाटतास्केने मार्क्सवाद-लेनिनवाद ता सत्य किन प्रतिष्ठित किया परमूड़ायर। अस्केने पार्टी-भावना किन सुदृढ़ बने किया परमूड़ायर, अस्के ने क्रांति जीड़ी किया परमूड़ायार। वैज्ञानिक दृष्टिकोण ता कमी इत्तेके सिद्धांत ओसो व्यवहार किन कल्पना मार्क्सवादी-लेनिनवादी दृष्टिकोण ता कमी इत्तेकेने मना लोप्पा पार्टी-भावना बिल्कुले हिल्ले लेवेके वेल्ले कमजोर मंता इंजी आंता।

इद्रम ता मानेय ना बारे ते उंदी कविता ते चित्रण किताद मंता, दोड़ रास्ता लेक्का मंता:

भीति पोरो मोड़ियना मरा

पोरोटल भारी-भरकम

मति मोदोल कमजोर, हीरकु पीरी लेक्कावु,

मेड्डा पोरो मोड़ियना हीद-गड्डा ता करकु

तेज-कोथ्ये, मोटा तोला वाले,

मति लोप्पाटल खाली खोका लेक्कवु।

इद कविता, वैज्ञानिक दृष्टिकोण ता कमी मंदानोर किन चिन्हित कींता। इद्रम तोर सिर्फ मार्क्स, एंगेल्स, लेनिन ओसो स्टालिन ना रचनांग ना उचुक शब्द ओसो वाक्य किन रटे कींतोर अनि वास्तविक ज्ञान बेसे दोरकी कीसि मत्ता लेक्का व्यवहार कींतोर। इद्रम आतेके वेने वीरकिन सम्मानता दोरकसी मंदिता। बोराई असल ते इद बीमारी ता इलाज कियाला आल्सिंतोर इत्तेके नन्ना ओनकिन इद कविता किन सुरता तासना सलाह हियाकान ओसो ज्यादा साहास तोहना जरूरत मत्तेके इदिन किन तन्ना कोली ता भीति ते चिपके कीयाना इंजी वेहिंतान। मार्क्सवाद-लेनिनवाद उंदी विज्ञान आंदू, विज्ञान इत्तेके इमानदारी ते दोरकी किता ठोस ज्ञान, तीना

लोप्पा चालबाजी कित्ताद हिल्ले। अदिन काजे वाटु मनम इमानदार बनेमायकाल।

दूसरा रुझान मार्क्सवादी-लेनिनवादी रुझान आंदू।

इद रुझान किन लागू कियानोर वात्तावरण ता सही ओसो गंभीरता ते जांच-पड़ताल ओसो अध्ययन कियाला काजे मार्क्सवादी-लेनिनवादी सिद्धांत ओसो तरीका किन लागू कींतोर। ओरू सिर्फ जोश ते वासी काम कियवा लेवा स्टालिन वेहत्ता लेक्का क्रांतिकारी उत्साह ओसो व्यवहारिकता ता समन्वय वेने कींतोर।⁴ इद रुझान किन लागू कीसि ओरू इतिहास किन अलग-अलग हिस्सांग ने तूसिंतोर। ओरा काजे सिर्फ प्राचीन यूनान ता जानकारी दोरकी कीयानाए हालता लेक्का मन्नो आंता, ओरा काजे चीन ता जानकारी वेने दोरकी कीयाना जरूरी मंदिता। ओरू सिर्फ विदेशी क्रांतिकारी इतिहास ता जानकारीए आयवा चीन ता क्रांतिकारी इतिहास ता जानकारी वेने दोरकी कीयाना। सिर्फ नेटा चीन ताए आयवा निन्नेटा ओसो मन्ने दिया ता चीन ता जानकारी वेने दोरकी कियाला आल्सिंतोर। इद रुझान किन लागू कियानोर उंदी निश्चित उद्देश्य काजे इत्तेके चीनी क्रांति ता वास्तविक आंदोलन संगे मार्क्सवाद-लेनिनवाद ता सिद्धांत किन काल्पला काजे ओसो इद सिद्धांत संगे चीनी क्रांति ता सैद्धांतिक ओसो कार्यनीतिक समस्यांग किन हल कियाला सहायता कीयाना दृष्टिकोण ओसो तरीका ता खोज कियाला काजे मार्क्सवाद-लेनिनवाद ता अध्ययन कींतोर। इद रुझान टार्गेट वाटसी काड़ी एस्सना रुझान आंदू। मना “टार्गेट” चीनी क्रांति ओसो मना “काड़ी” मार्क्सवाद-लेनिनवाद आंदू। माटु चीनी कम्युनिस्ट लोरोम इद काड़ी ता खोज चीनी क्रांति ता टार्गेट ओसो पूर्व ता क्रांति किन टार्गेट कीसि आरपार कियाला काजे किया मंतोम। इद्रम ता रुझान लागू कीयाना इत्तेके तथ्य कुना संगे सत्य ता खोज कीयाना आंता। “तथ्य” कुना लोप्पा कोंडा मुन्ने दिस्सना सब्बे चीजकु शामिल मंतांग, “सत्य” इत्तेके अविना लोप्पाटा संबंध इत्तेके अविन ताकी कीयाना नियम। ओसो “तलाश कीयाना” इत्तेके अध्ययन कीयाना आंता। मना देश, प्रांत, काउंटी लेवेके जिला लोप्पा ओसो बाहर मत्ता वास्तविक

स्थितिं किन आधार बने कीसि माटु मना काम ता मार्गदर्शन कीयाना नियमकु बने कीयाना, इव नियमकु काल्पनिक आयवा वास्तविकता परिस्थिति पोरो आधार आसी मंदाना, इत्तेके मनम मना नालुंग बगिल आयना घटनांग कुना अंदरूनी संबंध कुना खोज कीयाना। इद्रम कियाला काजे मनोगत कल्पना पोरो आधार आसी मंदानायो। उचुन उत्साह पोरो आधार आसी मंदानायो, जीवा हिल्वा लेक्काटा पुस्तकिंग पोरो आधार आसी मंदानायो। इद्रम ता खोज कियाला काजे भौतिक रूप ते अस्तित्व ते मत्ता तथ्य कुना पोरो आधार आसी मंदाना। मनम जानकारी किन विस्तार ते मना कैदे पोयना अनि मार्क्सवाद-लेनिनवाद ता आम नियम कुना मार्गदर्शन ते अदिनगडल सही निष्कर्ष तेंडना। इद्रम कित्ता निष्कर्ष क, ख, ग, घ क्रम ते मत्ता घटनांग ना पोरोल तुके लिस्ट बने कित्ता लेक्का लेवेके अंगडम ता पोल्लोंग संगे निंडसी मत्ता लेख लेक्का आयवा वैज्ञानिक निष्कर्ष मंदितांग। इद्रम ता रुझान तथ्य कुना संगे सत्य ता खोज कीयाना रुझान आंदु, होशियारी ते वाहवाही लूटे कीयाना रुझान आयो। इदु पार्टी-भावना किन तोहिंता, सिद्धांत ओसो व्यवहार किन काल्पना मार्क्सवादी-लेनिनवादी कार्यशैली किन तोहिंता। कम्युनिस्ट पार्टी ता हर सदस्य इद रुझान किन जरूर लागू कीयाना। बोरु इद रुझान किन लागू कींतोर ओरू “पोरो-पोरो बेहरा मति कमजोर मोदोल ओसो पीरी लेक्काट्टा हीरकु” लेक्काट्टोर मन्नोर आंतोर ओसो ओरू “तेज-कोय्ये, मोटा तोला वाले, मति लोप्पाटल खाली” वेने मन्नोर आंतोर।

4. पोरो वेहत्ता विचार कुना अनुसार नन्ना इव सुझावकु पेश किया मंतानः

1. मना नालुंग बगिल ता परिस्थिति किन सही ओसो गंभीरता ते अध्ययन कीयाना कार्य किन मनम पूरा पार्टी मुन्ने तासना। मार्क्सवाद-लेनिनवाद ता सिद्धांत ओसो तरीकांग पोरो आधार आसी दुश्मन ता, मना दोस्त लोरा ओसो खुद ता आर्थिक, वित्तीय, राजनीतिक, सैनिक, सांस्कृतिक ओसो पार्टी कामकाज ता विकास ता विस्तार ते जांच-पड़ताल ओसो अध्ययन कीयाना। ताना पेरके सही ओसो

जरूरी निष्कर्ष तेंडना। इद उद्देश्य किन पूरा कियाला काजे माटु मना कामरेड्स ना ध्यान इव व्यवहारिक समस्यांग कुना जांच-पड़ताल कियाला ओसो अविना अध्ययन कीयाना बगिल पिडंगना। मना कामरेड्स परिस्थिति ता बारे ते जानकारी दोरकी कीयाना ओसो नीति लोप्पा निपुण बनेमायना कम्युनिस्ट पार्टी ता नेतृत्वकारी संगठन कुना दोहरा बुनियादी कर्तव्य आंदू इंजी समझे कीसियाना, मुन्ने दुनिया किन पुंदाना ताना पेरके दुनिया किन बदले कीयाना। मनम मना कामरेड्स किन बिना जांच-पड़ताल कियवा लेवा बोन किने वेने वड़कना अधिकार हिल्ले ओसो लम्बा-चौड़ा पोल्लोंग कीयाना ओसो क, ख, ग, घ क्रम ते घटनांग ना लिस्ट पेश कीयानादु बदे काम ताद हिल्ले इंजी वेने समझे कीयाना। उदाहरण तुकु प्रचार-काम किने हूडाटु: मनम मना दुश्मन ता, मना दोस्त लोरा ओसो खुद ता प्रचार परिस्थितिंग ना बारे ते पुनवेके माटु मना काजे उंदी सही प्रचार-नीति बने किया परवोम आंतोम। बदे वेने विभाग लोप्पा काम कियाला काजे मुन्ने अगाटा परिस्थिति ता बारे ते पुंदाना जरूरी मंदिता, अस्के अद कर्तव्य किन सही तरीका ते पूरा कियमूडंता। जांच-पड़ताल ओसो अध्ययन कीयाना योजनांग किन पूरा पार्टी लोप्पा लागू कीयाना पार्टी कार्यशैली किन बदले कीयाना बुनियादी कड़ी आंदू।

2. चीन ता नूर साल कुना इतिहास किन हूडतेके मनम इदिना अध्ययन कियाला काजे आपसी सहयोग ओसो सही श्रम-विभाजन संगे सही लोकर किन जमा कीयाना ओसो वर्तमान अव्यवस्था किन दूर कीयाना। इदिना काजे मुन्ने आर्थिक इतिहास, राजनीतिक इतिहास, सैनिक इतिहास ओसो सांस्कृतिक इतिहास ता बचोनो क्षेत्र कुना लोप्पा विश्लेषणात्मक अध्ययन कीयाना सिर्फ अस्केने संश्लेषणात्मक अध्ययन कीयाना संभव आया परिंता।
3. कार्यकर्ता लोरा शिक्षा ता संबंध किन हूडतेके-ओरू काम किसोर मंदाना कार्यकर्ता लोरा शिक्षा आई लेवेके कार्यकर्ता-स्कूल लोप्पा शिक्षा दोरकी कित्ता कार्यकर्ता लोरा शिक्षा आई, ओरा काजे चीनी

क्रांति ता व्यवहारिक समस्यांग कुना अध्ययन किन केंद्र बने कीयाना ओसो मार्क्सवाद-लेनिनवाद ता बुनियादी नियम किन मार्गदर्शन ता रूप ते इस्तेमाल कीयाना लेक्काटा नीति लागू कीयाना। ओसो बिल्कुले जीवा हिल्वा, सीमित रूप ते मार्क्सवाद-लेनिनवाद ता अध्ययन कीयाना तरीका किन तिलांजली हियाना। मार्क्सवाद-लेनिनवाद ता अध्ययन लोप्पा माटु मना मुख्य पाठ्य-सामग्री ता रूप ते “सोवियत संघ ता कम्युनिस्ट पार्टी (बोलशेविक) ता इतिहास, संक्षिप्त कोर्स” किन इस्तेमाल कीयाना। तीना लोप्पा हत्ता नूर साल कुना इतिहास दुनिया ता कम्युनिस्ट आंदोलन ता सबसे बेस संश्लेषण कीसि निचोड़ तेंडताद मंता। इदु सिद्धांत ओसो व्यवहार किन काल्पना उंदी आदर्श आंदु। माटु लेनिन ओसो स्टालिन बद्रम मार्क्सवाद ता सच्चाई किन सोवियत क्रांति ता ठोस व्यवहार संगे काल्पतोर अनि बद्रम मार्क्सवाद ता विकास कित्तोर इंजी हूडाकाल अस्के माटु चीन लोप्पा बद्रम काम कीयाना इंजी पुंदाकाल।

माटु बचोनो बेरा हरीं लेसतोमा मति गलती हमेशा सही पोल्लो किन मुन्ने ओयनदु मंदिता। सजीवता ओसो विविधता संगे कलियसी मत्ता चीनी क्रांति ओसो विश्व क्रांति भूमि ते मना अध्ययन लोप्पा इद सुधार तिंची जरूर बेसता सफलता दोरकी कियमूडायर इंजी नाकिन विश्वास मंता।

नोट

1. फूश्येन काउंटी येनान तल लगभग 70 किलोमीटर जेक दक्षिण ते मंता।
2. हंदी इलाका ता मुद्रा शेनशी-कानसू-निंगश्या हंदी इलाका ता सरकारी बैंक कागजी नोट रूप ते जारी कित्ताद मत्ता। क्वोमिंगतांग-मुद्रा नालुंग बेहरा क्वोमिंगतांग नौकरशाह-पूजीपति बैंककु ब्रिटिश, अमेरिका साम्राज्यवादीरा समर्थन ते 1935 परेके जारी कित्ता कागजी मुद्रा मत्ता। इगा कामरेड माओ त्सेतुंग इव रेंडासी मुद्रांग ना विनिमय-दर ते आयना उतार-चढ़ाव ता बारे ते रास्तोरा।
3. कार्ल मार्क्स, “‘पूजी’ ग्रन्थ-1 ता द्वितीय जर्मन संस्करण पश्चलेख” हूडाटू: तीना लोप्पा ओरू “पेरकेटा तरीका [जांच-पड़ताल ता तरीका] ते सामग्री किन विस्तार ते जमा कीयाना आता। ताना विकास ता विभिन्न रूप कुना विश्लेषण कीयाना, अविना

लोप्पाटा संबंध कुना खोज कीयाना मंदिता। इद काम पूरा आता पेरेकेने वास्तविक आंदोलन ता सही वर्णन किया परमूडांता इंजी रास्तोरा”

4. जे.वी. स्टालिन, “लेनिनवाद ता आधारभूत सिद्धांत” ता नौवा भाग “कार्यशैली” हूडाटू।

दूरपूर्वी म्यूनिख (शहर) बने कीयाना षडयंत्र ता पर्दाफाश कीमुट

मई 1941

इदु पार्टी आदेश कामरेड माओ चीनी कम्युनिस्ट पार्टी ता केंद्रीय कमेटी काजे रासिस मत्तोरा।

1. चीन ता अधिकार कुन खतरा ते वाटसी जापान ओसो अमेरिका नडुमा समझौता, कम्युनिज्म ओसो सोवियत संघ ता खिलाफ उंदी पूर्वी म्यूनिख (शहर) बने कीयानादु इंजेटा जापान, अमेरिका ओसो च्यांग कार्ई-शेक ना पूना साजिश आंदू। मनम इद साजिश ता पर्दाफाश कीयाना अनि इदिना मुकाबला कीयाना।
2. नेंडु जापान साम्राज्यवादिर च्यांग कार्ई-शेक किन आत्मसमर्पण कियाला काजे जबरदस्ती कीयाना तम्मा फौजी हमलांग किन खत्म कित्तोरा। मति च्यांग किन आत्मसमर्पण कियाला कार्यवाहिंग कियानूर इंदानदु पक्का मंता। इदु दुश्मन ता उंदी पेरके उंदी लेवेके उंदे बेरा उंदी बगिल तल हौकना ओसो दूसरा बगिल जीवा कीयाना पाडना नीति ताए दूसरा रूप आंदू। मनम इद नीति ता पर्दाफाश कीयाना ओसो इदिना मुकाबला कीयाना।
3. जापान तम्मा फौजी हमलांग संगे-संगे अंगडम ता प्रचार कीयाना वेने शुरू कित्ता। इद प्रचार लोप्पा “आठवीं राह सेना क्वोमिंगतांग ता केंद्रीय सेना संगे तालमेल बने कीसि लडेमायो”, “आठवीं राह सेना हर मौका ता फायदा एतसी इलाका बेरसी किया मंता”, “अदु उंदी अंतरराष्ट्रीय हरीं तेरिया मंता”, “अद उंदी दूसरा केंद्रीय सरकार निल्पी किया मंता” इंदान लेक्कटवु मत्तांगा। इदु उंदी चालाक जापानी

स्कीम आंदू, इदिना लक्ष्य क्वोमिंगतांग ओसो कम्युनिस्ट पार्टी नड्मा फूट वाटना अनि क्वोमिंगतांग किन आत्मसमर्पण कियाला काजे सहमत कीयाना काम किन हल्को कीयानाद मंता। क्वोमिंगतांग ता “केंद्रीय समाचार-एजेन्सी” ओसो क्वोमिंगतांग ता न्यूज पेपर इव अंगडमता प्रचार कुना नकल कीसि अविना प्रचार किया मंतांग, जापान ता कम्युनिस्ट-विरोधी प्रचार ता ढिंढोरा पीटे कियाला काजे उचुन वेने पेरके-मुन्ने हूडोंग आंतांग अनि इविना लक्ष्यकु वेल्ले डावुट मत्ता लेक्काटवु मंदितांग। इविना वेने मनम पर्दाफाश कीयाना ओसो इदिना मुकाबला कीयाना।

4. पूना चौथी सेना ता बारे ते ओरू “बगावत कित्ताद” मंता ओसो आठवीं राह सेना किन क्वोमिंगतांग तल उंदी वेने गोली ओसो पैसा दोरकताद हिल्ले, मति ओरू दुश्मन ता खिलाफ लडेमायनदु उचुन वेने रोमी कित्ताद हिल्ले इंजी ऐलान कित्तोर। इदे आयवा, आठवीं राह सेना दक्षिण शानशी ता वर्तमान अभियान¹ ते क्वोमिंगतांग संगे तम्मा कार्यवाहिंग ना तालमेल बने कीयाना पहलकदमी कित्ता। इदु हत्ता रेंडु हफतांग उत्तरी चीन लोप्पा हमलांग जारी तासता, इंजे वेने अगा भीषण लड़ाईंग ताका मंतांग। कम्युनिस्ट पार्टी ता नेतृत्व ते काम कीयाना सशस्त्र शक्तिंग ओसो जनता जापानी आक्रमण विरोधी युद्ध ता मुख्य सिम्बल बनेमाता। कम्युनिस्ट पार्टी पोरो वाटता सब्बे आरोप कुना लक्ष्य प्रतिरोध-युद्ध लोप्पा तोड़फोड़ कीयाना ओसो आत्मसमर्पण काजे हरी पंडना मत्ता। माटु आठवीं राह सेना ओसो पूना चौथी सेना ता फौजी सफलतांग किन विस्तार कीयाना ओसो सब्बे पराजयवादिर (हारेमातोर) ओसो आत्मसमर्पणवादिरा विरोध कीयाना।

नोट

1. दक्षिण शानशी अभियान इत्तेके चुंगथ्याओ मेड्वांग ना अभियान। मई 1941 ते 50,000 तुकू ज्यादा सैनिक वाले उंदी आक्रमणकारी जापानी सेना दक्षिणी शानशी लोप्पा पीली डोड्डा ता उत्तर बगिल मत्ता चुंगथ्याओ मेड्वा इलाका पोरो हमला कित्ता। अद इलाका ते क्वोमिंगतांग ता सात फौजी कोर तैनात मत्ता। अदिना उत्तर-पूर्व ते काओफिंग इलाका ते क्वोमिंगतांग ता नालुंग फौजी कोर तैनात मत्तांग, कुल मिले कीसि अविना सैनिक संख्या 2,50,000 मत्ता। पीली डोड्डा ता उत्तर ते मत्ता क्वोमिंगतांग फौज कुना मुख्य काम कम्युनिस्ट लोरा खिलाफ लडेमायना मत्ता। अदिन काजे ओरू जापान ता खिलाफ लडेमायला खुद किन बस्केने तैयार किवोर, ताना लोप्पाटल ज्यादातर फौजकु जापानी आक्रमणकारिरा हमला आतास्के लड़ाई तल बचेमायना कोशिश कित्तोरा अदिन काजे आठवीं राह सेना इद अभियान ते क्वोमिंगतांग फौज कुन दुश्मन ता खिलाफ मदद हियाना भरपूर कोशिश कीतेकाई क्वोमिंगतांग फौज किन पूराए पूंडता। इद्रम कीयानास्के मूंड हप्तांग लोप्पा 50,000 हजार सेना किन पोहतोर अनि ओरा पिस्ता सेना पीली डोड्डा ता दक्षिण बगिल वित्तता।

फासीवाद-विरोधी अन्तरराष्ट्रीय संयुक्त मोर्चा ता बारे ते 23 जून 1941

इदु पार्टी आदेश किन कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे रासिस मत्तोर।

22 जून ते जर्मन ता फासीवादी शासक वर्ग सोवियत संघ पोरो हमला कित्ता। इदु सिर्फ सोवियत संघ ता खिलाफ आयवा सब्बे राष्ट्र कुना आजादी ओसो स्वाधीनता ता खिलाफ उंदी विश्वासघातपूर्ण आक्रमण ता आपराध आंदू। फासीवादी आक्रमण ता खिलाफ सोवियत संघ ता इदु न्यायपूर्ण प्रतिरोध-युद्ध सिर्फ अदिना रक्षा काजे ताकी कीयाना आयवा फासीवादी गुलामी तल मुक्ति दोरकी कियाला काजे संघर्षशील सब्बे राष्ट्रंग कुना काजे वेने ताकी कियमूडाया मंता।

इंजे पूरा दुनिया ता कम्युनिस्ट लोरा काम फासीवाद ता खिलाफ संघर्ष कीयाना ओसो सोवियत संघ ता रक्षा कीयाना मंता। चीन ता रक्षा कीयाना ओसो सब्बे राष्ट्रंग कुना आजादी, स्वाधीनता ता रक्षा कियाला काजे सब्बे देश कुना जनता किन गोलबंद कीसि अन्तरराष्ट्रीय संयुक्त मोर्चा निर्माण कीयानादु मंता। वर्तमान कालम ते सब्बे कोशिश कुन फासीवादी गुलामी ता मुकाबला कीयाना पोरो केंद्रित कीयाना।

चीनी कम्युनिस्ट पार्टी मुन्ने पूरा देश ते कीयाना कार्य दोड़ रास्ता लेक्का मंता:

1. जापान विरोधी राष्ट्रीय संयुक्त मोर्चा पोरो डटेमासी मंदाना, क्वोमिंगतांग-कम्युनिस्ट एकता पोरो डटेमासी मंदाना। जापानी

साम्राज्यवादिर किन चीन तल बाहर पूंडना लेक्कटा तरीकांग संगे सोवियत संघ ता मदद कीयाना।

2. बड़े पूंजीपति वर्ग ता प्रतिक्रियावादिरा सब्बे सोवियत-विरोधी ओसो कम्युनिस्ट विरोधी गतिविधिंंग ना दृढ़ता ते मुकाबला कीयाना।
3. विदेशी संबंध कुना लोप्पा मना दुश्मन ता खिलाफ ब्रिटिश, अमरीका ओसो बाकी देश कुना लोप्पा जर्मनी, इटली ओसो जापान ता फासीवादी शासक वर्ग ता विरोध कियानोरा संगे एकता कीयाना।

शेनशी-कानसू-निंगश्या हंडी इलाका ता प्रतिनिधि- सभा लोप्पा भाषण

21 नवम्बर 1941

प्रतिनिधि-सभा ता सदस्य लोर! कामरेड्स! हंडी इलाका ता प्रतिनिधि-सभा ता नेंडु आयना उद्धाटन उंदी वेल्ले महत्वपूर्ण पोल्लो आंदू। प्रतिनिधि-सभा ता सिर्फ उंदे उद्देश्य मंता, अदु जापान साम्राज्यवाद किन तेहकसी वाटना ओसो उंदी नवजनवादी चीन ता निर्माण कीयाना। दूसरा माटा ते क्रांतिकारी मूंडु जन सिद्धांतकु वाले चीन ता निर्माण कीयाना उद्देश्य। नेटा चीन काजे दूसरा बदे लक्ष्य मंदाए परवो। बारांकु इत्तेके इंजे मना मुख्य दुश्मन अंदरूनी दुश्मन आयवा जापानी फासीवाद ओसो जर्मन-इटली फासीवाद मंता। इंजे सोवियत लाल सेना सोवियत संघ ओसो पूरा मानव जाति ता पिस्वल काजे लड़ेमाया मंता अनि मनम जापानी साम्राज्यवाद संगे भीड़ेमाया मंतोमा। जापानी साम्राज्यवाद ता आक्रमण इंजे वेने जारी मंता ओसो अदिना उद्देश्य चीन किन तन्ना गुलाम बने कीयाना मंता। चीनी कम्युनिस्ट पार्टी जापान साम्राज्यवाद किन तेहकसी वाटला काजे देशमेटा सब्बे जापान-विरोधी ताकत कुन एकता कीयाना ओसो सब्बे जापान-विरोधी पार्टिंग, वर्ग, जातिंग संगे सहयोग स्थापित कीयाना पोल्लो ता पक्ष एतिंता। गद्दार लोर किन विडचसी बाकी सब्बे लोक्ुर संघर्ष काजे एकता आयना। कम्युनिस्ट पार्टी ता रुझान लगातार इदे मंदिंता। नालुंग साल तुकु ज्यादा कालम एवनल चीनी जनता वेल्ले बहादूरी ते जापानी आक्रमण विरोधी युद्ध किया मंता। इदु उंदी क्वोमिंगतांग ओसो कम्युनिस्ट पार्टी ता एकता अनि सब्बे वर्ग, पार्टिंग, जातिंग ना एकता ते

ताकसोर मत्ता युद्ध आंदु। मति इद युद्ध लोप्पा इंजे वेने जीत दोरकी कित्ताद हिल्ले, इदिन जीडला काजे मनम बराबर लडेमासोर दायना, क्रांतिकारी मूंड जनसिद्धांत कुन निज्जमे अमल कीयाना पोल्लो पोरो ध्यान हियाना।

क्रांतिकारी मूंड जन सिद्धांत पोर्रो अमल कीयाना बारांकु जरूरी मंदिता? बारांकु इत्तेके इंजे एवनल डा.सुन यात सेन ना बनेकित्ता मूंडु जन सिद्धांत कुना पोर्रो चीन ता सब्बे हिस्सांग लोप्पा अमल कित्ताद हिल्ले। माटु समाजवाद पोर्रो फौरी रूप ते इंजेने अमल कीयाना इंजी बारांकु मांग किसोर हिल्लेमा समाजवाद उंदी बेसता व्यवस्था मंता ओसो वेल्ले कालम तिंची सोवियत संघ इदिना पोर्रो अमल किया मंता इंदाना पोल्लो लोपा बदे डावुट हिल्ले। मति नेटा चीन ता बारे ते हूडतेके अदिन स्थापित कियाला काजे परिस्थिति इंजे वेने अनुकूल हिल्ले। मना शेनशी-कानसू-निंगश्या हंदी इलाका लोप्पा क्रांतिकारी मूंडु जन-सिद्धांत कुन लागू कित्ताद मंता। मना बदे वेने व्यवहारिक समस्या किन हल कीयानास्के माटु इव सिद्धांत कुना संगे मुन्ने हत्ताद हिल्ले। इव सिद्धांत कुना संबंध, नेटा राष्ट्रवाद ता सिद्धांत इत्तेके जापानी साम्राज्यवाद किन तेहकसी वाटना ओसो जनवाद ता सिद्धांत ओसो जन-जीविका ता सिद्धांत इत्तेके बदे उंदी समूह ता हित काजे आयवा जापान विरोधी सब्बे जनता ना हित काजे काम कीयाना संगे मंदिता। पूरा देश ता जनता किन व्यक्तिगत आजादी, राजनीतिक कामकाज लोप्पा हिस्सा एतना अधिकार ओसो सम्पत्ति किन सुरक्षित तासना अधिकार ता फायदा एतना मौका दोरकना। पूरा देश लोप्पा जनता किन तम्मा राय हियाना मौका दोरकना ओसो ओरकिन करला काजे गेत्तंग, तिंदाला काजे गाटो, पिस्वल काजे रोजगार अनि शिक्षा काजे स्कूल मंदाना। संक्षेप ते हर मानेय ना पिस्वल काजे सुविधा जरूर मंदाना। चीनी समाज ता रेंडासी कोनांग सुडला मंतांग ओसो नडमा ता हिस्सा बेहरा मंता। इत्तेके उंदी कोंटा ते सर्वहारा वर्ग मंता ओसो दूसरा कोंटा ते जर्मीदार ओसो बडे पूंजीपति वर्ग मंता। इव रेंडासी कोंटा ने मंदाना लोकुरा संख्या वेल्ले कम मंता, जनता लोप्पा उंदी बेहरा संख्या किसान, शहरी निम्न-पूंजीपति वर्ग ता लोकुर अनि मध्यवर्ती वर्ग ता बाकी लोकुरा संख्या

मंता। बदे वेने राजनीतिक पार्टी बस्के एवनल तन्ना नीतिंग लोप्पा इव वर्ग कुना हित कुना पोरो ध्यान हीवो अस्के एवनल अदु चीन किन सुचारू रूप ते ताकी किया परवो आंता। बस्के एवनल इव वर्ग कुना सदस्य लोरा काजे बदे सुविधा हीवो, बस्के एवनल ओरिन ओरा राय पेश कीयाना अधिकार हीवो आंता अस्के एवनल। चीनी कम्युनिस्ट पार्टी पेश कित्ता नीतिंग, जापान ता विरोध कीयाना पूरा जनता किन एकता कीयाना कोशिश कींता ओसो इद्रम कीयाना हर वर्ग ता हितकुना ध्यान तासिंता अनि खासकर किसान, शहरी निम्न-पूँजीपति वर्ग ता लोकर ओसो मध्यम वर्ग कुना बाकी लोकरा अधिकार कुन ध्यान तासिंता। कम्युनिस्ट पार्टी ता नीतिंग, हर समूह ता लोकर किन मौका हींतांग। अवु खुद ता राय पेश कीयाना, पिस्वल काजे रोजगार, तिंदाला काजे गाटो दोरकियर इंदाना गारंटी एतिंतांग। इद्रम ता नीतिंग असली क्रांतिकारी जन सिद्धांत कुन अमल कींतांग। भूमि-संबंध कुना लोप्पा किसान लोर किन अन्न दोरकना इंजी मनम उंदी बगिल लगान ओसो सूद कम कींतोम। ओसो दूसरा बगिल जर्मीदार लोरा वेने काम ताकना इंजी लगान ओसो सूद भरपाई कीयाना व्यवस्था वेने कींतोम। श्रम ओसो पूँजी नड़मा ता संबंध ता बारे ते मनम उंदी बगिल मजदूर लोरकिन काम ओसो खदान रेंडासी दोरकना इंजी मजदूर लोरा सहायता कींतोम अनि दूसरा बगिल पूँजीपतिर किन उचुन मुनाफा दोरकना इंजी उद्योग कुन विकसित कीयाना नीति पोरो ताकिंतोम। मनम इद्रम पूरा देश ता जनता किन जापान विरोधी संघर्ष काजे एकता कीयाना उद्देश्य तेने कींतोम। इदिने माटु नवजनवाद ता नीति इंतोम। इदु चीन ता वर्तमान परिस्थिति संगे कलियना लेक्कटा नीति आंदू। माटु इदिन शेनशी-कानसू-निंगश्य हंदी इलाका लोप्पा लेवेके दुश्मन ता केंद्र ते मत्ता जापान विरोधी आधार इलाकांग एवनले सीमित कियवा पूरा देश लोप्पा लागू कियमूडायर इंजी आशा किया मंतोम। माटु इद नीति किन सफलतापूर्वक लागू कीतोम ओसो पूरा चीन ता जनता इदिन अनुमोदन कित्ता। मति मना काम लोप्पा उचुक गलतिंग वेने आतांग। उचुन कम्युनिस्ट लोर इंजे एवनल गैर-पार्टी लोकरा संगे बद्रम जनवादी तरीका

ते एकता कीयाना इंजी करियताद हिल्ले, ओरा कार्यशैली रुढ़ीवाद लेवेके संकीर्णतावादी रुझान पोरो आधार आसी मंता: ओर इंजे वेने कम्युनिस्ट लोर जापान ता विरोध कीयाना गैर-पार्टी लोकुरा सहयोग कीयाना जिम्मेदारी ओरादे मंता ओसो गैर-पार्टी लोकुरा काजे बस्के ने वेने हरी बंद कीयाना अधिकार ओरकिन हिल्ले इंदाना बुनियादी सिद्धांत किन समझेमायोरा। सिद्धांत ता अनुसार मना आम जनता ना विचार कुन ध्यान ते केंजना, ओरा संगे घनिष्ठ सम्पर्क बने कीसि तासना, ओरगडल अलग-थलग आसी मंदानायो। “शेनशी-कानसू-निंगश्या हंदी इलाका ता प्रशासनिक कार्यक्रम” लोप्पा कम्युनिस्ट लोर गैर-पार्टी लोकुरा संगे जनवादी तरीका ते सहयोग कीयाना ओसो मनमानी तरीका ते काम कीयानायो सब्बे तम्मा कैदे तासना कोशिश कीयानायो इंजी वेहत्ताद मंता। इंजे वेने पार्टी ता नीति किन बेस समझेमायवा मत्ता कामरेड्स किन ध्यान ते तासिसी इदु धारा किन रास्तद मंता। कम्युनिस्ट लोर गैरपार्टी लोकुरा विचार कुन ध्यान ते केंजना ओसो ओरकिन बातल वड़कना मंतायो, वड़कला मौका हियाना। ओरू बातल इंतोरो अदु सही मत्तेके माटु अदिना स्वागत कीयाना ओसो ओरगडल करियाना ओरा पोल्लो गलत मत्तेके वेने ओरू बातल वड़कला आल्सतोरो अदु वड़कला मौका जरूर हियाना ओसो वेल्ले शांतिपूर्वक ओरकिन समझे कीयाना कोशिश कीयाना। वरोर कम्युनिस्ट जिद्दी मंदानायो ओसो दूसरोरा पोरो रोब वाटना कोशिश वेने कीयानायो। वरोर कम्युनिस्ट खुद किन सबसे ज्यादा पुत्ता लेक्का ओसो दुसरोर किन इनपड़े बातले वायवा लेक्का हूडनायो। ओरू खुद किन तन्ना सुडला कोली लोप्पा बंद कीयानायो। ओरू खुद ता बारे ते खुद तारीफ कीयानायो। ओरू खुद किन दूसरोरा पोरो वाटना कोशिश कीयानायो। कट्टर प्रतिक्रियावादिर किन विड़चसी, जापानी आक्रमणकारिर ओसो देशद्रोहिरा संगे सांठगांठ कीसि प्रतिरोध, एकता ता मोदोल कोयनोर ओसो बोनकिन वड़कना अधिकार हिल्लेयो अद्रमता वेने हर मानेय किन वड़कना अधिकार मंदिता। ओरू बद पोल्लो वड़का मंतोरो अदु गलत मत्तेकाई वेने बातले आयो। राज्य ता बारे ते पूरा राष्ट्र ता सार्वजनिक

समस्यांग मंतांग। इवु समस्यांग उंदी पार्टी लेवेके ग्रूप ता निजी समस्यांग आयोंग। अदिन काजे कम्युनिस्ट लोर गैर पार्टी लोकरा संगे जनवादी तरीका ते सहयोग कीयाना ओसो गैरपार्टी लोकरा किन बाहर तासना लेवेके हर चीज पोरो एकाधिकार कीयाना अधिकार बिल्कुले हिल्ले। कम्युनिस्ट पार्टी उंदी राजनीतिक पार्टी आंदू। इदु राष्ट्र ओसो जनता ना अधिकार काजे काम कींता ओसो अदिना लोप्पा उचुन वेने स्वार्थ मन्नो आंता। ओरू जनता ना निगरानी ते मंदाना ओसो जनता ना इच्छा विरुद्ध बिल्कुले दायनायो। तन्ना सदस्य लोर जनता ना संगे मंदाना अनि खुद किन जनता तुकू पोरो समझेमायनायो। प्रतिनिधि-सभा ता सदस्य, कामरेड्स, गैरपार्टी लोकरा संगे जनवादी तरीका ते सहयोग कीयाना कम्युनिस्ट पार्टी ता सिद्धांत अटल ओसो अल्पसंख्या ते मंदिता, बाहर मंदानोर हमेशा बहुसंख्या ते मंदानूर। अदिन काजे मना पार्टी-सदस्य लोर गैरपार्टी लोकरा संगे हमेशा सहयोग कीयाना ओसो ओरू इदे प्रतिनिधि-सभा लोप्पा इदिना शुरुआत कित्तेके बेस आयारा। नावा हिसाब ते मना इद नीति किन लागू कीसि प्रतिनिधि-सभा ता कम्युनिस्ट सदस्य लोर इगा वेल्ले बेसता शिक्षा दोरकी कियानूर ओसो रूढ़ीवादी- संकीर्णतावाद किन दूर किया परनूर। माटु मना राय दूसरोरा पोरो थोपे कीयाना लेक्काटा सुडला विचार तासनोर आयोम। मना काजे मनम गैरपार्टी लोकरा संगे मना कीवाड़ बद्रम तेरियसी तासना इंदानदु करियाना वेल्ले जरूरी मंता। ओरा संगे जनवादी तरीका ते सहयोग कीयाना ओसो दूसरोरा संगे बद्रम सलाह-मशवरा कीयाना इंदानदु करियना जरूरी मंता। इंजे वेने इद्रम ता कम्युनिस्ट “माकिन दूसरोरा संगे सहयोग कीयाना जरूरत मंता, इत्तेके माकिन अलग मंदाला हीमुट” इंदानोर वेने वेल्ले मंदानूर बहे। मति नाकिन इद्रमतोर इरवुर-मुव्वुर मंदानूर इंजी विश्वास मंता। नन्ना मना सदस्य लोरा बेहरा संख्या मना पार्टीता केंद्रीय कमेटी ता कार्यदिशा किन जरूर लागू कींतोर इंजी विश्वास संगे मीकिन वेहिताना। संगेने सब्बे गैरपार्टी कामरेड्स माकिन बातल पाहिजे इंदानदु समझेमायना ओसो कम्युनिस्ट पार्टी तन्ना स्वार्थ काजे काम कीयाना बदे सुडला सम्प्रदाय लेवेके गुट आयो इंदाना पोल्लो किन वेने बेस

समझेमायना। कम्युनिस्ट पार्टी वेल्ले जीवा कीसि ओसो ईमानदारी संगे राज्य ता समस्यांग किन सुधरे कियाला आलिसंता। इद्रम मत्तेकाई मना काम ते इंजे वेने वेल्ले कमजोरिंग मंतांग। मना गलतिंग मानेमायला माटु वेरियोम अविन सुधरे कियाला काजे माटु संकल्प एतितोम। पार्टी लोप्पा शिक्षा-कार्य किन जोरदार बने कीसि गैरपार्टी लोकरा संगे जनवादी तरीका ते सहयोग कीसि मनम इद काम किन पूरा कियाकाल। पार्टी लोप्पा ओसो पार्टी तुकू बाहर रेंडासी आलोचनांग वायनुंग अविना संगेने मना गलतिंग किन दूर किया परमूझायर ओसो राज्य ता समस्यांग किन निज्जमे बेस किया परमूझायर।

प्रतिनिधि-सभा ता सदस्य लोर! इद सभा लोप्पा शामिल आयला काजे इगा एवनल वायना कष्ट कीतीर, नाकिन इद विशिष्ट सम्मेलन ता अभिनंदन कीयाना मौका दोरकतांकु नन्ना वेल्ले खुश मंतान। नन्ना इद सम्मेलन ता सफल आयर इंजी आशा कीतान।

पार्टी ता कार्यशैली ते सुधार कीमूट

1 फरवरी 1942

इद भाषण चीनी कम्युनिस्ट पार्टी ता केंद्रीय कमेटी ता पार्टी स्कूल ता उद्घाटन आयानास्के कामरेड माओ त्सेतुंग हिंसी मत्तोर।

नेंडु पार्टी स्कूल ता उद्घाटन आया मंता ओसो नन्ना इदु बेस सफल आया आशा किया मंतान।

नन्ना पार्टी ता कार्यशैली समस्या बारे ते उचुक पोल्लो वेहला आल्सा मंतान।

उंदी क्रांतिकारी पार्टी ता जरूरत बारांकु मंदिता? उंदी क्रांतिकारी पार्टी ता जरूरत बारांकु मंदिता इत्तेके, दुनिया ते जनता ना उत्पीड़न कीयाना दुश्मन मंतोर ओसो जनता दुश्मन तोर कीयाना उत्पीड़न किन खत्म कियाला आल्सा मंता। पूंजीवाद ओसो साम्राज्यवादी समाज लोप्पा कम्युनिस्ट पार्टी लेक्का क्रांतिकारी पार्टी ता जरूरत मंदिता। इद्रम ता पार्टी लेवा जनता दुश्मन ता उत्पीड़न किन खत्म किया परवोए। माटु कम्युनिस्ट लोर आंदोम, माटु दुश्मन किन तेहकसी वाटना संघर्ष ते जनता ना नेतृत्व कियाला आल्संतोम। अदिन काजे मना लाईन किन सही तासना मनम कदम-कदम कलियसी ताकना, मना सैनिक लोर चुने कित्ता सैनिक लोर मंदाना मना हथियार बेसतांग मंदाना। इव शर्त कुन पूरा कियवा लेवा दुश्मन किन तेहकसी वाटा परवोमे।

नेंडु मना पार्टी मुन्ने बाता समस्या मंता? पार्टी ता आम कार्यदिशा सही मंता, ओसो ताना लोप्पा बदे समस्या हिल्ले। पार्टी कीयाना कामकाज लोप्पा सफलतांग दोरकतांग। पार्टी लोप्पा लाखों सदस्य लोर मंतोर, वीरू

दुश्मन ता खिलाफ वेल्ले कठिन ओसो कठोर संघर्ष लोप्पा जनता ना नेतृत्व किया मंतोर। इद पोल्लो किन सब्बे तोर वेल्ले बेसे पुत्तोर, इदिना लोप्पा बदे डावुट हिल्ले।

अद्रम इत्तेके पार्टी मुन्ने इंजे वेने बदे समस्या हिल्ले या? नावा हिसाब ते वेल्ले गंभीर समस्या मंता।

अद समस्या बाताल आंदू? उचुन कामरेड्स ना दिमाग ते उचुक पोल्लिंग मंतांग मति माकिन अवु एकदम स्पष्ट ओसो सही मत्ता लेक्का दिससोर हिल्लेंगा।

दूसरा माटा ते वेहाना इत्तेके अध्ययन-शैली लोप्पा, मना पार्टी लोप्पा अंदरूनी ओसो बाहरी संबंध कुन समन्वय कीयाना शैली ते ओसो मना लेखन-शैली (रासना-शैली) ते इंजे वेने उचुन कमी मंता। अध्ययन-शैली लोप्पा मनोगतवाद लेक्कटा कमी मंता। मना पार्टी-संबंध कुना शैली लोप्पा संकीर्णतावादी रोग मंता। लेखन-शैली लोप्पा घिसे-पिटे पार्टी लेखन ता रोग मंता। इव सब्बे गलतिंग आंदुंग, मति इंगम कालम ते ताकना उत्तरी बगिल तल वायना वेड़िय लेक्का पूरा मोय्योल ते फैलेमायोंगे। मनोगतवाद, संकीर्णतावाद ओसो घिसे-पिटे पार्टी-लेखन ता शैलिंग इंजे मजबूत हिल्लेंगा। उल्टा अवु हवाई हमला तल बचेमायला काजे बने कित्ता खंदक (बोंगा) कुनगडल वायना गब्बू तत्ताना वड़िय लेक्का मंतांग। (कव्वतोर) मति इदु पोल्लो गलत हिल्ले मना पार्टी लोप्पा इद्रम ता वड़िय वेने वाया मंता। मनम गब्बू वाले वेड़िय पुट्टी कीयाना बोंगांग किन बंद किया लागियर। मना पूरा पार्टी इद्रम ता बोंगांग किन बंद कीयाना काम ता जिम्मेदारी एतना ओसो मना पार्टी स्कूल किन वेने इद्रमे कीयाना। इव मूंडु खराब वेड़ियकु-मनोगतवाद, संकीर्णतावाद ओसो घिसेपिटे पार्टी-लेखन ता ऐतिहासिक मेदोलकु आंदुंग। इविना कब्जा पूरा पार्टी पोरो आताद हिल्ले, मति अवु इंजे वेने लगातार गडबड़ किया मंतांग ओसो मना पोरो हमला किया मंतांग। अदिन काजे प्रतिरोध कीयाना ओसो अविना अध्ययन कीयाना, अविना विश्लेषण कीयाना, अविन वेहाना जरूरी मंता।

अध्ययन-शैली लोप्पा सुधार कियाला काजे मनोगतवाद ता विरोध कीयाना। पार्टी-संबंध किन निभे कीयाना शैली लोप्पा सुधार काजे संकीर्णतावाद ता विरोध कीयाना। लेखन-शैली लोप्पा सुधार कियाला काजे घिसेपिटे पार्टी-लेखन ता विरोध कीयाना- इदु मना मुन्ने मत्ता काम आंदू।

दुश्मन किन तेहकसी वाटना काम किन पूरा कियाला काजे, मनम पार्टी लोप्पा इव शैलिंग लोप्पा कीयाना सुधार कार्य किन पूरा किया लागिअर। अध्ययन-शैली ओसो लेखन-शैली पार्टी कार्यशैली ता अंग वेने आंदू। उंदी बेरा मना पार्टी ता कार्यशैली लोप्पा सुधार आतेके देशमेटा जनता मना उदाहरण लोप्पाटल करियर। पार्टी ता बाहर बोरु लोकुरा कार्यशैली इद्रम खराब मंता ओरू बेस ओसो ईमानदार मत्तेके मना उदाहरण तल करियानूर ओसो तम्मा गलतिंग सुधरे कियानूर। अनि इदिना प्रभाव पूरा राष्ट्र पोरों अरियर। बस्के एवनल मना कम्युनिस्ट लाईन बेस मंता ओसो कदम-कदम कालियसी ताकिंता, बस्के एवनल मना सैनिक लोर चुने किता सैनिक लोर मंदिंतोर ओसो मना हथियार बेसता हथियार मंदिंता अस्के एवनल दुश्मन बचोन शक्तिशाली मत्तेकाई तेहकसी वाटा परमूडांता।

इंजे नन्ना मनोगतवाद ता बारे ते वेहकान।

मनोगतवाद उंदी खराब अध्ययन-शैली आंदू: इदु मार्क्सवाद-लेनिनवाद ता विरुद्ध मंता। इदिना कम्युनिस्ट पार्टी संगे अस्तित्वए मंदा परवो। माटु बातल वेहला आल्सा मंतोमो अदु मार्क्सवादी-लेनिनवादी अध्ययन-शैली आंदू। इदिन माटु अध्ययन-शैली इंतोम, इत्तेके सिर्फ स्कूल ता अध्ययन-शैली इंजी आयो, पूरा पार्टी ता अध्ययन-शैली आंदू। इदु नेतृत्वकारी संस्थांग ना कामरेड्स, सब्बे कार्यकर्ता लोर ओसो पार्टी सदस्य लोर आल्सना लेक्कटा सवाल आंदू। मार्क्सवाद-लेनिनवाद ता बारे ते मना रुझान, मना-मना काम ता बारे ते पार्टी ता सब्बे कामरेड्स ना रुझान ता सवाल आंदू। इद्रम इदु उंदी वेल्ले महत्वपूर्ण सवाल आंदू, निज्जमे प्राथमिक महत्व ता सवाल आंदू।

वेल्ले लोकुरा दिमाग ते अंगडम ता विचारकु नेंगसी मंतांग। उदाहरण तुकू लोकुरा दिमाग लोप्पा अंगडम ता विचारकु इत्तेके सिद्धांतकार बद्रम ता मानेय किन इंतोर, बुद्धिजीवी बोनकिन इंतोर ओसो सिद्धांत किन व्यवहार संगे काल्पना इत्तेके बाताल इंदाना लेक्कटा विचारकु वांतांग।

मुन्ने माटु मना पार्टी ता सैद्धांतिक स्तर पोरो मंताया दोड़? इंदानदु परहककाला। इस्सल तुलनात्मक रूप ते मार्क्सवादी-लेनिनवादी पुस्तकिंग ना वेल्ले अनुवाद आया मंता ओसो वेल्ले लोकुर अविन पढ़ेमाया मंतोरा। इदु उंदी वेल्ले बेसता पोल्लो आंदू। मति मनम इदिन हूडसिये मना पार्टी ता सैद्धांतिक स्तर वेल्ले पोरो हत्ता इंदा परितोमा? असल इत्तेके पार्टी ता स्तर मुन्ने तुकू उचुन पोरो आता इंदानदु निज्जमे। मति चीनी क्रांतिकारी आंदोलन ता समृद्ध विषय-वस्तु तल मना सैद्धांतिक मोर्चा ता तालमेल आया परताद हिल्ले। इव रेंडासी ना तुलना ते हूडतेके सैद्धांतिक पक्ष वेल्ले पेरके मंता। साधारण रूप ते मना सिद्धांत मना क्रांतिकारी व्यवहार संगे इंजे ताका परसोर हिल्ले। सिद्धांत व्यवहार तुकू मुन्ने ताकतेके बेस आसी मनवड इंदाना सवाल इत्तेके वेल्ले जेक मंता। माटु मना समृद्ध ओसो अलग-अलग व्यवहार किन इंजे सही तरीका ते सैद्धांतिक स्तर एवनल तेहा परताद हिल्ले। माटु इंजे एवनल मना क्रांतिकारी व्यवहार ता सब्बे समस्यांग पोरोए आयवा महत्वपूर्ण समस्यांग पोरो वेने विचार कित्ताद हिल्ले ओसो अविन सैद्धांतिक स्तर एवनल वेने पोरो तेहताद हिल्ले। उचुन आल्सट गोत्तो! मना लोप्पाटल बचोन लोकुर चीन ता अर्थव्यवस्था, राजनीतिक, फौजी समस्यांग ओसो संस्कृति ता बारे ते सिद्धांत कुना रचना कित्तोरा। इत्तेके निज्जमे सिद्धांत मानेमायना लेक्कटा सम्पूर्ण वैज्ञानिक इंदा परना लेक्कटा सिद्धांतकु रास्तोरा? विशेष रूप ते आर्थिक सिद्धांत लोप्पा अफीम युद्ध तिंची नेंड एवनल चीन लोप्पा पूंजीवाद विकास ता उंदी शताब्दी आता। मति इंजे एवनल वेने चीन ता आर्थिक विकास सच्चाई पोरो आधार आसी मत्ता निज्जम ता वैज्ञानिक ओसो सैद्धांतिक ग्रन्थ रास्तद हिल्ले। उदाहरण तुकू माटु चीन ता आर्थिक समस्यांग ना अध्ययन ते मना सैद्धांतिक स्तर पोरो तेदता इंदा परितोमा? मनम मना पार्टी लोप्पा

योग्य आर्थिक सिद्धांतकार मंतोर इंजी इंदा परितोमा? माटु इद्रम इनपडे इंदा परवोमा। माटु वेल्ले मार्क्सवादी-लेनिनवादी ग्रन्थकु पढेमातोम, मति मनम मनगा सिद्धांतकार मंतोर इंजी गंभीर रूप ते इंदा परितोमा? माटु इद्रम इंदा परवोमे। बारांकु इत्तेके मार्क्सवाद-लेनिनवाद सिद्धांत मार्क्स, एंगेल्स, लेनिन ओसो स्टालिन ना व्यवहार पोरो आधार आसी रासिस मत्ता सिद्धांत आंदु। इदु ऐतिहासिक ओसो क्रांतिकारी सच्चाई तिंची तेंडता आम निष्कर्ष आंदू। माटु सिर्फ ओराए ग्रन्थ कुन पढेमातोम मति ओरा सिद्धांत ता वेडचते मुन्ने हंजी चीनी इतिहास ओसो क्रांति ता सच्चाई ता अध्ययन कियवा, सैद्धांतिक दृष्टि ते चीन ता क्रांतिकारी व्यवहार पोरो सावधानी ते विचार कीयाना कोशिश कीवेके, माटु मार्क्सवादी सिद्धांतकार मत्ता लेक्का जोर वाटसी वेहा परवोमा। माटु कम्युनिस्ट पार्टी ता सदस्य आतेकाई चीन ता समस्यांग ना बगिल तल कोंडांग मुचतेके ओसो मार्क्सवादी रचनांगनगडल सिर्फ उंदी-रेंडु निष्कर्ष ओसो सिद्धांत किने रटे कितेके, सैद्धांतिक सफलतांग वेल्ले कम मंदितांग। बोराई मार्क्सवादी अर्थशास्त्र लेवेके दर्शनशास्त्र किन सिर्फ सुरताए तास्तेके, पहली पाट तिंचि दसवा पाट एवनल एर पोंगना लेक्का रटे किसोर हत्तोर, मति अविन लागू कियाला तैयार हिल्लेर अस्के ओनकिन मार्क्सवादी सिद्धांतकार इंदा परमूडांता या? हिल्ले, ओरकिन इद्रम इनपडे इनमूडायो! मना किन बद्रम ता सिद्धांतकार ना जरूरत मंता? मनाकिन मार्क्सवादी-लेनिनवादी रुझान, दृष्टिकोण ओसो सही तरीका ता अनुसार इतिहास अनि क्रांति ताकनास्के पुट्टना व्यवहारिक समस्यांग ना बारे ते सही-सही वेहा परना ओसो चीन ता आर्थिक, राजनीतिक, सैनिक सांस्कृतिक, बाकी समस्यांग कुना वैज्ञानिक ओसो सैद्धांतिक रूप ते समझे किया परना लेक्काटा सिद्धांतकार ना जरूरत मंता। इद्रम ता सिद्धांतकार बनेमायला काजे मार्क्सवाद-लेनिनवाद ता सारतत्व किन, मार्क्सवादी-लेनिनवादी रुझान, दृष्टिकोण ओसो तरीका किन औपनिवेशिक क्रांति, चीनी क्रांति ता बारे ते लेनिन ओसो स्टालिन ना सिद्धांत कुना संगे लागू कीसि मंदानोर, चीन ता व्यवहारिक समस्यांग ना गहराई ते वैज्ञानिक विश्लेषण कियानोर ओसो इव समस्यांग किन

विकास ता नियम कुना खोज कियाला काजे अविन लागू कियाला तैयार मंदाना सिद्धांतकार ना जरूरत मंता। मना किन निज्जमे इद्रम ताए सिद्धांतकार ना जरूरत मंता।

मना पार्टी ता केंद्रीय कमेटी इंजे उंदी फैसला कित्ता ताना लोप्पा मना सब्बे कामरेड्स काजे आह्वान कित्ताद मंता। कामरेड्स चीन ता इतिहास ओसो अदिना अर्थव्यवस्था, राजनीति, सैनिक समस्यांग ओसो संस्कृति ता गम्भीर अध्ययन लोप्पा मार्क्सवादी-लेनिनवादी रुझान, दृष्टिकोण ओसो तरीका किन लागू कीयाना ओसो पूरा सामग्री पोरो आधार आसी हर समस्या ता ठोस विश्लेषण कीसि सैद्धांतिक निष्कर्ष तेंडला करियाना। इद जिम्मेदारी किन मनमे एतना।

पार्टी स्कूल ता मना कामरेड्स किन मार्क्सवादी सिद्धांत किन उंदी जीवा हिल्ला लेक्कटा कठमुल्ला-सूत्र समझेमायनायो। मार्क्सवादी सिद्धांत लोप्पा निपुणता दोरकी कीयाना ओसो अदिन लागू कीयानाए इंदानदु जरूरी हिल्ले: सिर्फ इदिन लागू कियाला काजेए तीना लोप्पा निपुणता दोरकी कीयाना। मीटु इव उंदी-रेंडु व्यवहारिक समस्यांग ना विश्लेषण कीयाना लोप्पा वेने मार्क्सवादी-लेनिनवादी दृष्टिकोण ता इस्तेमाल किया परवेके बद्रम आयार। नेंडु बचोन ज्यादा समस्यांग ना इद्रम ता विश्लेषण किसोर दायकोम अचोने ज्यादा बेहरा सफलतांग मना किन दोरकानुंग। मना पार्टी स्कूल लोप्पा विद्यार्थि किन बेस ओसो कमजोर विद्यार्थी ना नम्बर हियाना नियम वेने तय कीयाना। इद नियम मार्क्सवाद-लेनिनवाद ता अध्ययन परेके ओरू चीन ता समस्यांग किन बद्रम हूडिंतोर इंदाना पोल्लो पोरो आधार आसी मंदिता। ओरू समस्यांग किन स्पष्ट रूप ते हूडिंतोरा, हूडोरो। ओरू अविन किन निपुणता ते वेने हूडिंतोरा, हूडोर इंदाना पोल्लो पोरो आधार आसी मंदिता।

इंजे माटु “बुद्धिजीविरा” सवाल किन हूडाकाल। चीन उंदी अर्ध-औपनिवेशिक, अर्ध-सामंती देश आंदु। इदिना संस्कृति वेल्ले विकसित हिल्ले, अदिन काजे बुद्धिजीविर किन विशेष मूल्यवान समझेमायमूडायाना मंता। बुद्धिजीविरा सवाल पोरो पार्टी ता केंद्रीय कमेटी रेंडु साल मुन्ने ने

माटु व्यापक बुद्धिजीविर किन मना बगिल तताना कोशिश कीयाना ओसो ओरू बस्के एवनल क्रांतिकारी मंदितोर जापान ता प्रतिरोध कियाला तैयार मंदितोर अस्के एवनल मनम ओरा स्वागत कीयाना इंजी फैसला कित्ता। बुद्धिजीविरा सम्मान कीयाना मना काजे वेल्ले बेसता पोल्लो मंदियर बारांकु इत्तेके क्रांतिकारी बुद्धिजीविर लेवा क्रांति सफल आया परवोए। मति माटु सब्बेतोरम, इद्रम ता बुद्धिजीविरा लोप्पा वेल्ले बुद्धिजीविर खुद किने बेहरा विद्वान समझेमांतोर इंजी पुत्तोमे। इद्रम कीयाना गलत ओसो नुकसानदायक मंदिता इंजी समझेमायोर आंतोर अद्रमासी ओरा तम्माए विकास रोमिंता। ओरू इद्रम ता बुद्धिजीविरा लोप्पाटल, निज्जमे तुलनात्मक रूप ते वेल्ले ज्ञानी मन्नोर आंतोर ओसो बस्के-बस्के मजदूर, किसान लोरकिन वेने ओरकिनकले ज्यादा जानकारी मंदिता इंदाना सच्चाई किन पुंजी मंदाना। इगा उचुन मुल इंदानूर, “वाह! निम्मा इत्तेके इनपडे उल्टा ताका मंतिन ओसो अंगडम ता पोल्लॉग वडका मंतिना” (कव्वतोर) मति कामरेड्स, मीटु वेल्ले वेरियमाटु। नन्ना इगा बातल वडका मंतानो अदिना महत्व मंता।

ज्ञान बातल आंदू? बस्केडल वर्ग-समाज बनेमाता अस्केटल दुनिया लोप्पा रेंडे रकम ता ज्ञान हूडला दोरका मंता- उत्पादन संघर्ष ता ज्ञान ओसो वर्ग-संघर्ष ता ज्ञान। प्राकृतिक विज्ञान ओसो सामाजिक विज्ञान पोरो रास्ता रेंडु रकम ता ज्ञान ता निचोड़ आंदु ओसो दर्शनशास्त्र प्रकृति संबंधित ज्ञान ओसो सामाजिक ज्ञान ता सामान्यीकरण (सार्वजनिक) ओसो एकीकरण आंदू। ज्ञान ता बदे दूसरा रकम वेने मंताया? इत्तेके, हिल्ले। इंजे माटु उंदी कौंडा-समाज ता व्यावहारिक कार्यवाहिंग निगडल कटेमासी मत्ता स्कूल कुना लोप्पा शिक्षा दोरकी कित्ता विद्यार्थिरा पोरो वाटकाल। ओरा परिस्थिति बद्रम मंता? वरोर मानेय इद्रमताए प्राथमिक स्कूल लोप्पा इद्रमताए विश्वविद्यालय लोप्पा दांतोर, स्नातक (ग्रेजुवेट) बनेमांतोर, अनि ओना लोप्पा ज्ञान ता भंडार मंता इंजी समझेमायमूडांता। मति उचुन मुल सिर्फ कित्ताबी ज्ञानीए मंदितोर। ओरू इंजे एवनल वेने बदे व्यवहारिक कार्यवाही ते हिस्सा एततद हिल्ले ओसो ओरू इंजे एवनल बचोन

करियतोरु अदिन पिस्वल लोप्पा बेगाने लागू वेने कित्ताद हिल्ले। इद्रम ता मानेय किन पूर्ण रूप ते विकसित बुद्धिजीवी समझेमायमूडांता या? नावा हिसाब ते इद्रम समझेमायना मुश्किल मंता बारांकु इत्तेके ओना ज्ञान इंजे एवनल अपूर्ण मंता। इत्तेके तुलनात्मक रूप ते पूर्ण ज्ञान बद्रम दोरकिता? तुलनात्मक रूप ते पूर्ण ज्ञान एवनल एव्वना रेंडु चरणकु मंतांगः पहली चरण इन्द्रियग्राह्य ज्ञान ता चरण ओसो दूसरा चरण बुद्धिसंगत ज्ञान चरणः बुद्धिसंगत ज्ञान इन्द्रियग्राह्य ज्ञान ता उच्च स्तर ते विकसित चरण आंदू। विद्यार्थिरा कित्ताबी ज्ञान बद्रम ता ज्ञान आंदू? ओरा पूरा ज्ञान निज्जम ताए मंता इंजी मानेमातेके वेने इद ज्ञान ओरू व्यक्तिगत अनुभव तिंची दोरकी कित्ता अनुभव आयवा ओना दादोर-तप्पेर उत्पादन संघर्ष ओसो वर्ग-संघर्ष ता अनुभव कुना निचोड़ तिंची बने कित्ता सिद्धांत कुना संगे कलियसी बनेमाता ज्ञान आंदू। विद्यार्थिर इद्रम ता ज्ञान दोरकी कीयानादु वेल्ले जरूरी मंता, मति मुन्ने ओरू तम्मा ज्ञान उंदी हिसाब ते उंदी बगिल तल दोरकी कित्ता ज्ञान मंता इंजी समझेमायना। इद ज्ञान ता परख दुसरोर इत्तेके कीतोरे मति खुद इंजे एवनल वेने कित्ताद हिल्ले। इद ज्ञान किन पिस्वल ते व्यवहार ते लागू कीयाना निपुणता दोरकी कीयाना सबसे महत्वपूर्ण पोल्लो आंदू। अदिन काजे, नन्ना कित्ताबी ज्ञान दोरकी कियानोर किन ओसो इंजे एवनल बोना ज्ञान व्यवहार संगे कलियताद हिल्ले। बोरु उचुन-उचुन व्यावहारिक अनुभव दोरकी कित्ताद मंतायों ओरकिन तम्मा कमजोरिंग किन चिन्हित कीयाना ओसो उचुन विनम्र (आज्ञाकारी) बनेमायना इंजी सलाह हींतानु।

सिर्फ कित्ताबी ज्ञान दोरकी कित्तोर ओरकिन निज्जम ता बुद्धिजीवि बद्रम बने कीयाना? वीर किन निज्जम ता बुद्धिजीवि बने कियाला काजे ओरू व्यावहारिक कार्य ते शामिल आयना ओसो व्यावहारिक कार्यकर्ता बनेमायना। सैद्धांतिक काम किया मंतोरु ओरू महत्वपूर्ण व्यवहारिक समस्यांग ना अध्ययन कीयाना। इद तरीका संगे ने माटु मना उद्देश्य किन पूरा किया परिंतोम।

नन्ना इगा बातल वेहा मंतानो अदिन केंजिसी लोकुर नाराज आयना लेक्का वेने मंता। ओरू नाकिन “नीवा पोल्ल्लोंग हिसाब ते मार्क्स किन वेने

बुद्धिजीवी समझेमायमूड़ायो” इंजी वेने इंदा परितोर। मति नन्ना ओरकिन मीटु गलत मंतिर इंजी इंतान। बारांकु इत्तेके मार्क्स क्रांतिकारी आंदोलन ता व्यवहार ते शामिल आतोर अनि क्रांतिकारी सिद्धांत ता रचना वेने कित्तोर। पूंजीवाद ता सबसे साधारण तत्व व्यापारिक माल तिंची शुरु कीसि पूंजीवादी समाज ता आर्थिक ढांचा ता पूर्ण रूप ते अध्ययन कित्तोर। लाखों-करोड़ों लोकुर व्यापारिक माल किन हर दिया हूडनोर ओसो इस्तेमाल कियानोर, मति ओरा काजे इदु उंदी आदत बनेमासी मत्ता अद्रमासी ओरा ध्यान इद बगिल हत्ताद हिल्ले। सिर्फ मार्क्स व्यापारिक माल ता असली विकास ता बारे ते महान खोज-कार्य कित्तोर। सार्वभौमिक रूप ते मत्ता चीज तिंची ओरू उंदी पूर्ण वैज्ञानिक सिद्धांत ता खोज कित्तोर। ओरू प्रकृति, इतिहास ओसो सर्वहारा क्रांति ता अध्ययन कित्तोर अनि द्वन्द्वात्मक भौतिकवाद, ऐतिहासिक भौतिकवाद ओसो सर्वहारा क्रांतिकारी सिद्धांत ता रचना कित्तोर। इद्रमे मार्क्स मानव-बुद्धि ता सबसे पोरो स्तर ता प्रतिनिधित्व कीयाना वेल्ले पूर्ण रूप ते विकसित बुद्धिजीवी बनेमातोर: ओरू बुनियादी रूप ते सिर्फ कित्ताबी ज्ञान दोरकी कियानोरगडल अलग मत्तोर। मार्क्स व्यावहारिक संघर्ष ताकनास्के विस्तृत रूप ते जांच-पड़ताल कित्तोर अनि अध्ययन कित्तोर। सामान्यीकरण ता काम कीसि मंजी तन्ना निष्कर्ष कुन व्यावहारिक संघर्ष कुना लोप्पा जांच कित्तोर। इदिन किने माटु सैद्धांतिक कार्य इंतोम। मना पार्टी लोप्पा इद्रम ता सैद्धांतिक खोज-कार्य कियाला करियाना लेक्कटा वेल्ले कामरेड्स मंतोर। ओरा लोप्पाटल ज्यादातर लोकुर समझदार मंतोर मनम ओरा सम्मान कीयाना। मति ओरू सही नियमानुसार ताकना ओसो पाड़ना गलतिंग किन दुहरे कीयानायो। ओर कठमुल्लावाद ता त्याग कीयाना ओसो खुद किन पुस्तक लोप्पा रास्ता वाक्यंग एवनले सीमित कीयानायो।

दुनिया लोप्पा सिर्फ उंदे रकम ता निज्जम ता सिद्धांत मंता। अदु वास्तविक परिस्थिति तिंची तेंडता ओसो वास्तविक व्यवहार संगे जांच-पड़ताल आता सिद्धांत आंदू। मना समझदारी ते बदे वेने चीज सिद्धांत इंदाना लेक्का हिल्ले। स्टालिन वेहत्ता लेक्का व्यवहार संगे संबंध हिल्ला

सिद्धांत उद्देश्य हिल्ला सिद्धांत आंता।³ उद्देश्य हिल्ला सिद्धांत अंगडम ओसो झूठ मंदिता अदिन काजे अद सिद्धांत किन त्याग कीयाना। बोरु इद अंगडम ता सिद्धांत किन प्रचार कींतोर ओरा विरोध कीयाना। मार्क्सवाद-लेनिनवाद वेल्ले सही ओसो वेल्ले वैज्ञानिक ओसो वेल्ले क्रांतिकारी सच्चाई आंदू। इदु असली सच्चाई तिंची पुटता ओसो असली व्यवहार तिंची परखे कित्ता सिद्धांत आंदू। मति मार्क्सवाद-लेनिनवाद ता अध्ययन कीयाना वेल्ले लोकर जीवा हिल्ला लेक्कटा कठमुल्ला-सूत्र समझेमांतोरा। इद्रम ओरू सिद्धांत ता विकास किन रोमी कींतोर अनि तम्मा ओसो दूसरा कामरेड्स ना नुकसान कींतोरा।

दूसरा बगिल, व्यावहारिक कार्य कीयाना मना कामरेड्स तम्मा अनुभव कुना दुरपयोग कींतोर ओरू वेने नुकसान तेहानूर। ओरा अनुभव वेल्ले समृद्ध मंदिता ओसो मना काजे वेल्ले मूल्यवान मंदिता। मति ओरू तम्माए अनुभव संगे खुश मत्तेके वेल्ले खतरनाक पोल्लो आयारा। ओरू तम्मा ज्ञान ज्यादातर इंद्रियग्राह्य ओसो आंशिक मंदिता ओसो ओरा लोप्पा बुद्धिसंगत ओसो सम्पूर्ण ज्ञान ता कमी मंता इंजी आल्सना: दूसरा माटा ते, ओरा लोप्पो सिद्धांत ता कमी मंता ओसो ओरा ज्ञान वेने तुलात्मक रूप ते अपूर्ण मंदिता। तुलनात्मक रूप ते पूर्ण ज्ञान हिल्ला क्रांतिकारी कार्य किन सही तरीका ते किया परमूडायो।

अद्रमे अपूर्ण ज्ञान रेंडु रकम तांग मंतांग, उंदी रेडीमेड ज्ञान इत्तेके पुस्तकिंग लोप्पा दोरकिता। दूसरा ज्यादातर इंद्रियग्राह्य ओसो आंशिक मंदिता: इव रेंडासी रकम ता ज्ञान उंदी बगिल तल दोरकी कित्ता ज्ञान मंदिता। इव रेंडासी ना समन्वय संगेने विशद ओसो तुलनात्मक पूर्ण ज्ञान दोरकी किया परमूडंता।

मति सिद्धांत ता अध्ययन कियाला काजे मजदूर वर्ग ओसो किसान-समुदाय तिंची वात्ता मना कार्यकर्ता लोर शुरुआती शिक्षा दोरकी कीयाना। इद्रम कीवेके ओरू मार्क्सवादी-लेनिनवादी सिद्धांत करिया परवोर आंतोरा। इदु शिक्षा दोरकी कीसि ओरू मार्क्सवाद-लेनिनवाद ता अध्ययन बस्केने वेने किया परिंतोरा। नन्ना सुडला मंदानास्के बस्केने मार्क्सवादी-लेनिनवादी

स्कूल ते हन्नोने। नन्ना सिर्फ इद्रमताए पोल्लोंग करियतान इत्तेके- “नावा गुरुजी इत्तोर-‘करियसोरे दायना बातल करियंतोम अदिन लगातार पाट किसोर मंदाना बचोन बेसता पोल्लो मंता एय्यो!’”⁴ मति इद पाठ्य-सामग्री वेल्ले पाड़ना मत्ता, इदिनगडल नाकिन वेल्ले फायदा आता बारांकु इत्तेके नन्ना पढ़ेमायला करियताना। इस्साल माटु कन्फ्यूशियस ना ग्रन्थ पढ़ेमायवा लेवा आधुनिक चीनी भाषा, इतिहास, भूगोल ओसो शुरूआती प्राकृतिक विज्ञान लेक्कटविन पढ़ेमांतोम। इविन किन उंदी बेरा करियतोम इत्तेके इवु हर जागा काम वांतांग। मना पार्टी ता केंद्रीय कमेटी इंजे मजदूर वर्ग ओसो किसान-समुदाय तल वात्ता मना कार्यकर्ता लोर प्राथमिक पढ़ाई कीयाना पोल्लो पोरो जोर हियाना अस्के ओरू राजानीतिक-शास्त्र, सैन्य-विज्ञान लेवेके अर्थशास्त्र, बदे वेने शाखा ता अध्ययन किया परितोर। लेवेके तम्मा समृद्ध अनुभव मत्तेकाई ओरू सिद्धांत किन इनपड़े अध्ययन किया परवोर।

तीनगडल मनोगतवाद ता मुकाबला कियाला काजे मनम इव रेंडु रकम ता लोकर मत्तादु हूड़ितोम। ओरा लोप्पा मत्ता कमी किन पूरा कियाला काजे मदद कीयाना ओरा समन्वय कीयाना। कित्ताबी ज्ञान तासना लोकर किन व्यवहार ता दिशा ते मुन्ने ओयना: इद्रम कित्तेके ओरू कठमुल्लावादी गलतिंग कीयाना तुकू बचेमायनूर। बोनकिन काम ता अनुभव मंता ओरू सिद्धांत ता अध्ययन कीयाना ओसो गम्भीरता ते अध्ययन कीयाना। सिर्फ अस्के ने ओरू तम्मा अनुभव किन सही तरीका ते समन्वय किया परनूर। सिद्धांत ता स्तर एवनल पोरो तेहा परनूर, सिर्फ अस्केने ओरू तम्मा आंशिक अनुभव किन सर्वव्यापी सच्चाई, समझेमायना भ्रम ते अरवा लेवा मंदानूर अनि अनुभववादी गलती तल बचेमायनूर। कठमुल्लावाद ओसो अनुभववाद इव रेंडासीए मनोगतवाद ता रेंडु रूपकु आंदुंग। इवु रेंडु विपरीत ध्रुव कुनगडल पुट्टितांग।

मना पार्टी लोप्पा रेंडु रकम ता मनोगतवाद-कठमुल्लावाद ओसो अनुभववाद मंता। अदु सिर्फ उंदी अंश किने हूड़िता, सम्पूर्ण किन आयो। लोकर सतर्क हिल्वेके ओरू इद्रम ता एकतरफापन उंदी कमजोरी आंदू

इंजी आल्सवेके, अदिन दूर कीयाना कोशिश किवेके गुमराह आयना सम्भावना मंदिता।

मति इव रेंडु रकम ता मनोगतवाद लोप्पा कठमुल्लावाद इंजे वेने मना पार्टी लोप्पा मंदाना मुख्य खतरा मंता। तीना कारण कठमुल्लावादी, तम्मा सच्चाई किन पुनवा मत्ता मजदूर वर्ग ओसो किसान-समुदाय तल वायना कार्यकर्ता लोरा पोरो रोब वाटना, तम्मा पिछलग्गू बने कियाला काजे मार्क्सवाद ता रूप धारण किया परितोर। ओरू वेल्ले सीदा-साधा लेय्योरा पोरो रोब वाटसी ओरकिन तम्मा जाली ते हिरकी किया परितोर। माटु कठमुल्लावाद पोरो काबू कीवेके, कित्ताबी ज्ञान तासना कार्यकर्ता लोर तम्मा विचार वात्ता लेक्का कार्यकर्ता लोरा संगे कलियनूर ओसो व्यवहारिक चीज कुना अध्ययन कियानोर। अस्के सिद्धांत ओसो अनुभव ता समन्वय कीयाना वेल्ले बेसता कार्यकर्ता लोर संगे ने उचुन निज्जम ता सिद्धांतकार वेने पुट्टितोर। माटु कुठमुल्लावाद पोरो काबू कित्तेके, व्यावहारिक अनुभव वाले कामरेड्स किन बेसता शिक्षक दोरकानूर, ओरू ओरा अनुभव किन सिद्धांत ता स्तर एवनल पोरो तेहानूर ओसो इद्रम ता अनुभववादी गलतिंग निगडल बचेमायाला काजे ओरा सहायता कियानूर।

“सिद्धांतकार” ओसो “बुद्धिजीवि” रा बारे ते अंगडम ता विचार कु आयवा वेल्ले कामरेडस लोप्पा “सिद्धांत किन व्यवहार संगे काल्पना” ता बारे ते वेने उंदी अंगडम ता विचारकु दिसिंतांग अनि इवु वाक्यकु हमेशा ओराए तोड्डी ते मंदितांग। ओरू पोल्लोंग हमेशा “काल्पना” कींतोर मति असल ते ओरू “अलग कियाला” आलिसंतोर। बारांकु इत्तेके ओरू काल्पना कोशिशे किवोर आंतोर। मार्क्सवादी-लेनिनवादी सिद्धांत किन चीनी क्रांति ता व्यवहार संगे बद्रम काल्पना? वडकना आम भाषा ते वेहाना इत्तेके इदु काम “टार्गेट वाटसी काडी एस्सना” लेक्का कीयाना। मूंड टार्गेट कुना संबंध वेने मार्क्सवाद-लेनिनवाद ता चीनी क्रांति संगेने मंता। मति उचुन कामरेड्स “बिना टार्गेट वाटवा लेवा काडी एस्सितोर”, अंधाधुंध काडिंग एस्सितोर ओरू क्रांति किन नुकसान किया मंतोर। उचुन कामरेड्स मूंड टार्गेट कुन सिर्फ बोयसोरे वाह-वाह किया मंतोर अनि

“बचोन बेसता काड़ी मंता! बचोन बेसता काड़ी मंताए एय्यो!” इंतोर, मति ओरू अविन टार्गेट वाटसी एस्सला आल्सोर आंतोर। इद्रमतोर सिर्फ बेस-बेसे इंजोर मंदितोर अनि क्रांति संगे ओरा बदे संबध मन्नो आंता। मार्क्सवाद-लेनिनवाद ता काड़ी चीनी क्रांति ता टार्गेट किन टार्गेट वाटला काजे इस्तेमाल कीयाना। बस्के एवनल इद पोल्लो किन स्पष्ट रूप ते समझेमायम अस्के एवनल मना पार्टी ता सैद्धांतिक स्तर इनपड़े पोर्रो तेहा परमूडायो ओसो चीनी क्रांति किन वेने इनपड़े सफल किया परमूडायो।

मना कामरेड्स मार्क्सवाद-लेनिनवाद ता अध्ययन दिखावा काजे कीयानायो इंजी समझेमायना। लेवेके ताना लोप्पा बदे गुप्त पोल्लो मंता इंजी अदिना अध्ययन कींतोम इंजी वेने आयवा माटु अदिना लोप्पा सर्वहारा वर्ग ता क्रांतिकारी कार्य किन जीत ता बगिल ओयना विज्ञान आंदू इंजी अध्ययन कींतोम इंदाना पोल्लो किन समझेमायना। इंजे वेने मार्क्सवाद-लेनिनवाद ग्रन्थ कुना उचुके पोल्लोंग किन सब्बे रोग कुना दवा लेक्का समझेमायानोरा संख्या वेल्ले मंता। इद्रमतोर पिल्ला-पेकोरा लेक्का अज्ञानता ता शिकार मंदितोर वीरकिन मनम समझे कीयाना। बोरू मार्क्सवाद-लेनिनवाद किन धार्मिक मंत्र समझमांतोर ओरू इद्रमताए अज्ञानी लोकुर आंदुर। इद्रम तोर किन माटु स्पष्ट रूप ते “मीवा मंत्र अंगडम मंता इंदाना।” मार्क्स, एंगेल्स, लेनिन ओसो स्टालनि बार-बार मना सिद्धांत बदे कठमुल्ला-सूत्र आयो, इदु कार्यवाही ता मार्गदर्शक आंदु इंजी वेहितोर। मति इद्रम तोर निज्जमे वेल्ले महत्वपूर्ण मत्ता पोल्लो किन मरंगितोर। चीनी कम्युनिस्ट लोर किन ओरू मार्क्सवादी-लेनिनवादी रुझान, दृष्टिकोण ओसो तरीका किन अनि चीनी क्रांति ता बारे ते लेनिन स्टानिल ना शिक्षांग किन लागू कीयाना लोप्पा निपुण बनेमायनूर ओसो इदिनकु वेने मुन्ने हंजी ओरू चीनी इतिहास ओसो क्रांति ता सच्चाई ता बारे ते गंभीर खोज कीसि अलग-अलग इलाकांग लोप्पा चीन ता जरूरत किन पूरा कियाला काजे सृजनात्मक तरीका ते कार्य किया परनूर अस्केने सिद्धांत किन व्यवहार संगे काल्पनोर इंजी मानेमायमूडायर। ठोस रूप ते बाताले कियवा लेवा सिद्धांत ओसो व्यवहार किन काल्पना पोल्लोंगे कीयाना अंगडम आंता।

बारांकु इत्तेक इद्रम पोल्लोंग बोराई नूर सालकु एवनल कीतेकाई बाताले फायदा मन्नो आंता। समस्यांग ना बारे ते उंदी मनोगतवादी ओसो उंदी बगिल ता रुझान ता विरोध कियाला काजे माटु कठमुल्लावादी मनोगतवादी ओसो उंदी बगिल तल आल्सना किन नष्ट कीयाना।

पूरा पार्टी लोप्पा अध्ययन-शैली ते सुधार कियाला काजे मनोगतवाद ता विरुद्ध संघर्ष कीयाना ता बारे ते नेंडु उचुक पोल्लोंग वेहत्ताद मंता।

इंजे नन्ना संकीर्णतावाद ता सवाल किन पोयिताना।

बीस साल ता अग्नि-दीक्षा पेरेके मना पार्टी लोप्पा इंजे संकीर्णतावाद ता दबाव खत्म आता। मति पार्टी लोप्पाटा संबंधकु ओसो बाहरी संबंध कुना लोप्पा संकीर्णतावाद ता अवशेष कु इंजे वेने मंतांग। अंदरूनी पार्टी संबंध कुना लोप्पा संकीर्णतावाद रुझान तल पार्टी कामरेड्स ना लोप्पा अलगाव पुट्टिता। इदु पार्टी ता अंदरूनी एकता ओसो एकजुटता किन नुकसान कीता। बाहरी संबंध कुना लोप्पा संकीर्णतावादी रुझान तल पार्टी ता बाहरी लोकुरा संगे अलगाव बेरसिंता ओसो पूरा जनता किन एकता कीयाना पार्टी काम किन नुकसान कीता। इव रेंडासी गलत रुझान कुना उन्मूलन कीसिए सब्बे पार्टी-सदस्य लोरा नडमा ओसो मना देश ता पूरा जनता नडमा एकता कीयाना महान काम किन पार्टी रोमवा लेवा किया परिंता।

पार्टी लोप्पा संकीर्णतावाद ता अवशेष बद्रम मंदिंतांग? मुख्य रूप ते अवु दोड़ रास्ता लेक्का मंतांग:

1. “स्वतंत्रता” ता मांग कीयाना। उचुन कामरेड्स सम्पूर्ण हित किन आयवा सिर्फ अंश ता हित किने हूडितोर: ओरू हमेशा अद आंशिक काम पोरी ने जोर वाटितोर। इविना काजे ओरू खुद जिम्मेदार मंदिंतोर अनि सम्पूर्ण हित कुन हमेशा तन्नाए आंशिक हित कुना लोप्पा तासला आल्सितोर। ओरू पार्टी ता जनवादी केंद्रीयता प्रणाली किन समझेमायोर: ओरू कम्युनिस्ट पार्टी किन सिर्फ जनवाद ताए जरूरत आयवा केंद्रियता ता वेने ज्यादा

जरूरत मंता इंजी समझेमायोरो। ओरू अल्पमत-बहुमत ता अनुसार, दोड़ता स्तर पोरोटा स्तर अनुसार, अंश, सम्पूर्ण ता अनुसार अनि सब्बे पार्टी सदस्य पार्टी ता केंद्रीय कमेटी ता अनुसार मंदाना जनवादी केंद्रीयता ता प्रणाली किन मरंगंतोरो। चांग क्वो-थाओ तन्ना किन केंद्रीय कमेटी तल “स्वतंत्र” तासना पोल्लोंग कियानोरो। अद्रमासी ओरू पार्टी संगे गदारी कीयाना “पोल्लोंग” कित्तोर अनि क्वोमिंगतांग ता जासूस बनेमातोरो। मति बद संकीर्णतावाद ता पोल्लोंग माटु इगा किया मंतोम अदु ज्यादा गंभीर रकम ता हिल्वेकाई, तानगडल माटु सतर्क मंदाना ओसो विभिन्न रूप ते दिसना फूट किन खत्म कीयाना। मनम मना कामरेड्स किन तम्मा सम्पूर्ण हित किन ध्यान तासना इंजी प्रोत्साहित कीयाना। हर पार्टी सदस्य काजे अनि कार्य ता हर शाखा लोप्पा, हर स्टेटमेंट लोप्पा, हर कार्यवाही लोपा पूरा पार्टी हित किन केंद्र बिंदु बने कीयाना। इद नियम ता उल्लंघन कीयाना अधिकार बोनकिने हिल्ले।

बोरु इद्रम “स्वतंत्रता” ता पोल्लोंग कींतोर ओरू हमेशा “नन्ना मुन्ने” इंदाना सिद्धांत संगे टुंडसी मंदितोर अनि व्यक्ति ओसो पार्टी नडमा ता संबंध ता सवाल ता बारे ते हमेशा गलत रुझान लागू कींतोर। तन्ना पोल्लोंग संगे पार्टी ता सम्मान कीयाना लेक्का दिखावा कींतोर, मति व्यवहार ते खुद किन मुन्ने ओसो पार्टी किन गौण तासितोर। इद्रम तोर बाता कियाला आल्सितोर? इद्रम तोरा सम्पत्ति ओसो ओहदा ता करविने मंदितोर ओसो वाहवाही लूटे कियाला आल्सितोर। इद्रम तोर किन काम ता बदे शाखा ते बदे जिम्मेदारी सौंपे कियमूडातास्के ओरू तम्मा “स्वतंत्रता” ता पोल्लोंग कीयाना शुरू कींतोर। तन्ना इद लक्ष्य किन पूरा कियाला काजे ओरू उचुन मुल किन लोप्पा पिडिंगितोर, उचुन मुल किन बाहर वाटसितोर। कामरेड्स ना नडमा बोल्लितोर, चुगलिंग कीयाना दलाली कीयाना तरीकांग लागू कीसि पूंजीपति वर्ग ता राजनीतिक पार्टिंग ना कोड़ही कार्यशैली किन कम्युनिस्ट पार्टी लोप्पा लागू कींतोर। ओरू

तम्मा बेइमानी ता कारण तेने असफल मंदिंतोरा। नन्ना, मनम ईमानदारी ते काम कीयाना इंजी इंतान बारांकु इत्तेके ईमानदारी ता रुझान लागू कियवा लेवा इद दुनिया ते बदे वेने काम पूरा किया परवोम। ईमानदार लोकरु बोरु मंदिंतोर? मार्क्स, एंगेल्स, लेनिन ओसो स्टालिन ईमानदार मंतोर, वैज्ञानिक लोकरु ईमानदार मंतोर। बेईमान लोकरु लोकरु बोरु? त्रात्सकी, बुखारिन, छन तू-श्यू ओसो चांग क्वो-थाओ वेल्ले बेईमान लोकरु आंदुर ओसो व्यक्तिगत हित ओसो बदे आंशिक अधिकार काजे “स्वतंत्रता” पोल्लोंग कींतोर ओरू वेने बेईमान मंदिंतोर। सब्बे लब्बड ता लोकरु ओसो वैज्ञानिक रूप ते तम्मा काम कियवा लेवा खुद किन वेल्ले समझदार ओसो चालाक समझेमांतोर। मति असल ते ओरू वेल्ले बकवल मंदिंतोर ओर आखरी ते कडियसी-पुडियसी डोल्लिंतोर। मना पार्टी स्कूल ता विद्यार्थिर् इद समस्या पोरो जरूर ध्यान हियाना। मनम उंदी केंद्रित, एकीकृत पार्टी ता निर्माण कीयाना ओसो गुटबाजी ता सब्बे सिद्धांतहीन संघर्ष कुन पूराए खत्म कीयाना। मनम व्यक्तिगत ओसो संकीर्णतावाद ता विरोध कीयाना, अस्केने माटु मना पूरा पार्टी किन कदम-कदम काल्पसोर ताकना ओसो समान उद्देश्य काजे संघर्ष कीयाना लेक्का बने किया परितोम।

बाहर तल वात्ता ओसो स्थानीय कार्यकर्ता लोर एकता आयना ओसो संकीर्णतावादी रुझान कुना विरोध कीयाना। बाहर तल वातोर ओसो स्थानीय कार्यकर्ता लोरा आपसी संबंध कुना बगिल विशेष ध्यान कीयाना जरूरी मंता बारांकु इत्तेके वेल्ले जापानी-विरोधी आधार-इलाकांग सिर्फ आठवीं राह सेना ओसो पूना चौथी सेना एवता पेरकेने स्थापना कित्ताद मंता ओसो वेल्ले स्थानीय काम सिर्फ बाहर ता कार्यकर्ता लोर वात्ता पेरके ने विकसित आता। मना कामरेड्स इद्रम ता परिस्थितिंग ने मना आधार इलाकांग सुदृढ़ बनेमायना, ओसो मना पार्टी अगा मजबूत आयाना इत्तेके बाहरी ओसो स्थानीय रेंडासी रकम ता कार्यकर्ता लोर उंदी आयना अनि स्थानीय कार्यकर्ता लोर किन बेहरा संख्या ते तैयार कीसि ओरकिन विकसित लागिंता इंदाना पोल्लो किन समझेमायना। लेवेके आया परवो। बाहर तल वात्ता ओसो स्थानीय कार्यकर्ता लोरा तम्मा-तम्मा क्षमतांग

ओसो कमजोरिंग मंदितांग बदे वेने रकम ता उन्नति काजे ओरा क्षमतांग नगडल करियसी ओरा कमजोरिंग किन दूर कीयाना। जनता संगे संबंध बने कीयाना पोल्लो ने बाहार तल वात्ता कार्यकर्ता लोर साधारण रूप ते स्थानीय कार्यकर्ता लोरा मुकाबला किया परवोर आंतोर। उदाहरण तुकू नाकिने हूड़ाटु। नन्ना उत्तरी शेनशी लोप्पा पांच-छै साल एवनल मत्तान, मति इगाटा परिस्थिति किन समझेमायला ओसो जनता ना संगे संबंध बने कीयाना लोप्पा स्थानीय कामरेड्स किनकले वेल्ले पेरेके मंताना। शानशी, हपे, शानतुंग ओसो बाकी इलाकांग ना जापान-विरोधी आधार-इलाकांग लोप्पा काम कियाला काजे दायाना मना कामरेड्स इद पोल्लो किन जरूर सुरता तासना। इदे आयवा उंदे आधार-इलाका लोप्पा इलाकांग पेरेके-मुन्ने आसी मत्तांकु उंदी इलाका ता स्थानीय कार्यकर्तालोर ओसो बाहर तल वात्ता कार्यकर्ता लोरा नडमा वेने अंतर मंदिता। उंदी ज्यादा विकसित इलाका तल कम विकसित इलाका लोप्पा दायना कार्यकर्ताल वेने अद इलाका ता हिसाब ते बाहर तल वात्ता कार्यकर्ताले आंदुर। ओरू वेने स्थानीय कार्यकर्ता लोरा पोषण कीयाना ओरा सहायता कीयाना पोरो वेल्ले ध्यान हियाना। कामकाज ता इनचार्ज बाहर तल वात्ता कार्यकर्ता मत्तेके इलाकांग लोप्पा स्थानीय कार्यकर्ता लोरा संगे ओना संबंध बेस हिल्वेके, साधारण रूप ते ओना मुख्य जिम्मेदारी ओसो वेने ज्यादा मंदाना। उचुक जागांग ने इद समस्या पोरो इंजे एवनल वेने वेल्ले ध्यान हित्ताद हिल्ले। उचुन मुल स्थानीय कार्यकर्ता लोर किन सुडला हूडितोर अनि “वीर बकवल, स्थानीय लोकुर बाताले पुन्नोर!” इंजी ओरा मजाक उडे कीतोर। इद्रम तोर स्थानीय कार्यकर्ता लोरा महत्व किन इनपडे समझेमाया परवो: ओरू स्थानीय कार्यकर्ता लोरा क्षमतांग ओसो खुद तन्ना कमजोरिंग किन वेने समझेमायोर आंतोर। इदु उंदी गलत ओसो संकीर्णतावादी रुझान आंदू बाहर तल वात्ता सब्बे कार्यकर्ता लोर किन स्थानीय कार्यकर्ता लोरा संगे जीवा कीसि व्यवहार कीयाना ओसो ओरा लगातार मदद कीयाना। ओरा मजाक उडे कीयाना लेवेके ओरा पोरो हमला कीयाना अधिकार इनपडे हिल्ले। डावुट हिल्वा, स्थानीय कार्यकर्ता लोर किन वेने बाहर तल वात्ता

कार्यकर्ता लोरा क्षमतांग नगडल करियाना ओसो गलत, संकीर्ण विचार कुन दूर कीयाना अस्के ने स्थानीय ओसो बाहर तल वात्ता कार्यकर्ता लोर आपस ते कलियसी उंदी आया परितोर। “ओरा” ओसो “मावा” ता बदे मतभेद मन्नो आया ओसो इद्रमे संकीर्णतावादी रुझान तिंची बचेमायमूडायर।

इदे पोल्लो सेना लोप्पा काम कीयाना कार्यकर्ता लोर ओसो स्थानीय काम कीयाना बाकी कार्यकर्ता लोरा संबंध ते वेने लागू आंता। ओरू पूर्ण रूप ते उंदी आयाना अनि संकीर्णतावादी रुझान कुना विरोध कीयाना। सेना ता कार्यकर्ता लोर किन स्थानीय कार्यकर्ता लोरा मदद कीयाना ओसो स्थानीय कार्यकर्ता लोर किन सेना ता कार्यकर्ता लोरा मदद कीयाना। ओरा नडमा मतभेद पुट्टेके रेंडासी रकम ता कार्यकर्ता लोर वरोर दूसरोना बारे सहनशीलता रुझान लागू कीसि सही आत्मालोचना कीयाना। बेगा सेना ता कार्यकर्ता लोर निज्जमे नेतृत्व ता पद ते मंतोर, अगा स्थानीय कार्यकर्ता लोरा संगे ओना संबंध बेस हिल्वेके इदिना जिम्मेदारी मुख्य रूप ते ओना पोरोने मंदाना। मुन्ने सेना ता कार्यकर्ता लोर खुद जिम्मेदारी किन समझेमायना ओसो स्थानीय कार्यकर्ता लोरा बारे ते सहनशीलता रुझान लागू कीयाना, अस्केने आधार-इलाकांग लोप्पा मना युद्ध ता कोशिश कु ओसो निर्माण कार्य सही तरीका ते मुन्ने दायना लेक्कटा परिस्थिति बनेमाया परिंता।

अलग-अलग फौजी युनिटकु, विभिन्न इलाकांग ओसो विभिन्न विभाग कुना लोप्पा वेने आपसी संबंध कुने इदे पोल्लो लागू कीयाना। मनम स्वार्थपूर्ण विभागवाद ता रुझान कुना विरोध कीयाना। बारांकु इतेके इविना लोप्पा उंदी दल ता अधिकार कुन ध्यान हीसी दुसरा दल ता अधिकार कुना लोप्पा कम ध्यान हियमूडांता। बोरो दूसरोरा मुश्किल कुना बारे ते उदासीनता ता रुझान लागू कींतोर, मांग कित्तेके वेने कार्यकर्ता लोर किन दूसरा दल लोप्पा लोहला तैयार आयोर ओसो तुलनात्मक रूप ते कम क्षमता वाले कार्यकर्ता लोर किन दूसरा दल कुना लोप्पा लोहितोर, ओरू “पडोसी पोल्लम किन तन्ना काम वायवा एर ता सफाई कीयाना

साधन बने कियाला” आल्संतोरा। दूसरा विभाग, इलाकांग ओसो लोकुरा बारे ते उचुन वेने आल्सोर, ओरू स्वार्थी विभागवादी मंदितोर, इद्रम तोरा लोप्पा कम्युनिस्ट भावनांग इनपड़े मन्नोग आंतांगा। सम्पूर्ण रूप ते ध्यान तासवा लेवा मंदाना विभाग, इलाकांग ओसो लोकुरा बारे ते उदासीन मंदाना, उंदी स्वार्थी विभागवादी विशेषता आंदू। मनम इद्रम तोरकिन ज्यादा से ज्यादा शिक्षित कीयाना अनि स्वार्थी विभागवाद उंदी संकीर्णतवादी रुझान आंदू इंजी ओरकिन समझे कीयाना पोल्लो पोरो ध्यान हियाना। इदिन विकसित आयला हीतेके इदु वेल्ले खतरनाक पोल्लो बनेमायरा।

उंदी दूसरा समस्या पाड़ना ओसो पूना कार्यकर्ता लोरा संबंध ते मंता। जापानी आक्रमण विरोधी युद्ध शुरू आता पेरेके मना पार्टी तन्ना किन वेल्ले विकास कित्ता। बेहरा संख्या ते पूना कार्यकर्ता लोर पुटतोरा। इदु वेल्ले बेसता पोल्लो मंता। सोवियत संघ ता कम्युनिस्ट पार्टी (बोलशेविक) ता अठरावी कांग्रेस लोप्पा कामरेड स्टालिन तन्ना रिपोर्ट ते इद्रम इत्तोर- “पाड़ना कार्यकर्ता लोरा संख्या हालनाचोन हिल्ले, ओरू वेल्ले कम मंतोर अनि प्रकृति ता नियमानुसार ओरा लोप्पाडल उचुन मुल मुय्यतोर वेने आया मंतोरा।” इगा कामरेड स्टालिन सिर्फ कार्यकर्ता लोरा परिस्थिति ता बारे तेने आयवा प्राकृतिक नियम कुना बारे ते वेने चर्चा किया मंतोरा। मना पार्टी लोप्पा पाड़ना कार्यकर्ता लोरा संगे एकता कीसि काम कीयाना पूना कार्यकर्ता लोर वेल्ले कम मंतोर, इद्रमे मत्तेके मना काम ठप्प आयारा। अदिन काजे सब्बे पाड़ना कार्यकर्ता लोर पूना कार्यकर्ता लोरा वेल्ले गिर्दा ते स्वागत कीयाना अनि ओरा संगे वेल्ले जीवा कीसि व्यवहार कीयाना। डावुट हिल्ला, पूना कार्यकर्ता लोर तम्मा कमजोरिंग मंदितांगा। ओरकिन क्रांति लोप्पा शामिल आसी वेल्ले दिव्यांग आताद हिल्ले ओसो ओरा अनुभव वेने कम मंता। ओरा लोप्पाटल उचुन मुल अनिवार्य रूप ते पाड़ना समाज ता खराब विचारधारा ता जुट्टा वेने तम्मा संगे तच्चि मंदानूरा। मति ओरा कमजोरिंग शिक्षा संगे, क्रांति ता ज्वाला लोप्पा फौलाद बनेमासी तीरम-तीरम दूर आयनुंगा। पूना कार्यकर्ता लोरा क्षमतांग इत्तेके स्टालिन

वेहत्ता लेक्का ओरू पूना चीजकुना बारे ते वेल्ले संवेदनशील मंदितोर अदिन काजे वेल्ले जोश ओसो सक्रिय मंदितोर-इव गुण उचुन पाड़ना कार्यकर्ता लोरा लोप्पा मन्नोंग आतांग। 5 पूना ओसो पाड़ना कार्यकर्ता लोर किन वरोनकु-वरोना सम्मान किया लागिंता। वरोनकु-वरोनगडल करियाना ओसो वरोर-वरोना क्षमतांग नगडल करियसी तम्मा कमजोरिंग किन दूर कीयाना अस्के ने ओरू मना काम लोप्पा जीवा कीसि शामिल आंतोर ओसो संकीर्णतावादी रुझान तल बचे माया परितोर। बेगा पाड़ना कार्यकर्ता लोर मुख्य रूप ते काम ता इनचारज मंदितोर, अगा पूना कार्यकर्ता लोरा संगे ओरा संबंध बेस हिल्लेके, इदिना मुख्य जिम्मेदारी पाड़ना कार्यकर्ता लोरा पोरो मंदिता।

अंश ओसो सम्पूर्ण ता संबंध, व्यक्ति ओसो पार्टी ता आपसी संबंध, बाहर तल वातोर ओसो स्थानीय कार्यकर्ता लोरा आपसी संबंध, सेना ओसो बदे दूसरा यूनिट कुना आपसी संबंध, बदे रेंडा इलाकांग ना आपसी संबंध, बदे रेंडु विभाग कुना आपसी संबंध अनि पाड़ना ओसो पूना कार्यकर्ता लोरा आपसी संबंधकु-इव सब्बे संबंधकु पार्टी ता अंदरूनी संबंधकु आंदुंगा। इव सब्बे संबंध कुना लोप्पा कम्युनिज्म ता भावना किन बेरसी कीयाना ओसो संकीर्णतावाद रुझान कुना खिलाफ सतर्क मंदांना जरूरत मंता। अस्केने मना पार्टी लाईन सही मंदिता ओसो सब्बतोर कलियसी ताकमूडांता, अस्केने बेस लड़ेमाया परमूडांता। इदु वेल्ले महत्वपूर्ण समस्या आंदू अदिन काजे इदिन किन पार्टी ता कार्यशैली लोप्पा सुधार कीयानास्के मनम पूर्ण रूप ते हल कीयाना। संकीर्णतावाद संगठनात्मक संबंध का लोप्पा मनोगतवाद ताए उंदी रूप आंदू। मनम मनोगतवाद तल मुक्त आयना लेवेके सत्य ता खोज कीयाना मार्क्सवादी-लेनिनवादी भावना किन बेरसी कीयाना इतेके मनम पार्टी तल संकीर्णतावाद ता अंश कुन खत्म कीयाना। अनि पार्टी लोप्पा पूर्ण एकता ओसो एकजुटता बनेमायाना इंजी पार्टी ता अधिकार व्यक्तिगत लेवेके बदे उंदी अंश ता अधिकार तुकू पोरो मंता इंजी चिन्हित कीयाना।

संकीर्णतावाद ता अंश किन सिर्फ पार्टी ता अंदरूनी संबंध तिंचिए आयवा अविन पार्टी ता बाहरी संबंध कुना लोप्पाटल वेने खत्म कीयाना। बारांकु इत्तेके: माटु सिर्फ पूरा पार्टी कामरेड्स किने एकता कीसि दुश्मन किन हारे किया परवोम, सिर्फ पूरा देश ता जनता किन एकता कीसिए दुश्मन किन हारे कीयाना परिंतोम। चीनी कम्युनिस्ट पार्टी हत्ता बीस साल तल पूरा देश ता जनता किन उंदी कीयाना महान ओसो कठीन काम किया मंता। जापानी आक्रमण विरोधी युद्ध शुरू आता पेरेके इद काम मुन्ने तुकु वेने ज्यादा बेहरा सफलता दोरकी कित्ता। इद्रम कीतेकाई जनता संगे मना कामरेड्स ना व्यवहार तरीका सही मंत्ता ओसो संकीर्णतावादी रुझान तिंची पूरा मुक्त आतोर इंजी आयो। असल इत्तेके कामरेड्स ना उंदी हिस्सा ते संकीर्णतावादी रुझान इंजे वेने मंत्ता। इदे आयवा उचुन कामरेड्स ना लोप्पा इत्तेके इद रुझान वेल्ले गंभीर रूप ते मंत्ता। मना वेल्ले कामरेड्स गैर पार्टी लोकुरा संगे घमंडी व्यवहार कींतोर, ओरकिन सुडला हूडिंतोर, ओरा सम्मान कीवोर, ओरा क्षमतांग किन स्वीकार कियाला इनकार कींतोर। इदु निज्जमे उंदी संकीर्णतावादी रुझान आंदू इद्रम ता कामरेड्स उंदी-रेंडु मार्क्सवादी पुस्तरकिंग पढेमासी वेल्ले सहनशीलता ते व्यवहार कियवा लेवा घमंडी व्यवहार संगे निंडसी मंदिंतोर। ओरू खुद ता ज्ञान अधुरा मंत्ता इंदानदु समझेमायवा लेवा हमेशा दूसरोर किने बकवल समझेमांतोर। मना कामरेड्स गैर पार्टी लोकुरा तुलना ते मना पार्टी सदस्य लोर हमेशाए अल्पसंख्या ते मंदिंतोर इंदानदु निज्जमे इंजी समझेमायना। इंजे हूडाटू-100 लोप्पाटल वरोर मानेय कम्युनिस्ट मत्तेके, चीन ता 45 करोड़ आबादी लोप्पाट 45 लाख कम्युनिस्ट आंतोर। इत्तेके मना पार्टी सदस्य लोरा संख्या इचोन बेरस्तेकाई सिर्फ कुल 1 प्रतिशते आंता ओसो गैर पार्टी लोकुरा संख्या 99 प्रतीशता। इद्रम मत्तास्के मनम गैर पार्टी लोकुरा संगे एकता कियवा मंदाना ता कारण बातल मंत्ता? मना संगे एकता कियाला आल्सानोर ओसो किसोर मंदानोरा बारे ते हूडतेके, मनम ओरा संगे एकता कीयाना मना कर्तव्य आंदू ओसो ओरकिन मनगडल जेक तासना अधिकार मना किन हिल्ले। मति उचुन पार्टी सदस्य लोर मना संगे सहयोग

कियाला आल्सनोर किन सुडला हूडिंतोर अनि ओरकिन जेक तासला आल्सिंतोर। इद्रम कीयाना बदे कारण हिल्ले। मार्क्स, एंगेल्स, लेनिन ओसो स्टालिन इदिना बदे कारण वेहतोरा? ओरू बदे कारण वेहत्ताद हिल्ले। इदिना उल्टा, ओरू हमेशा मना किन जन समुदाय संगे गटिंग संबंध बने कीयाना ओसो ओरगडल अलग आयनायो इंजी वेहिंतोर। चीनी कम्युनिस्ट पार्टी ता केद्रीय कमेटी बदे कारण वेहत्ता या? हिल्ले। अदु वेने तन्ना सब्बे प्रस्ताव कुना लोप्पा उंदी वेने कारण वेहत्ताद हिल्ले। अदिना सब्बे प्रस्ताव कुना लोप्पा अदु जन समुदाय तल अलग आयवा मंदानाए पोल्लो वेहत्ता। केंद्रीय कमेटी मना किन हमेशा जन समुदाय संगे गटिंग संबंध बने कीयाना अनि अलगाव पैदा कीयानायो इंजी वेहत्ता। इद्रमे जन समुदाय तल अलगाव पुट्टी कीयाना सब्बे कार्यवाहिंग ना बदे वेने कारण हिल्ले। इदु सिर्फ मना उचुन कामरेड्स खुद लागू कित्ता संकीर्णतावादी विचारके आंदुंग। मना कामरेड्स लोप्पा इद्रम ता संकीर्णतावादी रुझान वेल्ले गंभीर रूप ते मंता ओसो पार्टी ता कार्यदिशा किन लागू कीयाना लोप्पा बाधा वाटा मंता। अदिन काजे मनम इद समस्या ता मुकाबला कियाला काजे पार्टी लोप्पा व्यापक रूप ते शिक्षा कार्य कीयाना। सबसे मुन्ने मनम मना कामरेड्स किन इद समस्या बचोन गंभीर मंता इंजी समझे कीयाना। बस्के एवनल पार्टी सदस्य गैर पार्टी कार्यकर्ता लोर ओसो गैर पार्टी लोकरु संगे एकता आयोर अस्के एवनल दुश्मन किन हारे कीयाना ओसो क्रांति किन सफल बने कीयाना मुश्किल मंता इंजी समझे कीयाना।

सब्बे संकीर्णतावादी विचार मनोगतवादी मंदितांग ओसो क्रांति ता असल जरूरत कुना संगे मेल तिन्नोंग आंतांग। अद्रमासी संकीर्णतावाद ता खिलाफ संघर्ष ओसो मनोगतवाद ता खिलाफ संघर्ष संगे-संगे ताकी कीयाना।

घिसेपिटे पार्टी लेखन ता सवाल ता बारे वडकला काजे नेंडु टाईम हिल्ले: नन्ना इदिना बारे ते दूसरा मीटिंग ते चर्चा कियाकान। घिसे पिटे पार्टी लेखन कूडा (वियर) कांजना गाड़ी लेक्का मंता, अदु वेने मनोगतवाद ओसो संकीर्णतावाद ताए उंदी रूप आंदू। अदु लोकरु किन नुकसान कींता

अनि क्रांति किन नष्ट कींता। अदिन काजे अदिन खत्म कीयाना मना काजे वेल्ले जरूरी मंता।

मनोगतवाद ता विरोध कियाला काजे मनम भौतिकवाद ओसो द्वन्द्ववाद ता प्रचार कीयाना मना पार्टी लोप्पा वेल्ले कामरेड्स भौतिकवाद ओसो द्वन्द्ववाद ता प्रचार पोरो जोर हीवोर आंतोर। उचुन मुल मनोगतवाद प्रचार किन सहन कींतोर ओसो ओरा पोरो निराश आंतोर। ओरू ओरा मार्क्सवाद लोप्पा विश्वास हिल्ले इंजी आल्संतोर, मति ओरू भौतिकवाद ता प्रचार-प्रसार ता कोशिश कीवोर अनि मनोगतवादी चीजकु पढेमांतोर लेवेके केंजितोर अनि अविना पोरो विचार किवोर आंतोर, तम्मा राय वेने हीवोर आंतोर। इदु उंदी कम्युनिस्ट रुझान आयो। इदिनगडल मना वेल्ले कामरेड्स मनोगतवादी विचार कुना जहर ता शिकार आंतोर। अद्रमासी ओरा संवेदनशीलता मारिंता। अदिन काजे मनम मना कामरेड्स ना दिमाग किन मनोगतवाद ओसो कठमुल्लावाद रुझान तल मुक्त कियाला काजे पार्टी लोप्पा जागरण आंदोलन ताकी कीयाना। मनोगतवाद, संकीर्णतावाद ओसो घिसेपिटे पार्टी लेखन कुना बहिष्कार कीयाना आह्वान कीयाना। इद्रम ता गलतिंग जापानी माल लेक्का मंतांग, बारांकु इत्तेके मना दुश्मन वेने इव गलतिंग मना लोप्पा मंदाना इंजी आल्संतोर। अदिन काजे मनम जापानी माल ता बहिष्कार कींतोम⁶ अद्रमे मनम इव सब्बे चीजकुना बहिष्कार ता वेने अनुमोदन कीयाना। मनम मनोगतवाद, संकीर्णतावाद ओसो घिसेपिटे पार्टी लेखन ता सब्बे रद्दी चीज कुना बहिष्कार ता वेने अनुमोदन कीयाना। अविन ताकला हियानायो ओसो इविन ताकी कियाला आल्सानोर किन पार्टी ता सैद्धांतिक स्तर ते पेरके अरसी मत्ता दिना फायदा एतसी अविना व्यापार कीयाना छूट हियानायो। मना कामरेड्स इद लक्ष्य काजे तम्मा मूस्कना शक्ति किन वेल्ले विकसित कीयाना ओसो ओरू बदे वेने चीज किन इस्तेमाल कीयाना लेवेके बहिष्कार कीयाना निर्णय एतना मुन्ने अदिना सही जांच-परख कीयाना। कम्युनिस्ट लोर हर चीज ता कारण परहकना। ओरू तम्मा दिमाग इस्तेमाल कीसि अविना पोरो विचार कीयाना इत्तेके सच्चाई ता अनुसार मंता या

हिल्ले ओसो असल ते अविना बुनियाद मजबूत मंता या हिल्ले इंजी: ओरू बदे वेने परिस्थिति ते कोंडा हिल्ला लेक्का मंदानायो ओसो गुलामी ता रुझान किन प्रोत्साहन कीयानायो।

आखरी ते मनोगतवाद, संकीर्णतावाद ओसो घिसेपिटे पार्टी-लेखन ता विरोध कीयानास्के मनम रेंडु पोल्लोंग ना ध्यान तासना: पहला, “गलतिंगनगडल बचे मायला काजे पाड़ना गलतिंगनगडल सबक एतना”। दूसरा, “बीमार मानेय किन बचे कियाला काजे ओना बीमारी ता इलाज कीयाना।” हत्ता कालम ते कित्ता गलतिंग ना पर्दाफाश कीयानास्के बोनकिनाई बद्रम लागियर इंजी आल्सनायो। हत्ता कालम ता सब्बे गलतिंग ना बारे ते वैज्ञानिक रुझान लागू कीसि अविना विश्लेषण कीयाना ओसो आलोचना कीयाना जरूरी मंता। अस्के ने वायना कालम ते काम ज्यादा होशियारी ते ओसो बेस किया परमूड़ायर। इत्तेके “पाड़ना गलतिंग नगडल सबक एतना।” मति गलतिंग ना पर्दाफाश कीयाना ओसो कमजोरिंग ना आलोचना कीयाना मना लक्ष्य बीमारी ता इलाज कीयाना डॉक्टर ना लेक्का मंता। इदिना इस्तेमाल माटु पेशेंट किन बचे कियाला काजे कीयाना, ओनकिन हौकला काजे आयो। पोरहकु लोप्पा मत्ता रोग तल बचे कियाला काजे पेशेंट ना पोहरकुन आपरेशन कीसि तेंडना, अस्केने ओना जीवा पिसिंता। गलतिंग कीसि मक्की कियवा लेवा अविन ईमानदारी ते सुधरे कियाला आल्संतोर ओरा मनम स्वागत कीयाना। इद्रम मनम ओरा बीमारी ता इलाज कीयाना अस्केने ओरू वरोर बेसता कामरेड बनेमांतोर। मनम मनमर्जी ते ओना पोरो अंधाधुंद प्रहार कित्तेके मनम मना लक्ष्य किन बस्केने पूरा किया परवोमा बदे विचारधारात्मक ओसो राजनीतिक बीमारी ता इलाज कीयानास्के मनम बदमिजाजी (होंग आसी) ओसो जल्दबाजी ते काम कीयानायो। “बीमार किन बचे कियाला काजे ओना बिमारी ता इलाज कीयाना” रुझान किन लागू कीयाना। सिर्फ इदे सही ओसो कारगर तरीका आंदू।

पार्टी स्कूल ता उद्धाटन कीयानास्के नन्ना वेल्ले विस्तार ते पोल्लोंग कित्ताना नन्ना वेहत्ता पोल्लोंग पोरो मना कामरेड्स आलिसतिर इंजी आशा किया मंताना(जोरदार चपोटांग नेकतांग)

नोट

1. “चीन ता क्रांतिकारी युद्ध ता रणनीति ता बारे ते समस्यांग”, नोट 37 (“माओ त्सेतुंग ना संकलित रचनांग”, ग्रन्थ 1) हूडाटू। घिसेपिटे-लेखन, ओसो “अष्टपदी(octave) निबंध” शब्द कुना संगे करसाइ कित्ता लेक्का मंदितांग। सिर्फ शैली पोरो जोर हित्ताद मदितांग, अविना सार मन्नो आंता। इद्रम ता लेख कुना हर पैराग्राफ उंदी निश्चित नियम अनुसार रासना, अदिन अक्षर कुना संख्या वेने तय अनुसार मंदिता, लेखक सिर्फ हेडिंग ता अर्थ अनुसार पिङ्गा-पिङ्गी कीसि इद्रम ता लेख रासितोर। “घिसेपिटे पार्टी-लेखन” इत्तेके क्रांतिकारी लाईन लोप्पा उचुन मुल तथ्य कुना विश्लेषण कियवा लेवा क्रांतिकारी दिस्सना वाक्यांग ओसो परिभाषांग किन डग्गी कीसि उल्टा-सीधा कींतोर। “अष्टपदी निबंध” लेक्काने इव लेख कु वेने अंगडम शब्दके मंदितांग।
2. इद 1939 दिसम्बर ते बुद्धिजीविर किन भरती कीयाना ता बारे ते चीनी कम्युनिस्ट पार्टी ता केंद्रीय कमेटी कित्ता फैसला आंदू। इदिन किन “माओ त्सेतुंग ना संकलित रचनांग”, ग्रन्थ 2 लोप्पा “बुद्धिजीविर किन बेहरा संख्या ते भरती कीयाना” हेडिंग वाले लेख प्रकाशित आता।
3. जे. वी. स्टालिन ना रचना “लेनिनवाद ता आधारभूत सिद्धांत”, भाग 3 लोप्पा हूडाटू।
4. इदु “कनफ्यूशियस ना सूक्ति-संग्रह” पोरोल ता पुस्तक ता पहला वाक्य आंदू। इद पुस्तक लोप्पा कनफ्यूशियस ओसो ओना शिष्य लोरा पोल्लोंग रास्तद मंता।
5. जे. वी. स्टालिन, “सोवियत संघ ता कम्युनिस्ट पार्टी (बोलशेविक) ता अठरावी कांग्रेस ते केंद्रीय कमेटी ता काम ता रिपोर्ट”, भाग 3, परिच्छेद 2 लोप्पा हूडाटू।
6. जापानी माल बहिष्कार कीयाना संघर्ष ता उंदी तरीका मत्ता। अदिन किन चीनी जनता बीसवी सदी तुकू मुन्ने जापानी साम्राज्यवाद ता आक्रमण कुना विरुद्ध ते, इत्तेके 1919 ता देशभक्तिपूर्ण 4 मई आंदोलन लोप्पा, 18 सितम्बर 1931 ता घटना पेरके ओसो जापानी आक्रमण विरोधी युद्ध ताकनास्के बार-बार इस्तेमाल कित्ता।

घिसेपिटे पार्टी-लेखन ता विरोध कीमुट

8 फरवरी 1942

इद भाषण येनान लोप्पा आता कार्यकर्ता लोरा उंदी बैठक लोप्पा कामरेड माओ त्सेतुंग हित्तोर।

कामरेड खाए-फंग नेटा मीटिंग ता उद्देश्य ता बारे ते इंजे-इंजे वेहतोर। इंजे नन्ना मीकिन मनोगतवाद ओसो संकीर्णतावाद संगे तन्ना प्रचार-काम ता साधन ता रूप ते लेवेके तन्ना अभिव्यक्ति कीयाना शैली ता रूप ते घिसेपिटे पार्टी-लेखन ता इस्तेमाल कियाला काजे बव तरीकांग ना इस्तेमाल आंता इंजी वेहाकाना। मनम मनोगतवाद ओसो संकीर्णतावाद ता विरुद्ध संघर्ष किया मंतोम, मति तीना संगे ने माटु घिसेपिटे पार्टी-लेखन ता वेने विरोध कीवेके अविन किन मकसी मंदाला काजे जागा दोरकसोरे मंदियर। माटु अदिन किन वेने नष्ट कितेके मनोगतवाद ओसो संकीर्णतावाद किन माटु “मात” हिया परितोम ओसो इव रेंडासी दुश्मन किन तन्ना असली रूप ते वायला मजबूर किया परितोम, इव रेंडासी किन हूडसी “सडक वेंडना हुप्पे(एल) लेक्का इविन ‘हौकाट! हौकाट!’ इंजी हर मानेय केयंतोर”, अनि मनम अविन किन हल्कोए दूर किया परितोम।

बोराई सिर्फ तन्ना पढ़ेमायला काजे घिसेपिटे पार्टी-लेखन कींतोर, अस्के ज्यादा नुकसान आयो आंता। ओरू अदिन किन बोराई दूसरा मानेय किन हींतोर अस्के पढ़ेमायनोरा संख्या दो गुणा आंता अनि नुकसान वेने ज्यादा आंता। ओरू अविन किन बदे भीति पोरो चिपके कींतोर, अविना मिमियोग्राफ बने कींतोर, अविन समाचार पत्र (न्यूजपेपर) ते छापे कींतोर लेवेके पुस्तक ता रूप ते प्रकाशित कींतोर, अस्के समस्या निज्जमे उंदी

बेहरा रूप एतित्ता। बारांकु इत्तेके इद्रम कित्तेके अदिना असर वेल्ले अरिंता। घिसेपिटे पार्टी-लेखन कियानोर हमेशा पढ़ेमायनोरा बेहरा संख्या परहकींतोर। इद्रम घिसेपिटे पार्टी लेख कुना पर्दाफाश कीयाना ओसो विनाश कीयाना अनिवार्य आता।

घिसेपिटे पार्टी-लेखन “विदेशी घिसेपिटे लेख” कुनाए उंदी रकम आंदू, लू शुन वेल्ले कालम मुन्ने तीना पोरो हमला कीतोरे।¹ मति माटु इदे पार्टी ता “अष्टपदी लेखन” बारांकु इंतोम? बारांकु इत्तेके विदेशी छाप संगे-संगे ताना लोप्पा उचुन स्थानीय गंदगी वेने मंदिता। इदिन वेने उंदी रकम ता सृजनात्मक रचना ता पोरोल हिता लेक्का मंता! मना मानेय सृजनात्मक रचनांग तैयार कित्ताद हिल्ले इंजी बोर इंतोर? इदु वेने तो उंदी सृजनात्मक रचनाए आंदू अय्यो! (टहटह इन्नाह कव्वतोर)

मना पार्टी लोप्पा घिसेपिटे पार्टी-लेखन ता उंदी बेहरा इतिहास मंता। विशेष रूप ते भूमि-क्रांति ताकनास्के बस्के-बस्के इदु वेल्ले बेरसता।

ऐतिहासिक दृष्टि ते विचार कित्तेके घिसेपिटे पार्टी-लेखन ता जन्म 4 मई आंदोलन ता प्रतिक्रिया ता रूप ते आता।

4 मई आंदोलन ताकनास्के, आधुनिक विचार वालेर क्लासिकी चीनी भाषा ते इस्तेमाल ता विरोध कितोर अनि ताकसोर मत्ता चीनी भाषा ता इस्तेमाल कीयाना इंजी इत्तोर, परम्परा तल कठमुल्ला-सूत्र ता विरोध कीसि विज्ञान, जनवाद ता पक्ष एतितोर। इद्रम कीयाना एकदम सही मत्ता। अद कालम ते इद आंदोलन उंदी सजीव आंदोलन मत्ता, प्रगतिशील ओसो क्रांतिकारी आंदोलन मत्ता। अस्केटा शासक वर्ग विद्यार्थिंर किन कनफ्यूशियस ना विचार कुना शिक्षा हीयनोर अनि जनता किन कनफ्यूशियसवाद सब्बे छल-कपट ता पूजा धार्मिक कठमुल्ला-सूत्र कुना रूप ते कीयाना इंजी जबरदस्ती कियानोर, सब्बे लेखक क्लासिकी भाषा ता इस्तेमाल कियानोर। संक्षेप ते शासक वर्ग ओसो ओरा पिछलग्गू लोर बाता रास्तोर बाता पढ़ेमातोर अद विषय ओसो शैली रेंडासी ना दृष्टि ते घिसेपिटे लेखन ओसो कठमुल्ला-सूत्र कुना रूप मंदानादु। इव पाइना घिसेपिटे लेखन ओसो पाइना कठमुल्ला सूत्र मत्तांग। 4 मई आंदोलन ता

उंदी महान सफलता बाता इत्तेके अदु जनता मुन्ने पाड़ना घिसेपिटे लेखन ओसो पाड़ना कठमुल्ला-सूत्र कुना पर्दाफाश कित्ता अनि अविना विरोध कीयाना इंजी आह्वान कित्ता। अदिना संबंध ते इद आंदोलन ता उंदी दूसरा महान सफलता साम्राज्यवाद ता विरुद्ध अदिना संघर्ष, पाड़ना घिसेपिटे लेखन ओसो पाड़ना कठमुल्ला-सूत्र कुना विरोध ते कित्ता संघर्ष 4 मई आंदोलन ता महान सफलता लोप्पाटले उंदी आंदू ताना पेरके विदेशी घिसेपिटे लेखन ओसो विदेशी कठमुल्ला-सूत्र कुना जन्म आता। मना पार्टी ता उचुन मुल मार्क्सवाद ता तिरस्कार कीसि विदेशी घिसेपिटे लेखन ओसो विदेशी कठमुल्ला-सूत्र ना मनोगतवाद, संकीर्णतावाद ओसो घिसेपिटे पार्टी-लेखन ता रूप ते विकसित कित्तोर। इव पूना घिसेपिटे लेखन ओसो पूना कठमुल्ला-सूत्र आंदुंग। बचोनो कामरेड्स ना दिमाग ते इविना मोदल वेल्ले मजबूत आसी मंतांग, अद्रमासी अविन किन पूराए खत्म कियाला काजे मना किन इंजे वेने वेल्ले कठीन कोशिश किया लागिंय। इद्रमे माटु सामंतवाद ता पाड़ना घिसेपिटे लेखन ओसो पाड़ना कठमुल्ला-सूत्र कुना विरुद्ध संघर्ष कित्ता सजीव, प्रगतिशील ओसो क्रांतिकारी 4 मई आंदोलन किन उचुन मुल इनपडे उल्ले कीसितोर। इद्रमे घिसेपिटे लेखन ओसो पूना कठमुल्ला-सूत्र कुना जन्म आता। पूना घिसेपिटे लेखन ओसो पूना कठमुल्ला-सूत्र सजीव आयवा निर्जीव आंदुंग, प्रगतिशील आयवा प्रतिगामी आंदुंग, क्रांतिकारी आयवा क्रांति हरदे बाधा वाटनव आंदुंग। इत्तेके विदेशी घिसेपिटे लेखन या घिसेपिटे पार्टी लेखन 4 मई आंदोलन ता मौलिक स्वरूप ताए उंदी प्रतिक्रिया आंदू। मति 4 मई आंदोलन ता वेने कमजोरिंग मत्तांग। अद आंदोलन ता बचोनो नेता लोरा लोप्पा मार्क्सवादी आलोचनात्मक भावना ता कमी मत्ता। ओरू बद तरीका ता इस्तेमाल कियानोर अदु साधारण रूप ते पूंजीपति वर्ग ता तरीका मत्ता, इत्तेके आकारवादी तरीका मत्ता। पाड़ना घिसेपिटे लेखन ओसो पाड़ना कठमुल्ला-सूत्र कुना विरोध कीसि विज्ञान ओसो जनवाद ता पक्ष एतसी ओरू बेस कित्तोर मति तत्कालीन परिस्थिति, इतिहास ओसो विदेशी चीज कुना बारे ते ओरा दृष्टिकोण ऐतिहासिक भौतिकवाद ता आलोचनात्मक

विचार ता कमी मत्ता। ओरू निरपेक्ष ओसो सम्पूर्ण रूप ते लब्बड़ किन लब्बड़ इंदानोर अनि निरपेक्ष ओसो सम्पूर्ण रूप ते बेस किन बेस इंदानोर। विभिन्न समस्यांग ना बारे ते लागू कित्ता ओरा इद आकारवादी दृष्टिकोण ता प्रभाव आंदोलन ता विकास पोरो आरता। 4 मई आंदोलन तन्ना मुन्नेटा विकास लोप्पा रेंडु अलग-अलग धड़ाने विभाजन आता। उंदी हिस्सा विरासत ता रूप ते अद वैज्ञानिक ओसो जनवादी विचार किन लागू कित्ता अनि मार्क्सवाद पोरो आधार आसी बनेमाता। कम्युनिस्ट ओसो उचुन गैर पार्टी मार्क्सवादीर इद्रमे काम कित्तोर। दूसरा हिस्सा पूंजीपति वर्ग ता हरी पोयता। इदु आकारवाद ता दक्षिण पक्ष बगिल विकास आता। कम्युनिस्ट पार्टी लोप्पाटा परिस्थिति वेने उंदी लेक्का हिल्ला मत्ता: ताना लोप्पा वेने उचुन सदस्य लोर सही हरी तल लेसतोर अनि मार्क्सवाद किन पक्का लागू कियवा लेवा आकारवाद ता गलतिंग कित्तोर, इत्तेके मनोगतवाद, संकीर्णतावाद अनि घिसेपिटे पार्टी लेख कुना गलतिंग कित्तोर। इदु आकारवाद ता वाम पक्ष ता बगिल विकास। इद्रमे माटु घिसेपिटे पार्टी-लेखन बदे अचानक घटेमाता घटना आयवा उंदी बगिल 4 मई आंदोलन ता सकारात्मक तत्व कुना प्रतिक्रिया आंदू ओसो दूसरा बगिल अदिना नाकारात्मक तत्व कुना विरासत लेवेके इविना जारी रूप या विकसित रूप आंदू। इद पोल्लो किन समझेमातेके मावा काजे बेस आयार। बद्रम 4 मई आंदोलन ताकनास्के पाड़ना घिसेपिटे लेखन ओसो पाड़ना कठमुल्लावाद ता विरुद्ध संघर्ष कीयाना उंदी क्रांतिकारी ओसो आवश्यक कार्य मत्ता, अद्रमे नेटा मार्क्सवाद ता इस्तेमाल कीयानास्के पूना घिसेपिटे लेखन ओसो पूना कठमुल्लवाद ता आलोचना कीयाना वेने उंदी क्रांतिकारी ओसो जरूरी कार्य आंदू। 4 मई आंदोलन ताकनास्के पाड़ना घिसेपिटे लेखन ओसो पाड़ना कठमुल्लावाद ता विरुद्ध संघर्ष कियवा मत्तेके चीनी जनता तन्ना विचार कुन वीरा बंधन तिंची मुक्त किया परवो आसी मनवड़, चीन आजाद ओसो स्वाधीन आयार इंदाना आशा हिल्ले आसी मनवड़। 4 मई आंदोलन ताकनास्के इद काम सिर्फ शुरूए आसी मत्ता। उंदी महान कोशिश कीयाना जरूरत नेंडु वेने मंता। इद्रम कित्तेके मना पूरा जनता

पाड़ना घिसेपिटे लेखन ओसो पाड़ना कठमुल्लावाद तल पूराए मुक्त आयार। माटु नेंडु पूना घिसेपिटे लेखन ओसो पूना कठमुल्लावाद ता विरोध कीवेके चीनी जनता ना विचार उंदी दूसरा रकम ता आकारवाद ता बंधन लोप्पा हिरकियर। माटु पार्टी-सदस्य लोरा उंदी हिस्सा (डावुट हिल्ला उंदे हिस्सा) नड़मा मत्ता घिसेपिटे पार्टी-लेखन ता जहर किन नष्ट कियवेके, कठमुल्लावाद ता गलती तल मुक्त कियवेके मना काजे ओरा लोप्पा उंदी सजीव ओसो क्रांतिकारी विचार जागृत कीयाना मुशिकल आयार, ओरा लोप्पा मार्क्सवाद ता बारे ते गलत रुझान लागू कीयाना गलत आदत किन उन्मूलन कीयाना मुशिकल आयार। ओर लोप्पा निज्जम ता मार्क्सवाद ता व्यापक प्रचार-प्रसार ओसो विकास कीयाना मुशिकल आयार। इदे आयवा मना काजे पूरा जनता नड़मा मत्ता पाड़ना घिसेपिटे लेखन ओसो पाड़ना कठमुल्लावादी प्रभाव ता विरुद्ध ओसो वेल्ले लोकुरा नड़मा मत्ता विदेशी घिसेपिटे लेखन, विदेशी कठमुल्लावादी प्रभाव ता विरुद्ध उंदी शक्तिशाली संघर्ष ताकी कीयाना मुशिकल आयार। इव प्रभाव किन नष्ट कीसि अविन पूराए खत्म कीयाना मना लक्ष्य किन पूरा कीयाना मुशिकल आयार।

मनोगतवाद, संकीर्णतावाद ओसो घिसेपिटे पार्टी-लेखन-इव मूंडासिए मार्क्सवाद-विरोधी मत्तांग। सर्वहारा वर्ग किन इविना जरूरत हिल्ले। शोषक वर्ग किन इविना जरूरत मंता। अवु पार्टी लोप्पा निम्न-पूंजीपति वर्ग ता विचारधारा ताए उंदी रूप आंदुंग। चीन उंदी निम्न-पूंजीपति वर्ग ता बेहरा संख्या मंदाना देश आंदु। मना पार्टी इद बेहरा वर्ग ता घेराव लोप्पा मंता। मना पार्टी-सदस्य लोरा उंदी बेहरा संख्या इदे वर्ग तल वात्ताद मंता। मना पार्टी लोप्पा शामिल आयनास्के अनिवार्य रूप ते तन्ना संगे निम्न-पूंजीपति वर्ग ता प्रभाव पोयसिए वात्ताद मंता। निम्न-पूंजीपति वर्ग ता क्रांतिकारी जोश ओसो उंदी बगिल तल आल्सना किन रोमी कियवा मत्तेके ओरकिन बदले कीवेके, ओरू मनोगतवाद ओसो संकीर्णतावाद किन हल्कोए पुट्टि कियानूर। अनि अवु उंदी विदेशी घिसेपिटे लेखन लेवेके घिसेपिटे पार्टी लेखन ता रूप ते मंदानुंग।

इविना पोरों काबू कीयाना ओसो इविन किन पूराए खत्म कीयाना हल्को काम हिल्ले। इदिन किन सही तरीका ते इत्तेके तर्क संगे लोकरु किन समझे कीयाना कोशिश किसोरे पूरा कीयाना। तर्क संगे समझे कीयाना काम माटु बेस ओसो सही तरीका ते कित्तेके अदु कारगर काम कीता। तर्क संगे समझे कीयाना प्रक्रिया लोप्पा सबसे मुन्ने मनम जोर-जोर ते “निम्मा बीमार मंतिन” इंजी झटका हियाना: ताना पेरके ओनकिन इलाज कीयाना नेक सलाह हियाना।

इजे माटु घिसेपिटे पार्टी-लेखन ता विश्लेषण कियाकाल ओसो अदिना गलतिंग किन खोज कियाकाल। जहर संगे जहर किन हौकला काजे माटु आठ हिस्सांग वाले घिसेपिटे लेख कुना रूप² कुने लागू कियाकोम ओसो दोड़ रास्ता “आठ हिस्सांग” तय कियाकोम, इविन किन आठ मुख्य आरोपकु वेने इंदा परितोम।

घिसेपिटे पार्टी-लेख कुना विरुद्ध मना पहला आरोप- ओरू पोल्ले लेक्कटा शब्द कुना संगे पन्ना निहंतोरा। मना उचुन कामरेड्स किन वेल्ले बेहरा ओसो सार हिल्ला लेख रासना गिर्दा मंदिता। इद्रम ता लेखकु “उंदी चिकला ते मुडंदसी मत्ता महिला ता कालकुना हेरपुंज लेक्का वेल्ले जोम गब्बू” पोयसी मत्ता लेक्का मंदितांग। ओरकिन इचोन वेल्ले बेहरा ओसो सार हिल्ला मत्ता लेख कुना बाता जरूरत मंता? इद सवाल ता जवाब- ओरू इव लेख कुन जनता पढ़ेमायनायो इंजी तय कितोर इंजिए मंदा परिता। बारांकु इत्तेके इव लेखकु वेल्ले बेहरा ओसो सार हिल्ला लेक्का मंतांग अदिन काजे जनता अविन किन हूडसिए तल्ला होले कीसि विडससिंता। ओरू पढ़ेमायनोर इंजी बद्रम आल्सना? इद्रम ता लेख सीधा-सादा लोकरु किन धोखाए आयवा ओरा नडमा गलत प्रभाव वार्डितांग अनि गलत आदत कु पुट्टी कीतांग। हत्ता साल 22 जून ते सोवियत संघ आक्रमण ता विरुद्ध तन्ना बेहरा युद्ध शुरू कित्ता। मति 3 जुलाई ते स्टालिन हिता भाषण सिर्फ मना “मुक्ति दैनिक” ता सम्पादकीय अचोने बेहरा मत्ता। मति मना इद्रम ता महानुभवी लोरो लोप्पाटल बोराई इद भाषण किन तैयार कीसि मत्तेके, अदु बचोन बेहरा मंजी मनवड आल्सटू! कम से कम दस हजार

शब्दकु ताना लोप्पा मंजिए मन्नेंगा। माटु युद्ध ताकना कालम ते मंतोम अदिन काजे मनम परताचोन संक्षिप्त ओसो सार वाले लेख रासला कारियना। येनान लोप्पा बदे लड़ाई ताकसोर हिल्ले, मति मैदान ते मना सैनिक लोर लगातार युद्ध किया मंतोर। अनि मना जनता मना इलाका लोप्पा काम किया मंता। मना रास्ता लेखकु वेल्ले बेहरांग मत्तेके अविन बोर पढ़मायनूर? मैदान ते मत्ता मना कामरेड्स वेने बेहरा रिपोर्ट किन विचार कीवोर आंतोर। ओरू वेल्ले मेहनत ते रासिंतोर अनि इगा मनगा पढ़ेमायला काजे लोहितोर। मति अविन पढ़ेमायना हिम्मत बोर कीयाना? बेहरा ओसो सार हिल्ला लेखकु बदे काम तवु हिल्लेंग, इंदानास्के सुडला ओसो सार हिल्ला लेखकु बेस मंतांगा? हिल्ले, अवु वेने बदे काम तवु हिल्लेंगा असल इत्तेके मनम हर रकम ता सार हिल्ला पोल्लोंग किन बंद कीसियाना। मति मना सबसे मुख्य ओसो सबसे पहली काम मनम अद महिला ता गब्बु पोयसी मत्ता हेरपुंज किन गुमिया ते वाटनादु कीयाना। उचुन मुल पूछेमाया परिंतोर “‘पूंजी’ वेल्ले बेहरा हिल्लेया? इंजी, ताना बारे ते मनम बाता कीयाना ?” इदिना सीधा जवाब अदिन पढ़ेमासोर दायना। उंदी हट्टो मंता, “अलग-अलग मेड्रांग पोरो अलग-अलग पाटांग पारना” उंदी दूसरा हट्टो, “गाटो-कुसिर सवाद अनुकूल ओसो गेत्तेंग शरीर ता अनुकूल मंदाना”। मनम बदे वेने काम कींतोम अदिन किन असली परिस्थिति ना अनुकूल कीयाना। इदे पोल्लो लेख रासना ओसो भाषण हियाना बारे ते वेने लागू कीयाना। बद चीज ता विरोध कींतोम अदु पोल्ले लेक्कटा पोल्लोंग संगे निंडसी मत्ता ओसो घिसेपिटे लेख रासना आंदू। मति इद्रम इत्तेके हर चीज किन बेस मंदाला काजे अनिवार्य रूप ते सुडलाए मंदाना इंजी आयो। युद्ध कालम ते मनम संक्षेप लेख कना जरूरत मंता इंदानदु निज्जमे, मति इदिनकु वेने बेहरा पोल्लो बाता मंता इत्तेके मना काजे सार मंदाना लेखकुना जरूरत मंता। सार हिल्ला लेख कुना जरूरत हिल्लो। इदे पोल्लो भाषण हियानोरा बारे ते वेने लागू आंता। मनम सब्बे रकम ता पोल्ले लेक्कटा ओसो बेहरा भाषण हियाना बंद कीयाना।

घिसेपिटे पार्टी-लेखन कुना विरुद्ध ते मना दूसरा आरोप- जनता किन वेरियी कीयाना धमके कियाला काजे उंदी खास व्यवहार कींता। बदे-बदे घिसेपिटे पार्टी-लेख सिर्फ बेहरा ओसो सारहीने आयवा जनता किन पुंजी-पुंजी धमके कियाला काजे रास्तव मंदितांग। इदु वेल्ले खराब रकम ता जहर लेक्का मंता। बेहरा ओसो सारहीन लेख रासना अपरिपक्वता ता निशानी मंदिता मति जनता किन वेरियी कियाला काजे रासनादु अपरिपक्वता ता निशानीए आयवा बदमाशी ता निशानी वेने आंदू। इद्रम ता लोकुरा आलोचना किसोरे लू शुन उंदी बेरा इद्रम इतोर- “रांगना ओसो धमकिंग हियानादिन संघर्ष इंजी इनपडे इनमूडायो।”³ बोरु वैज्ञानिक रूप ते सही मंतोर ओरू आलोचना तुकू वेरियोरे, बारांकु इत्तेके विज्ञान निज्जम मंदिता ओसो अदु खंडन तुकू वेरियो आंता। मति बोरु घिसेपिटे पार्टी-लेख कुना रूप ते मनोगतवादी ओसो संकीर्णतावादी लेख रासिंतोर लेवेके भाषण हींतोर, ओरू तन्ना खंडन आयना तुकू वेरियंतोर, दुसरी दर्जा ता डरपोक मानेय मंदिंतोर, अदिन काजे दूसरोर किन वेरियी कींतोर। ओरू इद्रम कीसि जनता ना तोड्डी बंद किया परितोर इंजी आल्सिंतोर ओसो “बाजी जीड़ा” परितोर इंजी आल्सिंतोर। इद्रम ता व्यवहार सच्चाई किन तोहवा लेवा सच्चाई काजे बाधा वाटिंता। सच्चाई जनता किन वेरियी कियाला काजे उंदी खास व्यवहार कीवो आंता अदु सच्चाई ओसो ईमानदारी ते तन्ना पोल्लो जनता मुन्ने तासिंता ओसो व्यवहार कींता। बचोनो कामरेड्स ना लेख ओसो भाषण कुना लोप्पा हमेशा रेंडु वाक्यंग ना इस्तेमाल आंता। अविना लोप्पा उंदी वाक्य “निर्मम संघर्ष” ओसो दूसरा “निष्ठुर प्रहार”। दुश्मन ता खिलाफ लेवेके शत्रुपूर्ण विचारधारा ता खिलाफ इद रकम ता तरीका लागू कीयाना जरूरी मंता। मति खुद मना कामरेड्स ना खिलाफ अविना इस्तेमाल कीयाना गलत आंता। हमेशा दुश्मन ओसो शत्रुपूर्ण विचारधारा पार्टी लोप्पा नेंगिता, “सोवियत संघ ता कम्युनिस्ट पार्टी (बोलशेविक) ता इतिहास, संक्षेप कोर्स” परिशिष्ट ता चौथी हेडिंग ते वेहतांद मंता। बदे डारुट हिल्ला, दुश्मन ता विरुद्ध मनम निर्मम संघर्ष ताकी कीयाना ओरा पोरों निष्ठुर प्रहार कीयाना, बारांकु इत्तेके

वीरू बदमाश लोर वेने पार्टी ता विरुद्ध इवे तरीकांग इस्तेमाल कींतोरा माटु ओरा काजे सहनशील बनेमातेके ओरा षडयंत्र लोप्पा हिरकिंतोमा मति बस्के-बस्के ने गलती कीयाना मना कामरेड्स ना विरुद्ध मनम इद्रम ता तरीका लागू किया परवोमा मनम ओरा आलोचना ओसो आत्मालोचना ता तरीका लागू कीयाना। इदिना बारे ते “सोवियत संघ ता कम्युनिस्ट पार्टी(बोलशेविक) ता इतिहास, संक्षेप कोर्स” ता परिशिष्ट 5 हेडिंग लोप्पा वेहत्ताद मंता। हत्ता कालम ते उचुन कामरेड्स, बस्के-बस्के गलती कियानोरा विरुद्ध ते “निर्मम संघर्ष” ताकी कीयाना ओसो ओरा “निष्ठुर प्रहार” जोरशोर ते कियानोरा। इद्रम बारांकु कियानोर इत्तेके ओरू उंदी बगिल गलती कियानोरा बदे विश्लेषण कीवोर ओसो दूसरा बगिल धमके कियाला काजे उंदी खास व्यवहार कियोर। बोनाई संगे वेने इद्रम ता व्यवहार कीयाना सही हिल्ले, बारांकु इत्तेके दुश्मन ता विरोध कीयानास्के धमके कीयाना कार्यनीति इनपडे अंगडम आंता, अनि मना कामरेड्स ना विरुद्ध इदिना इस्तेमाल कीयाना सिर्फ नुकसाने आंता। इदु उंदी शोषक वर्ग ओसो आवारा सर्वहारा वर्ग तन्ना आदत अनुसार लागू कीयाना कार्य-नीति आंदू, मति सर्वहारा वर्ग किन इदिना जरूरत हिल्ले। सर्वहारा वर्ग ता सबसे खतरनाक ओसो कारगर हथियार ओरा गंभीरता ओसो जुझारू वैज्ञानिक रुझान आंदू। कम्युनिस्ट पार्टी दूसरा लोकुर किन धमके कीयाना भरोसा ते आयवा मार्क्सवाद-लेनिनवाद ता सच्चाई ता भरोसा ते पिसिंता। पांखंड ता सहारा एतसी तन्ना काजे सम्पति ओसो ओहदा दोरकी कीयाना विचार इत्तेके ओसो वेने अमानवीय पोल्लो आंता इंजी वेहाना जरूरते हिल्ले। संक्षेप ते फैसला कीयाना ओसो आदेश हियानास्के बदे वेने संस्था किन लेवेके लेख रासनस्के ओसो भाषण हियानास्के बोराई कामरेड किन पेरके-मुन्ने आयवा लेवा मार्क्सवादी-लेनिनवादी सच्चाई पोरो निर्भर मंदाना ओसो उंदी उपयोगी उद्देश्य ता सेवा कीयाना कोशिश कीयाना। सिर्फ तीना पोरो आधार आसिए क्रांति जीडा परमूडांता। इदिन विडचसी बाकी सब्बे अंगडम मंता।

घिसेपिटे पार्टी-लेखन ता विरुद्ध मना तीसरा आरोप-अवु पढ़ेमायनोरा बारे ते आलस्वा लेवा अंधाधुंद काडिंग एस्सना लेक्का रासिस मंदितांग। उचुक सालकु मुन्ने येनान शहर ता नालुंग दिवार कुना पोरो इद्रम ता नारा रासिस मत्ता, “मजदूर ओसो किसान लोर उंदी आयमूट अनि जापानी आक्रमण विरोधी युद्ध लोप्पा जीत हासिल कियाला काजे संघर्ष कीमूट!” इद नारा लोप्पा वेहत्ता विचार गलत हिल्ले, मति [“कुंग रन” इत्तेके मजदूर] [“कुंग” इत्तेके मजदूरी कीयाना] इद अक्षर ता टेडामेडा लकीर तिंची बनेमाता। ओसो [“रन” इत्तेक लोकर] इद अक्षर बद्रम रासिस मत्ता? इदिना तिन्नड काल लोप्पा मूंड तिरछा लकीर(रेसा) जोडेमासी मत्तां कु “रन” बनेमासी मत्ता। इदिन रासना मानेय बदे डावुट हिल्ला पाइना कालम ता विद्वान लोरा चेलाल मंदानूर, मति इदिन हूडसी निज्जमे आश्चर्य आंता इत्तेके जापानी आक्रमण विरोधी युद्ध ताकनास्के येनान शहर ता उंदी भीति पोरो इद्रम ता अक्षर कुन रासना जरूरत बारांकु आता। ओरू आम जनता किन इविन किन पढ़ेमायनायो इंजी किरिया कीसि मंदानूर बा; लेवेके इदिना दूसरा बाता कारण मंदियरा जीवा कीसि प्रचार-काम कीयाना कम्युनिस्ट लोर तम्मा पाठक लोर किन सुरता तासना ओसो बोरु लेख ओसो नारांग पाढमांतोर लेवेके ओरा भाषण ओसो वार्तांग केंजितोर इंदाना पोल्लो पोरो वेने ध्यान हियाना। हिलवेके ओरू इत्तेके ओरा लेख कुने पढ़ेमायवा मंदानूर ओसो भाषण किन केंजवा मंदानूर। हर मानेय हमेशा तन्ना रासता लेख कु लेवेके ओरू हिता भाषण किन हर मानेय हल्कोए समझेमाया परितोर इंजी आल्सितोर, मति असल इत्तेके अद्रम मन्नो आंता। ओरू घिसेपिटे पार्टी-लेखन ता रूप ते लेख रास्तेके लेवेके भाषण हीतेके, जनता ओरा पोल्लोंग बद्रम समझेमायार? मनम जनता ना सम्मान कीयाना, मनम जनता किन विचार वायना लेक्कटा लेख कु रासना। निशाना वाटसीए काडी एस्सना। जनता किन सुरता तासिसे लेखकु लेवेके भाषण हियाना। मनम वरोर दूसरो ना विचार किन समझेमायवा लेवाए बोनाई संगे गोती कियाला आल्सतेके, मनम वरोर-वरोना बेसता दोस्त बनेमाया परितोमा? प्रचार-काम कीयाना कार्यकर्ता लोर तम्मा पाठक लोरा

बारे ते जांच-पड़ताल, अध्ययन ओसो विश्लेषण कियवा लेवा पन्ने लेक्का टरटर किसोर मत्तेके बाताले फायदा दोरको आयार।

घिसेपिटे पार्टी-लेखन ता विरुद्ध मावा चौथा आरोप-इद्रम ता लेख कुना भाषा लोप्पा बिल्कुले रस मन्नो आंता। इविन किन हूडसी “प्येसान”⁴ ना सुरता वांता। मना घिसेपिटे पार्टी-लेखन ताए लेक्का शांघाई ता “सुडला प्येसान” पोरोल ता पात्र वेने वेल्ले तीखा ओसो अंगडम तवु मंदितांग। बदे लेख लेवेके भाषण लोप्पा कक्षा ता तरीकांग लेक्काने सिर्फ उचुके पोल्लोंग किन अदली-बदली कीसि बार-बार इस्तेमाल कित्तेके ओसो जीवा हिल्वा लेक्कटा पोल्लोंग ना पूराए कमी मत्तेके अवु रस हिल्वा भाषा ओसो अंगडम ता “प्येसान” कुना लेक्काए आयो या? बोराई 7 साल उमर ते प्राइमरी स्कूल लोप्पा दाखिल आंतोर उचुन बेरसतास्के मिडिल स्कूल लोप्पा दाखिला एतितोर ओसो लेय्योर आतास्के कॉलेज तल स्नातक बनेमासी पेसितोर अनि आम जनता ना संगे बदे सम्पर्क मन्नो आंता ओना, इत्तेके ओनकिन निर्जीव ओसो रस हिल्वा भाषा काजे दोषी मानेमायनायो। मति मनम आम जनता काजे काम कीयाना क्रांतिकारी लोरोम आंदोम, मनम आम जनता ना भाषा करियवेके माटु मना काम सही तरीका ते किया परवोम आंतोम। मना बचोनो कामरेड्स इंजे प्रचार-काम लोप्पा मंतोर, भाषा ता अध्ययन कीवोर आंतोर। ओरा प्रचार बिल्कुले रस हिल्वा लेक्का मंता ओसो सिर्फ उचुन मुले ओरा लेख पढेमायला लेवेके ओरा भाषण केंजला विचार कींतोर। मेहनत संगे भाषा ता अध्ययन कीयाना मना काजे बारांकु जरूरत मंता? बारांकु इत्तेके भाषा ता पूर्ण ज्ञान हासिल कीयाना हल्को काम मन्नो आंता। ताना काजे वेल्ले मेहनत संगे कोशिश कीयाना जरूरत मंता। पहली पोल्लो मनम आम जनतानगडल भाषा करियना। जनता ना शब्द-भंडार भरपूर, जोरदार, सजीव ओसो असली पिस्वल किन वेहनादु मंदिता। मना वेल्ले कामरेड्स किन भाषा ता पूर्ण ज्ञान हासिल हिल्वा कारण ते मना लेख ओसो भाषण लोप्पा जोरदार, सजीव ओसो प्रभाव वाटना लेक्कटा पोल्लोंग वेल्ले कम मंदितांग। अद्रमासी अवु वरोर हट्टा-कट्टा मानेय ना लेक्का आयवा वरोर पतला कमजोर “प्येसान” ना

लेक्का पेड़कांगे दिसिंतांगा दूसरा पोल्लो मनम बवु पोल्लो ना मना किन जरूरत दिसिंता, अविन किन विदेशी भाषानगडल पोयसी मना भाषा ते काल्पना। मनम विदेशी पोल्लॉंग किन यांत्रिक रूप ते मना भाषा लोप्पा शामिल कियवा लेवा लेवेके मनमर्जी ते अविना इस्तेमाल कीयानायो। अविन लोप्पा बवु पोल्लॉंग बेस मंतांग ओसो मना जरूरत कुन पूरा कींतांग अविन कीने शामिल कीयाना। मना वर्तमान शब्द-भांडार लोपा मुन्नेटले बचोनो विदेशी शब्द कु शामिल मंतांग, बारांकु इत्तेके चीनी भाषा ता पाड़ना शब्द-भांडार हालना लेक्का हिल्ला मत्ता। उदाहरण तुकू नेंडु मनम “कानपू” [कार्यकर्ता लोर] मीटिंग किया मंतोम ओसो “कानपू” शब्द ता उत्पत्ति उंदी विदेशी शब्द तले आता। विदेशीरा बचोनो पूना-पूना चीजकु सिर्फ पूना प्रगतिशील विचार के आयवा पूना-पूना हावभाव कुना वेने मनम लगातार लागू किसोर मंदाना। तीसरा पोल्लो मनम क्लासिकी चीनी भाषा लोप्पा मत्ता सजीव चीजकुना लोप्पाटल करियाना। मनम क्लासिकी चीनी भाषा ता मेहनत संगे अध्ययन कित्ताद हिल्ले अदिन काजे ताना लोप्पा मत्ता सजीव चीजकुना लोप्पाटल सही ओसो पूर्ण इस्तेमाल किया परताद हिल्ले। बदे डावुट हिल्ला ताकसोर हिल्ला शब्द ओसो संदर्भ-संकेत कुना इस्तेमाल मनम दृढ़ता ते विरोध किंतोम, इदु निश्चिंते मंता। मति बद चीज बेस मंता, इंजे अदिना इस्तेमाल आया मंता, अदिन किन जरूर लागू कीयाना। बोरु घिसेपिटे पार्टी-लेखन ता प्रभाव संगे दूषित आतोर, ओरू जनता ना भाषा लोप्पा विदेशी भाषांग ने लेवेके क्लासिकी चीनी भाषा लोप्पा मना काजे जरूरी मत्ता भाषा ता मेहनत ते अध्ययन किवोम आंतोम। अदिन काजे जनता रस हिल्ला निर्जीव प्रचार ता स्वागत कीवो आंता, इद्रम ता प्रभावहीन, अयोग्य प्रचारक लोर मना काजे एकदम बेकार साबित आंतोर। मना प्रचारक लोरा लोप्पा बोरु मंतोर? ओरा लोप्पा सिर्फ शिक्षक, पत्रकार, लेखक ओसो कलाकार लोरे आयवा मना सब्बे कार्यकर्ता लोर वेने शामिल मंतोर। उदाहरण तुकू सैनिक कमांडर लोर किने हूडाटू। ओरू बदे सार्वजनिक स्टेटमेंट हीवोर आंतोर, मति ओरकुन सैनिक लोरा संगे वड़कला लागिंता ओसो जनता संगे तम्मा संबंध बने कीसि तासला काजे

वड़कला लागिंता। इदु प्रचार आयवेके बाताल आंदू? बस्के वेने बोराई दूसरोरा संगे वड़कसोर मंदानास्के वेने ओरू प्रचार-कामे किसोर मंदितोरा। ओरू मूकाल हिल्वेके तो ओनकिन हमेशा बातालाई पोल्लोंग वड़कसोरे मंदा लागिंता। अदिन काजे मना सब्बे कामरेड्स भाषा ता अध्ययन कीयाना अनिवार्य मंता।

घिसेपिटे पार्टी-लेखन ता विरुद्ध मना पांचवा आरोप-हेडिंग काजे इस्तेमाल कीयाना कठीन शब्द कुने विषय किन पेश कीयाना (चीनी दवा ता दुकान खोले कीयाना लेक्का) पोरो मंता। बदे चीनी दवा ता दुकान ते हंजी उंदी कोंडा वाटतेके अगा, मीकिन बचोनो अलमारिंग ओसो दराजकु (सामान तासना पेटिंग-संदुकिंग लेक्काटवु) दिसिंतांग। अविना पोरो दवाईंग ना पोरोलकु रासिस मंदितांग-टनकल, फाक्सगलव, रेवन्दचीनी, शोरा....निज्जमे अगा मत्ता हर चीज पोरो पोरोल रासिस मंदिता। इदु तरीका किन मना कामरेड्स वेने लागू कीतोरा। तम्मा लेख ओसो भाषण कुना लोप्पा तम्मा पुस्तकिंग ओसो रिपोर्ट कुना लोप्पा सबसे मुन्ने बेहरा चीनी अंक, दूसरा नम्बर ते सुडला चीनी अंक, तीसरा नम्बर ते दस पाड़ना चीनी अंक, चौथा नम्बर ते बारा पाड़ना समयसूचक अक्षर, ताना पेरके अंग्रेजी ता वर्णमाला A,B,C,D बेहरा अक्षर, पेरके अंग्रेजी वर्णमाला ता a,b,c,d ता सुडला अक्षर, पेरके अरबी ता अंक लेक्काटा बचोनो रकमकुना इस्तेमाल कीतोरा। मनम बचोन बेसता किस्मत वालेर आंदोम-माटु उचुन वेने कोशिश कियवा लेवाए चीनी दवा दुकान खोले किया परना इंजी मना काजे मना पूरखा नोर ओसो विदेशिर रक-रकम ता संकेत-चिन्हंग बने कितोर इय्यो। बदे वेने लेख इद्रम ता संकेत-चिन्हंग संगे निंडसी मंदितांग अवु समस्यांग किन पेश कीवोंग, अविना विश्लेषण कीवोंग अविना समाधान वेने कीवोंग आंतांग। बदे वेने चीज ता पक्ष लेवेके विपक्ष ते पोल्लोंग कीवोंग, तम्मा इव सब्बे शब्दजालकु मत्तेकाई असल ते सार हिल्वाए मंदितांग ओसो उंदी चीनी दवा ता दुकान लेक्काने मंदितांग। इत्तेके इद्रम ता संकेत-चिन्हंग लेक्कटा दस पाड़ना चीनी अंक लेक्काटवु इस्तेमाल कियवा लेवा समस्यांग ना बारे ते इद्रम ता तरीकांग गलत आंदुंग।

चीनी दवा ता दुकान ता नकल कीसि लागू कित्ता तरीका, मना बचोनी कामरेड्स किन वेल्ले विचार वेने वांता, मति असल ते इदु वेल्ले अंगडम ता ओसो पिल्ला-पेकोर करसना लेक्काटा तरीका आंदू। इदु उंदी आकारवादी तरीका आंदू। इदु चीज कुना वर्गीकरण अविना अंदरूनी संबंध कुना अनुसार आयवा अविना बाहरी लक्षण कुना अनुसार कींता। बोराई अंदरूनी रूप ते वरोर-दूसरोना संगे बेमेल धारणांग किन लागू कींतोर ओसो अविन किन सिर्फ चीज कुना बाहरी लक्षण कुना अनुसार बदे लेख, भाषण लेवेके रिपोर्ट लोप्पा पेश कींतोर, अस्के ओरू धारणांग संगे खिलवाड कींतोर इंजी आल्सना। अनि वीरू बाकी लोकुर किन वेने अदे हरदे ओया परितोर। इदिना कारण ते ओरू समस्यांग पोरो विचार कियाला काजे ओसो चीज कुना सारतत्व एवनल एव्वला काजे तम्मा बुद्धि ता इस्तेमाल कियवा क, ख, ग, घ क्रम लोप्पा घटनांग ना सूची पेश कीसिए खुश आंतोर। समस्या बाताल आंदू? बदे चीज लोप्पा मत्ता अन्तरविरोध किने समस्या इंतोर। बेगानाई हल आयवा मत्ता अन्तरविरोध कुना अस्तित्व मंता, अगा समस्यांग पुट्टिंतांग। मीवा मुन्ने समस्या पुट्टियार अस्के, मीकिन उंदी पक्ष ता समर्थन ओसो दूसरा पक्ष ता विरोध किया लागियार अनि समस्या किन पेश किया लागियार। बदे समस्या किन पेश कियाला काजे मुन्ने मीकिन अद समस्या लेवेके अन्तरविरोध ता रेंडु बुनियादी पहलुंग कुना शुरूआती जांच-पडताल ओसो अविना शुरूआती अध्ययन किया लागियार, ताना पेरकेने मीटु अन्तरविरोध ता स्वरूप किन समझेमाया परितोर। इद समस्या ता खोज कीयाना प्रक्रिया आंदू। शुरूआती जांच-पडताल ओसो अध्ययन संगे समस्या ता खोज किया परमूडांता, समस्या किन पेश किया परमूडांता, मति इंजे हल किया परमूडायो। समस्या किन हल कियाला काजे सही जांच-पडताल ओसो अध्ययन कीयाना जरूरी मंता इदु विश्लेषण ता प्रक्रिया आंदू। समस्या किन पेश कियाला काजे वेने विश्लेषण कीयाना जरूरी मंता। हिल्लेके घठनांग ना कुप्पा मुन्ने मीटु समस्या लेवेके अन्तरविरोध ता मोदोल परहकला परविर आयकीरा मति इगा विश्लेषण ता प्रक्रिया इत्तेके सही विश्लेषण कीयाना। हमेशा बदे

समस्या किन पेश तो कियमूडांता मति अदिना हल आया परवो आंता, बारांकु इत्तेके चीजकुना अंदरूनी संबंध कुना खोज इंजे वेने कित्ताद हिल्ले, बारांकु इत्तेके सही तरीका ते विश्लेषण ता तरीका किन लागू कित्ताद हिल्ले। अद्रमासी बदे वेने समस्या ता आकार-प्रकार किन स्पष्ट रूप ते हूडा परवोम आंतोम, संश्लेषण किया परवोम आंतोम, समस्या किन बेस हल किया परवोम आंतोम। बदे लेख लेवेके भाषण महत्वपूर्ण मंता ओसो अदिना लक्ष्य दूसरो रा मार्गदर्शन कीयानादु मंता इत्तेके अदु सबसे मुन्ने बदे विशेष समस्या किन पेश कीयाना। इद्रम कित्तेके समस्या ता स्वरूप किन स्पष्ट किया परमूडांता अदिन हल कीयाना तरीका किन पेश किया परमूडांता: इव सब्बे कियाला काजे आकारवादी तरीकांग बेकार साबित आंतांग। बारांकु इत्तेके अवु पिल्ला-पेकोर कीयाना काम कींतांग। इद्रम ता कोडही आकारवादी तरीकांग मना पार्टी लोप्पा मंतांग, मनम अविना पर्दाफाश कियााना: सिर्फ इद्रमे मना पार्टी लोप्पा हर मानेय समस्यांग ना निरीक्षण कियाला काजे, अविन पेश कियाला काजे, अविना विश्लेषण कियाला काजे, अविन हल कियाला काजे मार्क्सवादी तरीका ता इस्तेमाल कियाला करिया परितोर: सिर्फ इद्रमे माटु मना काम किन साही तरीका ते किया परितोम। सिर्फ इद्रमे मना क्रांतिकारी काम किन सफलता दोरका परिता।

घिसेपिटे पार्टी-लेखन कुना विरुद्ध ते मना छठा आरोप- लोप्पा उत्तरदायित्व (जिम्मेदारी) ता भावना कमी मंदिता। इद भावना बेगा पैदा आंता अगा जनता किन नुकसाने आंता। पोरो वेहत्ता सब्बे दोष कुन, आशिक रूप ते अपरिपक्वता ओसो आंशिक रूप ते हालनाचोन जिम्मेदारी ता भावना कम मत्ता कारण ते पुट्टतांग। इव पोल्लो किन स्पष्ट कियाला काजे माटु तोड्डी नोरनादिन उदाहरण ता रूप ते पोया परितोम। मनम सब्बे तोरोम रोज तन्ना-तन्ना तोड्डी नोरितोम, मना बचोनो कामरेड्स दिव्या ते बचोनो बेरा मोक्कम नोरितोर। ताना पेरके दर्पण मुन्ने नितसी "जांच-पड़ताल ओसो अध्ययन" ता रूप ते तन्ना निरीक्षण कींतोर (टहटह इन्नाह कव्वतोर), मोक्कम ते बदे कमी मंदानायो इंजी। जिम्मेदारी

ता इद भावना बचोन बेहरा मंता! इद्रमे लेख रासना ओसो भाषण हियाना लोप्पा वेने माटु इद्रमे जिम्मेदारी ता भावना ता तोहतेके, मना काम गलत आयो आयार। बद चीज पेश कीयाना लेक्का हिल्ले, अदिन पेश कियमाटू। अदिना प्रभाव बाकी लोकुरा विचार कुना ओसो काम पोरो अर्रा परिंता इंदाना पोल्लो किन हमेशा सुरता तासटू। बोराई उंदी-रेंडु दिव्या एवनले तन्ना मोककम नोरवेके, बेस आयो ओसो नोरता पेरके वेने ओना मोककम पोरो उंदी-रेंडु दाग मत्तेके वेने तो बेस आयो। इद्रम ता पोल्लोग निगडल अचोन गंभीर खतरा हिल्ले, मति लेख रासना लेवेके भाषण हियाना पोल्लो इनपढ़े अलग मंता: अविना लक्ष्य दूसरो किन प्रभावित कीयाना मंदिता। इद्रम मत्तेकाई कामरेड्स इद काम किन लापरवाही तेने कींतोर: इद्रम कीयाना इत्तेके महत्वपूर्ण पोल्लो तुकू ज्यादा गौण पोल्लो तुन महत्व हियाना आंता। बचोनो लोकुर मुन्ने अध्ययन कियवाए तैयारी कियवा लेवाए रासिंतोर, लेवेके भाषण हींतोर। अनि ओरू तम्मा मोककम नोरता पेरके दर्पण हूडला विचार कींतोर, अद्रमे ओरू तम्मा लेख रास्ता पेरके अदिन बचोनो बेरा दोहरे कीवोर आंतोर अनि लापरवाही ते अदिन किन प्रकाशित वेने किसिंतोर। हमेशा इदिना “लगातार उंदी हजार शब्द पेसिंतांग, मति विषय-वस्तु तिंची दस हजार ली जेक आसोर दांतांग।” इद्रम ता लेखक लोर वेल्ले प्रतिभाशाली (गुणकारी) मंदिंतोर, मति असल ते जनता किन नुकसान कींतोर। इद जिम्मेदारी ता भावना लोप्पा मत्ता कमजोरी किन दूर कीयाना।

घिसेपिटे पार्टी-लेखन ता विरुद्ध मना सातवां आरोप-पूरा पार्टी लोप्पा जहर फैलेमांता ओसो क्रांति किन नुकसान कींता। तीना विरुद्ध मना आठवा आरोप-अदिना प्रचार आतेके देश बरबाद आयार ओसो जनता तबाह आंता। इव रेंडासी आरोपकु स्पष्ट मंतांग। इविना बारे ते विस्तार ते वेहना जरूरत हिल्ले। दूसरा माटा ते घिसेपिटे पार्टी-लेखन ता रूपान्तर कित्ताद हिल्ले ओसो रोमवा लेवा विकसित आयला हीतेके निज्जमे इदिना वेल्ले गंभीर नुकसान भोगेमाया लागियर। मनोगतवाद ओसो

संकीर्णतावाद ता जहर घिसेपिटे पार्टी-लेखन ते मकसी मंदिता। इद जहर किन फैलेमायला हीतेके पार्टी ओसो देश रेंडासी किन खतरा ते वाटिता।

पारो वेहत्ता आठ आरोपकु घिसेपिटे पार्टी-लेखन ता खिलाफ संघर्ष कियाला काजे मना आह्वान आंदू।

उंदी शैली ता रूप ते घिसेपिटे पार्टी-लेखन क्रांतिकारी भावना किन पेश कियाला काजे सही मन्नोग आंतांग। इदे आयवा अवु गुडंगा वेने पोय्या परितांग। क्रांतिकारी भावनांग ना विकास कियाला काजे घिसेपिटे पार्टी-लेखन ता त्याग कीयाना जरूरी मंता ताना जागा ते मार्क्सवादी-लेनिनवादी लेखन-शैली किन लागू कीयाना। उंदी पूना ओसो सजीवता संगे निंडसी मत्ता शैली किन लागू कीयाना। इदु लेखन-शैली वेल्ले कालम तले ताकसोर मंता। अदिना समृद्ध ओसो मना नडमा व्यापक रूप ते इंजे वेने प्रचार आताद हिल्ले। माटु विदेशी घिसेपिटे लेखन ओसो घिसेपिटे पार्टी-लेखन ता विनाश कियोकोम अस्के माटु मना पूना लेखन-शैली किन समृद्ध बने किया परितोम, अदिना व्यापक रूप ते प्रसार किया परितोम ओसो इद्रमे पार्टी ता क्रांतिकारी कार्य किन मुन्ने ओया परितोम।

पार्टी ता घिसेपिटे कार्यशैली सिर्फ लेख ओसो भाषण एवलने सीमित आयवा मीटिंग ताकी कीयाना मना तरीका लोप्पा वेने दिसिंता। “1. उद्घाटन ता घोषणा: 2. रिपोर्ट: 3. विचार-विमर्श। 4. निष्कर्ष: 5. समापना।” सुडला-बेहरा हर मीटिंग ते हर जागा ओसो हमेशा इदे गैर-लचीला तरीका ता इस्तेमाल कितेके पार्टी ता उंदी दूसरा घिसेपिटे कार्यशैली ता जन्म आयो या? मना मीटिंग लोप्पा “रिपोर्ट” पेश कियमूडांता अस्के हमेशा अवु इद्रमे ताकिंतांग: “1. अन्तरराष्ट्रीय परिस्थिति। 2. स्थानीय परिस्थिति: 3. हंदी क्षेत्र: ओसो 4. मना विभागा।” इव मीटिंग हमेशा नरकुम तल नरका एवल ताकिंतांग। इद्रम ता मीटिंग लोप्पा वडकला काजे बाताले हिल्वेकाई उचुन मुल वडकसितोरे, ओरू वडकवेके बाकी तोरा कोडेंग करवानुंग इत्ता लेक्का। संक्षेप ते असली परिस्थिति ता तिरस्कार कीयाना ओसो गैर लचीला पाडना शैली ओसो

आदत कुन गट्टिग पोयसी ताकना रुझान मना नडमा मंता। मनम इव सब्बे किन सुधरे कीयानायो या?

इस्सल बचोनो लोकुर उंदी राष्ट्रीय, वैज्ञानिक ओसो लोकुर मानेमाता शैली रूपान्तर कीयाना इंजी आह्वान किया मंतोर। वेल्ले बेसता पोल्लो मंता। मति रूपान्तर कीयाना इत्तेके पोरोटल दोड़ एवनल ओसो लोप्पाटल बाहर एवनल सही बदलाव कीयाना आंता। मति उचुन मुल उचुन वेने बदलाव कित्ताद हिल्ले ओरू वेने शैली रूपान्तर कीयाना ता आह्वान किया मंतोर। अदिनके नन्ना इद्रम ता कामरेड्स किन ओरू “रूपान्तर” कीयाना मुन्ने उचुन बदलाव कीयाना शुरू कीयाना इंजी सलाह हियाकान, लेवेके ओरू कठमुल्लावाद ओसो घिसेपिटे पार्टी-लेखन ता जाली ते फस्सेमासी मंदानूर। इदिन किन बेहरा लक्ष्य मति कम योग्यता ओसो बेहरा इच्छांग मंतांग मति गुण कम मंतांग इंदा परिंतोम, इदिनगडल बस्के वेने बाताले दोरको आंता। अदिन काजे बोराई “लोकुर जीवा कीयाना शैली बगिल रूपान्तर” कीयाना ता बारे ते मिंगता-मिंगता पोल्लॉग कींतोर मति असल ते खुद तन्ना सुडला दायरा एवनले सीमित आसी मंतोर, इत्तेके ओरू होशियार मंदाना, लेवेके बदे दिव्या जनता नडमा तल बोराई वरोर ओना पोरो अरनूर अनि पूछेमायनूर, “इद बद्रम ता “रूपान्तर” आंदु रा? इदिन नन्ना वेने उचुन हूडा परिंताना?” इंजी अस्के ओना कोंडा मुन्ने हीकट पोयसी ओरू दोड़ अरिंतोर। अदिन काजे बोराई सिर्फ अंगडम ता पोल्लॉग बोल्लवा लेवा निज्जमे ईमानदारी ते लोकुर किन जीवा कीयाना शैली बगिल रूपान्तर कियाला आल्संतोर इत्तेके ओरू जनता नडमा दायना ओरगडल करियाना, लेवेके ओना “रूपान्तर” वडिय ते वेलियसोर मंदियार। उचुन मुल लोकुर किन जीवा कीयाना शैली बगिल रूपान्तर कीयाना रट लगे कित्तोर मति जनता ना भाषा ते मूंडु वाक्यंग वेने वडका परवोर आंतोर। इदिनगडले ओरू जनता नगडल करियाना विचारे हिल्ले इंजी समझेमांता। ओरा दिमाग इंजे वेने ओरा सुडला एरिया एवनले सीमित मंता।

“प्रचार-कार्य निर्देशिका” हेडिंग ता पुस्तक लोप्पा चार लेख शामिल मंतांग, इद मीटिंग लोप्पा मीकिन तूसताद मंता, इदिन किन मीटु बार-बार पढेमायना इंजी सलाह हीताना।

इद पुस्तक ता मुन्ने टा हिस्सा लोप्पा, “सोवियत संघ ता कम्युनिस्ट पार्टी (बोलशेविक) ता इतिहास, संक्षेप कोर्स” तल पोयता लेनिन ना प्रचार-कार्य काजे कियाला लागू कित्ता तरीकांग ना चर्चा कित्ताद मंता। ताना लोप्पा बाकी पोल्लोंग संगे-संगे प्रचार काजे पर्चा रासना लेनिन ना तरीका बद्रम मत्ता इंजी वेने वेहत्ताद मंता:

लेनिन ना मार्गदर्शम ते “मजदूर वर्ग ता मुक्ति-संघर्ष ता सेंट पीटर्सवर्ग समिति” सबसे मुन्ने रूस लोप्पा समाजवाद किन मजदूर आंदोलन संगे काल्पना शुरू कित्ता। बदे कारखाना लोप्पा हड़ताल आतेके इद “संघर्ष समिति” तन्ना दल सदस्य लोरा संगे कारखाना ता परिस्थिति ता बारे ते सही जानकारी हासिल कीसि, तुरंत पर्चांग तेंडसी, समाजवादी ऐलान संगे मजदूर लोरा समर्थन कीयाना। इव पर्चांग लोप्पा उद्योगपतिर मजदूर लोरा पोरो कीयाना उत्पीड़न ता पर्दाफाश कियमूडायनदु। मजदूर लोर किन तम्मा अधिकार काजे बद्रम संघर्ष कीयाना इंजी वेहत्ताद मंदानदु अनि मजदूर लोरा मांग कुन पेश कियानदु। इव पर्चांग पूंजीवाद ता उत्पीड़न ता बारे ते, मजदूर लोरा गरीबी ता बारे ते, 12 तल 14 घंटांग काम किया लागना ओरा श्रम-दिय्या ना बारे ते ओसो ओरा अधिकार कुना पूर्ण कमी ता बारे ते सच्चाई किन स्पष्ट रूप ते पेश कियानवु। इविना लोप्पा सही राजनीतिक मांग किन वेने पेश कियमूडायनदु।

उचुन “बेस जानकारी हासिल कीयाना” अनि “सच्चाई किन स्पष्ट रूप ते पेश कीयाना” पोरो ध्यान हीमटु! ताना लोप्पा मुन्ने वेहत्ताद मंता।

1894 ता आखरी ते लेनिन बाबुशिकन पोरोल ता मजदूर ना मदद ते इद्रम ता प्रथम आंदोलनकारी पर्चा रास्तोर अनि सेंट पीटर्सवर्ग ता हड़ताल किसोर मत्ता सेमयान्निकोव कारखाना ता मजदूर लोरा पोरोल ते उंदी अपील रास्तोर।

मीकिन बदे पर्चा रासना मंता इत्तेके मीटु परिस्थिति ता बारे ते बेसता जानकारी मंदाना कामरेड्स ना संगे सलाह मशविरा कीयाना। लेनिन इद्रम ता जांच-पड़ताल ओसो अध्ययन पोरो आधार आसीए लेख रासनोर अनि काम कियानोरा।

हर पर्चा मजदूर लोरा भावना किन पक्का कियाला काजे मदद कींता। ओरू समाजवादी पार्टी ता लोकुर ओरा सहायता किया मंतोर इंजी ओरा रक्षा किया मंतोर इंजी हूड़तोरा।⁵

मनम लेनिन ना समर्थन कींतो मा? कींतोम इत्तेके मनम लेनिन ना भावना किन लागू कीसि काम कीयाना। इत्तेके मनम लेनिन कित्ता लेक्काने काम कीयाना ओसो अंगडम ता पोल्लोंग संगे पन्नांग निहनायो। मना पाठक लोर ओसो जनता ना बारे ते आल्सवा लेवा अंधाधुंद काडिंग एस्सनायो। घमंड ओसो अंगडम ता पोल्लोंग बोल्लनायो।

पुस्तक ता दूसरा हिस्सा कम्युनिस्ट इन्टरनेशनल ता सातवी विश्व कांग्रेस लोप्पा दिमित्रोव हित्ता बयान तिंची रास्ताद मंता। दिमित्रोव बातल इत्तोर? ओरू दोड़ रास्ता लेक्का वेहतोर:

मनम जनता ना मुन्ने मना पोल्लो कित्ताबी भाषा ते आयवा जनता ना उद्देश्य काजे संघर्ष कीयाना योद्धा लोरा भाषा ते तासना तरीका करियाना। ओरा हर शब्द हर विचार लाखों लाख लोकुरा लोप्पाटा विचार ओसो भावनांग किन प्रतिबिम्बित कींता।

बस्के एवनल जनता समझेमायना लेक्का भाषा वड़कला करियोम, अस्के एवनल मना फैसलांग किन जनता लागू किया परवो।

हमेशा सीधा ओसो ठोस शब्द ते, जनता पुंजी मत्ता ओसो समझेमायना लेक्काटा पोल्लोंग कियाला काजे मनम निपुण हिल्लेमा। माटु इंजे वेने रटे कित्ता पोल्लोंग नाए इस्तेमाल कींतोम, इविन किन दूर कित्ताद हिल्ले। असल इत्तेके माटु मना पर्चा, अखबार, प्रस्ताव ओसो निबंध कुना लोप्पा पढ़ेमातेके, हमेशा अवु कठीन भाषा ओसो शैली संगे ने रासिस मंदिंतांग। इद्रम मंदानास्के आम मजदूर लोरकिने आयवा मना पार्टी कार्यकर्ता लोर किन वेने समझेमायना मुश्किल आयरा।

इद पोल्लो सही हिल्ले या? दिमित्रोव मना कमजोरी किन स्पष्ट रूप ते समझे कीवोरा? घिसेपिटे पार्टी-लेखन ता अस्तित्व चीन ता संगे-संगे विदेश लोप्पा वेने मंता इंजी स्पष्ट मंता, इद्रमे मीटू इदु बीमारी आम हिल्ले इंजी समझेमाया परितिर। (कव्वतोर) हर परिस्थिति ते मना कामरेड्स दिमित्रोव ना मार्गदर्शन अनुसार तम्मा बीमारी किन तुरंत दूर कीयाना।

मनगडल हर मानेय दोड़ रास्ता पोल्लो किन उंदी कानून, उंदी बोलशेविक कानून, उंदी शुरुआती नियम बने कीयाना।

रासनास्के लेवेके वड़नास्के हमेशा आम मजदूर समुदाय किन सुरता तासना। ओरकिन समझेमायवा लेक्का, मीवा अपील पोरो ओरू विश्वास कीयाना लेक्का ओसो ओरू मीकिन लागू कियाला काजे तैयार आयना लेक्का ध्यान ते तासिसी वड़कना। मीटु बोना काजे रासिंतोरो ओरकिन सुरता तासना।⁶

इदु मना काजे कम्युनिस्ट इन्टरनेशनल तैयार कित्ता दवा आंदू इदिन किन अनिवार्य रूप ते लागू कीयाना। वाटु, माटु मना काजे इदिन किन उंदी “नियम” बने कियाकाल!

पुस्तक ता तीसरा लेख “लू शुन ना पूर्ण ग्रन्थावली” तल चुने कित्ताद मंता। लूशुन इदिन किन “सप्ताहिक” पोरोल ता पत्रिका किन हिता जवाब ता रूप ते रासिस मत्तोर, ताना लोप्पा रासना तरीका बद्रम मंदाना इंजी चर्चा कित्ताद मत्ता। इदिना बारेते लू शुन बाताल इत्तोर? ओरू रासना ता बारे ते कुल मिले कीसि आठ नियम तैयार कितोर, अविना लोप्पा उचुक दोड़ रास्ताव मंतांग।

नियम: 1. “सब्बे रकम ता चीज कुना पोरो बारीकी ते ध्यान हीमुट: अविना परताचोन निरीक्षण कीमुट। मीटु वेल्ले कम निरीक्षण कीसि मंतरि इत्तेके अदिना बारे ते रासमाटु।”

ओरू उंदी चीज लेवेके आधा वस्तु पोरो आयवा “सब्बे रकम ता चीज कुना पोरो बारीकी ते ध्यान हीमुट” इंजी इंतोर। ओरू सिर्फ उंदी नजर लेवेके आधा नजरे वाटमाटु अदिना “परताचोन निरीक्षण कीमुट” इंजी

इंतोरा। माटु बाता कींतोम? मनम हमेशा इदिना उल्टा कींतोम सिर्फ उचुने निरीक्षण कीसि रासिंतोम।

नियम: 2 “नीवगा बदे पोल्लो हिल्लास्के खुद किन रासला काजे मजबूर कियमाटू।”

मनम बाता कींतोम? मनम हमेशा वेल्ले रासला काजे खुद किन मजबूर कींतोम। अद्रमासी मनगा वेहला काजे बाताले हिल्ले इंजी स्पष्ट हिल्ले या? बिना जांच-पड़ताल ओसो अध्ययन कियवा लेवा पेन तेहना ओसो “रासला काजे खुद किन जबरदस्ती कीयाना” गैर जिम्मेदारी आंदू।

नियम: 4. “बदाई विषय ता बारे ते रास्ता पेरके कम से कम रेंडु बेरा अदिन किन जरूर पढ़ेमायना। ताना लोप्पा जरूरत हिल्ला शब्द, वाक्य ओसो पैराग्राफ कुन अगाडल बाहर किमूट। पूरा उपन्यास ता सामग्री किन उंदी रेखाचित्र ते निहचिमूट, मति रेखाचित्र ता सामग्री किन बाहर उपन्यास ता रूप ते बस्के ने पेश कियमाटू।”

कनफ्यूशियस “रेंडु बेरा विचार किमूट”⁸ इंजी सलाह हित्तोरा। हान ख्वी “बदे वेने काम समझदारी संगे ने पूरा किया परमूडांता इंजी”⁹ वेहतोरा। इदु प्राचीन कालम ता पोल्लो आंदू। नेटा समस्यांग वेल्ले जटिल मंतांग, बस्के-बस्के अविन बारे ते मूंड लेवेके नालुंग बेरा विचार कीयाना वेने हालवा लेक्का आंता। लू शुन “कम से कम रेंडु बेरा जरूर पढ़ेमायना” इंजी इत्तोरा। ज्यादा से ज्यादा बचोन बेरा पढ़ेमायना? ओरू वेहत्ताद हिल्ले, मति नावा हिसाब ते बदे वेने महत्वपूर्ण लेख ता प्रकाशित आयना मुन्ने अदिन किन दस बेरा तुकू ज्यादा बेरा पढ़ेमायना ओसो सचेतन रूप ते संशोधन कित्तेके बाताए नुकसान हिल्ले। लेख वस्तुगत सच्चाई किन तोहिंतांग। टेडामेडा ओसो कठीन मंदाना लेख कुन सही प्रतिबिम्बित कीयाना मुन्ने अदिना बार-बार अध्ययन कीयाना। इदिना बारे ते बकवल मंदानादु रासना शुरुआती ज्ञान तुन पुनवा मंदाना आंता।

नियम: 6. “नीकिन विडसी दूसरोर पुनवा लेक्कटा पूना-पूना विशेषणकु लेवेके शब्द कुना इस्तेमाल कियमाटू।”

मनम बचोनो “बोरे पुनवा लेक्कटा” पूना-पूना लेख कु रास्तोमा हमेशा सिर्फ उंदी वाक्य लोप्पाए चालीस लेवेके पचास शब्द मंदितांग, अविना लोप्पा “इद्रम ता पूना-पूना विशेषण लेवेके शब्द कु” बोरे पुनवा शब्द कु मंदितांग। बचोनो लोकर लू शुन किन लागू कीतोम इंजी दोगवा लेवा इंतोर, मति वीरे लोकर ओरू तैयार कित्ता नियम कुन लागू कीवोर आंतोरा।

पुस्तक लोप्पा शामिल कित्ता आखरी लेख चीनी कम्युनिस्ट पार्टी ता छठी केंद्रीय कमेटी ता छठा पूर्ण अधिवेशन लोप्पा स्वीकार कित्ता रिपोर्ट तल रास्तद मंता। ताना लोप्पा प्रचार-काम ता राष्ट्रीय शैली ता विकास बद्रम कीयाना इंजी वेहत्ताद मंता। 1938 ते आता अधिवेशन लोप्पा माटु “चीन ता विशिष्टता तुकू अलग मार्क्सवाद ता बदे वेने चर्चा कीयाना वड़िय ते वेलियाना मार्क्सवाद, पोल्ले लेक्कटा मार्क्सवाद आंदु इंजी इतोमा।” इत्तेके माटु मार्क्सवाद ता बारे ते सब्बे रकम ता वड़िय ते वेलियाना पोल्लोंग ना विरोध कीयाना। चीनी कम्युनिस्ट लोर मार्क्सवाद ता अध्ययन चीनी क्रांति ता वास्तविक परिस्थिति संगे जोड़े कीसि कीयाना।

रिपोर्ट लोप्पा इद्रम वेहत्ताद मत्ता:- विदेशी घिसेपिटे लेखन किन खत्म कीयाना, लेंग कलियवा पाटा पारना ओसो कठमुल्लावाद किन आराम कियाला हियाना लेक्का: इत्तेके तीना जागा ते चीनी जनता विचार कीयाना पूना ओसो जीवा मत्ता चीनी तरीका, भावना लागू कीयाना। अन्तरराष्ट्रवाद ता अंदरूनी सामग्री किन राष्ट्रीय रूप ते अलग कीयाना, अंतरराष्ट्रवाद ता शुरुआती पोल्लो किन समझेमायवा मंदानोरा काम आंदू। इदिन उल्टा मनम इव रेंडासी किन मजबूती ते जोड़े कीयाना इदिना बारे ते मना लाईन कुना लोप्पा वेल्ले गंभीर कमजोरिंग मंतांग, अविन किन गंभीरता ते दूर कीयाना।

अद रिपोर्ट लोप्पा विदेशी घिसेपिटे लेखन किन खत्म कीयाना मांग कित्ताद मत्ता, मति मना उचुन कामरेड्स इंजे वेने अदिन किन बढ़ावा हिया मंतोरा। पोल्ले लेक्कटा ओसो वड़िय ते कीयाना पोल्लोंग कम कीयाना

मांग कित्ताद मत्ता मति मना उचुन कामरेड्स अविन ज्यादा कीयाना जिद्द किया मंतोर। कठमुल्लावाद किन आराम कीयाना मांग कित्ताद मंता, मति मना कामरेड्स अदिन तेहना मांग किया मंतोर। संक्षिप्त ते बचोनो लाकुर छठी पूर्ण अधिवेशन लोप्पा मानेमाता रिपोर्ट किन उंदी केव्वि तल केंजीसी दूसरा केव्वि तल बाहार कीसितोर, पुंजी-पुंजी अदिना विरोध कियाला आल्सता लेक्का मंता।

इंजे केंद्रीय कमेटी मनाकिन धिसेपिटे पार्टी-लेखन, कठमुल्लावाद ओसो इद्रम ता सब्बे पोल्लोंग किन हमेशा काजे विडसना निर्णय कित्ता। अदिन काजे नन्ना इगा वासी मीवा संगे विस्तार ते चर्चा कित्ताना इगा चर्चा कित्ता पोल्लोंग पोरो मना कामरेड्स आल्सनूर, अविना विश्लेषण कियानूर अनि मना हर कामरेड तन्ना खुद ता बारे ते वेने विश्लेषण कियानूर इंजी आशा कींतान। हर कामरेड खुद किन जांच-पड़ताल कीयाना। ताना पेरके तन्ना पक्का दोस्त ओसो हैरे-हैरे ता कामरेड्स ना संगे विचार-विमर्श कीयाना अनि खुद ता कमजोरिंग किन निज्जमे दूर कीयाना।

नोट

1. 4 मई आंदोलन पेरके उचुक पीरी लेक्कटा पूंजीवादी ओसो निम्न-पूंजीवादी बुद्धिजीवुर विदेशी धिसेपिटे लेखन ता विकास कित्तोर ओसो क्रांतिकारी सांस्कृतिक कार्यकर्ता लोरा नडमा अदिना प्रचार कित्तोर। अद्रमासी ओरा लोप्पा इदु वेल्ले कालम एवनल मत्ता। लू शुन तन्ना बचोनो लेख कुना लोप्पा क्रांतिकारी सांस्कृतिक कार्यकर्ता लोरा लाईन लोप्पा दिसना विदेशी धिसेपिटे लेखन ता विरोध कीतोर:-

पाड़ना लेवेने पूना सब्बे रकम ता धिसेपिटे लेखन किन पूराए खत्म कीयाना। उदाहरण तुकू बोराई “रांगितोर”, “धमकिंग हींतोर” लेवेके “फैसला केंजी कीयाना” आयवा हर दिया विकसित आयना तथ्य ओसो घटनांग ना प्राकिटश कियाला काजे वैज्ञानिक ओसो ठोस रूप ते लागू कियवा लेवा पाड़ना तरीका ना नकल कीयाना ओसो हर तथ्य ता बारे ते अविन किन विचार हिल्ला लेक्काने लागू कींतोरा इदु वेने उंदी रकम ता धिसेपिटे कार्यशैली आंदू। (चू श्यू-श्या ना चिट्टी ता जवाब)

1. “चीन ता क्रांतिकारी युद्ध ता रणनीतिक समस्यांग”, नोट 37 (माओ त्सेतुंग ना संकलित रचनांग, ग्रन्थ 1) हूडाटू

2. “रांगना ओसो धमकिंग हियानादिन संघर्ष कीयाना इंजी बिल्कुले इनमूडायो” इदु 1932 ते लू शुन रास्ता उंदी लेख ता हेडिंग मत्ता। “खिचडी बोली” हेडिंग मत्ता लेख लोप्पा मंता, (ले शुन ना पूर्ण ग्रन्थावली, ग्रन्थ 5)।
3. शांघाई बोली ते शहर लोप्पा पिस्वल पिस्सला काजे बदे साधन हिल्वा ओसो भीख ताल्कसी लेवेके चोरी कीसि पिस्सना आवारा लोर किन “प्येशान” इंतोर। इद्रमतोर साधारण रूप ते वेल्ले पतला इत्तेके ओरा मेंदुल ते पेड़कांग दिससोर मंदितांगा।
4. “सोवियत संघ ता कम्युनिस्ट पार्टी (बोलशेविक) ता इतिहास, संक्षेप कोर्स”, अध्याय 1, परिच्छेद 3 हूडाटू।
5. जार्जी दिमित्रोव “फासीवाद ता विरुद्ध मजदूर वर्ग ता एकता”, भांग 6।
6. “सप्तर्षि” 1931 ओसो 1932 ते वामपंथी चीनी लेखक संघ प्रकाशित कीयाना उंदी मासिक पत्रिका मत्ता। “सप्तर्षि” किता सवाल-जवाब लोप्पा “दो दिल” पोरोल ता हेडिंग मत्ता लू शुन ना लेख लोप्पा शामिल मंता। (लू शुन ना पूर्ण ग्रन्थावली, ग्रन्थ 4)
7. “कनफ्यूशियस ना सूक्ति-संग्रह”, अध्याय 5, “कुंगये छांग”।
8. हान य्वी (768-824) थांग वंश कालम ते वरोर प्रसिद्ध (सब्बे तोर पुंदन लेक्काटोर) लेखक मत्तोर। “ज्ञानवृद्धि ता बारे ते” इंदाना हेडिंग ते ओरू “बदे वेने काम समझदारी संगेने पूरा कीयाना आंता, समझदारी ता कमी मत्तेके अदु असफल आंता” इंजी रासिस मत्तोर।

येनान ता कला-साहित्य गोष्ठी लोप्पा भाषण

मई 1942

प्रस्तावना

2 मई 1942

कामरेड्स! नेंडु इद गोष्ठी लोप्पा भाग एतला काजे मीकिन इगा केयताद मंता। इगा माटु मना विचार कुना आदान-प्रदान किया परितोम अनि साहित्य ओसो कला ता काम किन क्रांतिकारी काम ता आपसी संबंध कुना जांच-पड़ताल किया परितोम। मना लक्ष्य क्रांतिकारी साहित्य, कला तन्ना विकास सही हरीं पोयना, मना राष्ट्रीय दुश्मन ता तख्ता पलट कीयाना, मना राष्ट्रीय मुक्ति ता काम पूरा कीयाना लोप्पा क्रांतिकारी साहित्य, कला बाकी क्रांतिकारी काम कुना मुन्नेटल तुकू ओसो ज्यादा मदद कीयाना इंजी गारंटी एतनादु मंता। चीनी जनता ना मुक्ति काजे कीयाना मना संघर्ष लोप्पा विभिन्न रकम ता विभाग कु मंतांग, इविना लोप्पा कलम विभाग, बंदूक विभाग, इत्तेके सांस्कृतिक विभाग ओसो फौजी विभाग मंतांग। दुश्मन किन हारे कियाला काजे मनम मुख्य रूप ते बंदूकधारी सेना पोरों निर्भर मंदाना। मति सिर्फ इद उंदे रकम ता सेनाए मना काजे हालो आंता, मनगा उंदी सांस्कृतिक सेना वेने मंदाना। इदु मना लाईन किन एकताबद्ध कियालाकाजे ओसो दुश्मन किन हारे कियाला काजे वेल्ले जरूरी मंता। 4 मई आंदोलन तल चीन लोप्पा इद्रम ता सांस्कृतिक सेना अस्तित्व ते वासी चीनी क्रांति ता सहयोग कित्ता। चीन ता सांस्कृतिक ओसो सामाजिक आक्रमण ता सेवा कीयाना दलाल-पूंजीवादी संस्कृति ता प्रभाव मत्ता इलाका किन तीरम-तीरम कम कित्ता। पूना संस्कृति ता

विरोध कियालाकाजे चीन ता प्रतिक्रियावादीर इंजे सिर्फ “नुस्स ता मुकाबला कीयाना” तरीकांगे लागू किया परिंतोरा। दूसरा माटा ते प्रतिक्रियावादीरगा पैसा मंता, हिल्वेके ओरू इद्रम ता बदे काम किया परवोर मति भरपूर ताकत संगे बद्रमाई कीसि अदिना सृजन इत्तेके किया परिंतोरा। 4 मई आंदोलन तल कला-साहित्य मना सांस्कृतिक विभाग ता उंदी महत्वपूर्ण ओसो सफल अंग मत्ता। दस साल ता गृहयुद्ध ताकनास्के, क्रांतिकारी कला-साहित्य आंदोलन ता वेल्ले विकास आता। इदु आंदोलन ओसो अद कालम ता क्रांतिकारी युद्ध रेंडासीए उंदी सामान्य दिशा ते मुन्ने दाया मंतांग, मति इव रेंडासी उंदी परिवार ता सेनांग तम्मा व्यवहारिक कार्य लोप्पा आपस ते मेलजोल किया परताद हिल्ले, बारांकु इत्तेके प्रतिक्रियावादीर अविन किन उंदी दूसरा तल अलग कीसि तास्तोरा। जापानी आक्रमण विरोधी युद्ध शुरू आता पेरके ज्यादा से ज्यादा क्रांतिकारी लेखक ओसो कलाकार येनान अनि बाकी जापान विरोधी आधार इलाकांग लोप्पा वाया मंतोर इदु उंदी बेसता पोल्लो मंता। मति इद्रम इत्तेके आधार इलाकांग लोप्पा वातेकेने ओरू इगाटा जनता ना संगे पूर्ण रूप ते उंदी आतोर इंजी आयो। मनम मना क्रांतिकारी काम किन मुन्ने ओयना इत्तेके इव रेंडासी किन पूर्ण रूप ते उंदी किया लागियर। मना नेता सभा ता उद्देश्य साहित्य-कला किन पूरा क्रांतिकारी मशीनरी ता उंदी अभिन्न अंग ता रूप ते फिट कीयाना, जनता किन एकताबद्ध ओसो शिक्षित कीयाना, दुश्मन पोरो हमला कीयाना अनि अदिन नष्ट कीयाना शक्तिशाली हथियार बने कीयाना, जनता किन उंदी जीवा आसी दुश्मन ता मुकाबला कीयाना लेक्का बने कीयाना गारंटी एतनादु मंता। इद उद्देश्य किन पूरा कियाला काजे बवु समस्यांग किन हल कीयाना जरूरत मंता? नावा हिसाब ते अवु- लेखक, कलाकार वर्ग ता दृष्टिबिंदु ता समस्या, ओरा रुझान कुना समस्या, ओरा पाठक-दर्शक लोरा समस्या, ओरा काम ता समस्या ओसो ओरा अध्ययन ता समस्यांग आंदुंग।

वर्ग-दृष्टिबिंदु ता समस्या। मना दृष्टिबिंदु सर्वहारा वर्ग ओसो आम जनता ना दृष्टिबिंदु आंदू। कम्युनिस्ट पार्टी ता सदस्य लोरा काजे इदिना

अर्थ पार्टी ता दृष्टिबिंदु पोरो मंदाना, पार्टी-भावना किन पोयसी तासना ओसो पार्टी ता नीति पोरो नितसी मंदाना आंता। मना लेखक, कलाकार लोरा लोप्पा समस्या किन सही तरीका ते ओसो स्पष्ट रूप ते समझेमायवा मंदानोर मंतोरा? नावा हिसाब ते मंतोरे। मना बचोनो कामरेड्स हमेशा तम्मा सही दृष्टिबिंदु तल भटके मासोर मंदितोर।

रुझान ता समस्या। मना दृष्टिबिंदु तले बदे ठोस पोल्लो ता बारे ते मना ठोस रुझान जन्म आंता। उदाहरण तुकू मनम पाटा पारसोर मंदाना या लेवेके पर्दाफाश कीयाना? इदु उंदी रुझान ता सवाल आंदू। इव रेंडासी ना लोप्पाटल बद रुझान लागू कीयाना? नावा हिसाब ते मनम रेंडासी रकम ता रुझान कु लागू कीयाना। असल इत्तेके मना मुन्ने बोर मंतोर? मूंड रकम ता लोकर मंतोर- दुश्मन संयुक्त मोर्चा ता मना एकताकारी ओसो मना लोकर: आखरी श्रेणी ता लोकर आम जनता ओसो अदिना हिरावल दस्ताए मंता। वीर मूंड रकम ता लोकरा बारेते मनम अलग-अलग रकम ता रुझानकु लागू कीयाना। क्रांतिकारी लेखक, कलाकार लोर दुश्मन पोरो इत्तेके जापानी साम्राज्यवाद पोरो ओसो जनता ना सब्बे बाकी दुश्मन ता भयानक तरीकांग ओसो ओरा चालबाजी ता पर्दाफाश कीयाना संगेने ओरकिन हारे कीयाना वेने जरूरी मंता। इद्रम कित्तेके जापान विरोधी सेना ओसो जनता किन उंदी जीवा आसी तख्ता पलट कियाला काजे दृढ़तापूर्क संघर्ष कीयाना प्रोत्साहन दोरकिंता। संयुक्त मोर्चा लोप्पा तम्मा अलग-अलग एकताकारिरा पोरो मना रुझान ओरा संगे एकता वेने मंदाना ओसो ओरा संगे अलग-अलग रकम ता आलोचना कीयाना वेने कीयानादु मंदाना। मनम ओरू कीयाना जापान प्रतिरोध ता समर्थन कीतोम, तीना लोप्पा ओरू दोरकी कित्ता सफलता ना तारीफ वेने कीतोम। मति ओरू प्रतिरोध-युद्ध लोप्पा सक्रियता पूर्वक शामिल आयवा मत्तेके ओरा आलोचना कीतोम। बोराई कम्युनिस्ट पार्टी ओसो जनता ना विरोध कीतोम ओसो प्रतिक्रियावादी हरदे दिव्या-दिव्या तुकु दोड़ रेयसोर दांतोर अस्के माटु ओरा दृढ़तापूर्वक विरोध कीयाना। विशाल जन सुदाय ता बारे ते हूइतेके, अदिना मेहनत, अदिना संघर्ष, अदिना सेना ओसो अदिना पार्टी

ता संबंध ता बारे ते मनम जरूर तारीफ कीयाना। जनता ना वेने तम्मा कमजोरिंग मंदितो। सर्वहारा वर्ग लोप्पा वेने वेल्ले लोकुर निम्न-पूजीपति वर्ग विचार तासनोर मंदितोर। किसान ओसो शहरी निम्न-पूजीपति वर्ग ता लोकुर वेने पेरके अरता विचार तासनोर मंतोर, वीर सब्बे संघर्ष ताकनास्के ओरा बोजा आंतोर। ओरकिन शिक्षित कियाला काजे, ओरकिन ओरा पोरो मत्ता बोजा किन रेहला काजे ओसो तम्मा कमजोरिंग किन दूर कियाला काजे मदद हियाला दीर्घकालीन साहस संगे काम कीयाना। अस्के ने ओरू बेहरा डाका वाटसी मुन्ने दायनूर। ओरू संघर्ष ताकनास्के तम्मा पुनःसंस्कार कित्तोर ओसो किया मंतोर। मना कला-साहित्य किन पुनःसंस्कार ता प्रक्रिया वर्णन कीयाना। ओरू तम्मा गलतिंग किन सुधरे किया परवेके मनम ओरा लोप्पा नकारात्मक पहलू किन हूडसी ओरा मजाक उडे कीयाना गलती लेवेके ओरकिन वरोर दुश्मन बने कीयाना गलती कीयानायो। मना रचनांग संगे ओरकिन एकताबद्ध आयला, प्रगति कीयाना, उंदी जीवा आसी दृढ़तापूर्वक मुन्ने दायला, पेरके अरता विचार कुना त्याग कियाला ओसो क्रांतिकारी विचार कुना विकास कियाला मदद कीयाना ओसो मना चरनांग ना ओरा पोरो उल्टा असर अरवा लेक्का हूडना।

पाठक-दर्शक लोरा समस्या, इत्तेके मना साहित्यिक रचनांग ओसो कला ता सृजन लोकुरा काजे कीयाना आंता। शेनशी-कानसू-निंगश्या हंदी इलाका लोप्पा, उत्तरी चीन, मध्य चीन ता जापान विरोधी आधार इलाकांग लोप्पा मत्ता लेक्का इद समस्या क्वोमिंगतांग शासित इलाकाने हिल्ले। प्रतिरोध-युद्ध तुकु मुन्ने शांघाई तुकु इत्तेके ओसोए ज्यादा अलग मंता। अद कालम ते शांघाई लोप्पा क्रांतिकारी कला-साहित्य पाठक-दर्शक लोरा लोप्पाटल मुख्य रूप ते विद्यार्थिर, ऑफिस कुना कर्मचारिर ओसो दुकानदार लोरा सिर्फ उंदी हिस्सा मत्ता। प्रतिरोध-युद्ध शुरू आता पेरके, क्वोमिंगतांग-शासित इलाकांग लोप्पा पाठक-दर्शक लोरा एरिया उचुन विस्तार आसी मत्ता, मति ताना लोपा वेने मुन्नेटा लेक्काने लोकुर मत्तोर, बारांकु इत्तेके अगटा सरकार मजदूर, किसान ओसो सैनिक लोर

किन् क्रान्तिकारी कला-साहित्य ता सम्पर्क ते वायला हीवो आता। मना आधार इलाकांग लोप्पा परिस्थिति इनपडे अलग मत्ता। इगा कला-साहित्य ता रचनांग ना पाठक-दर्शक मजदूर, किसान, सैनिक ओसो क्रान्तिकारी कार्यकर्ता लोर मंतोर। विद्यार्थिर वेने मना आधार इलाकांग लोप्पा मंतोर, मति ओरू पाडना रकम ता विद्यार्थिर लेक्का हिल्लेर, ओरू भूतपूर्व कार्यकर्ता लेक्का लेवेके वायना कालम ता कार्यकर्ता लोरा लेक्का मंतोर। सब्बे रकम ता कार्यकर्ता, सेना ता योद्धा, कारखाना ता मजदूर ओसो नाहकुना किसान, सब्बे तोर साक्षर (पढेमायला करियातोर) बनेमाता पेरके पुस्तक ओसो अखबार पढेमायला आल्सा मंतोर अनि अनपढ मंदानोरु नाटक हूडला आल्सा मंतोर। चित्र हूडला आल्सा मंतोर, पाटांग पारला आल्सा मंतोर, पाटांग केजला आल्सा मंतोर। वीरु लोकुरे मना साहित्यिक ओसो कलात्मक रचनांग ना पाठक ओसो दर्शक लोर आंदुर। सिर्फ कार्यकर्ता लोरकिने पोयटु। ओरा संख्या वेल्ले कम मंता इंजी आल्समाटु। वीरा संख्या क्वोमिंगतांग-शासित इलाका लोप्पा प्रकाशित आयना बदे पुस्तक ता पाठक लोरा संख्या तुकू बचोनो ज्यादा मंता। अगा साधारण रूप ते उंदी पुस्तक ता संस्करण सिर्फ 2000 कापिंग छपेमांतांग, मूंड संस्करण काल्पतेकाई सिर्फ 60000 कापिंगे आंतांग। मति आधार इलाकांग लोप्पा हूडतेके सिर्फ उंदी येनान लोप्पाने 10,000 तुकू ज्यादा कार्यकर्ता लोर पुस्तक पढेमाया परितोर। इदे आयवा ओरा लोप्पा वेल्ले लोकुर वेल्ले कालम तल टिकेमासी मत्ता क्रान्तिकारीर आंदुर, वीरु देश ता सब्बे जागानल इगा वातोर ओरू इगाटल अलग-अलग जागा ने काम कियाला दायनूर, अदिन काजे ओरा नडमा शिक्षा-कार्य वेल्ले महत्वपूर्ण मंता। मना लेखक ओसो कलाकार लोर ओरा नडमा बेस काम कीयाना।

मना कला-साहित्य ता पाठक-दर्शक मजदूर, किसान, सैनिक ओसो ओरा कार्यकर्ता लोर मंतोर। अदिन काजे ओरकिन बेस समझेमायना ओसो ओरा जानकारी दोरकी कीयाना सवाल पैदा आंता। ओरकिन समझेमायना ओसो ओरा परिचय हासिल कियाला काजे पार्टी, सरकार ता संगठन कुना लोप्पा ग्रामीण, कारखानांग लोप्पा आठवीं राह सेना, पूना

चौथी सेना लोप्पा विभिन्न रकम ता लोकर ओसो तथ्य कुन समझेमायला, अविना परिचय दोरकी कियाला काजे वेल्ले काम किया लागियर। मना लेखक, कलाकार लोर तम्मा साहित्यिक, कलात्मक सृजन-कार्य किया लागियर, मति ओरा सबसे पहली काम जनता किन समझे कीयाना ओसो जानकारी हासिल कीयाना मंता। इदिना लोप्पा मना लेखक ओसो कार्यकर्ता लोरा परिस्थिति बद्रम मत्ता? ओरा लोप्पा ज्ञान ओसो समझदारी ता कमी मंता इंजी इंतान, ओरू “तम्मा ताकत प्रदर्शन काजे बेगाने जागा परहका परवा लेक्कटा वीर लोरा” लेक्का मंतोरा। ज्ञान ता कमी इत्तेके? इत्तेके जनता किन बेस चीनेमायवा मंदाना। लेखक ओसो कलाकार लोर किन तम्मा पाठक ओसो दर्शक लोरा बारे ते बदे जानकारी हिल्ले, लेवेके ओरा बारे ते ओरकिन उचुन वेने जानकारी हिल्ले। मना लेखक ओसो कलाकार लोर मजदूर, किसान, सैनिक लोरा ओसो कार्यकर्ता लोरा सही जानकारी हिल्ले। ओसो समझदारी ता कमी इत्तेके? इत्तेके भाषा समझेमायवा मंदाना, इत्तेक आम जनता ना समृद्ध ओसो सजीव भाषा किन समझेमायवा मंदाना। इत्तेके आम जनता ना समृद्ध ओसो सजीव भाषा ता बारे ते हालनाचोन ज्ञान हिल्ला मंदाना। वेल्ले लेखक ओसो कलाकार आम जनता तल अलग-थलग आसोर मंदिंतोर, तोहला काजे खुश दिसिंतोर अद्रमासी ओरू जनता ना भाषा किन पुनवा मंदिंतोर। अद्रमासी ओरा रचनांग लोप्पा सिर्फ भाषा ता कमजोरिए आयवा ओरू खुद रास्ता अंगडम ता विषयकु वेने मंतांग, अवु सामान्य रूप ते काम वार्योंग आंतांग। वेल्ले कामरेड्स “लोकर जीवा कीयाना शैली” ता वेल्ले पोल्लोंग कींतोरा। मति असल ते लोकर जीवा कीयाना शैली इत्तेके बातल आंदु? इत्तेके मना लेखक, कलाकार लोरा विचार, भावनांग मजदूर, किसान, सैनिक लोरा जनता ना विचारकु ओसो भावनांग संगे कलियाना। इद्रम कियाला काजे ओरकिन वेल्ले गंभीरता ते आम जनता ना भाषा समझेमाया लागियर। मीटु आम जनता ना भाषा लोप्पा वेल्ले पोल्लोंग समझेमायवेके, साहित्यिक ओसो कलात्मक सृजन ता पोल्लोंग बद्रम किया परकीर? “तम्मा ताकत प्रदर्शन कियाला काजे बेगाने जागा परहका परवा लेक्कटा

वीर” इत्तेके- मीवा महान सच्चाईंग किन जमा कियाला काजे आम जनता ना जीवा ते बदे जागा हिल्ले इंजी। मीटु जनता मुन्ने बचोन बेहरा महान बने मायला कोशिश कीतिर, बचोन ज्यादा मात्रा ते जनता किन इद्रम ता सामग्री थोपे कीतिर, अचोने ज्यादा जनता अदिन अस्वीकार कीयाना सम्भावना मंदिता। मीटु आम जनता मीकिन समझेमायना इंजी आल्सतेके, मीटु आम जनता संगे उंदी आयाना इंजी आल्सतेके मीकिन फौलाद बनेमायना उंदी दीर्घकालीन ओसो मुश्किल परिस्थिति तल वेंडना पक्का लक्ष्य बने किया लागिंयरा। इगा मना खुद ता अनुभव ता बारे ते इत्तेके नावा विचार कुना लोप्पा बद्रम बदलाव वात्ता इंजी वेहकाना नन्ना नावा पिस्वल वरोर विद्यार्थी ना रूप ते शुरू कित्तान, स्कूल ता वरोर आम विद्यार्थी ना तरीकांग लागू कित्तान: अस्के नन्ना बाकी विद्यार्थीरा मुन्ने शारीरिक श्रम कीयाना इत्तेके बेइज्जती समझेमायनोना। अद कालम ते नन्ना दुनिया लोप्पा सिर्फ बुद्धिजीविरे साफ-सुथरा मंदितोर, ओसो मजदूर, किसान लोर गंदा इंजी आल्सनोना। दूसरा नन्ना साफ-सुथरा समझेमायना बुद्धिजीविरा कपड़ांग केरला काजे नाकिन बेस लागनदु अनि मजदूर लेवेके किसान लोरा कपड़ांग वेल्ले खराब लागनवु, बारांकु इत्तेके नन्ना अविन किन गंदा समझेमायनोना। पेरके नन्ना वरोर क्रांतिकारी बनेमातान अनि मजदूर-किसान ओसो क्रांतिकारी सेना ता सैनिक लोरा संगे मत्तान अस्के नन्ना तीरम-तीरम ओरगडल करियतान अनि ओरू वेने नावगडल तीरम-तीरम करियतोर। अस्केने नन्ना नावा लोप्पा पूंजीवादी स्कूल तिंची वात्ता पूंजीपति वर्ग ओसो निम्न-पूंजीपति वर्ग ता भावनांग किन बुनियादी रूप ते बदले किया परतान। अस्केटले नन्ना मजदूर, किसान लोरिनकु, इंजे पुनःसंस्कार आयवा मत्ता बुद्धिजीविर साफ-सुथरा हिल्लेर इंजी समझेमांतान। मजदूर-किसान लोरे सबसे साफ-सुथरा मानेय आंदुर: ओरा कैकु तोड़ियो संगे मुडंदिसी मत्तेकाई कालकु हडप संगे मुडंदिस मत्तेकाई ओरू पूंजीपति वर्ग ओसो निम्न-पूंजीपति वर्ग ता बुद्धिजीविरा तुलना ते बचोनो ज्यादा साफ-सुथरा मंदितोर। इत्तेके भावनांग ना रूपान्तर, उंदी वर्ग तल दूसरा वर्ग ते रूपान्तर आंदु। मना बुद्धिजीवी वर्ग तिंचि वात्ता लेखक

ओसो कलाकार लोर तम्मा रचनांग किन आम जनता विचार कीयाना इंजी आल्सतेके ओरू तम्मा विचारकु ओसो भावनांग ना रूपान्तर कीयाना अनि अविना पुनःसंस्कार कीयाना। इद्रम ता रूपान्तर लेवा इद्रम ता पुनःसंस्कार लेवा ओरू बदे वेने काम सही तरीका ते किया परवोर आंतोर अनि इनपड़े नाकाबिल साबित आंतोर।

आखरी समस्या अध्ययन ता समस्या मंता। इत्तेके मार्क्सवाद-लेनिनवाद ओसो समाज ता अध्ययन कीयाना। बोराई खुद किन मार्क्सवादी क्रांतिकारी लेखक इंतोर ओसो खासकर कम्युनिस्ट पार्टी ता सदस्य मंदाना लेखक लोरिन, मार्क्सवादी-लेनिनवाद ता ज्ञान जरूर मंदाना। मति इंजे उचुन कामरेड्स मार्क्सवाद ता बुनियादी धारणांग किन पुत्ताद हिल्ले। उदाहरण तुकू इदु उंदी बुनियादी मार्क्सवाद मानेय ना अस्तित्वए ओना चेतना ता निर्णय कींता, वर्ग-संघर्ष ओसो राष्ट्रीय संघर्ष ता वास्तविक परिस्थितिंगे मना विचार ओसो भावनांग ना निर्णय कींतांग इंजी वेहिंता। मति मना उचुन कामरेड्स इदिना उल्टा कींतोर अनि हर चीज “प्रेम” तिंची शुरू आयना इंतोर। जीवा कीयानादु उंदी वर्ग-समाज लोप्पा जीवा कीयाना सिर्फ वर्ग पोरने जीवा कीयाना आंता, मति वीरु लोकर वर्ग तुकू बाहर मत्ता, अस्तित्व ते हिल्ला सच्चाई ओसो मानव-स्वभाव ता खोज कींतोर। इदिनगडल इद्रमतोरा लोप्पा पूंजीपति वर्ग ता वेल्ले प्रभाव मंता। ओरू खुद किन इद प्रभाव तल पूराए मुक्त कीयाना अनि वेल्ले जीवा कीसि मार्क्सवाद-लेनिनवाद ता अध्ययन कीयाना। लेखक ओसो कलाकार लोर साहित्यिक रचनांग, कलात्मक सृजन कुना अध्ययन कीयाना सही मंता, मति मार्क्सवाद-लेनिनवाद उंदी सब्बे क्रांतिकारि अनिवार्य रूप ते अध्ययन कीयाना विज्ञान आंदू, लेखक ओसो कलाकार लोर इदिन रोमि किया परवोर। लेखक ओसो कलाकार लोर समाज ता अध्ययन कीयाना, इत्तेके ओरू समाज ता विभिन्न वर्ग कुन अध्ययन कीयाना, ओरा आपसी संबंध ओसो तन्ना परिस्थितिंग, ओरा बाहरी आकृति, मनोवृत्ति ता अध्ययन कीयाना। इव सब्बे पोल्लोंग किन स्पष्ट

कित्तेके ने मना कला-साहित्य ता विषय-वस्तु वेल्ले समृद्ध आयर ओसो सही दिशा ते विकसित आयार।

नेंडु नन्ना इव समस्यांग किन सिर्फ प्रस्तावना रूप ते तेहा मंताना मीटु सब्बेतोर इव समस्यांग किन ओसो बाकी इविना संबंधित समस्यांग ना बारे ते मीवा विचार वेहाकिर इंजी आशा किया मंता।

उपसंहार

23 मई 1942

कामरेड्स! मना गोष्ठी ता इद महीना ते 3 मीटिंग आंतांगा। सच्चाई ता खोज ते लोकर कास्ता-कास्ता चर्चा कितोर, ताना लोप्पा 20 तुकू ज्यादा पार्टी कामरेड्स ओसो गैर पार्टी कामरेड्स भाषण हितोर अनि समस्यांग किन स्पष्ट रूप ते पेश कितोर, वेल्ले ठोस रूप हितोर। इदिनगडल कला-साहित्य ता पूरा आंदोलन किने वेल्ले फायदा आयार इंजी आल्संताना।

बदे वेने समस्या पोरो विचार कीयानास्के मनम वास्तविक परिस्थिति किन आधार बने कीसि शुरूआत कीयाना, अदिना परिभाषा किन आधार बने कीयानायो। मनम साहित्य-कला ता परिभाषा किन पाठ्य-पुस्तकिंग लोप्पा परहकितोम अनि ताना पेरके अविन कला-साहित्य ता इंजे ताकसोर मत्ता आंदोलन कुना निर्देशक नियम कुना निर्णय कियाला ओसो नेटा कालम ते पुट्टना अलग-अलग मत ओसो मतभेद कुन जांच कियाला काजे इस्तेमाल कितोम, अस्के मनम उंदी गलत तरीका किन लागू कीतोम। माटु मार्क्सवादीर आंदोम, मार्क्सवाद मनाकिन बदे वेने समस्या कि हल कीयानास्के मनम वास्तविक तथ्य कुनगडल शुरू कीयाना, अस्तित्व ते हिल्वा परिभाषा तल आयो इंजी वेहिंता। इव तथ्य कुना विश्लेषण कीसि मनम मना निर्देशक नियम, नीतिंग ओसो तरीकांग किन निर्धारित कीयाना इंजी वेहिंता। कला-साहित्य संबंध ते मना वर्तमान वाद-विवाद लोप्पा वेने इद्रमे कीयाना।

इंजेटा तथ्य बाता मंता? अवु इगा रास्ता लेक्का मंतांग, चीन देश 5 साल तिंची लडेमासोर मत्ता जापानी-आक्रमण-विरोधी युद्ध, विश्वव्यापी फासीवादी-विरोधी युद्ध, जापानी आक्रमण विरोध युद्ध लोप्पा चीन ता बडे जर्मीदार वर्ग ओसो बडे पूंजीपति वर्ग ता दुलमुल रुझान लागू कीयाना ओसो मनमानी तरीका ते जनता ना उत्पीड़न कीयाना नीति किन लागू कियाना: 4 मई आंदोलन तल साहित्य-कला लोप्पा क्रांतिकारी आंदोलन ताकी कीयाना- हत्ता 23 साल लोप्पा क्रांति काजे अदिन महान योगदान ओसो अदिना कमिंग, आठवीं राह सेना ओसो पूना चौथी सेना ता जापान विरोधी जनवाद आधार इलाकांग मंदांना ओसो इव आधार-इलाकांग लोप्पा लेखक ओसो कलाकार लोरा उंदी बेहरा संख्या आठवीं राह सेना ओसो पूना चौथी सेना, मजदूर, किसान लोरा संगे उंदी आयना, वात्तावरण ओसो कर्तव्य रेंडासी ना दृष्टिकोण ते इव आधार इलाकांग ना लेखक, कलाकार लोर ओसो क्वोमिंगतांग शासित इलाकांग ना लेखक, कलाकार लोरा नडमा अंतर: येनान ओसो बाकी जापान विरोधी आधार इलाकांग लोप्पा तेदना साहित्य-कला ता विवादास्पद सवालकु। इव सब्बे वास्तविक ओसो अटूट तथ्य आंदुंग इविना पोरों आधार आसी मनम मना समस्यांग पोरों विचार कीयाना।

असल ते मना समस्यांग ना केंद्र बेगा मंता? नावा हिसाब ते बुनियादी रूप ते आम जनता काजे काम कीयाना सवाल ओसो इद सवाल बद्रम कीयाना इंजी मंता। बस्के एवनल इव रेंडासी सवालकु हल आयोग अस्के एवनल मना लेखक, कलाकार, तम्मा किन वात्तावरण ओसो तम्मा कर्तव्य कुना अनुसार बनेकिया परवोर आयनूर, ओरकिन उंदी पेरके उंदी अंदरूनी ओसो बाहरी मुश्किल कुना सामना किया लागियारा। नावा निष्कर्ष इव रेंडु सवाल कुना पोरोंने केंद्रित मंदियर अनि संगेने नन्ना इव रेंडु सवाल कुना संबंध ते उचुक दूसरा सवालकुना वेने चर्चा कियाना।

समस्यांग:

1. मना कला-साहित्य बोना काजे मंदिंता?

इदु समस्या किन माक्सवादि, इत्तेके खासकर लेनिन वेल्ले मुन्ने हल कित्तोर। 1905 तेने लेनिन वेल्ले गंभीरता ते मना साहित्य-कला किन “लाखों-करोड़ों मेहनतकश जनता ना सेवा कीयाना” इंजी वेहतोर। बोरु जापान विरोधी आधार इलाकांग लोप्पा कला-साहित्य ता काम किया मंतोर ओरू इद समस्या हल आता इंजी आल्संतोर बहे मति इदिना बारे ते ओसो ज्यादा वाद-विवाद कीयाना जरूरत हिल्ले। असल इत्तेके वेल्ले कामरेड्स इदिन स्पष्ट रूप ते हल किया परताद हिल्ले। अद्रमासी ओरा भावनांग, ओरा रचनांग, ओरा गतिविधिंग ओसो साहित्य-कला ता निर्देशक नियम कुना बारे ते ओरा विचार अनिवार्य रूप ते आम जनता ओसो ठोस संघर्ष ता जरूरत संगे मेल तिन्नो आंता। सांस्कृतिक लोकर, लेखक, कलाकार ओसो साहित्य-कला लोप्पा काम कीयाना बाकी कार्यकर्ता लोरा लोप्पाटल कम्युनिस्ट पार्टी ता आठवीं राह सेना ओसो पूना चौथी सेना संगे कलियसी मुक्ति-संघर्ष लोप्पा मत्तोर लोप्पा सिर्फ उचुने मुल कैरियरवादीर मंदानूर ओसो मना संगे सिर्फ अस्थाई रूप तेने मंदानूर, मति ओरा बहुसंख्या मना काम काजे वेल्ले मेहनत ते काम किया मंता। वीर कामरेड्स ना भरोसा ते मना साहित्य, नाटक, पाटा ओसो ललित कलांग लोप्पा वेल्ले लोकर प्रतिरोध युद्ध शुरू आता पेरके तम्मा काम शुरू कितोर, वेल्ले लोकर प्रतिरोध-युद्ध तुकू मुन्ने वेने वेल्ले कालम एवनल क्रांतिकारी काम कितोर। वेल्ले मुशिकल कुना सामना कितोर अनि तम्मा काम ओसो रचनांग संगे व्यापक जनता लोप्पा प्रभाव वाटतोर। इद्रम ता परिस्थिति ते मनम वीर कामरेड्स ना लोप्पा वेने उचुन मुल कला-साहित्य बोना काजे मंता इंदाना समस्यांग किन स्पष्ट रूप ते हल इंजे एवनल किया परता हिल्ले इंजी बारांकु इंतोम? इंजे वेने उचुन मुल क्रांतिकारी साहित्य-कला जनता ना बेहरा समुदाय काजे आयवा शोषक ओसो उत्पीड़क वर्ग काजे मंता इंजी इंतोरा?

शोषक-शासक लोरा काजे वेने कला-साहित्य मंता इंदाना पोल्लो लोप्पा बदे डावुट हिल्ले। बद कला-साहित्य जर्मीदार वर्ग काजे मंदिता, अदिन किन सामंती कला-साहित्य इंतोम। चीन ता सामंती युग लोप्पा

शासक वर्ग ता कला-साहित्य इद्रमे मत्ता। नेंडु वेने इद्रम ता कला-साहित्य चीन लोप्पा वेल्ले ताकिंता। बद कला-साहित्य पूंजीपति वर्ग काजे मंदिता अदिन पूंजीपति वर्ग ता कला-साहित्य इंतोमा ल्यांग श-छ्यू² लेक्कटोरा लू शुन आलोचना कीसि मत्तोरा इद्रम तोर कला-साहित्य किन वर्ग तुक् बाहर हंजी वेहिंतोर, मति असल ते ओरू पूंजीपति वर्ग ता कला-साहित्य ता पक्ष एतितोर अनि सर्वहारा कला-साहित्य ता विरोध किसोर मंदितोरा। बद कला-साहित्य साम्राज्यवादिरा काजे मंदिता, चओ च्चो-रन, चांग चिं-फिंग³ ओसो ओना लेक्कटा बाकी लोकुरा रचनांग देशद्रोही कला-साहित्य इंतोमा। मना कला-साहित्य पोरो वेहत्ता विभिन्न रकम ता लोकुर काजे आयवा जनता काजेने मंदिता। माटु वर्तमान कालम ते चीन ता पूना संस्कृति सर्वहारा वर्ग ता नेतृत्व ते आम जनता ना साम्राज्यवाद-विरोध, सामंतवाद-विरोधी संस्कृति इंजी वेहतोमा। नेंडु निज्जमे आम जनता काजे मत्ता संस्कृति सर्वहारा वर्ग ता नेतृत्व ते मंदिता। पूंजीपति वर्ग ता नेतृत्व ते मंदाना संस्कृति जनता काजे मन्नो आंता। स्वाभाविक रूप ते पूना कला-साहित्य पोरो वेने इदे पोल्लो लागू आंता, इदु पूना संस्कृति ता उंदी अंग आंदू। मनम कला-साहित्य ता समृद्ध विरासत किन, चीन ओसो बाकी देश कुना लोप्पा पाड़ना कालम तिंची ताकसोर मत्ता कला-साहित्य ता रिवाज कुन स्वीकार कीयाना, मति मना उद्देश्य आम जनता ना सेवा कीयानाए मंदाना। मनम हत्ता कालम ता साहित्यिक, कलात्मक रूप ता इस्तेमाल कीयाना तुक् अस्वीकार कीवोमे। मना कैदे वात्ता पेरके इव पाड़ना रूप कुना वेने मनम पुनःसंस्कार कीसि ताना लोप्पा उंदी पूना विषय-वस्तु निहतकोम, अस्के जनता ना सेवा कीयाना उंदी क्रांतिकारी वस्तु बनेमांतांग।

आम जनता लोप्पा बोर शामिल मंतोर? व्यापक रूप ते जनता लोप्पा, मजदूर, किसान, सैनिक ओसो शहरी निम्न-पूंजीपति वर्ग शामिल मंतोरा। अदिन काजे मना कला-साहित्य सबसे मुन्ने क्रांति ता नेतृत्व कीयाना मजदूर वर्ग काजे मंदिता। दूसरा, क्रांति लोप्पा मना सबसे व्यापक ओसो सबसे दृढ़ एकता कीयाना किसान लोरा काजे मंदिता। तीसरा,

क्रांतिकारी युद्ध ता मुख्य शक्ति मत्ता, सशस्त्र मजदूर-किसान इत्तेके आठवीं राह सेना ओसो पूना चौथी सेना अनि जनता ना बाकी सशस्त्र फौज कुना काजे मंदिता। चौथा, शहरी निम्न-पूंजीपति वर्ग ता मेहनतकश जनता ओसो बुद्धिजीविरा काजे मंदिता। इव रेंडासी रकम ता लोकर क्रांति लोप्पा मना संगे एकता ते वांतोर अनि दीर्घकालिन सहयोग किया परिंतोर। वीर नालुंग रकम ता लोकर कलियसी चीनी राष्ट्र ता उंदी सबसे बेहरा ओसो व्यापक जनता बनेमांतोर।

मना कला-साहित्य पोरो वेहत्ता नालुंग रकम ता लोकरा काजे मंदाना। ओरा सेवा कियाला काजे मनम सर्वहारा वर्ग ता दृष्टिकोण लागू कीयाना, निम्न-पूंजीपति वर्ग ता दृष्टिकोण आयो। नेंडु व्यक्तिवादी, निम्न-पूंजीपति वर्ग ता दृष्टिकोण संगे टुंडसी मत्ता लेखक लोर, क्रांतिकारी मजदूर, किसान ओसो सैनिक लोरा व्यापक जनता ता सही सेवा किया परवोर। ओरा गिर्दा मुख्य रूप ते अल्पसंख्यक निम्न-पूंजीपति वर्ग ता बुद्धिजीविरा पोरो नें मंदिता। मुख्य रूप ते इदिना कारण तेने मना उचुन कामरेड्स “कला-साहित्य बोना काजे?” ता समस्या किन सही तरीका ते हल किया परवोर आंतोर। इद पोल्लो किन वेहनास्के नन्ना सिद्धांत ता चर्चा किसोर हिल्लेन। सिद्धांत ता रूप ते ओसो नावा पोल्लो ते मना लाईन ता बोराई मजदूर, किसान ओसो सैनिक लोरा व्यापक जनता किन निम्न-पूंजीपति वर्ग ता बुद्धिजीविरकिनकु कम महत्वपूर्ण आल्सोना नन्ना इगा व्यवहार ता पोल्लोंग किया मंतान, करनी ता आयो। इत्तेके तम्मा व्यवहार लोप्पा, तम्मा करनी लोप्पा ओरू निम्न-पूंजीपति वर्ग ता बुद्धिजीविरकिनकु कम महत्वपूर्ण समझेमायोर। नन्ना इगा व्यवहार ता पोल्लोंग किया मंतान, करनी ता पोल्लोंग किया मंतान। अस्के तम्मा व्यवहार ते, तम्मा करनी ते ओरू निम्न-पूंजीपति वर्ग ता बुद्धिजीविर किन मजदूर, किसान, सैनिक लोरकिनकु ज्यादा महत्वपूर्ण समझेमांतोर।

नन्ना, ओरू इद्रम कीवोर इंजी आल्सिंतांगा। वेल्लेटोर निम्न-पूंजीपति वर्ग ता बुद्धिजीविरा अध्ययन कीयाना ओसो ओरा मनोवृत्ति ता विश्लेषण कीयाना लोप्पा अपेक्षाकृत ज्यादा गिर्दा तोहिंतोर। ओरू मजदूर,

किसान, सैनिक लोरा व्यापक जनता संगे सम्पर्क तासवा लेवा ओरा संगे व्यवहारिक संघर्ष लोप्पा भाग एतवा लेवा, ओरकिन शिक्षित कियवा लेवा इद्रम ता बुद्धिजीविराए पाटा पारना लोप्पा ध्यान केंद्रित कींतोर, ओरा गलतिंग ना पर्दाफाश कीवोर आंतोर। निम्न-पूंजीपति वर्ग लोप्पा पुट्टांकु ओसो खुद वेने बुद्धिजीवी मत्तांकु, वेल्लेटोर सिर्फ बुद्धिजीविर लोप्पा ने तम्मा दोस्त लोरकिन परहकींतोर अनि ओराए अध्ययन कीयाना पोरो ध्यान केंद्रित कींतोर। इद्रम ता अध्ययन सर्वहारा वर्ग ता दृष्टिकोण ते कित्तेके सही मंदिता। मति ओरू इद्रम बिल्कुले कीवोर आंतोर। ओरू निम्न-पूंजीपति वर्ग ता दृष्टिकोण लागू कींतोर। निम्न-पूंजीपति वर्ग ता बारे तेने वेहतना लेक्कटा रचनांग ना सृजन कींतोर। बचोनो साहित्यिक रचनांग ओसो कलात्मक सृजन कुना लोप्पा मनाकिन इदे परिस्थिति दिसता। ओरू हमेशा निम्न-पूंजीपति वर्ग लोपा पुट्टना बुद्धिजीविराए समर्थन कींतोर, ओरा गलतिंग किन सही वेहिंतोर। दूसरा बगिल इद्रमतोर मजदूर, किसान, सैनिक लोरा व्यापक जनता संगे सम्पर्क तासोर आंतोर, ओरू ओरकिन समझेमायना लेवेके अध्ययन कीयाना कोशिश कम कींतोर। ओरा नड्मा गरें ता दोस्ती बने कीयाना कोशिश कम कींतोर। बस्केनो कोशिश कीतेकाई ओरा भूमिका लोप्पा पोरो-पोरो मेहनतकश जनता मंदिता मति लोप्पा निम्न-पूंजीपति वर्ग ता बुद्धिजीविरे मंदिंतोर। उचुक जागा ने ओरू मजदूर, किसान, सैनिक ओसो वीरा लोप्पाटल वायना कार्यकर्ता लोर किन विचार कींतोर। मति उचुन जागा ने ओरू उचुन वेने आल्सोर आंतोर। ओरू तम्मा विचारकु लेवेके तरीकांग ओसो तम्मा पूना कला-साहित्य किन (दिवार-पत्र, दिवार-चित्र, लोकगीत, लोक-कथांग) किन विचार किवोरे आंतोर। बस्के-बस्के ओरू इद्रम ताविन विचार वेने कींतोर मति इद वेने तम्मा रचनांग कियाला काजे बदे विषय किन परहकला काजेने कींतोर। बदे दूसरा मौका ते वीरू इद्रम कियानदिन कोंडांग रेंगल कीसि हूडिंतोर। निम्न-पूंजीपति वर्ग ता बुद्धिजीविराए आयवा पूंजीपति वर्ग पोरो वेने पक्षपातपूर्ण रुझान लागू कींतोर। इद्रमतोरा कालकु निम्न-पूंजीपति वर्ग ता बुद्धिजीविरा पक्ष ते मंदितांग। असरदार माटा ने वेहाना इत्तेके ओरा

अन्तःचेतना ते इंजे वेने निम्न-पूँजीपति वर्ग ता बुद्धिजीविराए राज्य मंता। इद्रमे ओरू इंजे एवनल “बोना काजे?” ता समस्या किन स्पष्ट रूप ते हल किया परताद हिल्ले। इद पोल्लो सिर्फ येनान लोप्पाटल वात्ता पूनोरा पोरोने आयवा लड़ाई ते हत्ता ओसो मना आधार-इलाकांग लोप्पा ओसो आठवीं राह सेना, पूना चौथी सेना लोप्पा बचोनो साल एवनल काम कित्ता बचोनो लोकरू इंजे वेने इद समस्या किन पूराए हल किया परताद हिल्ले। इदिन पूराए हल कियाला काजे कम से कम आठ-दस साल लागिंतांग। मति तीना लोप्पा बचोन कालम लागतेकाई मनम इदिन किन बदे वेने परिस्थिति ते स्पष्ट ओसो पूर्ण रूप ते इद समस्या किन हल कीयाना। मना लेखक ओसो कलाकार लोर पोयता कामकिन पूरा कीयाना अनि तम्मा दृष्टिकोण बदले कीयाना। ओरू मजदूर, किसान, सैनिक लोरा नड़मा ओसो व्यवहारिक संघर्ष नड़मा प्रक्रिया ओसो मार्क्सवाद अनि समाजवाद ता अध्ययन कीयाना प्रक्रिया संगे तीरम-तीरम तम्मा कालकु मजदूर, किसान, सैनिक लोरा पक्ष ते कीयाना। सर्वहारा वर्ग ता पक्ष ते कीयाना। सिर्फ इद्रमे मनम मजदूर, किसान, सैनिक लोरा काजे मत्ता लेवेके निज्जमे सर्वहारा वर्ग काजे मत्ता कला-साहित्य ता सृजन किया परितोम।

“बोना काजे?” ता सवाल उंदी बुनियादी सवाल मंता, इदु उंदी सैद्धांतिक सवाल आंदू हत्ता कालम ते मना उचुन कामरेड्स नड़मा मतभेद ओसो विचार-भिन्नता, विरोध ओसो फूट पैदा आता, अदु इद बुनियादी ओसो सैद्धांतिक सवाल ता बारे आयवा उचुन तुलनात्मक गौण सवाल कुना बारे ते लेवेके सैद्धांतिक विवाद हिल्ला सवाल कुना बारे ते पैदा आता। मति इद सैद्धांतिक सवाल ता बारे ते रेंडु प्रतिद्वंद्वी पक्ष कुना नड़मा बदे विचार-भिन्नता मंदाना लेक्का हिल्ले। बारांकु इत्तेके अवु लगभग पूर्ण एकमत वेने तोहतांग, उचुन-उचुन इव रेंडासी ना रुझान मजदूर, किसान ओसो सैनिक लोर किन सुडला हूडना खुद किन आम जनता तल अलग-थलग कीयाना बगिल मंता। नन्ना “उचुन-उचुन” बारांकु इत्तान इत्तेके वीरु साधारण रूप ते मजदूर, किसान, सैनिक लोरकिन क्वोमिंगतांग कित्ता लेक्का सुडला हूडोर आंतोर अनि खुद किन आम जनता तल अलग-

थलग किवोर आंतोर, मति ओरा लोप्पा इदु रुझान जरूर मंदिता। बस्के एवनल बुनियादी समस्या हल आयो, अस्के एवनल बाकी समस्यांग किन वेने हल्कोए हल किया परमूड़ायो। उदाहरण तुकू कला-साहित्य लोप्पा संकीर्णतावाद, उन्मूलन सिर्फ इव “मजदूर ओसो किसान लोरा काजे!”, “आठवीं राह सेना ओसो पूना चौथी सेना काजे!” अनि “जनता नड़मा दायना!” इंदाना लेक्कटा नारांग केयसिए सही रूप ते लागू किया परमूड़ांता, लेवेके संकीर्णतावाद ता समस्या बस्केने हल आया परवो आंता। लू शुन उंदी बेरा इद्रम इत्तोर:- समान उद्देश्य उंदी संयुक्त मोर्चा ता पहली शर्त आंदू। इदु तथ्य ता कारण तेने मना मोर्चा इंजे एवनल संयुक्त मोर्चा बनेमाया परताद हिल्ले। इदिनगडल मनम मना उद्देश्य ता एकीकरण किया परोम, उचुन मुल सिर्फ सुडला-सुडला ग्रूप काजे ओसो असल इतेके तम्मा काजेए काम कीयाना लेक्का दिसिंता। मति मना सब्बे तोरा उद्देश्य मजदूर ओसो किसान लोरा व्यापक जनता ता सेवा कीयाना मतेके बदे डावुट हिल्ला जरूर मना मोर्चा उंदी संयुक्त मोर्चा बनेमायरा।⁴

इद समस्या अद कालम ते शांघाई लोप्पा मत्ता, इंजे अदु हुंगकिंग लोप्पा वेने मंता। इद्रम ता जागा ने उद समस्या किन सही तरीका ते हल कीयाना वेल्ले मुशिकल आंता, बारांकु इत्तेके अगटा शासक क्रांतिकारी लेखक ओसो कलाकार लोरा दमन कींतोर, ओरकिन मजदूर, किसान, सैनिक जन समुदाय लोप्पा दायना आजादी हीवोर आंतोर। मना इगाटा परिस्थिति इनपड़े अलग मंता। माटु क्रांतिकारी लेखक ओसो कलाकार लोर किन ओरू सक्रिय रूप ते मजदूर, किसान, सैनिक लोरा संगे सम्पर्क कीयाना इंजी प्रोत्साहन हींतोम। ओरू आम जनता नड़मा दायना अनि उंदी निज्जमता क्रांतिकारी कला-साहित्य ता सृजन कीयाना इंजी पूरा आजादी हींतोम। अदिन काजे मनगा इद समस्या हल आयना गरे एवता। मति इद्रम इत्तेके इदु स्पष्ट ओसो पूर्ण रूप ते हल आता इंजी आयो। इद समस्या किन पूर्ण ओसो स्पष्ट रूप ते हल कियाला काजे मनम मार्क्सवाद ता अध्ययन ओसो समाज ता अध्ययन कीयाना। मार्क्सवाद इत्तेके जीवा मत्ता मार्क्सवाद ता अध्ययन कीयाना। आम जनता ना पिस्वल ता ओरा संघर्ष

कुना लोप्पा तन्ना भूमिका निभे किसोर मत्ता मार्क्सवाद ता अध्ययन कीयाना, सिर्फ पोल्लोंग काजे मत्ता मार्क्सवाद ता आयो। पोल्लोंग काजे मत्ता मार्क्सवाद किन वास्तविक पिस्वल ता मार्क्सवाद ते बदले कितेके संकीर्णतावाद मन्नो आयार। इद्रम कितेके सिर्फ संकीर्णतावाद ता समस्याए आयवा वेल्ले दूसरा समस्यांग वेने हल आयनुंग।

1. बोना सेवा कीयाना, इद समस्या पेरके, दूसरा समस्या बद्रम सेवा कीयाना इंजी वांता। मना उचुन कामरेड्स ना माटा ने: मनम स्तर पोरो तेहना काम कीयाना या लेवेके लोक-प्रचलित कीयाना काम कीयाना?

हत्ता कालम ते उचुन कामरेड्स लोक-प्रचलित कीयाना काम कियानदिन कम महत्व हितोर लेवेके अदिन किन नजरअंदाज कीतुर अनि स्तर बेरसी कीयाना काम किन जरूरत तुकू ज्यादा महत्व हितोर। स्तर बेरसी कीयाना काम पोरो जोर जरूर हियाना मति सिर्फ इदिना काजे ने काम कीयानादु गलत आंता। इद्रम कीयानास्के “बोना काजे?” ता समस्या किन स्पष्ट रूप ते हल कियवा मंदानादु दिसता। इद्रम मना कामरेड्स लोर “बोना काजे?” ता समस्या किन स्पष्ट रूप ते हल किया परवोर आंतोर, अदिन काजे ओरगा लोक-प्रचलित कीयाना ओसो स्तर बेरसी कीयाना पोल्लो ता जांच कियाला काजे बदे सही तरीका मन्नो आंता। अद्रमासी इव रेंडिना नड़मा ता संबंध कुन समझेमायना कमजोरी वीरगा मंदिता। मना कला-साहित्य बुनियादी रूप ते मजदूर, किसान ओसो सैनिक लोरा काजे मंता, अदिन काजे लोक-प्रचलित कियाला काजे काम कीयाना इतेके मजदूर, किसान, सैनिक लोरा लोप्पा लोक-प्रचलित कीयाना। स्तर बेरसी कीयाना इतेके ओरू वर्तमान स्तर तल मुन्ने दायना। मनम ओरा नड़मा बदिन किन लोक-प्रचलित कीयाना? मनम हल्कोए मानेमायना लेक्कटा सामंती जर्मीदार वर्ग किन जरूरत मत्ता चीज किन लोक-प्रचलित कीयाना या? लेवेके मनम पूंजीपति वर्ग किन जरूरत मत्ता चीज कुना प्रचार कीयाना? मनम निम्न-पूंजीपति वर्ग ता बुद्धिजीविर किन जरूरत मत्ता चीज कुना प्रचार कीयाना या? हिल्ले, मनम इविना लोप्पाटल बदिनाए वेने

प्रचार कीयानायो। मनम सिर्फ मजदूर, किसान, सैनिक लोर किन जरूरत मत्ता चीज कुनाए लोक-प्रचलित कीयाना। इद्रम कित्तेके मजदूर, किसान ओसो सैनिक लोर किन शिक्षित कीयाना काम तुकू मुन्ने मावा काजे मना मुन्ने वीरगडल करियाना काम मंदिता। इदु पोल्लो स्तर बेरसी कीयाना काम पोरो ज्यदा लागू आंता। स्तर बेरसी कियाला काजे उंदी आधार मंदाना। उदाहरण तुकू एर ता उंदी बाल्टी किन हूडाटू: अदिन किन नेल पोरोटल तेहवेके वायुमंडल तले तेहना आंताया? इद्रमे कला-साहित्य किन बद आधार तल तेहना? सामंती वर्ग ता आधार तल तेहना या? लेवेके पूंजीपति वर्ग ता आधार तले? इविना लोप्पाटल बदे वेने आधार तल तेहनायो, अदिन सिर्फ मजदूर, किसान, सैनिक लोरा जनता ना आधार तले तेहाना। इत्तेके मजदूर, किसान ओसो सैनिक लोर किन पोरो तेहची सामंती वर्ग, पूंजीपति वर्ग ओसो निम्न-पूंजीपति वर्ग ता बुद्धिजीविरा “स्तर बेरसी” कीयाना एवनल एवसी कीयाना इंजी आयो: इदिना अर्थ कला-साहित्य ता स्तर किन बद दिशा ते मजदूर, किसान ओसो सैनिक लोर खुद मुन्ने दाया मंतोरो अदे दिशा ते मुन्ने ओयना। बारांकु इत्तेके इद दिशा ते सर्वहारा वर्ग मुन्ने हंजोर मंदिता। इगा मजदूर, किसान, सैनिक लोरगडल करियाना काम ओसो उंदी बेरा मना मुन्ने वांता। सिर्फ मजदूर, किसान ओसो सैनिक लोरगडल शुरू कीसिए माटु लोक-प्रचलित कीयाना ओसो स्तर बेरसी कीयाना काम किन सही तरिका ते समझेमाया परितोमा। इव रेंडासी ना नडमा ता सही संबंध कुना खोज किया परितोमा।

सब्बे रकम ता कला-साहित्य ता स्रोत बाता मंदिता? विचारधारात्मक रूप ते साहित्यिक रचनांग ओसो कलाकृति मानेय ना दिमाग ते बदे रकम ता सामाजिक पिस्वल ता चित्र पुट्टिता। क्रांतिकारी कला-साहित्य क्रांतिकारी लेखक ओसो क्रांतिकारी कलाकार लोरा लोप्पा जनता ना पिस्वल किन हूडसी पुट्टिता। जनता ना पिस्वल असली साहित्य ओसो कला काजे कच्चा माल ता खान मंदिता। इद कच्चा माल तन्ना स्वाभाविक रूप ते मंदिता, इद कच्चा माल अनपढ़ मंदिता मति वेल्ले सजीव, समृद्ध ओसो मौलिक मंदिता: तीना संगे तुलना कित्तेके पूरा

कला-साहित्य जीवा हिल्वा लेक्का आंता। सिर्फ इदे कला-साहित्य ता उंदी हंदी हिल्वा स्रोत आंदू सिर्फ इदे कच्चा माल अदिना स्रोत बारांकु मंता इत्तेके अदिना स्रोत दूसरा बदे मंदाए परवो। लोकुर पूछेमायनूर पुस्तकिंग पाड़ना कालम ता ओसो विदेशीरा साहित्यिक रचनांग ओसो कला ताए स्रोत आयवा सिर्फ उंदी धारा आंदुंग, इविना सृजन मना मुन्नेटा लोकुर ओसो विदेशिर तम्मा कालम ता ओसो तम्मा जागा ता जनता ना पिस्वल तल दोरकी कित्ता साहित्यिक ओसो कलात्मक कच्चा माल पोरो आधार आसी कितोर इंजी। मनम साहित्यिक ओसो कलात्मक विरासत ता सब्बे श्रेष्ठ चीज कुन लागू कीयाना। आलोचनात्मक रूप ते सब्बे जरूरी मत्ता चीज कुन लागू कीयाना। ताना पेरके मनम मना कालम ओसो मना जागा ता जनता ना पिस्वल लोप्पा मत्ता साहित्यिक ओसो कलात्मक कच्चा माल तल मना कला ता सृजन कीयानास्के, अदिन उंदी उदाहरण मंदाना ओसो हिल्वा मंदाना लोप्पा वेल्ले फर्क मंदिता। उंदी अपरिष्कृत ओसो परिष्कृत, अनपढ़ ओसो पढ़ेमातोरा, दोड़ ता स्तर ओसो पोरोटा स्तर नड़मा लेक्का, स्पीड ओसो तीरम-तीरम सृजन कीयाना नड़मा मत्ताचोने फर्क मंदिता। अदिन काजे बदे वेने परिस्थिति ते मना पुरकानोर ओसो विदेशीरा विरासत बिल्कुले विड़सनायो, अवु सामंती वर्ग लेवेके पूंजीपति वर्ग ता मत्तेकाई अदिन किन उदाहरण ता रूप ते इस्तेमाल जरूर कीयाना। मति विरासत किन लागू कीयाना ओसो अदिन उदाहरण ता रूप ते इस्तेमाल कीयाना काम किन खुद ता सृजन-कार्य ता जागा ते तासनायो, इद्रम बिल्कुले आया परो। मना मुन्नेटा लोकुर ओसो विदेशीरा कला ता आलोचनात्मक विवेचन कियवा लेवा अविन किन इस्तेमाल कीयाना कला-साहित्य लोप्पा उंदी वेल्ले असृजनशीलता ओसो नुकसानदायक कठमुल्लावाद आंता। चीन ता क्रांतिकारी लेखक, कलाकार लोर होशियार लेखक, कलाकार लोरिन, आम जनता नड़मा दाया लागियर। ओरू वेल्ले जोम एवनल बदे शर्त हिल्वाए मजदूर, किसान, सैनिक जनता लोप्पा दायना, संघर्ष ता किस्स ते डेयना। सब्बे व्यापक ओसो सब्बे समृद्ध स्रोत लोप्पा दायाना अस्केने ओरू सब्बे रकम ता लोकुर, सब्बे

वर्ग, सब्बे रकम ता जनता, पिस्वल, संघर्ष ता सब्बे सजीव रूप, साहित्य-कला ता पूरा कच्चा माल ता निरीक्षण किया परितोर। अस्केने ओरू अविना अनुभव दोरकी किया परितोर, अस्के ने ओरू अविना अध्ययन किया परितोर ओसो अस्केने ओरू अविना विश्लेषण किया परितोर। सिर्फ इद्रम कीसिए ओरू सृजन-कार्य शुरू किया परितोर। लेवेके ओरकिन खुद किने तम्मा रचनांग काजे बदे वेने सामग्री दोरका परवो आयर, इद्रम ओरू उंदी नकली लेखक ओसो नकली कलाकार बनेमायनूर। इद्रम ता लेखक ओसो कलाकार लोरा बारे ते लू शुन तन्ना वसीयत लोप्पा तन्ना मरीं किन इद्रम बिल्कुल बनेमायनायो इंजी वेतोर।⁵

मानेय ना सामाजिक पिस्वले साहित्य, कला ता स्रोत मंदिता। ओना विषय-वस्तु कला-साहित्य ता मुकाबला ते बचोनो ज्यादा सजीव ओसो समृद्ध मंदिता। मति लोकर सिर्फ पिस्वल हूडसिए खुश आयोर आंतोर ओरू साहित्य ओसो कला ता वेने मांग कींतोर। इद्रम बारांकु आंता? इदिना कारण- अवु रेंडासी सुंदर मत्तेके ओसो साहित्यिक रचनांग, कला लोप्पा दिसना मानैना पिस्वल रोज ता असली पिस्वल तुकू ज्यादा नेल संगे बोयसी मत्तेके, ज्यादा तीव्र, केंद्रित, वेल्ले विशिष्टतापूर्ण, आदर्श ता गर्रे ओसो बचोनो ज्यादा व्यापक आया परिता अनि अदु इद्रमे मंदाना वेने। क्रांतिकारी कला-साहित्य असल ते पिस्वल पोरों आधार आसी विभिन्न रकम ता भूमिकांग निभे कीयाना, इतिहास किन मुन्ने ओयला काजे आम जनता ना मदद कीयाना। उदागरण तुकू उंदी बगिल करवु, हिंगम ओसो उत्पीड़न ता मुशिकलकु मंतांग, दूसरा बगिल मानेय मानेय ना शोषण ओसो उत्पीड़मन ता अस्तित्व वेने मंता। इव पोल्लोंग हर जागा ते मंदितांग, लोकर इव पोल्लोंग किन वेल्ले आम समझेमांतोर। लेखक ओसो कलाकार इद्रम ता रोज ता घटनांग किन केंद्रीकरण कींतोर। अविन नडुमा ता अन्तरविरोध संघर्ष कुन उंदी रूप हींतोर। जनता किन जागृत कीयाना, गिर्दा कीयाना, हेरे-हेरे ता वात्तावरण किन बदले कियाला काजे एकता आसी संघर्ष कियाला काजे प्रेरित कीयाना लेक्कटा साहित्य ओसो कला

ता रचना कींतोर। इद्रम ता कला-साहित्य लेवा मना काम पूरा आया परवो, कारगर रूप ते ओसो जल्दितेके पूरा आयाये परवो।

कला-साहित्य ता काम लोप्पा लोक-प्रचलित कीयाना ओसो स्तर बेरसी कीयाना इत्तेके बाताल? इव रेंडासी काम नडमा बाता संबंध मंता? लोक-प्रचलित कला सरल ओसो समझेमायला लेक्का मंदिता। अदिन काजे अविन किन व्यापक जनता तुलनात्मक रूप ते हल्कोए ओसो जल्दिते लागू कींता। बेहरा स्तर ता रचनांग तुलनात्मक रूप ता ज्यादा व्यवहारिक मंदितांग अदिन काजे अविना रचना कीयाना मुशिकल आंता। साधारण रूप ते अवु इस्सल व्यापक जनता लोप्पा ज्यादा हल्को ओसो जल्दी लोक-प्रचलित आया परवोंग आंतांग। मजदूर किसान, सैनिक लोरा मुन्ने इद समस्या मंता। ओरू इंजे दुश्मन खिलाफ उंदी निर्मम ओसो नेत्तुर लड़ई लड़ेमाया मंतोर, मति सामंती वर्ग ओसो पूंजीपिति वर्ग ता दीर्घकालीन शासन मत्तांकु अनपढ़ आसी मंतोर अदिन काजे ओरू वेल्ले गिर्दा ते व्यापक स्तर ते जागरण आंदोलन ता मांग किया मंतोर। ओरू तम्मा फौजी जरूरत किन पूरा कीयाना लेक्कटा ओसो हल्कोए समझेमाया परना लेक्कटा कला-साहित्य ता मांग किया मंतोर। तीनगडल ओरा संघर्ष कीयाना गिर्दा ओसो जीत दोरकी कीयाना विश्वास बेरसिंता, ओरा एकता मजबूत आंता, ओरू उंदी जीवा आसी दुश्मन संगे साहसपूर्वक लड़ेमाया परिंतोर। ओरा मौलिन जरूरत “वेल्ले पुंगर वाटसी मत्ता रेशमी कपड़ा” आयवा “बर्फ अरना कालम ते काम वायना ईंधन” आंदू। अदिन काजे वर्तमान परिस्थिति लोप्पा लोक-प्रचलित कीयाना ज्यादा जरूरत मंता। प्रचार कीयाना काम ता महत्व किन कम हूडना लेवेके नजरअंदाज कीयाना गलत आंता।

मति प्रचार कीयाना काम ओसो स्तर बेरसी कीयाना काम नडमा ता संबंध किन देहा वेने परमूडायो। परिस्थिति सिर्फ बेहरा स्तर ता उचुक रचनांग किने लोकुरा लोप्पा प्रचार कियमूडायो मंता इंजिए आयो व्यापक जनता ना सांस्कृतिक स्तर वेने लगातार बेरसोर दाया मंता। लोक-प्रचलित कीयाना काम ता स्तर हमेशा उंदी लेक्का मत्तेके महीनों-महीना ओसो

सालों-साल उंदी लेक्कटा पोल्लोंग सप्लाई कियमूडाता। हमेशा ओरे “नन्हे ग्वाले”⁶ ओरे “मानेय, कै, तोड्डी, चाकू, टाली, हें”⁷ वाले विषय किन सही सप्लाई कित्तेके शिक्षा हियानोर ओसो शिक्षा हासिल कियानोरा परिस्थिति वरोनगा छै ओसो दूसरोनगा आधा दर्जन इत्ता लेक्का आयो या? इद्रम ता लोक-प्रचलित कीयाना काम तल बाता फायदा? जनता लोक-प्रचलित कीयाना मांग कीता, ताना पेरके स्तर बेरसी कीयाना वेने मांग कीता: अदु हर महीना ओसो हर साल स्तर बेरसी कीयाना मांग कीता। इगा लोक-प्रचलित कीयाना इत्तेके जनता काजे स्तर बेरसी कीयाना आंता। इद्रम ता स्तर बेरसी कीयाना काम वायुमंडल ओसो लोप्पा-लोप्पा आयवा लोक-प्रचलित कीयाना काम पोरो वेने आधार आसी मंदिता। इद्रम ता स्तर बेरसी कीयाना काम ता निर्णय लोक-प्रचलित कीयाना कामे कीता अनि संगेने लोक-प्रचलित कीयाना मार्गदर्शन वेने कीता। पूरा चीन लोप्पा क्रांति ता विकास, क्रांतिकारी संस्कृति ता विकास सही तरीका ते आसोर हिल्ले, अविना प्रचार वेने तीरम-तीरम आया मंता। बदे-बदे इलाका लोप्पा लोक-प्रचलित कीयाना काम पूरा आता ओसो लोक-प्रचलित कीयाना लोप्पा आधार आसी स्तर बेरसी कीयाना काम आया मंता। मति बाकी इलाकांग लोप्पा लोक-प्रचलित कीयाना काम इंजे वेने शुरू आताद हिल्ले। अदिन काजे बदे उंदी इलाका लोप्पा लोक-प्रचलित कीयाना पोरो आधार आसी स्तर बेरसी कीयाना काम ते दोरकी कित्ता अनुभव किन दूसरा इलाकांग लोप्पा वेने लागू किया परमूडांता। अगा अवु लोक-प्रचलित कीयाना काम ओसो स्तर बेरसी कीयाना काम ता मार्गदर्शन कियाला सहयोग कीतांग। इद्रमे अवु मना वेल्ले विंको-वंको मत्ता हरी ने मनाकिन लेसला हीवोंग आयनुंगा। अन्तरराष्ट्रीय स्तर ते दूसरा देश कुना बेसता अनुभव ओसो खासकर सोवियत संघ ता अनुभव वेने मना मार्गदर्शन कीतांग। अदिन काजे मनगा स्तर बेरसी कीयाना काम लोक-प्रचलित कीयाना काम पोरोने आधार आसी मंदितांग। लोक-प्रचलित कीयाना काम ता मार्गदर्शन स्तर बेरसी कीयाना कामे कीता। इदिना कारण तेने लोक-प्रचलित कीयाना बद काम ता चर्चा किया मंतोमो

अदु स्तर बेरसी कीयाना काम लोप्पा बाधा वाटवा लेवा स्तर बेरसी कीयाना काम ता आधार बनेमांता। वायना कालम ते ओसो ज्यादा व्यापक रूप ते स्तर बेरसी कियाला काजे जरूरी परिस्थितिंग तैयार आयनुंग।

स्तर बेरसी कीयाना काम सीधा आम जनता ना जरूरत किने पूरा कियवा लेवा अदु आम जनता ना जरूरत कुन पेरेके मंजी वेने पूरा किया परिंता। इत्तेके मना कार्यकर्ता लोर किन इद्रम ताए स्तर बेरसी कीयाना काम ता जरूरत मंता। कार्यकर्ता लोर आम जनता लोप्पाटा मुन्ने हत्ता तत्व मंदिंतोर ओसो साधारण रूप ते जनतानगडले करियसी मंदिंतोर। ओरा काजे तुलनात्मक रूप ते बेहरा स्तर ता कला-साहित्य वेल्ले जरूरी मंदिता। इद पोल्लो किन नजरअंदाज कीयाना गलत आंता। कार्यकर्ता लोरा काजे कियानदु वेने पूराए जनता काजे ने मंदिता, बारांकु इत्तेके सिर्फ कार्यकर्ता लोरा संगेने ने माटु आम जनता किन शिक्षित किया परिंतोमा मनम मना कार्यकर्ता लोरकिन हियाना सामग्री लोप्पा आम जनता किन शिक्षित कीयाना ओसो जनता ना मार्गदर्शन कीयाना लोप्पा सहायता आयवेके स्तर बेरसी कीयाना मना काम निशाना हिल्वाए काडी एस्सना लेक्का आयार ओसो व्यापक जनता ना सेवा कीयाना बुनियादी नियम तिंची अलग आंयार।

सारांश रूप ते: क्रांतिकारी लेखक, कलाकार तम्मा कलात्मक कच्चा माल तल जनता ना पिस्वल मत्ता साहित्यिक कलात्मक कच्चा माल किन विचारधारात्मक रूप ते उंदी विशाल जनता ना सेवा कीयाना कला-साहित्य बने किसिंतोर। तीना लोप्पा स्तर बेरसी कीयाना कला-साहित्य वेने शामिल मंता। इदिन किन शुरूआती स्तर ता कला-साहित्य पोरो आधार आसी विकसित कियमूडांता। इदिना जरूरत जनता लोप्पटा स्तर बेरसिस मत्ता हिस्सा ओसो सबसे मुन्ने जनता लोप्पाटा कार्यकर्ता लोर किन मंदिता। तीना लोप्पा शुरूआती स्तर ता कला-साहित्य वेने शामिल मंता। इदिना मार्गदर्शन बेहरा स्तर ता कला-साहित्य कींता अनि इस्सलिंग आम जनता ना बहुसंख्या किन फौजी जरूरत मंता। मना पूरा कला-साहित्य, इत्तेके अदिना स्तर बेहरा मत्तेकाई लेवेके शुरूआती

मत्तेकाई विशाल जन समुदाय काजे ने मंदिता ओसो सबसे मुन्ने मजदूर, किसान ओसो सैनिक लोरा काजेने मंदिता: इदिना सृजन मजदूर, किसान, सैनिक लोरा काजे कियमूडांता अनि ओरा काजेने इदिना इस्तेमाल आंता।

स्तर बेरसी कीयाना ओसो लोक-प्रचलित कीयाना काम नड़माता संबंध कुना समस्या किन हल कित्ता पेरेके इंजे मना विशेषज्ञ ओसो लोक-प्रचलित कीयाना काम कियानोरा नड़मा ता संबंध ता समस्या किन वेने हल किया परितोम। मना विशेषज्ञ सिर्फ कार्यकर्ता लोरा काजे ने आयवा मुख्य रूप ते आम जनता काजेने मंदिता। मना साहित्य-विशेषज्ञ लोर आम जनता ना दिवार-पत्र ओसो सेना, ग्रामीण लोप्पा रासना रिपोर्ट कुना पोरो ध्यान हियाना। मना नाटक-विशेषज्ञ लोर सेना ओसो ग्रामीण कुना सुडला-सुडला नाटक-मंडल कुना बगिल ध्यान हियाना। मना पाटा-विशेषज्ञ लोर आम जनता ना पाटांग पोरो ध्यान हियाना। मना ललित कला विशेषज्ञ लोर आम जनता ना ललित कला पोरो ध्यान हियाना। वीर सब्बेतोर कला-साहित्य किन आम जनता लोप्पा लोक-प्रचलित कीयाना काम किसोर मत्ता कामरेड्स ना संगे सम्पर्क कीयाना। ओरू उंदी बगिल लोक-प्रचलित कीयाना काम कियानोरा मदद कीयाना ओसो ओरा मार्गदर्शन कीयाना। दूसरा बगिल ओरगडल करियसोरे खुद ता ज्ञान बेरसी कीयाना ओसो खुद किन समृद्ध बने कियाला काजे आम जनता नगडल पोषक तत्व दोरकी कीयाना। इद्रम कीवेके ओरू “वड़िय तेने महल” बने कियानूर अनि आम जनता ओसो सच्चाई तल तम्मा सम्पर्क देहहानूर। इद्रम ता विषय-वस्तु ओसो पिस्वल तल जीरो बनेमायनूर। मनम विशेषज्ञ लोरा सामना कीयाना, बारांकु इतेके ओरू मना कार्य काजे वेल्ले मूल्यवान मंदिता। मति बोराई क्रांतिकारी लेखक लेवेके कलाकार आम जनता संगे गड्डिग संबंध तासितोर, ओरा विचार कुन प्रचार कींतोर ओरा काजे ईमानदार प्रवक्ता बनेमासिए ओरकिन शिक्षित किया परितोर ओसो आम जनता ना विद्यार्थि बनेमासिए ओरा शिक्षक बनेमाया परितोर इंजी मुन्ने ने ओरकिन वेहचियाना। खुद किन आम जनता ना मालिक समझेमातेके, खुद किन अमीर समझेमातेके “ दोड़ ता तबकांग” कुना पोरो दबाव

वाटतेके, ओरू बचोने प्रतिभाशाली मत्तेकाई आम जनता किन ओना जरूरत मन्नो आंता ओना काम ता बदे भविष्य मन्नो आंता।

मना इद रुझान उंदी उपयोगितावादी रुझान हिल्ले या? भौतिकवादी लोकुर सामान्य रूप ते उपयोगितावाद ता विरोध कीवा लेवा सामंती वर्ग, पूंजीपति वर्ग ओसो निम्न-पूंजीपति वर्ग ता उपयोगितावाद ता विरोध कींतोर। ओरू पोरो-पोरो उपयोगितावाद ता विरोध कीयाना पाखंडवाद ता विरोध कींतोर। मति खुद वेल्ले स्वार्थी ओसो उंदी वेल्ले अदूरदर्शी उपयोगितावाद किन लागू कींतोर। दुनिया लोप्पा बदे वने “वाद” उपयोगितावादी विचार तल बाहर मन्नो आंता: वर्ग-समाज लोप्पा इद वर्ग ता उपयोगितावाद मंदिता लेवेके अद वर्ग ता उपयोगितावाद मंदिता। मनम सर्वहारा क्रांतिकारी उपयोगितावादी आंदोम मना प्रस्थान-बिंदु व्यापक आम जनता ना वर्तमान ओसो वायना कालम ता अधिकार कुना एकता आंदू, इदिना संख्या मना आबादी ता 90 प्रतिशत तुकू ज्यादा मंता: अदिन काजे माटु व्यापक ओसो वेल्ले दीर्घकालीन उद्देश्य कुना काजे काम कीयाना क्रांतिकारि आंदोम, सिर्फ आंशिक ओसो फौरी उद्देश्य कुन हूडाना संकीर्ण उपयोगितावादीर आयोम। उदाहरण तुकू मीटु खुद पोरो ओसो उंदी सुडला ग्रूप पोरो उपयोगिता काजे अल्प संख्यक लोर किने विचार वायना लेक्कटा ओसो बहुसंख्यक लोराकाजे जरूरत हिल्ला कला-साहित्य किन थोपे कीसितेके, संगेने माटु आम जनता किन अदिना उपयोगितावाद काजे ओरा पोरो होंग आतेके मीटु सिर्फ जनता नाए अपमान किवा मीवा खुद ता आत्मज्ञान ता कमी किन वेने एक्सपोज कियाकिर। बदे वेने वस्तु सिर्फ विशाल जनता किन फायदा आतेकेने अदिन किन बेस इनमूडंता। मीवा रचना “वसंत कालम ते बर्फ अरना” लेक्का आया परिंता, मति इंजे अदु सिर्फ अल्पसंख्यक लोकुरा जरूरत कुने पूरा कींता ओसो आम जनता इंजे वेने “कंगाले मंतोर”⁸ अस्के मीटु अदिना स्तर किन बेरसी कीयाना जागा ते सिर्फ आम जनता पोरो होंग आयना तुकू बाताले फायदा हिल्ले। इंजे सवाल “वसंत कालम ते बर्फ अरना” ओसो “कंगाली ता पाटा पारना” नडुमा, स्तर बेरसी कीयाना

ओसो लोक-प्रचलित कीयाना नडमा एकता बद्रम कीयाना इंजी मंता। इद्रम ता एकता लेवा बोराई वेने विशेषज्ञ ना कला उंदी वेल्ले संकीर्ण उपयोगितावादी कला बनेमांता। मीटु इद्रम ता कला किन बचोन “शुद्ध ओसो बेहरा स्तर” ता कला इत्तेकाई, मीट हित्ता पोरोल ओसो आम जनता इदिना अनुमोदन कीवो आंता।

बेगा उंदी बेरा माटु बुनियादी नियम कुना समस्यांग किन इत्तेके मजदूर, किसान, सैनिक लोरा सेवा कीयाना समस्या किन ओसो “ओरा सेवा बद्रम कीयाना” ता समस्या किन हल कीतोम इत्तेके अगा इद्रमताए दूसरा समस्यांग किन इत्तेके बेसता पिस्वल ता बारे ते रासना, स्याही पक्ष ता बारे ते रासना लेक्कटा ओसो एकता ता समस्या किन वेने हल किया परितोम। माटु सब्बेतोरोम इद बुनियादी नियम ता बारे ते उंदी राय पेश कित्तेके कला-साहित्य ता सब्बे स्कूल, प्रकाशन, संगठन, मना पूरा साहित्यिक-कलात्मक गतिविधिं किन इद नियम ता पालन किया लागिंता। इद नियम तल भटकेमातेके गलत आंता। इदिना संगे कलियवा मंदाना हर पोल्लो किन सुधार कीयाना।

2. मना कला-साहित्य विशाल जनता काजे मंता, अदिन काजे माटु पार्टी लोप्पटा अंदरूनी संबंध कुना समस्यांग पोरो इत्तेके पार्टी ता कला-साहित्य लोप्पा कीयाना काम ओसो पूरा पार्टी काम नडमा ता संबंध कुना समस्या पोरो वेने विचार-विमर्श किया परितोम। इदे आयवा पार्टी ता बाहरी संबंध कुना समस्या इत्तेके पार्टी ता कला-साहित्य लोप्पा कीयाना काम ओसो गैर पार्टी कामकाज नडमा ता संबंध कुना समस्यांग कला-साहित्य लोप्पा संयुक्त मोर्चा ता समस्या पोरो वेने विचार-विमर्श किया परितोम।

वाटु, इंजे माटु पहली समस्या पोरो विचार कियाकाल। नेटा दुनिया ते पूरा संस्कृति ओसो पूरा कला-साहित्य निश्चित वर्ग कुनाए मत्ता लेक्का आया मंता, अविन किन निश्चित राजनीतिक कार्यदिशा ता अनुसार बने कियमूडांता। असल इत्तेके “कला, कला काजे” इंदाना सिद्धांत किन माने मायना कला, वर्ग तल बाहर मंदाना कला ओसो राजनीतिक समानान्तर

मंदाना, स्वतंत्र मंदाना कला इंदाना लेक्कटा बदे वेने कला हिल्ले। सर्वहारा वर्ग ता कला-साहित्य पूरा सर्वहारा क्रांतिकारी कार्य ता उंदी अंग आंदू: लेनिन ना माटा ने इदु पूरा क्रांतिकारी मशीन ता नट-पेंच’ लेक्का मंता। अदिन काजे कला-साहित्य लोपा पार्टी काम ओसो पार्टी ता पूरा क्रांतिकारी काम लोप्पा उंदी निश्चित ओसो सुनिर्धारित जागा मंदिता। इदु बदे विशेष क्रांतिकारी कालम ते पार्टी निर्धारित कीयाना क्रांतिकारी कार्य लोप्पाने मंदिता। इद व्यवस्था ता विरोध कित्तेके अनिवार्य रूप ते द्विवाद लेवेके बहुवाद पैदा आयारा। इद्रम आतेके त्रात्सकी कित्ता लेक्का “राजनीतिक मार्क्सवादी, कला पूंजीवादी” आयारा। माटु कला-साहित्य ता महत्व किन समझेमायला काजे जरूरत तुकू ज्यादा जोर हियाना पक्ष एतोम, मति इदिना महत्व किन कम आल्सनदिना पक्ष वेने एतोम आंतोमा साहित्य ओसो कला राजनीति ता अनुसार मंदिता, मति अवु खुद वेने राजनीति पोरो तम्मा महान प्रभाव वाटिंतांग। क्रांतिकारी साहित्य ओसो कला पूरा क्रांतिकारी कार्य ता उंदी अंग आंदू, इव रेंडासी इद काम ता नट ओसो पेंच आंदुंगा। बाकी सब्बे महत्वपूर्ण पार्टस कुना तुलना ते इवु कम जरूरी ओसो गौण मंदितांग, मति पूरा मशीन ता अनिवार्य अंग मंदितांग। मनगा सबसे सामान्य ओसो सबसे साधारण कला-साहित्य हिल्लेके माटु क्रांतिकारी आंदोलन किन ताकि किया परवोम ओसो जीडा वेने परवोमा इद पोल्लो किन समझेमायवा मंदाना गलत आंदू। इदे आयवा माटु कला-साहित्य राजनीति ता अनुसार इंतोम अस्के माटु वर्ग-राजनीति ता बारे ते वेहचोर मंदिंतोम, आम जनता ना राजनीति ता बारे ते वेहचोर मंदिंतोम, उचुने राजनीतिज्ञ लोरा राजनीति ता बारे आयो। राजनीति बचोन क्रांतिकारी मत्तेकाई लेवेके प्रतिक्रांतिकारी मत्तेकाई विभिन्न वर्ग कुना नड्मा ता संघर्ष आंदू, सिर्फ मुट्टामेंड लोकुरा कार्यवाही आयो। विचारधारा, कला लोप्पा क्रांतिकारी संघर्ष किन राजनीतिक संघर्ष ता अनुसार मंदाना। बारांकु इत्तेके सिर्फ राजनीति संगेने वर्ग विशेष ओसो आम जनता ना जरूरतकु केंद्रित रूप ते दिसिंतांग। क्रांतिकारी राजनीतिज्ञ लोर क्रांतिकारी राजनीति ता विज्ञान ओसो कला किन समझेमायना राजनीति-विशेषज्ञ

लोर सिर्फ कोटी-कोटी राजनेता-आम जनता ना नेतालोर आंदुर। ओरा काम राजनेता लोरा विशाल जनता ना राय जमा कीयाना अविन किन सुधरे कीयाना अनि ताना पेरके आम जनता किन वापिस कीयानादु मंता। जनता अविन किन तन्ना व्यवहार ते लागू कींता। ओरू लोन लोप्पा मंजी काम कीयाना, खुद किन बुद्धिमान समझमायना, खुद किन दुनिया तल अलग समझेमायना अमीर “राजनेतालोर” आयोरा इदु सर्वहारा वर्ग ता राजनेता लोर ओसो पतन आसोर मत्ता पूंजीवादी राजनेता लोरा नड़मा ता सैद्धांतिक फर्क आंदू इदिना कारण तेने मना कला-साहित्य ता राजनीतिक स्वरूप ओसो सच्चाई ता नड़मा पूर्ण एकता स्थापित आया परिंता। इद पोल्लो किन समझेमायवा मंदाना ओसो सर्वहारा वर्ग ता राजनीति किन इद वर्ग ता राजनेता लोर बाजारू बने कीयाना गलत आयारा।

तीना पेरके माटु कला-साहित्य लोप्पा संयुक्त मोर्चा ता सवाल पोरो विचार क्रियाकाल। कला-साहित्य राजनीति ता मातहत मंदिता, नेता चीन ता राजनीति ता पहली बुनियादी सवाल जापान ता प्रतिरोध कीयाना मंता अदिन काजे मना पार्टी ता लेखक, कलाकार लोर सबसे मुन्ने जापान ता प्रतिरोध कीयाना समस्या पोरो सब्बे गैर पार्टी लेखक-कलाकार लोरा संगे (तीना लोप्पा पार्टी ता समर्थक ओसो निम्न-पूंजीपति वर्ग ता लेखक-कलाकार लोरगडल पोयसी पूंजीपति वर्ग ओसो जर्मीदार वर्ग एवनल सब्बे तो र अदिना पक्ष एतितोर) एकता कीयाना। दूसरा, जनवाद सवाल पोरो वेने मनम ओरा संगे एकता कीयाना। जापान-विरोधी लेखक, कलाकार लोरा उंदी हिस्सा इदे सवाल पोरो मना संगे सहमत हिल्ले, अदिन काजे ओरा संगे एकता कीयाना दायरा अनिवार्य रूप ते उचुन सुडला आयारा। तीसरा, कला-साहित्य लोप्पा तन्ना विशेष सवाल, कला-साहित्य ता सृजन-प्रणाली ओसो सृजन-शैली ता संबंध ते ओरा संगे एकता कीयाना। इगा ओसो उंदी बेरा एकता ता दायरा ओसो वेने सुडला आयार, बारांकु इत्तेके माटु समाजवादी यथार्थवाद ता पक्ष एतितोम ओसो उचुन मुल इदिनकु सहमत मन्नोर आंतोर। बदे उंदी समस्या पोरो एकता मत्तेके अगा बदे दूसरा समस्या पोरो संघर्ष ताकिंता, आलोचना आंता। इव समस्यांग

अलग-अलग मंदाना संगे ने उंदी दूसरा संगे जुड़ेमासी वेने मंदितांगा इदिना कारण ते जापान ता प्रतिरोध कीयाना लेक्कटा एकता पैदा कीयाना समस्यांग लोप्पा वेने संघर्ष ओसो आलोचना किन संगे-संगे ताकी किया लागिता। संयुक्त मोर्चा लोप्पा, “ सिर्फ संघर्ष कीयाना, एकता बिल्कुले कीयानायो” इंदाना रेंडासी नीतिंग गलत मंदितांगा हत्ता कालम ते उचुन कामरेड्स दक्षिणपंथी आत्मसमर्पणवाद ओसो दुमछल्लावाद ओसो “वामपंथी” अलगावाद, संकीर्णतावाद पोरो अमल कीयानास्के कित्ता लेक्का। इदु पोल्लो बचोन राजनीतिक रूप ते सही मंता अचोने कला-साहित्य ता बारे ते सहीए मंता।

निम्न-पूंजीपति वर्ग ता लेखक-कलाकार चीन ता कला-साहित्य लोप्पा संयुक्त मोर्चा ता उंदी महत्वपूर्ण शक्ति आंदू। ओरा विचार ओसो ओरा रचनांग लोप्पा वेल्ले कमिंग मंतांग, मति तुलनात्मक रूप ते विचार कित्तेके ओरा झुकाव क्रांति बगिले मंदिता ओरू मेहनतकश जनता ना गरे मंदिता। अदिन काजे ओरकिन तम्मा गलतिंग किन सुधरे कियाला काजे मदद कीयाना, मेहनतकश जनता ना सेवा कीयाना मोर्चा ता पक्ष ते कीयाना मना काजे उंदी महत्वपूर्ण काम आंदू।

3. कला-साहित्य लोप्पा साहित्य ओसो कला ता समालोचना संघर्ष प्रमुख तरीकांग लोप्पाटल उंदी आंदू। कामरेडस् लोर वेहत्ता लेक्का इदिन किन विकसित कीयाना ओसो इदिना बारे ते मना मुन्ने कित्ता काम हालता लेक्का हिल्ले। कला-साहित्य ता समालोचना उंदी कठीन सवाल मंता। तीना काजे वेल्ले ओसो विशेष अध्ययन कीयाना जरूरत मंता। इगा नन्ना सिर्फ समालोचना ता मापदंड कुना बुनियादी सवाल ताए चर्चा कियाकान। इदे आयवा कामरेड्स तेहता उचुन विशेष सवाल कु अनि उचुन गलत दृष्टिकोण कुना पोरो वेने संक्षेप ते नावा विचार वेहाकान।

कला-साहित्य ता समालोचना ता रेंडु रकम ते तुलना कियामूडांता। राजनीतिक ओसो कलात्मक। राजनीतिक तुलना ता अनुसार जापान ता

प्रतिरोध कियाला काजे एकता ओसो फायदा मंदाना हर चीज किन सही मानेमायमूड़ांता। उदाहरण तुकू आम जनता किन उंदी आसी दुश्मन संगे लड़ेमायला काजे प्रोत्साहन कीयाना, विकास रोमि कीयाना ता विरोध कीयाना ओसो विकास ता हरदे मुन्ने दायना लेक्काटवु। दूसरा बगिल जापान ता प्रतिरोध कीयाना हर काम काजे ओसो एकता काजे नुकसान आयना हर चीज किन खराब इनमूड़ांता। उदाहरण तुकू आम जनता नड़मा फूट ओसो अनेकता पैदा कीयाना, विकास विरोधी ओसो लोकर किन पेरके दोब्बनावु। माटु सही ओसो गलत नड़मा बद्रम फर्क किया परिंतोम-मनोगत ओसो सामाजिक व्यवहार संगे? आदर्शवादी लोकर मनोगत पोरो जोर हींतोर ओसो सामाजिक व्यवहार किन नजरअंदाज कींतोर। भौतिकवादी लोकर सामाजवादी व्यवहार पोरो जोर हींतोर ओसो मनोगत किन नजरअंदाज कींतोर। इव रेंडासी ना उल्टा माटु मनोगत ओसो सामाजिक व्यवहार ता एकता ता द्वन्द्वात्मक भौतिकवादी सिद्धांत ता समर्थन कींतोम। आम जनता ना सेवा कियाला काजे मनोगत आम जनता ना समर्थन हासिल कियाला काजे सामाजिक व्यवहार संगे अभिन्न रूप ते जुड़ेमासी मंता, इव रेंडासी ना एकता वेल्ले जरूरी मंदिता। बोराई वरोर मानेय लेवेके उंदी सुडला ग्रूप ता सेवा कियानदु सही हिल्ले। आम जनता ना सेवा कीयाना प्रयोजन मत्तेकाई, आम जनता ना समर्थन मत्तेकाई तानगडल बदे फायदा हिल्लेके वेने बेस मन्नो आंता। बोराई लेखक, कलाकार ना मनोगत इच्छांग ना जांच कीयानास्के इत्तेके ओना योजना सही ओसो बेस मंता या हिल्ले इंदानदु, ओना मूल्यांकन ओना घोषणांग पोरो आधार आसी आयवा समाज लोपा आम जनता पोरो ओना काम ता इत्तेके ओरू रासना लेख कुना प्रभाव पोरो आधार आसी कींतोम। मनोगत इच्छा लेवेके प्रयोजन किन जांच कीयाना मापदंड सामाजिक व्यवहार ओसो अदिना रिजल्टे आंदू। माटु कला-साहित्य ता समालोचना लोप्पा संकीर्णतावाद किन जागा हीवोम, मनम जापान ता प्रतिरोध कियाला काजे एकता कीयाना आम नियम ते राजनीतिक दृष्टिकोण हिल्ला साहित्यिक रचनांग ओसो कला किन सहन कीवोम। मति संगेने मना

आलोचनांग लोप्पा माटु नियम किन मजबूती ते लागू किसोरे राष्ट्र-विरोधी, विज्ञान-विरोधी, जन-विरोधी ओसो कम्युनिस्ट-विरोधी विचार कुना प्रचार कीयाना साहित्य ओसो कला ता सख्त आलोचना ओसो खंडन कीयाना। बारांकु इत्तेके इव साहित्यिक रचनांग-कला ता प्रयोजन ओसो रिजल्ट जापान ता प्रतिरोध कियाला काजे कीयाना एकता ता मोदोल किन कोयनादु मंदिता। कलात्मक मापदंड ता अनुसार तुलनात्मक रूप ते बेहरा स्तर किन तुलनात्मक रूप ते श्रेष्ठ इनमूडांता ओसो तुलनात्मक रूप ते सुडला स्तर ता इत्तेके अंगडम ता कला किन तुलनात्मक रूप अंगडमे इनमूडांता। बदे डारुट हिल्ला इद्रम ता अंतर कीयानास्के इद्रम ता कला लोप्पाटल पैदा आयना सामाजिक रिजल्ट पोरो वेने ध्यान तासना। तन्ना काम किन बेस आल्सवा मंदाना लेखक हिल्ला लेक्का मंता। अदिनके मनम मना आलोचना किन सब्बे रकम ता कलाकृति नडमा खुला प्रतिगियोगिता काजे अनुमति हियाना। मति कला-शास्त्र ता मापदंड ता अनुसार इव काम कुना सही-सही आलोचना कीयाना अस्केने तुलनात्मक रूप ते दोड स्तर ते मत्ता कला किन तीरम-तीरम पोरो स्तर ते तेहा परमूडायरा। बदे कला व्यापक जन-समूदाय ता संघर्ष ता मांग किन पूरा कीवो अदिन किन बदले कीसि व्यापक जनता ना संघर्ष ता मांग किन पूरा कीयाना कला बने किया परमूडांता इंदाना पोल्लो किन सुरता तासना वेल्ले जरूरी मंता।

उंदी राजनीतिक मापदंड मंदिता ओसो दूसरा कलात्मक मापदंडः इव रेंडासी ना नडमा बाता संबंध मंता? कलाकिन राजनीति ता मुन्ने तासा परमूडायो ओसो कलात्मक सृजन, आलोचना ता बदे वेने उंदी तरीका किने आम विश्व-दृष्टिकोण मुन्ने तासमूडांता। माटु सिर्फ उंदी आकार हिल्ला ओसो बदलेमायवा मंदाना राजनीतिक मापदंड ता अस्तित्व किने आयवा उंदी आकार हिल्ला ओसो बदलेमायवा मंदाना कलात्मक मापदंड ता अस्तित्व किन वेने स्वीकार कीवोम आंतोम। सब्बे वर्ग-समाज लोप्पा हर वर्गता राजनीतिक ओसो कलात्मक मापदंड मंदिता। मति सब्बे वर्ग-समाज लोप्पा सब्बे वर्ग हमेशा राजनीतिक मापदंड किन प्रमुख जागा

हींतांग ओसो कलात्मक मापदंड किन गौण तासितांगा पूंजीपति वर्ग सर्वहारा वर्ग ता साहित्यिक रचनांग, कलाकृतिंग (इवु बचोनो बेहरा स्तर ता मत्तेकाई) काजे हमेशा हरी बंद कींतांगा इद्रमे सर्वहारा वर्ग वेने हत्ता कालम ता साहित्यिक रचनांग, कलाकृतिंग ना जांच कीयानास्के सबसे मुन्ने अविना बदे प्रगतिशील महत्व मंता या हिल्ले इंजी हूडना ओसो अविना अलग-अलग रुझान निश्चित कीयाना। उचुक राजनीतिक दृष्टि ते प्रतिक्रियावादी कृतिंग लोप्पा वेने बदे कलात्मक प्रतिभा मंदा परिंता। बवु रचनांग ना विषय बचोन ज्यादा प्रतिक्रियावादी मंदिंता ओसो बविना कलात्मक प्रतिभा बचोनो ज्यादा बेहरा स्तर ते मंदिंता, अवु जनता काजे अचोने ज्यादा खतरनाक मंदिंतांगा इद्रम ताविन ठुकरे कीयाना वेने अचोने जरूरत मंता। मना कमजोर परिस्थिति ते सब्बे शोषक वर्ग ता कला-साहित्य ता उंदी आम विशेषता, ओरा प्रतिक्रियावादी राजनीतिक विषय-वस्तु ओसो ओरा कलात्मक रूप नडमा अंतरविरोध पैदा आयनदु मंता। माटु बद चीज ता मांग कींतोम अदु राजनीति ओसो कला ता एकता, विषय-वस्तु ओसो रूप ता एकता, क्रांतिकारी राजनीतिक विषय-वस्तु ओसो परताचोन पूर्ण कलात्मक रूप ता एकता मंदिंता। राजनीतिक दृष्टि ते बचोन प्रगतिशील मत्तेकाई कलात्मक प्रतिभा ता कमी मत्ता कलाकृतिंग शक्तिहीन मंदिंतांगा। अदिन काजे माटु राजनीतिक दृष्टिकोण गलत मत्ता कलाकृतिंग ना सृजन कियाला ओसो “पोस्टरबाजी, नारेबाजी लेक्कटा शैली” वाले राजनीतिक दृष्टिकोण सही मंतांग मति कलात्मकता ता कमी मंदांना कलाकृतिंग ना सृजन कीयाना, इव रेंडासी रकम ता रुझान कुना विरोध कींतोम। मनम साहित्य ओसो कला ता सवाल कुना पोरो रेंडासी जागा ने संघर्ष ताकी कीयाना।

इव रेंडासी रकम ता रुझानकु वेल्ले कामरेड्स ना दिमाग ते मंतांगा। वेल्ले कामरेड्स कलात्मक तकनीक किन नजरअंदाज कींतोरः अदिन काजे कलात्मक स्तर पोरो तेहना बगिल ध्यान हियाना जरूरी मंता। मति नावा हिसाब ते इंजे राजनीतिक पक्ष ता समस्या उंदी वेल्ले बेहरा समस्या मंता। उचुन कामरेड्स लोप्पा शुरूआती राजनीतिक ज्ञान ता कमी मंता,

अदिन काजे रक-रकम ता अंगडम ता विचारकु ओरा दिमाग ते निंडसी मंतांग। इद प्रक्रिया ते येनान ता उचुन कामरेड्स किन मीवा मुन्ने उदाहरण काजे तासकान।

“मानव-स्वभाव ता सिद्धांत” मानव-स्वभाव लेक्कटा बदे चीज मंताया? बदे डायुट हिल्ला, मंदिता। मति मानव-स्वभाव सिर्फ उंदी आकार मत्ता वस्तु आंदु या, अदु बदे आकार हिल्ला वस्तु आयो। वर्ग-समाज लोप्पा मानव-स्वभाव ता स्वरूप वेने वर्ग मूलक मंदिता। वर्ग तुकू बाहर बदे मानव-स्वभाव मन्नो आंता। माटु सर्वहारा वर्ग ओसो आम जनता ना मानव-स्वभाव ता पक्ष एतितोम। जमींदार वर्ग ओसो पूंजीपति वर्ग खुद तम्मा वर्ग ता मानव-स्वभाव ता पक्ष एतितोर। ओरू सिर्फ ओराए मानव-स्वभाव, मानव-स्वभाव आंदू इंजी इन्नोर मति इद्रम इंतोम इंजी साबित कीयाना कोशिश कींतोर। तीना लोप्पा फर्क सिर्फ इदे मंता। निम्न पूंजीपति वर्ग ता उचुन बुद्धिजीविर बद मानव-स्वभाव ता पाटा परितोर, अदे वेने आम जनता तल अलग मंदिता लेवेके जनता विरुद्ध मंदिता: बदिन किन ओरू मानव-स्वभाव इंतोर अदु सार रूप ते सिर्फ पूंजीवादी व्यक्तिवादे मंदिता, अदिन काजे ओरा दृष्टि ते सर्वहारा वर्ग ता मानव-स्वभाव इदिना बिलकुल उल्टा मंदिता। येनान लोप्पा उचुन मुल कला-साहित्य ता सिद्धांत ता आधार ता रूप ते पेश कीयाना “मानव-स्वभाव ता सिद्धांत” समस्या किन इद्रमे पेश कींतोर ओसो इदु गलत आंदू।

“कला-साहित्य काजे बुनियादी प्रस्थान-बिन्दु जीवा कीयाना आंदू, मानेय पोरो जीवा कीयाना।” जीवा कीयाना प्रस्थान-बिंदु मंदिता, मति उंदी दूसरा बुनियादी प्रस्थान-बिंदु वेने मंता। जीवा कीयाना उंदी धारणात्मक वस्तु आंदू, वस्तुगत व्यवहार ता उपज आंदू, मूल रूप ते माटु धारणा किन प्रस्थान-बिंदु बने कियवा लेवा वस्तुगत व्यवहार किन बने कींतोम। मना बुद्धिजीवि वर्ग तल वात्ता लेखक, कलाकार लोर सर्वहारा वर्ग किन जीवा कींतोर बारांकु इत्तेके समाज लोप्पा ओरा ओसो सर्वहारा वर्ग ता परिस्थिति उंदी लेक्का मंता। माटु जापानी साम्राज्यवाद पोरो होंग आंतोम, बारांकु इत्तेके जापानी साम्राज्यवाद मना पोरो उत्पीडन कींता। बदे कारण हिल्ला

जीवा कीयाना लेवेके होंग आयनादु दुनिया लोप्पा मन्नो आंता। “मानेय पोरो जीवा कीयानादु” मानव जाति लोप्पा वर्ग विभाजन आता पेरके सर्वव्यापी जीवा कीयाना लेक्कटा चीज बेगाने हिल्ले। हत्ता कालम ता सब्बे शासक वर्ग वेल्ले चाव ते “मानेय पोरो जीवा कीयाना” बारे ते पोल्लोंग कित्तोर। अद्रमे वेल्ले महात्मा ओसो ज्ञानी लोर वेने इद्रम ता पोल्लोंग कित्तोर, मति इदिना वरोर वेने अमल कित्ताद हिल्ले, बारांकु इत्तेके वर्ग-समाज लोप्पा इद्रम कीयाना संभव हिल्ले। निज्जमे मानेय पोरो जीवा कीयानादु पूरा दुनिया लोप्पा वर्ग किन खत्म कित्ता पेरके ने संभव आया परंता। वर्ग समाज किन वेल्ले समूह ने तूस्तादु मंता, वरोर वरोना पोरो दुश्मनी ता रुझान लागू कींतोर। वर्ग बस्के खत्म आयार अस्केने पूरा मानेय पोरो जीवा कियानादु संभव आयार, मति इंजे इत्तेके इनपड़े आया परवो। माटु मना दुश्मन किन जीवा कीवोम, मना सामाजिक गंदगी किन जीवा कीवोम, मना उदेश्य अदिन किन नष्ट कीयानादु मंता। इदु उंदी साधारण ज्ञान ता पोल्लो आंदू। मना लेखक, कलाकार लोरा लोप्पा इंजे एवनल बोराई समझेमाया परताद हिल्ले या?

“साहित्यिक रचनांग ओसो कलाकृतिंग हमेशाए वेहच ओसो हीकट पोरो बराबर जोर हींतांग, आधा वेहच ओसो आधा हीकटा” इद पोल्लो लोप्पा बचोनो ढीलाडला विचारकु मंतांग। साहित्यिक रचनांग वेने हमेशाए इद्रम हिल्ला मत्तांग। निम्न पूंजीपति वर्ग ता वेल्ले लेखक लोर वेहच किन बस्केने परहकोर आंतोर। ओरा रचनांग हमेशाए हीकट किने वेहच ते तत्तिंतांग। इद्रम ता रचनांग किन “वेहच ते तत्ताना साहित्य” इंतोर। इदे आयवा ओरा उचुक रचनांग विशेष रूप ते निराशावाद ओसो दुनिया संगे निराशता किने प्रचार कींतांग। तीना उल्टा सोवियत साहित्य समाजवादी निर्माण कालम ते मुख्य रूप ते वेहच ता बारे तेने वेहिंतांग। अदु काम ते वायना कमिंग किन वेने वेहिंता ओसो नकारात्मकता किन वेने वेहिंता। मति इद्रम कीयाना सिर्फ पूरा वेहच किने तोहिंता, “आधा वेहच ओसो आधा हीकट” पोरो आधार आसी मन्नो आंता। पूंजीपति वर्ग प्रतिक्रियावादी बनेमायनास्के अदिना लेखक ओसो कलाकार लोर

क्रांतिकारी आम जनता किन गुंडा लोरा लेक्का ओसो खुद पवित्र आत्मा लेक्का पेश कींतोरा। इद्रमे वेहच ओसो हीकट किन बिल्कुले उल्टा कीसि पेश कींतोरा। सिर्फ सही क्रांतिकारी लेखक, कलाकार लोरे इद समस्या किन सही तरीका ते हल किया परिंतोरा। इव सब्बे हीकटते मत्ता ताकत कु इत्तेके विशाल जन-समुदाय किन नुकसान कीयानाविना पर्दाफाश कीयाना ओसो विशाल जनता ना सब्बे क्रांतिकारी संघर्ष कुना गुणगान कीयाना। इदे क्रांतिकारी लेखक, कलाकार लोरा बुनियादी काम आंदू।

“साहित्य ओसो कला ता काम हमेशाए पर्दाफाश कीयानादे मत्ता।” इद पोल्लो वेने मुन्नेटा पोल्लो लेक्काने इतिहास-विज्ञान ता जानकारी हिल्ला कारण तेने पुटिंता। साहित्य-कला ता काम माटु मुन्ने वेहत्ता लेक्का सिर्फ पर्दाफाश कीयाना इंजी बस्के हिल्ला मत्ता। क्रांतिकारी लेखक, कलाकार पर्दाफाश कियाला काजे तम्मा निशाना आम जनता किन बिल्कुले वाटोर आंतोरा। ओरू सिर्फ आक्रमणकारी, शोषक, उत्पीड़क लोर किन ओसो इद्रम तोरा कारण ते जनता पोरो आयवा प्रभाव पोरो निशाना वाटिंतोरा। आम जनता लोप्पा वेने कमिंग मंदिंतांग, अविन किन जनता खुद तम्मा लाईन ते आलोचना ओसो आत्मालोचना कीसि दूर कीयाना। इद्रम ता आलोचना ओसो आत्मालोचना कीयाना साहित्य-कला ता उंदी सबसे महत्वपूर्ण काम वेने आंदू। मति इदिन किन “जनता ना पर्दाफाश कीयाना” इंजी बिल्कुले समझेमायनायो। जनता ना बारे ते बुनियादी सवाल अदिन किन शिक्षित कीयाना ओसो अदिना स्तर किन पोरो तेहनादु मंदिंता। सिर्फ प्रतिक्रांतिकारी लेखक-कलाकार लोरे जनता किन “पुटतास्केटल बकवल” मत्ता लेक्का ओसो क्रांतिकारी जन समुदाय किन “निरंकुश गुंडा” लोरा लेक्का पेश कींतोरा।

“नेंडु वेने व्यंग्यपूर्ण निबंध-लेखन ता कालम आंदू, लू शुन ना शैली वाले रचनांग ना नेंडु वेने जरूरत मंता।” हीकट ते मत्ता शक्तिंग ना शासन लोप्पा मंजोरे, वड़कना आजादी हिल्ला मत्ता लु शुन संघर्ष कियाला काजे तन्ना लेख कुना लोप्पा वेल्ले बारीक पोल्लोंग ओसो जीवा किन देलगना पोल्लोंग रासतोर, ओरू इद्रम कीसि सही कित्तोरा। मनम वेने फासीवादी,

चीनी प्रतिक्रियावादिर ओसो जनता किन नुकसान कीयाना सब्बे चीज कुना पोरो मना पोल्लोंग संगे तीत्र प्रहार कीयाना, मति शेनशी-कानसू-निंगश्या सीमा इलाका ते ओसो दुश्मन ता इलाका ते मत्ता जापान विरोधी आधार इलाका लोप्पा सिर्फ प्रतिक्रांतिकारिरे दबाव ते तासिस मंदाना ओसो मना बगिल तल जनवाद ओसो आजादी दोरकसी मत्ता क्रांतिकारी लेखक ओसो कलाकार लोरा काजे मना लेखकुना शैली सिर्फ लू शुन ना शैली लेक्कने मंदानायो। इगा मनम बाताल इंदाला आल्सा मंतोमो बुलंद आवाज ते इंदा परिंतोम, पेरेके-मुन्ने आसी, लेवेके जीवा किन देलगना लेक्कटा पोल्लो ना इस्तेमाल कीयाना जरूरत हिल्ले। बारांकु इत्तेके जनता किन इद्रम ता पोल्लोंग समझेमायना मुशिकल आंता। “जीवा किन देलगना लेक्कटा लेख-निबंध रासनास्के” वेने लू शुन जनता ना दुश्मन काजे आयवा जनता काजे रास्तोर, ताना लोप्पा ओरू क्रांतिकारी जनता ओसो क्रांतिकारी पार्टी ता खिलाफ बस्के वेने जीवा किन देलगना लेक्कटा पोल्लोंग कित्ताद हिल्ले। ओना इव निबंध शैली ना दृष्टि ते ओरू दुश्मन किन निशाना वाटसी रासना लेख कुना लेक्का हिल्लेंगा। जनता ना कर्मिंग ना आलोचना कीयाना जरूरी मंता, माटु मुन्ने वेहत्ता लेक्का मति इद्रम कीयानास्के जीवा कीसि जनता ना दृष्टिबिंदु किन लागू कीयाना ओसो जीवा मंदान जोम अदिना रक्षा कीयाना, शिक्षित कीयाना उद्देश्य तेने वडकना। मना कामरेड्स ना संगे दुश्मन लेक्का व्यवहार कीयाना इत्तेके दुश्मन ता दृष्टिबिंदु किन लागू कीयाना आंता। इद्रम इत्तेके मनम व्यंग्य (जीवा किन दलगना पोल्लोंग) किन खत्म कीयाना या? हिल्ले। व्यंग्य ता हमेशा जरूरत मंदिता। मति व्यंग्य बचोनो रकम ता मंदिता। हर उंदी व्यंग्य ता अलग रुझान मंदिता। इत्तेके मना दुश्मन काजे व्यंग्य, मना एकताकारिरा काजे व्यंग्य ओसो खुद मना लाईन ता लोकुरा काजे व्यंग्य अलग-अलग मंदिता। माटु सामान्य रूप ते जीवा किन दलगना लेक्कटा पोल्लोंग कोवोम, अदिनके माटु जीवा किन दलगना लेक्कटा रुझान ता दुरुपयोग किन खत्म किया जरूरत मंता।

“नन्ना तारीफ ओसो गुणगान ता काम कीवोना वेहच ता गुणगान कियानोरा लेख कु अनिवार्य रूप ते महान मन्नोंग आंतांग ओसो हीकट ता बारे ते वेहानोरा रचनांग वेने अनिवार्य रूप ते अंगडम मन्नोंग आंतांगा” मीटु पूंजीपति वर्ग ता लेखक लेवेके कलाकार लोर मत्तेके, सर्वहारा वर्ग आयवा पूंजीपति वर्ग ता गुणगान कियाकिरा। मीटू सर्वहारा वर्ग ता लेखक लेवेके कलाकार लोर मत्तेके मीटु पूंजीपति वर्ग आयवा सर्वहारा वर्ग ओसो मेहनतकश जनता ना गुणगान कियाकिरा। इरवुरा लोप्पाटल उंदी बदे उंदिए किया परितोर। सर्वहारा वर्ग ता वेहच ता गुणगान कियानोरा रचनांग महान हिल्वेकाई बाताले आयो मति सर्वहारा वर्ग ता “हीकट” ता बारे ते इत्तेके ओरा असली पिस्वल ता बारे ते वेहानोरा रचनांग मत्वहीन मंदाना वेल्ले जरूरी मंदिता। इव सब्बे कला-साहित्य ता बारे ते ऐतिहासिक सच्चाई आयो या? असल इत्तेके मानव जाति ता इतिहास ता निर्माण कीयाना जनता ना बारे ते गुणगान बारांकु कीयानायो? असल ते सर्वहारा वर्ग, कम्युनिस्ट पार्टी, नवजनवाद ओसो समाजवाद गुणगान बारांकु कीयानायो? उंदी रकम ता लोकुर जनता ना काम पोरो गिर्दा तोहवा लेवा मंदानोर वेने मंतोर। इद्रम तोर सर्वहारा वर्ग ओसो अदिना हिरावल दस्ता ता संघर्ष ओसो अदिना जीत किन वेल्ले दुक्कम पोयसी उंदी कोंटा ते नितसी हूडितोर: इद्रम तोर तम्मा व्यक्तित्व, तम्मा दोस्त-गोति ता इरवुर-मुवुर लोकुरा व्यक्तित्व ता गुणगान कियाला बस्केने दोगोर आंतोर। तीना लोप्पा बदे डावुट हिल्ले- इद्रम ता निम्न पूंजीपति वर्ग ता व्यक्तिवादी लोकुर, क्रांतिकारी जनता ना काम, क्षमतांग, संघर्ष कीयाना साहस ओसो अदिना जीत हासिल कीयाना विश्वास किन बेरसी कियाला तैयार मन्नोर आंतोर। इद्रमतोर क्रांतिकारी लाईन लोप्पा सिर्फ एल्लुम लेक्का मंतोर। क्रांतिकारी जनता किन इद्रम ता “भाट” लोरा जरूरत हिल्ले इंजी बदे डावुट हिल्ले।

“इद दृष्टिबिंदु ता सवाल आयो। नावा वर्ग-दृष्टिबिंदु सही मंता, नावा लक्ष्य बेस मंता ओसो नन्ना पोल्लोंग किन वेल्ले बेस समझेमांतान मति नावा पोल्लो वेहला काजे तैयार हिल्लेन, अदिन काजे नावा पोल्लो ता

असर कम अरिंता।” प्रयोजन ओसो परिणाम ता बारे ते द्वन्द्वात्मक भौतिकवादी दृष्टिकोण ता चर्चा नन्ना मुन्ने ने कित्ताद मंता। इगा नन्ना पूछेमाया मंतान, परिणाम ता सवाल दृष्टिबिंदु ता सवाल आयो या? वरोर मानेय मनोगत तल प्रेरित आसी काम किसोर दांतोर अनि अदिना रिजल्ट ता बारे बिल्कुले आल्सोर। वरोर सिर्फ दवाईए रासोर मंदाना डॉक्टर ना लेक्का, दवाईंगे राससोर मंजी, अद दवाई तिंजी बचोन मुल डोलतोर इंदानदु पुनवा मंदिंतोर। इगा मनम उंदी राजनीतिक पार्टी ता उदाहरण पोयकाल, इद पार्टी सिर्फ घेषणांगे किसोर दांता अनि अवु लागू आतांगे आयोंग इंदानदु परवाए कीवो आंता। इद वेने उंदी सही दृष्टिबिंदु आंदू इंजी पूछेमायमूडांता या? ओसो इद्रम ता लक्ष्य बेसता लक्ष्य मंता या? बदे डावुट हिल्ला, गलतिंग मुन्नेटल ध्यान तासता जागाते वेने आया परिंतांगे। मति रिजल्ट गलत वातेकाई मीवा लक्ष्य सही मत्ता इंजी इनमूडायार या? बदे पार्टी लेवेके डॉक्टर किन जांच कीयानास्के मनम ओरा व्यवहार किन हूडना, ओरा काम ता रिजल्ट किन हूडना। इदे पोल्लो वरोर लेखक किन जांच कीयानास्के वेने लागू आंता। निज्जमे बेसता लक्ष्य वाले मानेय किन तन्ना रिजल्ट पोरों ध्यान तासना, अनुभव कुना निचोड़ ओसो कार्य-पद्धति ता अध्ययन कीयाना इत्तेके सृजन-कार्य ता शैलिंग ना अध्ययन कीयाना। निज्जमे बेसता लक्ष्य वालेर तम्मा काम ता कमिंग ओसो गलतिंग ना खुल्लमखुल्ला आलोचना कीयाना ओसो अविन किन सुधरे कीयाना संकल्प एतना। कम्युनिस्ट लोरा लोप्पा आत्मालोचना ता तरीका इद्रमे लागू आंता। इदे दृष्टिकोण तीरम-तीरम समझेमायना ओसो अदिन तीरम-तीरम लागू कीयाना। बोराई आत्मसंतोष ता भावना ता शिकार आसी मंतोर “वेल्ले बेस समझेमायनोर”, असल ते ओरू उचुन वेने समझेमातद हिल्ले।

“माकिन मार्क्सवाद ता अध्ययन क्रियाला काजे अनुरोध कीयाना द्वन्द्वात्मक भौतिकवादी सृजन-शैली ता गलती किन दुहरे कीयाना आयर, इद्रम कित्तेके मना सृजनात्मक मूड किन नुकसान आयार।” मार्क्सवाद ता अध्यय कीयाना इत्तेके माटु दुनिया किन समाज किन ओसो कला-साहित्य

किन द्वंद्वात्मक भौतिकवादी ओसो ऐतिहासिक भौतिकवादी दृष्टिकोण ते हूडाना। इत्तेके मनम मना साहित्यिक रचनांग ओसो कलाकृतिंग लोप्पा दर्शनशास्त्र ता लेक्चर (भाषण) हीसोर वेलियानायो। साहित्यिक-कलात्मक सृजन ता काम लोप्पा मार्क्सवाद सच्चाई किन गुच्ची कीसि ताना जागा एतवा लेवा अदु अदिन किन तना लोप्पा नेहिंता। भौतिक विज्ञान लोप्पा परमाणु ओसो विद्युत-अणु सिद्धांत किन गुची कीसि अविना जागा एतवा लेवा अविन किन तम्मा लोप्पा नेहना लेक्का। कोरा, नीरस, कठमुल्लावादी तरीका सृजनात्मक मूड किन नष्ट कींतांग: इदे आयवा अवु सबसे मुन्ने मार्क्सवाद किन नष्ट कींतांग। अदु कठमुल्लावादी “मार्क्सवाद” मार्क्सवाद मन्नो आंता, अदु मार्क्सवाद-विरोधी मंदिता। अस्के मार्क्सवाद सृजनात्मक मूड किन नष्ट किसिंता या? इंगो इद नष्ट किसिंता। अदु निज्जमे सामंती, पूंजीवादी, निम्न-पूंजीवादी, उदारतावादी, व्यक्तिवादी, शून्यवादी, “कला कला काजे” ता सिद्धांत किन मानेमायनोर, बेहरा वर्ग, पतनशील ओसो निराशावादी मंदाना, गैर सर्वहारा जनता कुना सब्बे सृजनात्मक मूड किन नष्ट किसिंता। सर्वहारा वर्ग ता लेखक-कलाकार लोरा बारे ते हूडतेके ओर इद्रम ता सृजनात्मक मूड किन नष्ट कीयानायो? नन्ना इद्रम कीयाना जरूरी समझेमांताना। इव सब्बे तविन पूराए नष्ट कीयाना, अनि इविन नष्ट कीसिए पूना रचनांग ना सृजन कियमूडंता।

4. बवु समस्यांग किन इगा चर्चा कित्ता मंता अवु येनान लोप्पटा मना कला-साहित्य ते मंतांग। इदिनगडल मना कला-साहित्य लोप्पा इंजे वेने गलत कार्यशैली गंभीर रूप ते मंता ओसो मना कामरेड्स लोर इंजे वेने आदर्शवाद, कठमुल्लावाद ता अमल कीयाना, झूठ-अंगडम ता पोल्लॉंग, व्यवहार किन नजरअंदाज कीयाना, आम जनता तल जेक आयना लेक्काटा बचोनों कर्मिग दिसिंतांग। इव सब्बे ना खिलाफ उंदी प्रभावी ओसो गंभीर सूधारीकरण आंदोलन ताकी कीयाना जरूरत मंता।

मना वेल्ले कामरेड्स सर्वहारा वर्ग ओसो निम्न-पूंजीपति वर्ग नडुमा ता अंतर किन इंजे वेने स्पष्ट रूप ते समझेमाताद हिल्ले। वेल्ले पार्टी-मेम्बर

कम्युनिस्ट पार्टी लोप्पा संगठनात्मक रूप ते शामिल आताद मंता, मति विचारधारात्मक रूप ते बिल्कुले शामिल आताद हिल्ले। विचाराधारात्मक रूप ते पार्टी लोप्पा शामिल आताद हिल्ले ओरा दिमाग ते इंजे वेने शोषक वर्ग ता गंदगी निंडसी मंता। ओरकिन सर्वहारा वर्ग ता विचाराधारा, कम्युनिज्म लेवेके पार्टी ता बारे ता बिल्कुल ज्ञान हिल्ले। ओरू “सर्वहारा वर्ग ता विचाराधारा किन घिसीपिटी सामग्री” इंजीए आल्लिंतोर! मति इद्रम ता सामग्री किन हासिल कीयाना हल्को काम मन्ने आंता इंजी उचुन वेने आल्लसोर। ओरा उचुन मुल लोप्पा उचुन वेने कम्युनिस्ट मत्ता लेक्कटा रुझानकु दिस्सोंग आतांग, इद्रमतोर लास्ट ते पार्टी तल अलगे आंतोर। अदिन काजे मना पार्टी ओसो मना लाईन लोप्पा ज्यादातर लोकुर बेदाग मत्तेकाई वेने क्रांतिकारी आंदोलन किन परताचोन मुन्ने ओयला काजे अदिन किन जल्दी-जल्दी सफल कियाला काजे मनम विचारधारात्मक ओसो संगठनात्मक रूप ते ओरू सुधार कीयाना। संगठनात्मक रूप ते सुधरे कियाला काजे मुन्ने विचारधारात्मक रूप ते सुधरे कीयाना जरूरी मंता। ताना पेरके सर्वहारा वर्ग ता विचारधारा संगे गैर-सर्वहारा विचाराधारा ता खिलाफ संघर्ष ताकी कीयाना। येनान ता कला-साहित्य लोप्पा इद विचारधारात्मक संघर्ष मुन्नेने शुरु आताद मंता अनि इदु वेल्ले जरूरी मंता। निम्न-पूजीपति वर्ग ते पुटता बुद्धिजीविर हमेशा कला-साहित्य संगे सब्बे रकम ता साधन कुना इस्तेमाल कीसि खुद किन ओसो तन्नाए विचार कुना प्रचार कीयाना कोशिश कींतोर। पार्टी ओसो दुनिया किन तन्नाए विचार वात्ता लेक्का ताकी कीयाना कोशिश कींतोर। इव परिस्थितिंग ने मनम ओरकिन गंभीर रूप ते वेहाना “कामरेड्स, इद्रम काम कीयानादु बेस आयो! सर्वहारा वर्ग मीवा अनुसार बने माया परवो: मीवा विचार कुन स्वीकार कीयाना इत्तेके बड़े जर्मीदार वर्ग ता बड़े पूजीपति वर्ग मुन्ने तल्ला वरहना ओसो पार्टी अनि देश किन खतरा ते वाटना आंता।” पार्टी ओसो दुनिया किन माटु मना सर्वहारा हिरावल दस्ता लेक्का बने किया परितोमा। माटु कला-साहित्य लोप्पा काम कीयाना मना कामरेड्स इद महान वाद-विवाद ता गंभीरता किन

समझेमायनूर इंजी आशा किया मंतोमा इद संघर्ष लोप्पा सक्रियता ते शामिल आसी हर कामरेड्स तन्ना जागा ते मजबूत बनेमायना ओसो मना पूरा लाईनकु विचाराधारात्मक-संगठनात्मक रूप ते निज्जमे एकताबद्ध ओसो सदृढ़ बनेमायाना इंजी आशा किया मंतोमा

मना वेल्ले कामरेड्स ना विचार इंजे वेने उलझेमातादु मंता, अदिन काजे मना क्रांतिकारी आधार इलाकांग ओसो क्वोमिंगंतांग-शासित इलाकांग नडमा अंतर किन बेस समझेमाताद हिल्ले। अदिना कारण ते ओरगडल वेल्ले गलतिंग आंतांगा मना कामरेड्स ना उंदी बेहरा संख्या शांघाई ता तंग कोठरिंग¹⁰ लोप्पाटल वात्ताद मंता। ओरू इद्रम ता तंग कोठरिंग लोप्पाटल इव क्रांतिकारी आधार-इलाकांग लोप्पा वासी सिर्फ उंदी रकम ता जागा तल दूसरा रकम ता जागा तेने आयवा उंदी ऐतिहासिक युग तल दूसरा ऐतिहासिक युग ते वेने एवितोरा। पहली समाज उंदी अर्ध-सामंती, अर्ध-औपनिवेशिक समाज मता। इगा बड़े जमींदार वर्ग ओसो बड़े पूंजीपति वर्ग ता शासन मता। दूसरा समाज उंदी क्रांतिकारी नव जनवादी समाज मंता। इदिना नेतृत्व सर्वहारा वर्ग कींता। इव क्रांतिकारी आधार इलाकांग लोप्पा वायनादु, चीन ता हजारों साल कुना इतिहास लोप्पा असाधारण इत्तेके उंदी आम जनता कैदे राजसत्ता मंदाना युग ते वातोरा। इगा मना हेरे-हेरे मत्ता लोकर ओसो मना प्रचार-काम कीयाना पाठक-दर्शक लोर अलगे रकम तोर मंतोरा। पाड़ना समाज हत्ता, इंजे अदु बस्केने वापिस वायो। अदिन काजे माटु पेरके-मुन्ने आयवा लेवा पूना जनता संगे उंदी आयना। नन्ना मुन्ने वेहत्ता लेक्का पूना जनता नडमा मंजी वेने मना उचुन कामरेड्स लोप्पा “ज्ञान ओसो समझदारी ता कमी” मत्ता ओसो ओरू “तम्मा ताकत-तोहला काजे बेगाने वेने जागा परहका परवा लेक्कटा वीर” लोरा लेक्का मत्तेके, ओरा मुन्ने मुश्किल पैदा आयनुंग, सिर्फ ओरू ग्रामीण इलाकांग लोप्पा दायनास्के ने आयवा ओरा मुन्ने येनान लोप्पा वेने मुश्किल पैदा आयनुंग। उचुन कामरेड्स “नन्ना ‘बेहरा इलाका’¹¹ ता पाठक लोरा काजे शुरू तासना। इद काम नन्ना बेस किया परितान ओसो इदिना ‘राष्ट्रीय महत्व’ वेने मंता इंजी आल्सिंतोरा।” इद्रम

आल्सना बिल्कुले गलत मंता। “बेहरा इलाका” वेने बदलेमाया मंता। अगाटा पाठक क्रांतिकारी आधार-इलाकांग लोप्पा मंदानोरु, लेखक लोर पूना लोकुरा बारे ते पूना इलाकाना बारे ते रास्ना इंजी आल्संतोर, तम्मा पाड़ना घिसिपिटी कहानिंग पढ़ेमासी-पढ़ेमासी दोगता लेक्का आया मंता। अदिन काजे बदे रचना किन बचोन ज्यादा क्रांतिकारी आधार-इलाका ना आम जनता काजे रासमूड़ायर, अचोने ज्यादा अदिना राष्ट्रीय महत्व बेरसियार इंजी आल्सा मंतोर। “विध्वंस”¹² पोरोल ता उपन्यास लोप्पा फादेयेव सिर्फ उंदी सुडला छापामार दस्ता ता कहानी रास्तोर, ओना विचार पाड़ना दुनिया ता पाठक लोर किन खुश कियानदु हिल्ला मत्ता: मति इद पुस्तक ता विश्वव्यापी प्रभाव अरता। मीटु पुता लेक्काने कम से कम चीन लोप्पा इत्तेके इद रचना ता वेल्ले प्रभाव अरता। चीन पेरके अरवा लेवा मुन्ने दाया मंता, इवु चीन ता पेरके अरता पाड़ना पतनशील इलाकांग आयवा क्रांतिकारी आधार-इलाकांगे चीन किन मुन्ने ओया मंतांग। इदु उंदी बुनियादी पोल्लो आंदू इदिनकिन मना कामरेड्स सुधारीकरण आंदोलन ताकनास्के सबसे मुन्ने समझेमायना।

आम जनता ना पूना समाज संगे कलियाना वेल्ले जरूरी मंता। अदिन काजे व्यक्ति ओसो आम जनता ना नड़मा ता संबंध ता समस्या किन सही तरीका ते हल कीयाना जरूरी मंता। ले शुन ना कविता ता इव लाईन कुन मनम मना आदर्श बने कित्तेके बेस आयार:

कोंडा रेंगल कीसि हजारो लोकुर

नावा पोरो बातल वड़कींतोर नन्ना परवा कीवोन

मति दूसरा बगिल तल्ला वरिहची

सुडला पिल्ला-पेकोरा कोंदा लेक्का सेवा किसोर मंताना¹³

“कोंडा रेंगल कीयाना हजारो लोकुर” इत्तेके दुश्मन आंदुर। मनम दुश्मन बचोन खतरनाक मत्तेकाई ओरा मुन्ने बिल्कुल तल्ला वरहनायो। “पिल्ला-पेकोर” इत्तेके सर्वहारा वर्ग ओसो आम जनता ना बारे ते वेहत्ताद मंता। सब्बे कम्युनिस्टि लोर सब्बे क्रांतिकारी ओसो सब्बे क्रांतिकारी लेखक-कलाकार लोर लु शुन ना आदर्श कुना उदाहरण तिंची करियाना।

सर्वहारा वर्ग ओसो आम जनता काजे “कोंदा” लेक्का काम किसोरे जीवा मंदान जोम सेवा कीयाना। बोरु बुद्धिजीवी आम जनता संगे कलियसी मंदाला आल्संतोर ओसो ओरा सेवा कियाला आल्संतोर, ओरू वरोर वरोना बारे ते बेस पुंजी मंदाना। इद्रम कीयाना वेल्ले कठीन ओसो वेल्ले टकराव वाले मंदिता मति इद्रम कीयाना अनिवार्य वेने मंदिता। अदिन काजे मीवा लोप्पा दृढ़ संकल्प मंता इत्तेके मीटु इगा वेहत्ता मांग किन जरूर पूरा कियाकिर।

नेंडु मना कला-साहित्य ता आंदोलन ता बुनियादी दिशा संबंध ते सिर्फ उचुने समस्यांग ना चर्चा किताना वेल्ले ठोस समस्यांग इंजे वेने पिस्तांगे। इविना बारे ते वने अध्ययन कीयाना वेल्ले जरूरत मंता। इगा सब्बे कामरेड्स पोरो वेहत्ता दिशा ते दायला काजे तैयार मंतोर इंजी विश्वास मंता। नाकिन इद सुधारीकरण आंदोलन ताकनास्के ओसो वायना कालम ते मीवा अध्ययन ओसो मना दीर्घकालीन काम लोप्पा मीटु जरूर मीवा रचनांग रास परकीर, आम जनता खुशी ते स्वागत कीयाना लेक्कटा रचनांग रासा परकिर। अनि कला-साहित्य ता आंदोलन किन क्रांतिकारी आधार-इलाकांग लोप्पा ओसो पूरा चीन लोप्पा उंदी बिल्कुल पूना ओसो शानदार मंजिल ते एवसी किया परकीर इंजी विश्वास मंता।

नोट

1. वी.आई. लेनिन ना रचना “पार्टी-संगठन ओसो पार्टी-साहित्य” हूडूटू: तीना लोप्पा ओरू सर्वहारा साहित्य ता विशेषतांग किन दोड़ रास्ता लेक्का वेहतेरा।

इदु उंदी साहित्य उंदी स्वतंत्र साहित्य मंदियार। बारांकु इत्तेके समाजवाद ता विचार ओसो मेहनतकश जनता पोरो जीवा कीयाना भावना मंदिता, लालच ओसो कैरियरवाद(खुदताए बारे ते आल्सना) मन्नो आंता। अदिन काजे जनता पोरो जीवा कीयाना भावना लगातार पूना शक्तिंग किन तच्चोरे मंदानुंगा। इद उंदी स्वतंत्र साहित्य मंदिता, बारांकु इत्तेके इदु बदे तूम(संतुष्ट) नायिका, पिस्वल तुकु परेशान “उच्च वर्ग ता दसियों हजार लोकरा” लेवेके तिंजि-तिंजी बेरसिस मत्ता चर्बी दोड़ दबेमासोर दायनोरा सेवा कियवा लेवा, करोड़ों-करोड़ मेहनतकश लोरा इत्तेके देश ता पुंगार लेक्का मत्ता अदिना ताकत कुना ओसो वायना कालम ता सेवा कियार। इदु उंदी स्वतंत्र साहित्य मंदिता, बारांकु इत्तेके मानव जाति ता क्रांतिकारी विचार कुना सफलतांग किन समाजवादी

सर्वहारा वर्ग ता अनुभव ओसो सजीव काम संगे कलियसी मंदिता। हत्ता कालम ता अनुभव (वैज्ञानिक समाजवाद, समाजवाद ता शुरुआती कल्पनावादी रूप कुनगडल विकसित आसी मत्तादु), वर्तमान कालम ता अनुभव (मजदूर कामरेड्स ना वर्तमान संघर्ष) नड्मा उंदी स्थाई पारम्परिक प्रभाव पैदा कियार।

2. ल्यांग श-छ्यू प्रतिक्रांतिकारी नेशनल सोशलिस्ट पार्टी ता सदस्य मत्तोर, वीरू वेल्ले जोम कला-साहित्य ता बारे ते प्रतिक्रियावादी अमरीका पूंजीपति वर्ग ता विचार ना प्रचार कित्तोर। ओरू वेल्ले कट्टरता ते क्रांति ता विरोध कित्तोर ओसो क्रांतिकारी कला-साहित्य पोरो वेल्ले रांगतोर।
3. चओ च्वो-रन ओसो चांग चि-फिंग 1937 लोप्पा जापानी आक्रमणकारिर पेकिंग ओसो शांघाई पोरो कब्जा कित्ता पेरके आत्मसमर्पण कित्तोर।
4. “वामपक्षीय लेखक संघ ता बारे ते नावा विचार”, “रेंडु जीवा” पोरोल ता संग्रह, लू शुन ता पूर्ण ग्रन्थावली, ग्रन्थ 4।
5. “मृत्यु”, “अतिरिक्त सामग्री” पोरोल ता रचना लोप्पा संकलित, “अर्ध-रियायती नाटेना कोठरी लोप्पा रास्ता लेख कुना आखरी संग्रह”, लू शुन ता पूर्ण ग्रन्थावली, ग्रन्थ 6।
6. “नन्हा ग्वाला” उंदी लोकप्रिय चीनी लोक-नाटक आंदू। तीना लोप्पा सिर्फ रेंडु भूमिकांग मंतांग। वरोर पाटा पारानोर ओसो उंदी नाटेना पिल्ला पारसोरे सवाल-जवाब कींतोर। जापानी आक्रमण विरोधी युद्ध ता शुरुआत ते जापान विरोध प्रचार कार्य काजे पूना संवाद तैयार कीसि इद नाट्यशैली ता इस्तेमाल कित्तोर अनि उचुने कालम ते इदिन किन लोकर वेल्ले विचार कित्तोर।
7. इवु छै शब्द कुन रासला काजे चीनी अक्षर वेल्ले हल्को मंतांग। इवु साधारण रूप ते अक्षर-ज्ञान ता पाडना कित्ताब ता शुरुआती पाठ लोप्पा शामिल कियमूडांता।
8. “वसंत मे हिमछट्टा” ओसो “कंगालों का गीत” ईसापूर्व तीसरी शताब्दी ते छू राज्य लोप्पा पारटना पाटा मत्ता। इविना लोप्पा मुन्ने पाटा ता लेंग ता स्तर दूसरा तुकू पोरो मंता। राजकुमार चाओ मिंग ना “गद्य-पद्य संग्रह” पोरोल ता रचना ते “छू राज्य ता राजाल किन सुंग य्वी ना उत्तर” कहानी लोप्पा छू राज्य ता राजधानी लोप्पा “वसंत मे हिमछट्टा” पारतास्के “ताना लोप्पा सिर्फ उचुन दर्जन लोकर शामिल आतोर”, मति “कंगालों का गीत” पारतास्के “तीना लोप्पा हजारों लोकर शामिल आतोर।”
9. वी.आई. लेनिन ना रचना “पार्टी-संगठन ओसो पार्टी-साहित्य” लोप्पा ओरू “साहित्य किन सर्वहारा वर्ग ता सब्बे आम कार्य ता उंदी अंग बनेमायना, उंदी अखंड ओसो महान सामाजिक जनवादी मशीनरी ता ‘पलकु ओसो पेंच’ लेक्का बनेमायना इंजी वेहितोर। इदिना नेतृत्व पूरा मजदूर वर्ग ता राजनीतिक दृष्टि ते जागरूक हिरावल दस्ता कींता।”

10. शांघाई ता बिल्डिंग लोप्पा उंदी रकम ता सुडला कोली बिल्डिंग ता पेरकेटा सीडिंग ओदा मंदिता। तंग ओसो हीकट पोयसी मत्तांकु अदिना किराया सस्ता मंदिता। अदिन काजे गरीब लेखक-कलाकार, बुद्धिजीविर, दपतर कर्मचारिरा उंदी वेल्ले बेहरा संख्या इद्रमताए कोलिंग किराया ते तासिंतांग।
11. “बेहरा इलाका” इदु पोरोल जापानी आक्रमण विरोधी युद्ध कालम ते चीन ता दक्षिण-पश्चिम ओसो उत्तर-पश्चिम लोप्पा क्वोमिंगतांग ता शासन ते वायना ओसो जापानी हमलावर लोरा कब्जा ते मत्ता इलाकांग किन हित्ताद मंता। जापान विरोध आधार इलाकांग इत्तेके दुश्मन इलाका ते मत्ता कम्युनिस्ट पार्टी ता नेतृत्व ते निल्पी कित्ता इलाकांग “सुडला इलाकांग” इंजी केयताद मत्ता।
12. प्रसिद्ध सोवियत लेखक एलेक्जेंडर फादेयव ना “विध्वंस” पोरोल उपन्यास 1927 ते प्रकाशित आसी मत्ता। उपन्यास लोप्पा मजदूर, किसान ओसो क्रांतिकारी बुद्धिजीविरा उंदी छापामार दस्ता सोवियत गृहयुद्ध ताकनास्के साइवेरिया लोप्पा प्रतिक्रांतिकारी डाकु लोरा खिलाफ कित्ता संघर्ष कुना बारे ते वेहिंता। इद उपन्यास ता चीनी अनुवाद लू शुन कित्तोरा
13. यु पद्यांश लू शुन ना “आत्म-विडम्बना” हेडिंग कविता तल पोयताद मंता, “संग्रह ता बारह संग्रह”, लू शुन ना पूर्ण ग्रन्थावली, ग्रन्थ 7।

उंदी वेल्ले महत्वपूर्ण नीति

7 सितम्बर 1942

इद सम्पादकीय कामरेड माओ त्सेतुंग येनान ता “मुक्ति दैनिक” काजे रासिस मत्तोर।

बस्केटल चीनी कम्युनिस्ट पार्टी ता केंद्रीय कमेटी “बेसता फौज ओसो सरल प्रशासन” ता नीति पेश कित्ता, अस्केटल वेल्ले जापान विरोधी आधार इलाकांग ना पार्टी संगठन केंद्रीय कमेटी ता आदेश कुना अनुसार लागू किया मंतोम लेवेके लागू कीयाना योजनांग बने किया मंतोमा शानशी-हपे-शानतुंग-हनान सीमा इलाका ता नेतृत्वकारी कामरेड्स इद काम किन वेल्ले गड्डिंग कैदे पोयतोर। “बेसता फौज सरल प्रशासन” ता उदाहरण बने कित्तोर। मति उचुन आधार इलाकांग लोप्पा कामरेड्स इदिन अचोने गंभीरता ते लागू कीयाना कोशिश कित्ताद हिल्ले। बारांकु इत्तेके ओरू इद नीति किन पूरा समझेमाताद हिल्ले। ओरू इंजे वेने वर्तमान परिस्थिति ओसो पार्टी ता बाकी नीतिंग संगे इदिना बाता संबंध मंता इंजी ओसो इदिन उंदी वेल्ले महत्वपूर्ण नीति समझेमायना लोप्पा विफल आंतोर। इद समस्या ता बारे ते मुन्ने वेने बचोनो बेरा “मुक्ति दैनिक” ते चर्चा कित्ताद मंता ओसो नेंडु माटु इदिना बारे ते ज्यादा चर्चा कियाला आल्सा मंतोम।

पार्टी किन सब्बे नीतिंग ना लक्ष्य जापानी हमलावर लोर किन हारे कीयाना मत्ता। पांचवी साल तल प्रतिरोध-युद्ध असल ते तन्ना जीत काजे संघर्ष कीयाना आखरी मंजिल ते नेंगता। इद मंजिल ते परिस्थिति युद्ध ता पहली ओसो दूसरा साल तुकु अलग मत्ता। तीसरा ओसो चौथा साल तुकु वेने अलग मत्ता। युद्ध ता पांचवी ओसो छठा साल ता उंदी विशेषता बाताल मंता इत्तेके उंदी बगिल माटु जीत हासिल कीयाना गर्रे एव्वा मंतोम

अनि दूसरा बगिल मना मुन्ने बेहरा-बेहरा मुश्किलकु वाया मंतांग। दूसरा माटा ते माटु “कोर्र कूसेंग हीकट” लेक्कटा परिस्थिति ते मंतोम। इदु परिस्थिति वर्तमान मंजिल ते सब्बे फासीवादी विरोधी देश कुना लोप्पा ओसो संगेने पूरा चीन लोप्पा वेने मंता। इदु आठवीं राह सेना ओसो पूना चौथी सेना ता आधार इलाका एवनल सीमित हिल्ले, मति इगा अदु विशेष रूप ते उग्र रूप धारण कित्ताद मंता। माटु जापानी हमलावर लोर किन रेंडु साल लोप्पा हारे कीयाना कोशिश किया मंतोम इव रेंडु साल वेल्ले बेहरा मुश्किल कुना सालकु मंदिंतांग ओसो युद्ध ता शुरू ता रेंडु सालकु ओसो नड्मा ता रेंडु साल कुनल बिल्कुले अलग मंदिंतांग। खासकर क्रांतिकारी पार्टी ओसो क्रांतिकारी सेना ता नेतृत्वकारी कार्यकर्ता लोर इद पोल्लो किन मुन्ने ने समझेमायना। ओरू इद्रम कियाला तैयार हिल्लेके, ओरू सिर्फ घटनांग संगेने पोंगसोर हत्ता लेक्का दांतोर, ओरू बचोन मेहनत कीतेकाई ओरू जीत हासिल किया परवोर आंतोर। आखरी ते ओरू क्रांति ता काम किन नुकसान वेने किया परिंतोर। दुश्मन इलाका लोप्पा परिस्थिति जापान विरोधी आधार इलाका ता परिस्थिति मुन्ने तुकू बचोनो गुना ज्यादा कठीन मंदिंता, मति अदु वेने वेल्ले कठीन मन्नो। मनम इंजेने सही नीति लागू कीवेके वेल्ले बेहरा मुश्किल कुना सामना किया लागिंयार। साधारण रूपते लोकुर हत्ता कालम ओसो वर्तमान कालम ता परिस्थितिंग पोरो आधार आसी निर्णय कींतोर। ओरू वायना कालम ता परिस्थिति वेने लगभग इद्रमे मंदिंता इंजी गलत आल्सड ता शिकार आंतोर। ओरू जहाज किन एर दोड़ मत्ता बंडांग(कलकु) ना सामना किया लागिंयार इंजी अंदाजा वाटला तैयार मन्नोर आंतोर अनि शांतिपूर्वक इव बंडांग नगडल बचेमासी पेसना बारे ते वेने आल्सा परवोर आंतोर। प्रतिरोध युद्ध ता जहाज हर्दे एर दोड़ मत्ता बंडांग बवु आंदुंग? अवु युद्ध ता आखरी मंजिल ता वेल्ले गंभीर भौतिक मुश्किलकु। पार्टी ता केंद्रीय कमेटी ओरा बगिल इंगित कित्ता ओसो मनम सावधान आयना, अविनगडल बचेमासी पेसिसी दायना इंजी मना किन आह्वान कित्ता। मना वेल्ले कामरेड्स इद पोल्लो किन समझेमातोर, मति उचुन कामरेड्स इदिन किन इंजे वेने समझेमाताद हिल्ले। इदु पहली बाधा

आंदु इदिन किन पार कीयाना। प्रतिरोध युद्ध लोप्पा एकता ता जरूरत मंता। एकता कीयाना मुश्किल कुना सामना किया लागिगर। इव मुश्किलकु राजनीतिक मंतांगः इव हत्ता कालम ते पुट्टतांग ओसो वायना कालम ते वेने पुट्टा परिंतांग। मना पार्टी हत्ता पांच साल तल अविना पोरो तीरम-तीरम ओसो वेल्ले कोशिश कीसि जीत हासिल किसोर वात्ता। मना नारा एकता किन मजबूत कीयाना ओसो लगातार इद्रम किसोरे मंदानादु मत्ता। मति दूसरा रकम ता मुश्किलकु, भौतिक मुश्किल कु वेने मंतांग। अवु वेल्ले उग्र रूप एतसोर दायनुंग। उचुन कामरेड्स नेंडु वेने इदिना बगिल ध्यान हीसोर हिल्लेर, परिस्थिति ता मांग किन समझेमासोर हिल्लेर, इद्रमतोर किन मनम सतर्क कीयाना। पूरा जापान विरोधी आधार इलाकांग ना सब्बे कामरेड्स इंजेटले भौतिक मुश्किल कु अनिवार्य रूप ते गंभीर आसोर दायनुंग इंजी समझेमायना। मनम अविना पोरो जीत हासिल कीयाना ओसो “बेसता फौज ओसो सरल प्रशासन” सबसे महत्वपूर्ण तरीका आंदू।

इदु बेसता फौज ओसो सरल प्रशासन ता नीति भौतिक मुश्किल किन दूर कियाला काजे बारांकु महत्वपूर्ण मंता? स्पष्ट रूप ते वेहाना इत्तेके इंजेटा कालम ओसो इदिनकु वेने ज्यादा वायना कालम ते आधार इलाका ना युद्ध ता परिस्थिति मना किन मना मुन्नेटा विचार कुना संगे टुंडसी मंदाना अनुमति हीवो आंता। मना विशाल युद्ध मशीनरी मना हत्ता कालम ता परिस्थिति ता अनुकूल मत्ता। अद कालम ते इदिना अनुमति मत्ता ओसो इदिना जरूरत वेने मत्ता। मति इंजे परिस्थिति अद्रम हिल्ले, आधार इलाकांग सुडला आया मंतांग, उचुन कालम एवनल इद्रमे आयनुंग ओसो बदे डावुट हिल्ला मुन्नेटा लेक्का ने विशाल युद्ध-मशीनरी किन बचे कीसि तासना मुश्किल मन्नो आयर। मना युद्ध मशीनरी ओसो युद्ध ता परिस्थिति नडमा अंतरविरोध मंतांग अविन किन मनम हल कीयाना। दुश्मन ता लक्ष्य इद अंतरवरोध किन बेरसी कीयाना ओसो “मूंडु रकम ते खत्म कीयाना”¹ नीति किन लागू किया मंता। मति मनम मना विशाल मशीनरी तासतेके मना सीधा दुश्मन ता जाल ते हिरकितोम। मनम अदिन सुडला हूडतेके ओसो बेसता फौज अनि सरल प्रशासन पोरो अमल कित्तेके मना युद्ध

मशीनरी सुडला मत्तेकाई मजबूत मंदिता। इद “बेहरा कीके ओसो जिल-जिल एर” नडमा ता अन्तरविरोध किन हल कीसि मना युद्ध मशीनरी किन युद्ध ता परिस्थिति ता अनुकूल बने कोंतोम अनि माटु ज्यादा मजबूत आया परितोम। इद्रमे दुश्मन मना किन हारे कीयाना जागा ते मनम दुश्मन किन हारे कीतोम। इदिना कारण तेने माटु पार्टी ता केंद्रीय कमेटी पेश कित्ता “बेसता फौज ओसो सरल प्रशासन” ता नीति उंदी वेल्ले महत्वपूर्ण मंता इंजी इंतोम।

मति मानेय ना दिमाग परिस्थितिंग ओसो आदत कुना संगे दोहची मत्ता लेक्का मंता। इव आदत कुनगडल क्रांतिकारीर वेने बचेमाय परवोर आंतोर। इद विशाल मशीनरी किन माटु खुद बने कीतोम, इदिन सुडला किया लागियर इंजी बस्केने आल्सोम। नेंडु इद्रम कीयाना टाईम वात्ता माटु मुश्किल ते अरसी मंतोम। दुश्मन तन्ना विशाल युद्ध मशीनरी संगे मावा पोरो दबाव वाटा मंता। इद्रम ता परिस्थिति ते मनम युद्ध मशीनरी किन बद्रम सुडला किया परितोम? माटु इद्रम कित्तेके दुश्मन ता मुकाबला कियाला काजे मना फौज वेल्ले कम आयारा। इद्रम ता परिस्थितिंग ओसो आदत कुना संगे दोहची मत्तांके वांतांग। कालम अनुसार गेत्तेंग बदले कीयाना जरूरी आंता। हर साल वसंत कालम पेरके एही कालम वांता ओसो एही कालम पेरके हिरंगम वांता ओसो हिरंगम पेरके वसंत वांता, अस्के गेत्तेंग बदले किया लागिंता। मति पाड़ना आदत तल मजबूर आसी सही कालम ते इदिन किन बदले किया परवोम आंतोम ओसो बीमाम आंतोम। आधार इलाका ता वर्तमान परिस्थिति मना हिरंगम ता गेत्तेंग बदले कीसि एही कालम ता गेत्तेंग करना मांग किया मंता। अस्के ने माटु दुश्मन खिलाफ लडेमाया परितोम मति माटु इंजे वेने हिरंगमता गेत्तेंगे करसी मंतोम ओसो लडेमाया परवा लेक्का मंतोम। दुश्मन ता विशाल मशीनरी ता मुकाबला बद्रम कीयाना इत्तेके मनम वानर राज राजकुमारी फौलादी-पंखा ता मुकाबला बद्रम कित्ता इंदाना उदाहरण तिंची करिया परितोम। राजकुमारी उंदी बेहरा दैत्य मत्ता, मति वानरराज उंदी सुडला पुडिय ता रूप ते एतसी ताना पोड्डा ते नेंगता अनि अदिन किन हारे कित्ता। 2 ल्यू चुंग-यवान

“क्वेइचओ ना गधा” 3 ते बाता वेहतोरो अदिनगडल वेने वेल्ले महत्वपूर्ण सबक दोरकिता। उंदी बेहरा शरीर वाले गधा क्वेइचओ ओतोर, अदिन हूइसी उंदी सुडला डुव्वल वेरियता। मति आखरी ते बेहरा शरीर वाले गधा किन अदु सुडल डुव्वले तित्ता। मना आठवीं राह सेना ओसो पूना चौथी सेना वेने वानरराज ओसो सुडला डुव्वल लेक्का मंता। जापानी बेहरा शरीर ता दैत्य ओसो गधा संगे लड़ेमायला काजे पूरा तैयारी तासिंता। इंजे माटु उचुन बदलाव कीसि, खुद किन सुडला ओसो मजबूत बने कित्तेके मनम जीत हासिल कीतोमा।

नोट

1. “मूंड रकम ते खत्म कीयाना” नीति जापानी साम्राज्यवादीर चीन ता मुक्त इलाका लोप्पा ताकी कित्ता “सब्बे बोइसाटु, सब्बे तोर किन हौकाटु, सब्बे लूटे कियमूट” ता नीति मत्ता।
2. वानरराज सुन ऊ-खुंग उंदी सुडला पुडिय ता रूप एतसी राजकुमारी फौलादी-पंखा किन (पूरा पोरोल लो छा मत्ता) बद्रम हारे कित्तोर, इदिना कहानी काजे चीनी उपन्यास “शी यओ ची” (पश्चिम ता तीर्थयात्र) अध्याय 59 हूइसाटु।
3. ल्यू चुंग-य्वान (773-819 ई.) थांग वंश ता वरोर महान लेखक मत्तोरा। “मूंड नीति कथांग” पोरोल ता रचना लोप्पा “क्वेइचओ ना गधा” वेने शामिल मंता, ताना लोप्पा क्वेइचओ ना उंदी डुव्वल पहली बेरा उंदी गधा किन हूइंता अनि वेरियंता। मति अदु एरियना ओसो कांजना ओसो पिडंगना काम विइसी दूसरा बाताले कीवो इंजी पुत्ता पेरके डुव्वल ताना पोरो अरसी अदिन किन तित्ता।

दूसरी विश्वयुद्ध ता मोड़

12 अक्तुबर 1942

इदु सम्पादकीय कामरेड माओ त्सेतुंग येनान ता “मुक्ति दैनिक” काजे रासिस मत्तोर।

ब्रिटिश ओसो अमेरिका अखबारकु स्टालिनग्राद ता अभियान ता तुलना वेरदुन ना अभियान संगे कित्ताद मंता, अनि “लाल वेरदुन” ना इंजे पूरा दुनिया लोप्पा प्रचार आता। असल इत्तेके इदु तुलना सही हिल्ला मत्ता। स्टालिनग्राद ता अभियान ता स्वरूप पहली विश्व युद्ध ता वेरदुन अभियान ता तुलना तुकू अलग मत्ता। मति अविना लोप्पा उंदी पोल्लो उंदी लेक्का मत्ता अदु इद्रम मत्ता: अस्केटा लेक्काने इंजे वेने वेल्ले लोकर जर्मनी ता आक्रमणात्मक कार्यवाही किन हूडसी जर्मनी इंजे वेने युद्ध जीड़ा परिंता इंजी आल्सतोर। 1918 ता हिरंगम कालम ते पहली विश्व युद्ध खत्म आयना ता रेंडु साल मुन्ने, 1916 लोप्पा जर्मन सेनांग फ्रांस ता किला वेरदुन पोरो बचोनो बेरा हमला कीसि मत्तांगा। वेरदुन अभियान लोप्पा जर्मन सेनांग ना कमांडर-इन-चीफ जर्मन युवराज खुद मत्तोर ओसो अभियान लोप्पा वाटता सेनांग जर्मन सेनांग ना सबसे बेसता हिस्सांग मत्तांगा। इदु अभियान निर्णायक महत्व मंता। जर्मन सेनांग पूराए हारेमाता पेरके पूरा जर्मन-आस्ट्रियन-तुर्की-बलगेरियन गठजोड़ काजे लगातार मुश्किलकु बेरसोर हत्तांग: अदिना संगे ताकनोर विडसी वितत्तोर, ताना पेरके बिखरेमासी पूराए विनाश आता। मति अद कालम ते ब्रिटिश-अमेरिका-फ्रांसीसी गठजोड़ अद परिस्थिति किन आंकलन किया परवो आता अद्रमासी अदु तन्ना जीत ता बारे ते आल्सवा लेवा जर्मन सेना इंजे वेने वेल्ले शाक्तिशाली मंता इंजी आल्सता। इतिहास लोप्पा, सब्बे

प्रतिक्रियावादी ताकत कु तम्मा सर्वनाश तुकू मुन्ने अनिवार्य रूप ते क्रांतिकारी ताकत कुना खिलाफ आखरी एवनल संघर्ष कींतांग, उचुक क्रांतिकारी लोकर ओरा बाहरी ताकत ओसो लोप्पटा कमजोरी संगे वेने उचुन कालम काजे धोखा तितोरा दुश्मन तन्ना विनाश ता गरे एव्वा मंतोर ओसो खुद जीत ता गरे एव्वा मंतोर इंदाना सच्चाई किन समझेमायोर आंतोरा। फासीवादी ताकत कुना सुधार ओसो अविना शुरू कित्ता हत्ता सालकुना आक्रमणकारी युद्ध, इव रेंडासी आखरी जीवा ता संघर्षकु आंदुंग। इद वर्तमान युद्ध लोप्पा स्टालिनग्राद पोरो कित्ता प्रचार खुद फासीवाद ता आखरी संघर्ष ता रूप आंदू। इतिहास ता इद मोड़ ते वेने दुनिया ता फासीवादी-विरोधी मोर्चा ता वेल्ले लोकर फासीवाद ता बाहरी खतरनाक परिस्थिति किन हूडसी, लोप्पटा परिस्थिति किन समझेमाया परवा कारण ते धोखा तितोरा। 23 अगस्त ते पूरा जर्मन सेना दोन डोड्डा वेंडसी स्टालिनग्राद ता बारे प्रचार कीयाना शुरू कित्ता। 15 सितम्बर ते उचुन जर्मन टीमकु नगर ता उत्तर-पश्चिम हिस्सा ता औद्योगिक इलाका लोप्पा नेंगता। 9 अक्तूबर ते सोवियत सूचना ब्यूरो लाल सेना इद इलाका लोप्पा जर्मन लोहकिन मुट्टी कित्ता इंजी ऐलान कित्ता। 48 दिव्यांग इद कठीन लड़ाई ता उदाहारण मानव-इतिहास लोप्पा बेगाने दोरको। आखरी ते इदु अभियान लोप्पा सोवियत सेना जीड़ता। 48 दिव्यांग लोप्पा इद नगर तल हार लेवेके जीत ता हर कबुर करोड़ों लोकर किन बस्केने दुखी कियानदु ओसो बस्केने खुश कीसियानदु। इदु अभियान सिर्फ सोवियत जर्मन युद्ध ता ओसो वर्तमान फासीवादी विरोधी विश्वयुद्ध ताए मोड़ आयवा, पूरा मानव जाति ता इतिहास ता मोड़ आंदू। इव 48 दिव्यांग लोप्पा पूरा दुनिया ता जनता ना कोंडांग स्टालिनग्राद पोरोने मत्तांग। इचोन तो हत्ता अक्तूबर महीना ते मास्को पोरो वेने हिल्वा मत्तांग।

पश्चिम मोर्चा ते हिटलर तन्ना जीत दोरकी कित्ता पेरके वेल्ले हुशियार आता लेक्का मंता। पोलैंड, नार्वे, नीदरलैंड, बेलजियम, फ्रांस ओसो बलकान देशकुना ता प्रचार कीयानास्के हिटलर उंदी बेरा उंदे लक्ष्य पोरो तन्ना ताकत केंद्रित कीसि तन्ना ध्यान हिके-हक्के भटके कियाला हिम्मत

कीवोर आतोर। पश्चिम मोर्चा ते जीत हासिल कित्ता पेरके, ओना दिमाग ते सफलता ता घंमड वात्ता अनि ओरू सोवियत संघ किन मूंड महीनांग लोप्पाने खत्म कीयाना कोशिश ते लागतोर। इदु विशाल ओसो शक्तिशाली समाजवादी देश ता उत्तर ते मरमानस्क तल दक्षिण ता क्रीमिया एवनल ता पूरा मोर्चा लोप्पा प्रचार कित्तोर अनि इद्रम तन्ना सेना किन हिके-हके बिखरे कित्तोर। हत्ता अक्तूबर ते मास्को पोरु ओना प्रचार विफलता सोवियत-जर्मन युद्ध ता पहली मंजिल खत्म आयना दिना चिन्हा मत्ता। इदु हिटलर ना पहली रणनीतिक योजना ता डुंडुल बनेमाता इंजी वेहत्ता। हत्ता साल लाल सेना जर्मन आक्रमण किन रोमी कित्ता अनि हिरंगम ते सब्बे मोर्चा पोरु प्रत्याक्रमण शुरू कित्ता। इदु सोवियत-जर्मन युद्ध ता दूसरी मंजिल मत्ता, इद मंजिल ते हिटलर तन्ना डावपेज बदले कीसि पेरके गुचना ओसो रक्षा कीयाना डावपेज लागू कित्तोर। इद मंजिल ते ओरू तन्ना फील्ड कमांडर-इन-चीफ ब्राचित्श किन बर्खाश्त कीयाना ओसो कमान खुद पोयता पेरके नालुंग बगिल आक्रमण कीयाना योजना किन त्याग कित्तोर, पूरा यूरोप ता कोना-कोना परहकसी परताचोन सेना जमा कित्तोर अनि प्रचार ता तैयारी कित्तोर। इदु दक्षिण मोर्चा एवनले सीमित आतेकाई ओना हिसाब ते सोवियत संघ किन नुकसान कीयाना प्रचार मत्ता। इदु प्रचार उंदी आखरी प्रचार मत्ता, बारांकु इतेके तीना लोप्पा फासीवाद ता बारे ते फैसला आयनदु मत्ता, अदिन काजे हिटलर परताचोन बेहरा सेना जमा कित्तोर, उत्तरी अमेरिका ता युद्ध-मोर्चा तल वेने उचुन हवाईजहाज ओसो टैंक तच्ची वेने वाटतोर। इयेंड मई महीना ते कर्च ओसो सेवियास्तोपोल पोरु जर्मन प्रचार संगे युद्ध तन्ना तीसरी मंजिल ते मेंगता। 15,00,000 तुकू वेने ज्यादा सेना जमा कीसि हिटलर तन्ना वायु-सेना ओसो टैंक-सेना ता मुख्य ताकत ता मदद ते स्टालिनग्राद ओसो काकेशिया पोरु उदाहरण हिल्वा लेक्कटा प्रचार कित्तोर। इव रेंडासी जागा ने जल्दिए तन्ना कब्जा ते पोयना दुहरी कोशिश कित्तोर। उंदी वोल्गा किन कट कीसि बाकू पोरु अधिकार कीयाना, इद्रम कित्तेके उत्तर बगिल मास्को पोरु ओसो दक्षिण बगिल फारस ता खाड़ी एवनल बेरोकटोक मुन्ने

हनमूडांता इंजी आल्सतोर। संगेने ताना लोप्पा जापानी फासीवादिर किन वेने मंचूरिया ते तम्मा सेनांग किन स्टालिग्रद पतन आता पेरके अद बगिल साइबेरिया पोरो अधिकार कियाला काजे जमा कीयाना आदेश हित्तोर।

हिटलर सोवियत संघ किन परताचोन कमजोर कीसि, जर्मन सेना ता मुख्य ताकत सोवियत रणभूमित तल फ्री आसी पश्चिमी मोर्चा ता ब्रिटिश-अमेरिका संगे लड़मायला काजे परताचोन साधन हासिल कीसि जापानीरा संगे कलियाला तैयार आयार इंजी संगेने अगा जापानी सेना ता मुख्य शक्ति वेने उत्तर बगिल तल फ्री आसी तन्ना इलाका ता सुरक्षा तुकू परिशान आयवा लेवा पश्चिम ते चीन ता विरुद्ध ओसो दक्षिण ते ब्रिटिश ओसो अमेरिका ता विरुद्ध मुन्ने दायार इंजी आल्सतोर। इद्रम फासीवादी गठजोड़ किन जीडी कीसि सोवियत संघ किन कमजोर कीयाना अंदाजा वाटसी मत्तोर। मति इद कालम ते बाताल आयार, बाताल आयो इंदानदु हिटलर किन तन्ना योजनांग किन विफल कित्ता सोवियत कार्यनीति तल समझेमाता। सोवियत संघ मुन्ने दुश्मन किन लेसी कीसि देश लोप्पा जेक एवनल नेंगला हियाना ओसो ओरा अंधाधुंद प्रतिरोध कीयाना नीति लागू कित्तोर। पांच महीनांग ना लड़ाई लोप्पा जर्मन सेना काकेशिया ता निय्य दोरकना इलाका लोप्पाए नेंगा परवो ओसो स्टालिनग्रद पोरो अधिकार किया वेने परवो। अदिना कारण ते हिटलर किन तन्ना फौजकु बेहरा-बेहरा मेट्टांग ओसो उंदी पुनवा मत्ता नगर ता बाहरो रोमी कीसि तासा लागता। ओना सेना अगाटल हिके-हके मेलिया परवा लेक्का आता इत्तेके अदु अगाटल पेरकेये दाया परवो मुन्ने वेने दाया परवो: अद्रमासी ओरकिन जबरदस्त नुकसान तेहा लागता। अक्तूबर वात्ता इंजे हिरंगम कालम जेक हिल्ले। जल्दिए युद्ध ता तीसरी मंजिल मारियर अनि चौथी शुरू आयर। सोवियत संघ ता विरुद्ध प्रचार कीयाना हिटलर ना उंदी वेने रणनीतिक योजना सफल आया परवो। हत्ता साल एही कालम ते तम्मा सेनांग किन विकेंद्रित कीतांकु हिटलर विफल आतोर। अदिनके इंजे ओरू सिर्फ दक्षिण बगिले तन्ना ताकत वाटतोर। मति ओरू अस्के वेने सिर्फ उंदी काड़ी संगे रेंडु निशाना वाटला आल्सतोर, इत्तेके मुन्ने वोल्गा किन कट कीसि दक्षिण

काकेशिया पोरो कब्जा कियाला आल्सतोर, अदिनके तन्ना फौज किन ओसो उंदी बेरा बिखरे कीतुर। इंजे ओना ताकत ओना विचार संगे मेल तिंजोर हिल्ले अनि इंजे ओना सर्वनाश पक्का आयर इंजी समझेमाया परवोर आतोर-“काविड़ बैगा ता रेंडु बगिल गट्टी हिल्लेके बोजा अगडल दोड़ अरिंता।”

सोवियत संघ बचोन ज्यादा लड़ेमांता अचोने ज्यादा अदिना ताकत बेरसिंता। स्टालिन ना दूरदृष्टिकोण वाले रणनीतिक कमान पूरा पहल कदमी तन्ना कैदे पोयता, अद्रमासी हिटलर किन हर जागा ते विनाश ता सामना किया लागता। इयेंड हिरंगम कालम ते युद्ध ता चौथी मंजिल शुरू आयार, इदु हिटलर किन सर्वनाश कीयाना मंजिल मंदियर।

युद्ध ता पहली ओसो तीसरी मंजिल ताकनास्के हिटलर ना परिस्थिति ता तुलना कीतेक मना किन ओरू आखरी हार गरे एवता लेक्का दिस्सा मंतोर। स्टालिनग्राद ओसो काकेशिया, रेंडासी जागाने लाल सेना जर्मन हमला किन निज्जमे रोमी कित्ता। स्टालिनग्राद ओसो काकेशिया पोरो अधिकार कियाला विफल आता पेरके हिटलर इंजे वेल्ले दोगतोर। हत्ता साल ते दिसम्बर तल इयेंड एवनल पूरा हिरंगम कालम ते सेना बद्रमाई कीसि जमा कीसि मत्तोर अदु पूराए युद्ध लोप्पा वाटतद मंता। उंदी महीना तुकू वेने कम टाईम ते सोवियत-जर्मन मोर्चा ते हिरंगम कालम शुरू आयर अनि हिटलर किन कंदरेमासी रक्षात्मक कार्यवाही काजे आल्सा लागियार। दोन डोड्डा ता पश्चिम ओसो दक्षिण ता पूरा पट्टी ओना सबसे कमजोर इलाका आंदू ओसो लाल सेना तन्ना प्रत्याक्रमण अगाडले कियार। आयना सर्वनाश तल वेरियसी हिटलर इयेटा हिरंगम कालम ते ओसो उंदी बेरा तन्ना किन पुर्गठित कियानूर। पूर्वी ओसो पश्चिमी रेंडासी मोर्चांग ना खतरा संगे लड़ेमायला काजे ओरू तन्ना सेना किन जमा कीसि पुर्गठित कीसि उचुक पूना डिविजनकु बने कियाला काजे सफलता दोरकी किया परनूर वेने। इदिना संगे ओरू तन्ना मूंडासी फासीवादी देशकु-इटली, रूमानिया ओसो हंगरी मुन्ने सहायता काजे केय एतानूर। बाताल आतेकाई पूर्व ते हिरंगम कालम ता लड़ाई ता जबरदस्त नुकसान तेहा लागियर, संगेने

पश्चिम ते दूसरा मोर्चा वातेके ताना संगे लडेमायला काजे तैयार मंदा लागिगर। अगा इटली, रूमोनिया ओसो हंगरी हिटलर ना काम खत्म आयनादु हूडसी निराशावाद ता शिकार आयनुंग अनि दिय्या-दिय्या तुक् ओनगडल अलग आयनुंग। उचुने कालम ते इत्तेके 9 अक्तूबर पेरके हिटलर काजे सिर्फ उंदे हरीं पिसिंता-सर्वनाश।

इव 48 दिय्यांग लोप्पा लाल सेना बद्रम स्टालिनग्राद ता रक्षा कित्ता, इंदानदु हत्ता साल मास्को ता रक्षा संगे कलियंता। इत्तेके हिटलर इयेटा काजे योजना बने कीसि मत्तोर मति ओना योजना किन हत्ता साल ता ओना योजना लेक्काने विफल कियमूडाता। मति तीना लोप्पा वेने उंदी अंतर मंता अदु सोवियत जनता मास्को ता रक्षा अभियान पेरकेने शीताकलीन प्रत्याक्रमण शुरू कीसि मत्ता, इयेंड अदिन किन जर्मन सेना ता ग्रीष्मकालीन आक्रमण सहेमाया लागता। इदिना कारण उचुन जर्मनी ओसो योरोपीय ग्रूप कुना युद्ध-क्षमता इंजे पूराए खत्मा आयवा मत्ता ओसो उचुन ब्रिटिश ओसो अमेरिका दूसरा मोर्चा निल्पी कियाला लेट कीसि मत्ता। मति इंजे स्टालिनग्राद ता रक्षा ता अभियान पेरके परिस्थिति हत्ता साल तुकु अलग मंदियार। उंदी बगिल सोवियत संघ बेहरा स्तर ते दूसरा शीतकालीन प्रत्याक्रमण कियार ओसो दूसरा मोर्चा निल्पी कीयाना बारे ते ब्रिटिश-अमेरिका इंजे लेट किवोंग आयनुंग(अद मोर्चा निल्पी कीयाना तारीख इंजे सही-सही वेहा परमूडायो), योरोप ता जनता इदिना समर्थन ते विद्रोह कियाला तैयार मंदियार। दूसरा बगिल जर्मनी ओसो अदिना योरोपीय समर्थक लोरा लोप्पा इंजे बेहरा आक्रमण कीयाना ताक हिल्ले। हिटलर किन झकमारेमासी तन्ना पूरा नीति किन बदले क्रिया लागिगर ओसो रणनीतिक रक्षा हरदे ताका लागिगर। उंदी बेरा हिटलर रणनीतिक रक्षा ता हरीं पोयतोर, इत्तेके फासीवाद ता विनाश पक्का आयार। हिटलर ना राज्य लेक्का हर फासीवादी राज्य तन्ना पुटतास्केटले तन्ना राजनीतिक ओसो फौजी पिस्वल ता आधार आक्रमणात्मक कार्यवाहीए कींता। अदिना आक्रमणात्मक कार्यवाहिंग खत्म आयनास्के अदिना पिस्वल वेने खत्म आंता। स्टालिनग्राद ता अभियान फासीवाद ता आक्रमणात्मक

कार्यवाही किन खत्म किसीता अद्रमासी इदु उंदी निर्णयात्मक अभियान आंदू इद अभियान पूरा विश्वयुद्ध काजे उंदी निर्णयात्मक अभियान मत्ता।

हिटलर किन मूंडु शक्तिशाली दुश्मन ता सामना किया लागता: सोवियत संघ, ब्रिटिश-अमेरिका ओसो जर्मन कब्जा ते मत्ता इलाका ना जनता। पूर्वी मोर्चा ते लाल सेना गट्टिग नितसी मंता। इदिना प्रत्याक्रमण दूसरा सालता हिरंगम कालम ते लगातार ताकियर अनि ताना वेने ताकियारे: इदे शक्ति पूरा युद्ध ओसो मानव जाति ता फैसला कियार। पश्चिम मोर्चा ते ब्रिटिश ओसो अमेरिका वेने जेक नितसी तमाशा हूडसोर मत्ता अनि डुलमुल नीति पोरो ताकता। मति डोगता डुव्वल किन पोय्यना टाईम वात्तास्के, दूसरा मोर्चा खुलेमायार। ओसो हिटलर-विरोधी अंदरूनी मोर्चांग वेने मंतांग। अवे जनता ना जन-विद्रोह ना मोर्चा, इदिना किस्स जर्मन, फ्रांस, योरोप ता बाकी इलाकांग लोप्पा सुलगे माया मंता: सोवियत संघ बस्के नालुंग बगिल प्रत्याक्रमण शुरू कियार ओसो दूसरा मोर्चा ते तोपकु पोक्कनुंग, अस्केने इद पूरा जनता वेने इदिना समर्थन ते तीसरा मोर्चा निल्पी कियार। इद्रमे हिटलर पोरो मूंडु बगिल तल हमला ना वार उंदे बेरा अरियर। इद्रम अदु ऐतिहासिक प्रक्रिया इत्तेके स्टालिनग्राद ता अभियान पेरके शुरूआयार।

नेपोलियन ना राजनीतिक पिस्वल वारलू ते मारता, मति मास्को लोप्पा आता ओना हार असल ते ओना राजनीतिक पिस्वल ता निर्णायक मोड़ मत्ता।¹ नेंडु हिटलर वेने नेपोलियन नाए हरदे ताक मंतोर, इदु स्टालिनग्राद ता अभियाने ओनकिन हौकता।

इद परिस्थिति ता प्रत्यक्ष प्रभाव दीर्घलीन रूप ते वेने अरियर। वायना साल ते जापानी फासीवाद काजे वेने बदे दूसरा काल मन्नो आयार। कालम गडससोरे अदिन तल्ला नोमुर् बेरसोरे दायार ओसो आखरी ते गुमिया ते एवसिए रोमियर।

विश्व-परिस्थिति ताबारे ते बोना दृष्टिकोण निराशावादी मंता ओरू तन्ना दृष्टिकोण किन बदले कीयाना।

नोट

1. जून 1815 ते बेलजियम, त दक्षिण ते वाटरलू पोरोल ता जागा ते नेपोलियन ओसो ब्रिटिश-प्रशिया ता एकताबद्ध सेना नडमा भीषण लड़ाई आता। नेपोलियन हारेमातोर अनि दक्षिण अटलान्टिक महासागर ते मत्ता सेन्ट हेलेना द्वीप ते निर्वासन कित्तोर। 1821 ते अगाने डोलतोर। तन्ना पिस्वल ते नेपोलियन वेल्ले योरपीय देशकुन गुलाम बने कीसि मत्तोर। मति 1812 ते रूस ता विरुद्ध तन्ना आक्रमणकारी युद्ध लोप्पा, मास्को ते ओना फौज कुन लगभग पुराए खत्म कियमूडाता अनि ओनकिन हारेमाया लागता। इद नुकसान संगे नेपोलियन किन हमेशा काजे धक्का दलगत। नेपोलियन ना मास्को हार ता बारे ते “माओ त्सेतुंग ना संकलित रचनांग” ग्रन्थ 2 ते “दीर्घलीन युद्ध ता बारे ते” हेडिंग ता लेख ता नोट 23 हूडाट।

अक्तूबर क्रांति ता पच्चीसवी जयंती कालम ते

6 नवम्बर 1942

इद साल अक्तूबर क्रांति ता जयंती किन मन वेल्ले आशावाद संगे मानेमाया मंतोम। नावा हिसाब ते इदु जयंती सिर्फ सोवियत-जर्मन युद्ध संगे उंदी पूना मोड़ ता निशानीए आयवा फासीवादी मोर्चा खिलाफ पूरा दुनिया ता फासीवाद विरोधी मोर्चा ना सफलतांग कुना उंदी पूना मोड़ ता वेने चिना आंदू।

इदिनकु मुन्ने लाल सेना फासीवादी जर्मन ओसो अदिना सहयोगी यूरोपीयन लोरा प्रतिरोध कियाला काजे वर्राए मत्ता अदिन काजे हिटलर तन्ना आक्रमणात्मक कार्यवाहिंग किन रोमवा लेवा जारी तास्तोर। इंजे युद्ध ताकनास्के सोवियत संघ ओसो ज्यादा शक्तिशाली आता अनि हिटलर ना दूसरा ग्रीष्मकालीन आक्रमणात्मक कार्यवाही असफल आता। इंजेटल दुनिया ता फासीवादी विरोधी मोर्चा ता काम फासीवादी मोर्चा ता खिलाफ आक्रमणात्मक कार्यवाही कीयाना ओसो फासीवाद किन हारे कीयाना मंता।

स्टालिनग्राद लोप्पा लाल सेना ता योद्धा लोर वीरतापूर्वक काम कित्तोर। इवन मानव जाति ता पिस्वल बदले कियानुंग। ओरू अक्तूबर क्रांति ता पिल्ला-पेकोर आंदुर। अक्तूबर क्रांति ता झंडा ऊंगा मंता, सब्बे फासीवादी ताकत कुना सर्वनाश पक्का आयर।

लाल सेना ता जीत ता गिर्दा मानेमायनास्के माटु चीनी लोकर वेने मना गिर्दा मानेमांतोम। मना जापानी आक्रमण विरोधी युद्ध हत्ता पांच साल तल ताका मंता। इंजे एवनल मना मुन्ने बचोनो मुश्किलकु वातांग मति जीडना पोड़ु मना मुन्ने पेसा मंता। जापानी फासीवादिर पोरो मना जीत निज्जमे वेल्ले जेक हिल्ले।

चीनी जनता ना काम तन्ना सब्बे कोशिशकु जापानी फासीवाद किन हारे कीयाना लोप्पा केंद्रित कीयानादु मंता।

जापानी आक्रमण विरोधी युद्ध लोप्या आर्थिक ओसो वित्तीय समस्यांग दिसम्बर 1942

इदु लेख ता मूल हेडिंग 'मना हत्ता कालम ता कामकाज ता बुनियादी निचोड़' मत्ता, "आर्थिक ओसो वित्तीय समस्यांग" हेडिंग वाले कामरेड्स त्सेतुंग शेनशी-कानसू-निंगश्या हंदी इलाका ता वरिष्ठ कार्यकर्ता लोरा उंदी सम्मेलन लोप्या पेश कित्ता रिपोर्ट ता पहला अध्याय मत्ता। जापानी आक्रमण विरोधी युद्ध लोप्या मुक्त इलाकांग काजे 1941 ओसो 1942 सबसे ज्यादा कठीन साल मत्ता। जापानी आक्रमणकारिरा हमलांग ओसो क्वोमिंगतांग त घेराबंदी, नाकेबंदी ता कारण ते मुक्त इलाकांग किन वित्तीय मुश्किल कुना सामना किया लागता। कामरेड माओ त्सेतुंग वित्तीय ओसो आर्थिक मुश्किल कुन वेंडला काजे पार्टी कृषि-उत्पादन ता बाकी शाखांग ना विकास कियाला काजे जनता ना नेतृत्व कियान पूना कोशिश कीयाना इंजी वेहतोर। ओरू मुक्त इलाकांग ना सरकार, संगठनकु, विद्यालय ओसो फौजी यूनिटकुन तम्मा जरूरत किन पूरा कियाला काजे परताचोन उत्पादन कीयाना कीयाना इंजी आह्वान कीयाना इंजी वेहतोर। कामरेड्स माओ त्सेतुंग ना "आर्थिक ओसो वित्तीय समस्यांग" हेडिंग वाले पुस्तक ओसो ओना "आधार इलाकांग लोप्या लगान कम कीयाना, उत्पादन बेरसी कीयाना ओसो 'सरकार ता समर्थन कीयाना अनि जनता ना संगे एकता बेरसी कीयाना' आंदोलन विस्तार कीमुट" ओसो "संगठित आयमुट!" हेडिंग वाले लेख मुक्त इलाकांग लोप्या उत्पादन आंदोलन ता नेतृत्व कियाला काजे पार्टी ता बुनियादी प्रोग्राम बनेमाता। कामरेड्स माओ त्सेतुंग इगा, आर्थिक विकास ता नजरअंदाज कीसि सार्वजनिक राजस्व (दोरकना टैक्सकु) ओसो व्यय (लागत) पोरो ध्यान केंद्रित कीयाना ओसो उत्पादन बेरसी कीयाना ओसो मुश्किल कुन जीडला काजे जनता किन गोलबंद कियवा लेवा ओरो मदद कियवा लेवाए ओरगडल मांग कीयाना गलत विचार ता बारे ते वेहा मंतोर। अदिना कड़ी आलोचना कित्तोर। "अर्थव्यवस्था ता विकास कियाला काजे ओसो राशन सप्लाई ता गारंटी कियाला काजे" पार्टी ता सही नीति पेश कित्तोर। इद नीति संगे उत्पादन आंदोलन वेल्ले सफल आता। इदिना विकास शेनशी-कानसू-निंगश्या हंदी इलाका लोप्या ओसो दुश्मन इलाका लोप्या मत्ता मुक्त इलाकांग लोप्या कित्ताद मंता। इद्रम कीतांकु सिर्फ मुक्त इलाका ना सेना ओसो जनता युद्ध ता सबसे कठीन कालम ता सामना कियालाए आयवा परके वेने आर्थिक निर्माण ता नेतृत्व कियाला काजे पार्टी किन समृद्ध अनुभवकु दोरकतांग।

मना आर्थिक ओसो वित्तीय काम ता मार्गदर्श कीयाना आम नीति अर्थव्यवस्था ता विकास कीयाना ओसो राशन सप्लाई कीयाना ता गारंटी कीयाना आंदू। मति मना वेल्ले कामरेड्स सार्वजनिक वित्त पोरो एकतरफा जोर हींतोर अनि पूरा अर्थव्यवस्था ता महत्व किन समझेमायोर आंतोर। सिर्फ आय ओसो लागत ता समस्या लोप्पाने हिरकसी मत्तांकु ओरू पूरा कोशिश कितेके वेने बदे समस्या ता हल परका परवोर आंतोर। बारांकु इत्तेक उंदी घिसेपिटे रूढ़िवादी विचार ता शिकार आसी मंतोर। ओरू उंदी बगिल सही ओसो गलत वित्तीय नीति ता अर्थव्यवस्था पोरो असर अरिंता अगा दूसरा बगिल वित्तीय परिस्थिति ते निर्णय कीयाना अर्थव्यवस्थाए मंदिंता इंजी पुनवा मंदिंतोर। उंदी पक्का बुनियाद वाले अर्थव्यवस्था लेवा वित्तीय मुश्किल किन हल कीयाना मुश्किल मंता। उंदी विकासशील अर्थव्यवस्था लेवा वित्तीय जरूरत किन वेने पूरा कियमूडायो। शेनशी-कानसू-निगंश्या हंदी इलाका ता वित्तीय समस्या दसियो हजार सैनिक ओसो गैर सैनिक कर्मचारिरा रहन-सहन ओसो ओरा कार्यवाहिंग काजे धन जमा कीयाना, दूसरा माटा ने जापानी आक्रमण विरोधी युद्ध कियाला काजे धन जमा कीयानादु मंता। इद धन ता उचुन हिस्सा जनता हियाणा टैक्स संगे जमा कीयाना आंता, उचुन हिस्सा दसियो हजारा सैनिक, गैर सैनिक कर्मचारिर कीयाना उत्पादन-कार्य तल जमा कीयाना आंता। मनम अर्थव्यवस्था ता नीजि ओसो सार्वजनिक रेंडानी ना विकास कियवेके माटु पूराए खत्म आंतोमा। वित्तीय मुश्किल कुना पोरो काबू किया परवेके वास्तविक परिस्थिति ता अनुसार ओसो कारगर रूप ते आर्थिक विकास कीयाना तरिका किन लागू कीयाना। आर्थिक विकास किन ओसो वित्तीय स्रोत किन खोले कीयाना काम किन नजरअंदाज कीयाना ओसो इदिना जागा ते जरूरी खर्च कम कीसि वित्तीय मुश्किल कुन हल कीयाना कोशिश कीयाना उंदी रूढ़िवादी विचार आंदू, इद्रम कितेके बदे वेने समस्या हल आया परवो।

हत्ता पांच साल लोपा माटु बचोनो मंजिलकु वेंडतोमा मना मुन्ने सबसे ज्यादा ओसो गंभीर मुश्किल 1940 ओसो 1941 ता वातांगा क्वोमिंगतांग तन्ना कम्युनिस्ट विरोध अभियान संगे टक्कराव पैदा कित्तास्के। उचुन कालम एवनल मनगा कपड़-लता, गाटो-कुसिर, नूकांग-दारिंग, कमका-निय्य, कागज-कलम, सैनिक लोरा जूतांग-मोजांग, गैर सैनिक कर्मचारिरा हिरंगम ता तारना कामरांग-दरिंग ना वेल्ले जरूरत मत्ता। मनम दोरकी कीयाना धन संगे मना खिलाफ आर्थिक नाकेबंदी कीसि क्वोमिंगतांग मना गुडंगा पोयना कोशिश कित्ता। मनम निज्जमे वेल्ले मुश्किल ते मंतोरा मति माटु मुश्किलकुना पोरो काबू कित्ताद मंता। माकिन सिर्फ हंदी इलाका ता जनतानगडल अनाज दोरकी कीयानाए आयवा खासकर माटु वेल्ले दृढ़ता ते खुद ता कैदे मना आर्थव्यवस्था ता सार्वजनिक आर्थिकव्यवस्था ता निर्माण कित्ताद मंता। हंदी इलाका ता सरकार मना जरूरत कुन पूरा कियाला काजे बचोनो उद्योगकुना निर्माण कित्ता। फौजी यूनिटकु व्यापक उत्पादन आंदोलन कीतांग अनि तम्मा खुद ता जरूरत किन पूरा कियाला काजे बचोनो उद्योग कुना निर्माण कीतांग। फौजी यूनिटकु तम्मा जरूरत किन पूरा कियाला काजे कृषि, उद्योग, वाणिज्य ता विस्तार कीतांग। विभिन्न संगठन कु विद्यालय कुना दसियों हजार लोकर वेने तम्मा जरूरत किन पूरा कियाला काजे इद्रम ताए आर्थिक गतिविधिं ना विकास कित्तोरा इदु आत्मनिर्भर वाले अर्थव्यवस्था आंदू इदिना विकास फौजी यूनिटकु ओसो विभिन्न संगठन, विद्यालयकु कित्ता विशेष परिस्थिति विशेष उपज आंदू ऐतिहासिक परिस्थितिं लोप्पा इदु अयोग्य ओसो आल्सा परवा लेक्का मंता मति इंजे इदु योग्य ओसो जरूरी मंता। इद्रम ता तरीकांगे संगे माटु मना मुश्किल कुन हल किया परितोमा इदु, राशन सपलाई ता गारंटी सिर्फ आर्थिक विकास संगे ने एतमूडांता इंदाना सच्चाई किन साबित कीवो या? मना मुन्ने इंजे वेने वेल्ले मुश्किलकु मंतांग मति मना अर्थव्यवस्था ता सार्वजनिक क्षेत्र ता बुनियाद वाटतद मंता। ओसो उंदी साल आता पेरके 1943 ता आखरी ते इदु बुनियाद ओसो ज्यादा मजबूत आयारा।

अर्थव्यवस्था ता विकास कीयाना उंदी सही कार्यदिशा मंता, मति विकास कीयाना इत्तेके अंधाधुंद तरीका ते विस्तार कीयाना इंजी आयो। उचुन कामरेड्स इगटा वर्तमान ठोस परिस्थिति किन नजरअंदाज कींतोर अनि विकास ता बारे अंगडमे कोलार पोयंतोर। उदाहरण तुकू ओरू बेहरा उद्योग कुना स्थापना कीयाना मांग किया मंतोर ओसो ओवोर, हथियार बने कीयाना बेहरा उद्योग बने कीयाना ता योजनांग पेश किया मंतोर, इद्रम तवु सब्बे तोर अमल कीयाना लेक्का ओसो मंजूर कीयाना लेक्का हिल्लेंग। विकास ता बारे ते कार्यदिशा पार्टी पेश कित्ता कार्यदिशाए सही मंता। ताना लोप्पा उंदी बगिल घिसेपिटे रूढ़िवादी विचार कुना विरोध कित्ताद मंता ओसो दूसरा बगिल बेहरावु, अंगडमतवु ओसो अव्यवहारिक योजनांग ना वेने विरोध कित्ताद मंता। इदे वित्तीय ओसो आर्थिक क्षेत्र ता रेंडु पार्टी संघर्षकु आंदुंग।

उंदी बगिल मन मना अर्थव्यवस्था ता सार्वजिक क्षित्र ता विकास कियाला आल्लिसंतोमा। दूसरा बगिल मनम जनता कीयाना सहायत ता महत्व किन वेने मरंगनायो। जनता मना किन 1940 ते 90,000 तथन, 1941 ते 2,00,000 तान ओसो 1942 ते 1, 60, 000 तान अनाज हित्ता।¹ इद्रमे मना सैनिक, गैर सैनिक कर्मचारिरा राशन ता समस्या किन हल कीयाना गारंटी कित्ता। 1941 ता आखरी एवनल मना कृषि ता सार्वजनिक क्षेत्र लोप्पा अनाज ता उत्पादन वेल्ले कम मत्ता। मनम अनाज काजे जनता पोरो निर्भर मंदानोरोमा। मनम सेनाकिन अनाज ता उत्पादन कीयाना इंजी प्रेरित कीयाना मति उचुन कालम एवनल मनम अदिना काजे मुख्य रूप ते जनता पोरोने निर्भर मंदा लागियर। मति शेनशी-कानसू-निंगश्य हंदी इलाका ते मंता। अदिन किन सीधा युद्ध ता नुकसान तेहा लागो, मति इचोन बेहरा इलाका लोप्पा वेल्ले कम आबादी सिर्फ 15,00,000 मंता। अदिन काजे इदु अचोन ज्यादा अनाज जमा कीसि हिया परवो आयार। इदे आयवा मना जनता मना काजे होवोर दुलाई कींता अनि होवोर-दुलाई ता लेवी हींता। 1941 ते 50 लाख य्वान ता सरकार बौण्ड वेने अस्सता। इव सब्बे जनता पोरो मंदाना कम बोजा हिल्ले।

प्रतिरोध-युद्ध ओसो राष्ट्रीय पूर्णनिर्माण ता जरूरत कुन पूरा कियाला काजे जनता किन इद्रम ता बोजा तन्ना हट्टा पोरो कांजा लागियर इंजी अद बेसे समझेमांता। सरकार वेल्ले बेहरा मुश्किलकुना सामना किसोर मंदानास्के जनता ओसो ज्यादा बोजा कांजला वेहना इद पोल्लो किन जनता वेने समझेमांता। मति जनता नगडल वसूल कीयाना संगे-संगे मनम जनता ना घाटा पूरा कियाला ओसो अर्थव्यवस्था ता विस्तार कियाला वेने मदद कीयाना। इत्तेके जनता किन कृषि, पशुपालन, दस्तकारी, होवोर उद्योग ओसो वाणिज्य ता विकास कीयाना लोप्पा मदद कियाला काजे सही ओसो ठोस निर्णय एतना। इद्रम कीसि अदु मना किन हियाना संगे-संगे खुद हासिल कींता अनि बचोन मना किन हींता अदिनकु ज्यादा दोरकी किंता। सिर्फ इद्रमे माटु जापान खिलाफ उंदी दीर्घकालीन युद्ध ता बोजा कांजा परितोम।

युद्ध ता जरूरत कुन नजअंदाज कीसि उचुन कामरेड्स सरकार “दयालुपन” ता नीति लागू कीयाना इंजी जोर वाटितोर। इदु उंदी गलत धारणा आंदू। बारांकु इत्तेके बस्के एवनल माटु जापानी आक्रमण विरोधी युद्ध लोप्पा जीत हासिल कीवोम अस्के एवनल इद्रम ता “दयालुपन” तल जनता किन बाताले फायदा आयो आंता, सिर्फ जापानी साम्राज्यवादीर किने फायदा आयार। इदुना उल्टा जनता किन इंजे वेल्ले बोजा कांजला लागियर, मति बद्रम-बद्रम सरकार ओसो फौज कुना मुन्ने मत्ता मुश्किलकु हल आयनुंग, प्रतरोध युद्ध लोप्पा स्थिर मनमूडायर ओसो दुश्मन किन हारे कियमूडायर, अद्रम-अद्रम जनता काजे परिस्थिति सुधरेमासोर दायरः इदिना लोप्पाने क्रांतिकारी सरकार ता सही दयालुपन मंदिता।

दूसरा गलत धारणा “कीके पोयला काजे पूना तालब किन खाली कीयाना”, इत्तेके जनता नगडल अंत हिल्वा मांग कीयाना, अदिना मुश्किल कुन नजरअंदाज कीयाना ओसो सिर्फ सरकार, सेना ताए जरूरत पोरोने ध्यान हियानदु। इदु क्वोमिंगतांग आल्सना तरीका आंदू, इदिन किन मनम बिल्कुले लागू कीयानायो। मनम अस्थाई रूप ता जनता किन बोजा बेरसी किताद मंता, मति मना अर्थव्यवस्था ता सार्वजनिक क्षेत्र ता निर्माण

कीयाना तुरंत शुरू कित्ताद मंता। 1941 ओसो 1942 ते सेना, सरकार, संगठन, विद्यालयकु तम्मा ज्यादातर जरूरत कुन खुद तन्नाए कोशिश कुना संगे पूरा कीतांग। इदु चीन ता इतिहास ते उदाहरण हिल्ला लेक्कटा उंदी जबरदस्त सफलता मत्ता, इदु मना सफलता काजे भौतिक आधार बने कीता। मन आत्मनिर्भर बने कीयाना आर्थिक गतिविधिं बचोन ज्यादा बेरसिंतांग, अचोने ज्यादा माटु जनता ना टैक्स ता बोजा कम किया परितोमा। पहली मंजिल ते, 1937 तल 1939 एवनल मनम जनता नगडल वेल्ले कम पोयतोमा। इद मंजिल ते जनता तन्ना ताकत वेल्ले बेरसी कित्ता। दूसरा मंजिल ते 1940 तल 1942 एवनल जनता पोरो बोजा बेरसता। तीसरी मंजिल 1943 ते शुरू आयर। वायना रेंडु सालकुना लोप्पा 1943 ओसो 1944 ते मना अर्थव्यवस्था ता सार्वजनिक क्षेत्र बेरसतेके, मना शेनशी-कानसू-निंगश्य हंदी इलाका लोप्पा मना पूराए लेवेके ज्यादातर फौजकु कृषि-उत्पादन ते लागना परिस्थिति ते मत्तेके, 1944 ता आखरी ते जनता ना ओसो वेने हल्को आयार, अस्के जनता तन्ना किन ओसो बेरसी कियार। इदु उंदी सम्भावना मंता, इदिन किन मनम असलतेने बदले कीयाना।

मनम सब्बे उंदी बगिलता विचार कुना खंडन कीयाना ओसो मना पार्टी ता सही नारा “अर्थव्यवस्था ता विकास कीमटु ओसो रसद-सप्लाई ता गारंटी कीमुट” पेश कीयाना। सार्वजनिक हित ओसो निजी हित नडमा ता संबंध ता बारे ते मना नारांग “सार्वजनिक हित ओसो निजी हित रेंडासी ना सुरता तासना” ओसो “सैनिक ओसो गैर सैनिक इरवुरासी ना सुरता तासना” इंजी मंतांग। मनम सिर्फ इदे रकम ता नारांग किन सही मानेमांतो। माटु मना अर्थव्यवस्था ता सार्वजनिक ओसो निजी क्षेत्र ता सच्चाई ओसो व्यवहारिक तरीका ते विस्तार कीसिए मना वित्तीय जरूरत कुन पूरा कीयाना गारंटी किया परितोमा। कठिन परिस्थिति ते वेने मनम टैक्स ता उंदी सीमा निर्धारित कीयाना पोरो ध्यान हियाना अस्केने अदिना बोजा जनता किन परेशान कीवो आयर। बस्के संभव आयर अस्के मनम इद बोजा किन

कम कीयाना। इद्रम किसोर मत्तेके जनता किन तन्ना ताकत बेरसी कियाला मौका दोरकिंता।

क्वोमिगंतांग ता कट्टरपंथिर हंदी इलाका लोप्पा निर्माण कार्य कीयाना अंगडम मंता इंजी ओसो मुशिकल कुन वेंडा परमूडायो इंजी आल्सिंतोरा। ओरू हंदी इलाका बस्केने वेने खत्म आया परिंता इंजी आल्सा मंतोरा। इद्रम तोरा संगे चर्चा कीयाना अंगडम आंता। मना “खत्म आयना” दिव्या किन हूडला आल्सानोरा इच्छा बस्केने पूरा आयो। उल्टा माटु ओसो वेने खुशहाल पिस्वल पिससोर दायकोम। ओरू कम्युनिस्ट पार्टी ओसो हंदी इलाका ता क्रांतिकारी सरकार ता नेतृत्व ते जनता हमेशा पार्टी ओसो सरकार किन तन्ना समर्थन हींता इंजी समझेमायोरा। पार्टी ओसो सरकार आर्थिक, वित्तीय मुशिकल कु बचोन गंभीर मत्तेकाई अविन वेंडला काजे बद्रमाई तरीका हमेशा खोज कींता। असल ते माटु मना उचुक मुन्नेटा मुशिकल कुना पोरो काबी कित्ताद मंता ओसो जल्दिए बाकी मुशिकल कुना पोरो वेने काबू कियाकोम। हत्ता कालम ते माटु इदिन कु बचोनो गुना ज्यादा बेहरा मुशिकल कुना सामना कीतोम अनि अव सब्बे ना पोरो काबू कीतोम। रोज ता भीषण लड़ाई ता कारण ते उत्तरी ओसो मध्य चीन ते मत्ता मना आधार इलाका इंजे शेनशी-कानसू-निंगश्या हंदी इलाका तुकु बचोनो ज्यादा बेहरा मुशिकलकुना सामना किया मंता, मति माटु इव इलाकांग लोप्पा साढ़े पांच साल तल नित्तसी मंतोम। बस्के एवनल जीत हासिल आयो अस्के एवनल गड्डिग नित्तसी मंदा परिंतोम। मना काजे निराश आयना बदे आधार हिल्ले। माटु हर रकम ता मुशिकल कुन पार किया परिंतोम।

शेनशी-कानसू-निंगश्या हंदी इलाका ता वरिष्ठ कार्यकर्ता लोरा वर्तमान सम्मेलन पेरेके माटु “बेसता फौज ओसो सरल प्रशासन”² ता नीति अमल कियाकोम। इद नीति किन सख्त, गहराई ओसो व्यापक रूप ते अमल कीयाना। विचार हिल्ला लेक्का, पोरो-पोरो लेवेके आंशिक रूप ते आयो। इदिन पोरो अमल कीयानास्के मनम सरलीकरण, एकीकरण, कार्य-कुशलता, धैर्य ओसो नौकरशाही-विरोध इव पांच उद्देश्य कुन पूरा

कीयाना। इव पांच उद्देश्यंग मना आर्थिक, वित्तीय कार्य पोरो वेल्ले महत्वपूर्ण प्रभाव वाटिंतांग। सरलीकरण संगे गैर-उत्पादन खर्च कम आयनुंग अनि उत्पादन-कार्य लोप्पा आमदनी बेरसियार। इदिना प्रभाव सिर्फ मना वित्तीय परिस्थिति पोरोने आयवा आर्थिक दृष्टिकोण ते वेने जनता ना बोजा हल्को आयर ओसो अदिना सीधा फायदा आयार। मना आर्थिक-वित्तीय ढांचा लोप्पा मना एकरीकरण ता कमी, स्वतंत्रता पोरो ज्यादा जोर हियाना ओसो तालमेल ता कमी लेक्कटा गलतिंग पोरो काबू कीयाना। मना नीति-नियम कुना पोरो पूरा अमल कीयाना लेक्कटाना एकीकृत ओसो आदेश अनुसार कार्य-व्यवस्था बने कीयाना। इद्रम ता एकीकृत व्यवस्था मत्तेके कार्य-कुशलता बेरसियार। मना सब्बे संगठन कुन खासकर आर्थिक, वित्तीय कार्य लोप्पा मत्ता संगठनकु ओसो बचत पोरो ध्यान हियाना। बचत किन अमल कित्तेके वेल्ले गैर जरूरी, फालतू खर्च खत्म किया परिंतोम। इदु करोड़ो ख्यान ते मंदा परिंता। आर्थिक, वित्तीय कार्य ते मत्ता लोकर इंजे एवनल नौकरशाही तरीकांग पोरो काबू कीयाना। इविना लोप्पा उचुक भ्रष्टाचार-घूसखोरी, बेहरा संगठन, अंगडम ता “प्रतिमानीकरम” ओसो लाल फीताशाही, वेल्ले गंभीर मंतांग। माटु इव पांच उद्देश्यंग पार्टी, सरकार ओसो सेना लोप्पा दोरकी कित्तेके “बेसता सेना ओसो सरल प्रशासन” ता मना नीति लक्ष्य पूरा आयार। मना मुश्किलकु हल आयनुंग मति मना काजे “खत्म आयना” दिव्या वाया मंता इंजी अंगडम ता बोल्लनोरा तोड्डी बंद आयार।

नोट

1. इव आंकडांग शेनशी-कानसू-निंगश्या हंदी इलाका ता किसान लोर 1940 तल 1942 एवनल निहता कृषि-टैक्स (सार्वजनिक अनाज) ताव आंदुंग।
2. “बेसता सेना ओसो सरल प्रशासन” काजे इदेर ग्रन्थ ता “उंदी वेल्ले महत्वपूर्ण नीति” हेडिंग वाले लेख किन हूडाट।
इद लेख, “मना मुन्नेटा कामकाज ता बुनियादी निचोड” हेडिंग वाले आंदु, कामरेड माओ त्सेतुंग शेनशी-कानसू-निंगश्या हंदी इलाका ता वरिष्ठ कार्यकर्ता लोरा उंदी सम्मेलन लोप्पा पेश कित्ता “आर्थिक ओसो वित्तीय समस्यांग” हेडिंग वाले रिपोर्ट ता पहली अध्याय

आंदोलन जापानी आक्रमण विरोधी युद्ध लोप्य मुक्त इलाकांग काजे 1941 ओसो 1942 सबसे ज्यादा कठिन साल मत्ता। जापानी आक्रमणकारिरा खतरनाक हमलांग ओसो क्वोमिंगतांग ता घेराबंदी, नाकेबंदी ता कारण ते मुक्त इलाकांग किन वेल्ले वित्तीय मुश्किल कुना सामना किया लागता। खामरेड माओ त्सेतुंग वित्तीय ओसो आर्थिक मुश्किल कुना पोरो जीत हासिल कियाला काजे पार्टी कृषि-उत्पादन शाखांग ना विकास कियाला काजे जनता ना नेतृत्व कीयाना कोशिश कीयाना इंजे वेहतोरा। मुक्त इलाकांग ना सरकार, संगठन, विद्यालय ओसो फौजी यूनिटकुन तम्मा जरूरत कुन पूरा कियाला काजे ज्यादा से ज्यादा उत्पादन कीयाना इंजी आह्वान कित्तोरा। कामरेड माओ त्सेतुंग ना “आर्थिक ओसो वित्तीय समस्यांग” हेडिंगवाले पुस्तक ओसो ओना “आधार इलाकांग लोप्पा लगा कम कीयाना, उत्पादन बेरसी कीयाना ‘सरकार ता समर्थन कीयाना ओसो जनता ना संगे संबंध बेरसी कीयाना’ आंदोलन किन विस्तार कीमुट” ओसो “संगठित आयमुट!” हेडिंग वाले लेख मुख्त इलाका लोप्पा उत्पादन आंदोलन ता नेतृत्व कियाला काजे पार्टी ता बुनियादी प्रोगाम मंदाना। कामरेड माओ त्सेतुंग इगा आर्थिक विकास किन नजरअंदाज कीसि सार्वजनिक आय ओसो लागत पोरो ध्यान केंद्रित कीयाना ओसो उत्पादन बेरसी कीयाना अनि मुश्किल कुन वेंडला काजे जनता किन गोलबंद कियवा लेवा ओरा मदद कियवा लेवा ओरगडल मांग कीयाना गलत विचार कुना कड़ी आलोचना कित्तोरा। “अर्थव्यवस्था ता विकास कीयाना ओसो राशन-सप्लाई ता गारंटी कीयाना” पार्टी ता सही नीति किन पेश कित्तोरा। इद नीति संगे उत्पादन आंदोलन लोप्पा वेल्ले सफलता दोरकता, तीना विकास शेनशी-कानसू-निंगश्या हंदी इलाका ते ओसो दुश्मन ता इलाका ते मत्ता मुक्त इलाकांग लोप्पा कित्ताद मत्ता। इद सिर्फ मुक्त इलाकांग ना सेना ओसो जनता युद्ध त सबसे कठिन परिस्थिति ता सामना कियालाए आयवा वायना कालमे ते वेने आर्थिक निर्माण ता नेतृत्व कियाला काजे पार्टी समृद्ध अनुभव दोरकी किया परता।

नेतृत्व ता तरिकांग संबंघ ते उचुक सवालकु

1 जून 1943

नेतृत्व ता तरीकांग बारे ते इद निर्णय कामरेड् माओ त्सेतुंग चीनी कम्युनिस्ट पार्टी ता केंद्रीय कमेटी काजे रासिस मतोर।

1. माटु कम्युनिस्ट लोर मना बदे वेने काम किन रोमी कियाला काजे रेंडु रकम ता तरीकांग लागू कीयाना। पहली सामान्य किन विशेष संगे काल्पना तरीका: दूसरा नेतृत्व किन जनता संगे काल्पना तरिका।
2. बदे वेने काम कीयाना सामान्य ओसो व्यापक आह्वान कीवेके व्यापकजनता किन कार्यवाही कियाला काजे गोलबंद किया परमूडायो। मति नेतृत्वकारी पद ते काम कियानोर तम्मा गतिविधिग सिर्फ सामान्य आह्वान एवनले सीमित तासिंतोर। ओरू उचुन संगठन कुना लोप्पा हंजी तन्ना आह्वान कित्ता काम लोप्पा गहराई ओसो ठोस रूप ते खुग शामिल आयवेके, बदे उंदी जागा ते अद आह्वान किन व्यावहारिक रूप हीवेके, अनुभव दोरकी कीवेके, बाकी दल कुना मार्गदर्शन काजे अव अनुभव कुना इस्तेमाल कीवेके- तन्ना सामान्य आह्वान ता टागोट किन जांच कीयाना लेवेके अदिना अंतरवस्तु किन समृद्ध बने कीयाना बदे हरीं हिल्ले आयार। आह्वान ता विफल आयना खतरा वेने मंदियारे। उदाहरण तुकू 1942 ते ताकता दोष-निवारण आंदोलन लोप्पा बेगाने सामान्य आह्वान किन विशेष ओसो ठोस मार्गदर्शन संगे काल्पना तरीका लागू कित्तेके अगा अदिना ठोस सफलता दोरकता। बेगा इद तरीका किन लागू कित्ताद हिल्ले अलगा वेने इदिना लोप्पा सफलता दोरको। 1943 ते ताकी कित्ता दोष-निवारण आंदोलन लोप्पा केंद्रीय कमेटी ता हर ब्यूरो ओसो उप-ब्यूरो किन ओसो पार्टी ता हर क्षेत्रीय कमेटी ओसो प्रिफेक्चर-कमेटी किन सामान्य आह्वान कीयाना (पूरा सालमेंड दोष-निवारण कार्य ता योजना पेश कीयाना) संगे-संगे दोड़ रास्ता काम वेने किसोर ओरू

व्यावहारिक अनुभव दोरकी कीयाना। तम्मा संगठन ता बाकी संगठन, बिद्यालय लेवेके फौजी यूनिटकु ना रेंडु लेवेके मूंड दलकुन (ज्यादा आयो) चुने कीयाना। इव दलकुना परिस्थिति ता पूर्ण अध्ययन कीयाना, इविना लोप्पा दोष-निवारण आंदोलन ता विकास ता विस्तृत जानकारी दोरकी कीयाना। ओरा स्टाफ ता (ज्यादा आयो) उचुन प्रतिनिधि सदस्य लोरा राजनीतिक, विचारधारात्मक विशेषतांग ना अध्ययन ता बारे ते ओरा ज्ञान ओसो काम ता, क्षमता ओसो कर्मिंग ना विस्तृत जानकारी हासिल कीयाना। तीना संगे-संगे, इव दलकुना काम ता जिम्मादारी एतनोरा व्यक्तिगत रूप ते मार्गदर्शन वेने किमूट, अस्केने ओरू दल मुन्ने मत्ता बचोनो व्यावहारिक समस्यांग ना ठोस हल किया परितोर। हर संगठन, विद्यालय लेवेके फौजी यूनिट कुना लोप्पा बचोनो दलकु मंदितांग, अदिन काजे अविना नेता लोर वेने इद्रमे कीयाना। इदे आयवा, इद तरीका संगे नेता लोर नेतृत्व ता काम ओसो करियाना काम ता तालमेल किया परितोर। बोराई नेतृत्वकारी कामरेड बस्के एवनल तन्ना दोड़ मत्ता विशेष दल कुना विशेष मानेय ओसो विशेष घटनाक्रम कुनगडल ठोस अनुभव दोरकी कीवोर, अस्के एवनल ओरू सब्बे दलकुना सामान्य मार्गदर्शन कियाला परवोर आंतोर। इद तरीका किन हर जागा लागू कीयाना अस्केने मना सब्बे स्तर ता नेतृत्वकारी कार्यकर्ता लोर इदिन लागू कियाला करियानूर।

3. 1942 ता दोष-निवारण आंदोलन ता अनुभव तले दोष-निवारण कार्य ता सफलता काजे हर दल लोप्पा आंदोलन ताकनास्के सक्रिय तत्व कुना उंदी नेतृत्वकारी ग्रुप बने कीयाना, इदिना अनुसार बाकी दलकु काम कीयाना ओसो नेतृत्वकारी ग्रूप आंदोलन लोप्पा शामिल आयना जनता संगे घनिष्ठ संपर्क बने कीयाना। नेतृत्वकारी ग्रूप बचोन सक्रिय मत्तेकाई बस्के एवनल तम्मा सक्रियता किन जनता ता सक्रियता संगे काल्पो आंता अस्के एवनल ओरा कार्यवाही सिर्फ उचुने मुल कित्ता असफल कोशिश साबित आयार। दूसरा बगिल

सिर्फ जनताए सक्रिय मंता ओसो अदिना सक्रियता किन सही तरीका ते संगठित कियाला काजे बदे शक्तिशाली नेतृत्वकारी ग्रुप हिल्ले इंदानास्के इद्रम ता सक्रिय वेल्ले जोम टिकेमाया परवो आंता लेवेके सही दिशा ते मुन्ने दाया परवो आंता। हर जागा ते जनता लोप्पा साधारण रूप ते मूंड रकम ता लोकुर मंदितोर। तुलनात्मक रूप ते सक्रिय, मध्यम ओसो तुलनात्मक रूप ते पेरके अरसी मतोर। अदिन काजे नेता लोर उचुन संख्या वाले सक्रिय तत्व कुन नेतृत्व ता नालुंग बगिल एकताबद्ध कीयाना लोप्पा निपुण आयना, मध्यम तत्व कुना स्तर पोरो तेहला काजे ओसो पेरके अरतोर किन तम्मा पक्ष ते कियाला काजे सक्रिय तत्व पोरो निर्भर मंदाना। सही एकता ता धागा ते दोहची मत्ता ओसो जनता संगे सही सम्पर्क तासना नेतृत्वकारी ग्रुप ता निर्माण सिर्फ जन-संघर्ष ताकनास्के ने तीरम-तीरम कीयाना आंता, अलग मंजी आयो। बदे वेने महान संघर्ष ता शुरूआत ता, नड़मा ओसो आखरी ता मंजिल ते ज्यादातर नेतृत्वकारी ग्रुप किन शुरु तल आखरी एवनल पूर्ण रूप ते बदलेमासोर मंदा लागिंता ओरू पूर्ण रूप ते बदलेमायवा मंदा वेने परवो आंतोर। संघर्ष ताकनास्के मुन्ने वायना सक्रिय तत्व किन कमजोर आता लेवेके पतन आता नेतृत्वकारी ग्रूप ता पाड़ना सदस्य लोरा जागा एतला काजे लगातार विकसित कीयाना। बचोनो जागा ने बचोनो संगठकुना कार्य किन मुन्ने ओया परवा मंदाना बुनियादी कारण एकताबद्ध नेतृत्वकारी ग्रुप हिल्ला मंदाना, जनता संगे संपर्क हिल्ला मंदाना नेतृत्वकारी ग्रुप। ठोस परिस्थितिंग किन ध्यान हीसी (लोकुर किन अस्वाभाविक रूप ते शामिल कियवालेवा) ओसो वेल्ले सक्रिय, वेल्ले ईमानदार, वेल्ले जागरूक शिक्षक, कर्मचारीर ओसो विद्यार्थिर किन शामिल कित्ता 100 लोकुरा बदे विद्यालय लोप्पा बचोनो लोकुर ओसो उंदी दर्जन लेवेके अधिनकुन वेने ज्यादा लोकुरा बदे नेतृत्वकारी ग्रुप हिल्ले ओसो मत्तेकाई इदिना सुचारू रूप ते संचालन किया परनूडायो। पार्टी ता बोलशेविकीरण कियाला काजे स्टालिन वेहत्ता 12 शर्तकु

लोपटल 9वी शर्त, नेतृत्व ता संचालन-केंद्र ता स्थापना कीयाना ता बारे ते मंता,¹ मनम सुडला-बेहरा हर संगठन लोप्पा हर विद्यालय ते हर फौजी यूनिट ते, हर कारखाना ओसो हर नाटे लागू कीयाना। कार्यकर्ता लोरा संबंध ते नीति पोरो बहस ताकनास्के दिमित्रोव पेश कित्ता नालुंग शर्तकु² इद्रम ता नेतृत्वकारी ग्रुप कुना जांच आयना। काम पोरो लगाव, जनता संगे अटूट सम्पर्क, स्वतंत्र रूप ते काम कीयाना क्षमता ओसो अनुशासन ता पालन कीयाना। युद्ध लोप्पाई, उत्पादन लेवेके शिक्षा लोप्पा आई (दोष-निवारण कार्य वेने शामिल मंता) प्रधान काम आई लेवेके मुन्नेटा काम ता जांच कीयाना काम आई, कार्यकर्ता लोरा पाड़ना कालम ता जांच-पड़ताल कीयाना काम आई लेवेके दूसरा बदे वेने काम आई कीयानास्के सामान्य आह्वान किन विशेष मार्गदर्शन संगे काल्पना तरीका किन लागू कियाला संगे-संगे नेतृत्वकारी ग्रुप किन जनता संगे काल्पना तारीका किन वेने लागू कीयाना जरूरी मंता।

4. मना पार्टी ता पूरा काम लोप्पा सही नेतृत्व काजे “जनता तल करियसी जनता किने वापिस कीयाना” तरीका लागू कीयाना जरूरी ता। इतेके: जनता ता विचार कुन(बिखरेमासी मत्ता विचारकुन) जमा कीसि अदिना निचोड़ तेंडना(अध्ययन संगे अविन केंद्रित ओसो व्यवस्थित विचार कु बने कीयाना) अनि जनता नड़मा दायना, इव विचार कुना प्रचार कीयाना। जनता किन समझे कीयाना अविन खुद ता विचार कुना रूप ते लागू कीयाना, अविना पोरो दृढ़ता ते नितसी मंदाणा अनि कार्य रूप ते बदले कीयाना। इद्रम ता कार्यवाहिंग ताकनास्के इव विचार कुना टार्गेट ता आंकलन कीयाना। तीना पेरेके ओसो उंदी बेरा जनता नड़मा ता विचार कुन जमा कीसि अविना निचोड़ तेंडना अनि अव विचार कुना पोरो गट्टिग नितसी मंदाला, अविन लागू कियाला काजे ओसो उंदी बेरा जनता नड़मा दायना। इद्रम बार-बार कितेके इव विचारकु हर बेरा मुन्ने तुकू ज्यादा सही

ओसो मुन्ने तुकू ज्यादा सजीव, समृद्ध बनेमायुंनंग। इदे मार्क्सवाद ता ज्ञान-सिद्धांत आंदू।

5. बदे वेने संगठन लेवेके बदे संघर्ष ता नेतृत्वकारी ग्रुप ओसो जनता नडमा सही संबंध बने कीयाना धारणा “जनता तल पोयसी जनता किन मलहना” तरीका किन लागू कीसि नेतृत्व लोर सही विचार कुन लागू किया परितोर। इद धारण ता नेतृत्व सही विचार कुन लागू कीयानास्के सामान्य आह्वान ता ठोस मार्गदर्शन संगे काल्पना- इव सवाल किना बारे ते मना कार्यकर्ता लोरा नडमा मंदाना गलत विचार कुन सुधरे कियाला काजे इव सब्बे धारणांग किन व्यापक प्रचार वर्तमान दोष-निवारण आंदोलन ताकनास्के कीयाना। मना बचोनो कामरेड्स सक्रिय तत्व कुन जमा कीसि नेतृत्व ता संचालन-केंद्र ता निर्माण कीयाना काम ता महत्व किन समझेमायोर ताना लोप्पा निपुण मन्नोर आंतोर। ओरू संचालन-केंद्र ता जनता संगे अटूट संपर्क कीयाना महत्व किन समझेमायोर आंतोर। अदिन काजे ओरा नेतृत्व उंदी नौकरशाही नेतृत्व बनेमांता। अद्रमासी जनता तल संपर्क देगिंता। मना बचोनो कामरेड्स जन-संघर्ष कुना अनुभव ता निचोड़ तेंडना महत्व किन समझेमायवा लेवेके ताना लोप्पा निपुण हिल्वा लेवेकाई खुद किन चतुर समझेमासी तन्ना मनोगतवाद विचार किन व्यक्त कियाला तैयार मंदिंतोर। ओरा विचारकु अदिन काजेए सारहीन ओसो अव्यवहारिक मंदिंतांग। मना बचोनो कामरेड्स बदे काम किन पूरा कियाला काजे सिर्फ सामान्य आह्वान कीसिए खुश आंतोर अनि तुरंत पेरके बदे विशेष ओसो ठोस मार्गदर्शन कीयाना महत्व किन समझेमायोर ताना लोप्पा निपुण वेने मन्नोर आंतोर। अदिन काजे ओरू आह्वान पोरोल तुके मंदिंता। लेवेके सभा-भवन एवनले सीमित आसी मंदिंता। वर्तमान दोष निवारण आंदोलन ताकनास्के मनम इन कर्मिंग किन दूर कीयाना। मना अध्ययन, काम ता जांच, कार्यकर्ता लोरा पाड़ना इतिहास ता जांच, नेतृत्व किन जनता संगे काल्पना, सामान्य किन विशेष संगे काल्पना तरीका किन इस्तेमाल कीयाना

करियाना। वायना कालम ता मना काम लोप्पा वेने इद तरीका किन लागू कीयाना।

6. जनता ता विचार किन जमा कीसि अविन निचोड़ तेंडना, ताना पेरेके जनता नडमा दायना, अव विचार कुना पोरो डटेमासी मंदाना अविन लागू कीसि नेतृत्व ता सही विचार कुना निर्माण कीयाना-इदु नेतृत्व ता बुनियादी तरीका आंदू। विचार कुना निचोड़ तेंडना ओसो अविना पोरो अटल मंदाना प्रक्रिया ते सामान्य आह्वान किन ठो, मार्गदर्श संगे कालपना तरीका किन इस्तेमाल कीयाना जरूरी मंता। इद्रम कीयानादु बुनियादी तरीका ता उंदी अंद आंदू। बचोनो समस्यांग लोप्पा कीयाना मार्गदर्शन पोरो आधार आसी सामान्य विचार (सामान्य आह्वान) किन सूत्रबद्ध कीयाना ओसो विभिन्न दलकुना लोप्पा व्यवहार संगे जांच कीयाना(इद्रम सिर्फ खुद कीयाना अनि दूसरोर किन वेने वेहना) ताना पेरेके पूना अनुभव किन जमा कीसि (अदिना निचोड़) ओसो जनता ता सामान्य मार्गदर्शन कियाला काजे पूना सरकूलर तैयार कीयाना। मना कामरेड्स वर्तमान दोष-निवारण आंदोलन ताकनास्के ओसो बाकी काम कियानस्के इद्रमे कीयाना। बचोन ज्यादा निपुणता ते इद काम कियमूडायर, मना नेतृत्व अचोने ज्यादा बेस बनेमायार
7. मना कै दोड़ ता दलकुन बदे काम सौंपे कीयानास्के (अदु क्रांतिकारी युद्ध, उत्पादन लेवेके शिक्षा संबंधित काम आई, दोष-निवारण आंदोलन, पाड़ना कामकाज ता जांच लेवेके कार्यकर्ता लोरा पाड़ना इतिहास ता जांत संबंधित कामकाज आई, प्रचार काम संगठनात्मक काम, जासूसी-विरोधी काम लेवेके दूसरा बदे आई काम) पोरोटा बदे संगठन ओसो अदिना विभाग दोड़ ता संगठन ता नेताल संगे सब्बे पोल्लो ना बारे ते आल्सना। अस्केने अद जिम्मेदारी किन बेस निभे कियमूडांता। इद्रमे कार्य-विभाजन ओसो एकीकृत केंद्रिकृत-नेतृत्व रेंडासी अमल किया परमूडांता। पोरोटा बदे हिस्सा किन दोड़ ता संगठन ता पूरा जिम्मेदारी सम्भाले कीयाना मानेय (सचिव, अध्यक्ष, निर्देशक लेवेके विद्यालय ता प्रिन्सपल) किन जानकारी हिल्ला

लेवेके गैरजिम्मेदारी ता परिस्थिति ते वाटसी सिर्फ खुदे बदे विभाग संगे एकदम अलग सम्पर्क कीयानायो। उदाहरण तुकू संगठनात्मक कार्य, प्रचार-कार्य लेवेके जासूसी-विरोधी कार्य सबंध ते पोरोटा बदे विभाग सिर्फ दोड़ ता इवे विभाग कुना संगे तन्ना अलग सम्पर्क कीयानायो। बदे संगठन ता पूरा जिम्मेदारी सम्भाले कियानोर ओसो बदे विशेष जिम्मेदारी किन सम्भाले कियानोर इरवुरासी किन गतिविधि ना बारे ते जानकारी मंदाना ओसो इरवुरासी किन जिम्मेदारी हियाना। इदु केंद्रिकृत तरीका कार्य-विभाजन किन किन एकीकृत नेतृत्व संगे काल्पिता। पूरा जिम्मेदारी सम्भाले कियानोरा संगे बदे विशेष कार्य किन पूरा कियाला काजे बेहरा संख्या ते कार्यकर्ता लोर किन बस्के-बस्के बदे संगठन ता पूरा कार्यकर्ता लोर एवनल गोलबंद कीयाना काम किन संभव किसिंता। इद्रम अलग-अलग विभाग लोप्पा कार्यकर्ता लोरा कबी किन दूर कीयाना लोपपा ओसो मना मुन्ने मत्ता कार्य किन कियाला काजे बचोनो लोकर किन क्रियाशील कार्यकर्ता बने कियाला मदद आंता। इद वेने नेतृत्व किन जनता संगे काल्पना तरीका आंदू। उदाहरण तुकु मना कार्यकर्ता लोरा पाड़ना इतिहास किन हूड़ाटु। इद काम किन अलग-थलग कीसि लेवेके सिर्फ संगठन-विभाग ताए उचुन संगे कित्तेके, इद काम सही तरीका ते आयाए परवो। मति इद का ते शामिल आयला काजे तन्ना स्टाफ ता बचोनो वेले सब्बे कार्यकर्ता लोर ओसो तन्ना सब्बे विद्यार्थिर किन गोलबंद कीयाना बदे विशेष संगठन लेवेके विद्यालय ता मुख्य प्रशासनिक अधिकारी संगे कित्तेके ओसो तीना संगे-संगे पोरोटा संगठन-विभाग ता नेतृत्वकारी सदस्य लोर सही तरीका ते मार्गदर्श कित्तेके, नेतृत्व किन जनता संगे काल्पना नियम पोरो अमल कित्तेके कार्यकर्ता लोरा पाड़ना इतिहास ता जांच काम किन डावुट हिल्वा ओसो खुशी-खुशी ते पूरा कियमूडांता।

8. बदे विशेष जागा ते उंदे बेरा बचोनो प्रधान काम ताकी किया परमूडायो। उंदी बेरा सिर्फ उंदे प्रधान काम किया परमूडांता। दूसरा,

तीसरा दर्जा ता महत्व वाले बाकी काम सिर्फ अदिना पूरक मंदा परितांगा। अदिन काजे बोना पोरो बदे एरिया ता पूरा जिम्मेदारी मंता ओरू अगाटा संघर्ष ता इतिहास ओसो ठोस परिस्थिति किन ध्यान ते तासना। विभिन्न कार्य ता महत्व अनुसार अविना प्रमुखता ता क्रम निर्धारित कीयाना। ओरू तन्ना योजना बने कियवा लेवा पोरोटा संगठन तल वायना हर आदेश किन अद्रमे लागू कीसि “प्रधान कार्य” लोप्पा गड़बड़ी पैदा कियानूर। तुलनात्मक महत्व ओसो जरूरत किन स्पष्ट कियवा लेवा ओसो प्रधान कार्य किन स्पष्ट कियवा लेवा बदे वेने पोरो कमेटी उंदे बेरा बचोनो काम, दोड़ ता कमेटी किन सौंपे कीयानायो। बारांकु इत्तेके दोड़ ता कमेटी तन्ना काम पूरा कियाला काजे तेहना ठोस निर्णय कुना लोप्पा लेसियर अनि अदिना काम लोप्पा बदे ठोस सफलता दोरको आयरा। बदे एरिया ता ऐतिहासिक परिस्थितिंग ओसो तात्कालीन परिस्थिति ना अनुसार अगाटा सम्पूर्ण परिस्थिति किन सुरता तासिसी तन्ना कार्य ता योजना बने कीयाना। हर कालम ते प्रधान कार्य ता बारे ते ओसो बाकी काम कुना प्रमुखता ता क्रम ता बारे ते सही निर्णय एतना अद निर्णय किन दृढ़ता ते लागू कीयाना ओसो ठोस सफलता ता गारंटी हियाना नेतृत्व-कला ता उंदी अंग आंदू। इदु नेतृत्व ता तरीका संबंधित समस्या वेने ओसो नेतृत्व किन जनता संगे काल्पना, सामान्य किन विशेष संगे काल्पना नियम किन लागू कीयानास्के हल कीयाना बगिल ध्यान हियाना।

9. इगा नेतृत्व तरीता ता बारे ते विस्तृत विवरण पेश कित्ताद हिल्ले। सब्बे एरिया ना कामरेड्स इगा पेश कित्ता नियम कुना पोरो आधार आसी खुद इद समस्या पोरो गंभीरतापूर्वक विचार कियाकिर इंजी आशा क्रिया मंताना। संघर्ष बचोन ज्यादा कठिन मंता कम्युनिस्ट लोरा काजे विशाल जनता ता मांग संगे तम्मा नेतृत्व ता घनिष्ठ सम्पर्क कीयाना ओसो सामान्य आह्वान किन विशेष मार्गदर्शन संगे घनिष्ठ रूप ते काल्पनादु अचोने ज्यादा जरूरी आंता। इद्रम कीसि नेतृत्व ता मनोगतवादी नौकरशाही तरीकांग किन पूराए खत्मत कियमूडांता।

मना पार्टी ता सब्बे नेतृत्वकारी कामरेड्स तम्मा नेतृत्व ता मनोगतवादी, नौकरशाही तरीकांग जागा ते नेतृत्व ता वैज्ञानिक, मार्क्सवादी तरीकांग किन हमेशा बेरसी कीयाना। पाड़ना रकम ता तरीकांग किन खत्म कियाला काजे दूसरा रकम ता तरीकांग किन इस्तेमाल कीयाना। नेतृत्व किन ज-समुदाय संगे काल्पमा, सामान्य किन विशेष संगे काल्पना नियम मनोगतवाद ओसो नौकरशाही समझेमायो आंता। ओरू पार्टी ता कार्य विकास लोप्पा ज्यादा बाधा वाटितोर। नेतृत्व लोप्पा मनोगतवादी, नौकरशाही तरीकांग ना मुकाबला कियाला काजे मना नेतृत्व ता वैज्ञानिक, मार्क्सवादी तरीकांग किन व्यापक रूप ते ओसो गहराई ते बेरसी कीयाना।

नोट

1. जे. वी. स्टालिन, “जर्मन कम्युनिस्ट पार्टी ता वायना कालम ओसो बोलशेविकीकरण ता सवाल” हूडाटी।
2. कम्युनिस्ट इन्टरनेशनल ता सातवी कांग्रेस ते जार्जी दिमोत्रोव पेश कित्ता निष्कर्ष “फासीवाद ता विरुद्ध मजदूर वर्ग ता एकता” ता सातवां भाग “कार्यकर्ता-समस्या” हूडाटु।

क्वोमिंगतांग पोरो उचुक आलोचनात्मक सवाल

12 जुलाई 1943

कामरेड माओ त्सेतुंग इद संपादकीय किन येनान ता “मुक्ति दैनिक” काजे रासिर मत्तोर।

हत्ता महीना ते चीन लोप्पा जापान विरोधी ग्रूप लोप्पा इत्तेके क्वोमिंगतांग ता नेतृत्व ते काम कीयाना पार्टी, सरकार, सेना बचोनो सगंठन कुना एकता भंग कीयाना ओसो प्रतिरोध युद्ध किन तहस-नहस कीयाना अभियान शुरू कीतांग। इदु वेल्ले असाधारण ओसो अचानक घटेमाता घटना मत्ता। इदु कम्युनिस्ट पार्टी पोरो हमला कियाला काजे कित्ताद मत्ता, मति असल ते चीनी राष्ट्र ओसो पूरा चीनी जनता पोरो तन्ना निशाना वाटता।

मुन्ने क्वोमिंगतांग फौज कुना बारे ते आलस्काल। पूरा देश लोप्पा क्वोमिंगतांग ता नेतृत्व ते ताकना फौजकुना लोप्पाटल मूंड मुख्य सैन्य ग्रूपकु- 34वीं, 37वीं ओसो 38वीं ग्रूप। उत्तर पश्चिम ते तैनात आतांग, इवु सब्बे 8 वी युद्ध-क्षेत्र ता डिप्टी कमांडर-इन-चीफ हू चुंग-नान ना नेतृत्व ते मत्ता। इविना लोप्पाटल रेंडु किन शेनशी-कानसू-निंगश्या हंदी इलाका ता घेराव कियाला काजे इस्तेमाल कित्तोर। उंदी किन पीली डोल्लाट ता ओदा-ओदा ईछवान तल थुंगक्वा एवनल जापानी सेना ता खिलाफ प्रतिरक्षा-कार्य काजे तैनात कित्तोर। 4 साल ज्यादा कालम तल इद्रम ता परिस्थिति मत्ता। बस्के एवनल बदे फौजी मुठभेड़ आयो अस्के एवनल लोकर इद परिस्थिति किन आदत बने कीसि मत्तोर। मति हत्ता उचुक दिव्यांग लोप्पा उंदी अप्रत्याशित बदलाव आता। डोड्डा ओदा-ओदा प्रतिरक्षा-कार्य काजे तैनात कित्ता मूंडु फौजी कोर-पहली, 16वी ओसो

90वीं फौजी कोर इविना लोप्पटल रेंडु किन गुच्ची कित्ताद मत्ता, पहली फौजी कोर किन पिनचओ ओसो छुमह्वा इलाका लोप्पा ओसो 90वीं फौजी कोर किन लोछवान इलाका लोप्पा तैनात कित्ताद मत्ता। इव रेंडासी हंदी इलाका पोरो हमला कियाला काजे सक्रिय रूप ते तैयारी किया मंतांग। डोड्डा ओदा जापानी सेना खिलाफ निल्पी कित्ता प्रतिरक्षा सैनिक तैनात हिल्वा मत्तोर।

इद्रम ता परिस्थिति ते लोकर अनिवार्य रूप ते क्वोमिंगतांग लोकर ओसो जापानी लोरा नडमा बाता संबंध मंता? इंजी पूछेमांतोर।

क्वोमिंगतांग ता वेल्ले लोकर नरका-पिय्यल कम्युनिस्ट पार्टी “प्रतिरोध युद्ध लोप्पा तोडफोड” किया मंता ओसो “एकता किन तहस-नहस” कियान मंता इंजी वेल्ले प्रचार किया मंतोर। डोड्डा ता प्रतिरक्षा काजे तैनात मुख्य सेना किन गुची कीयाना प्रतिरोध-युद्ध किन सुदृढ़ बने कीयाना इंदाना या? हंदी इलाका पोरो हमला कीयाना एकता किन मजबूत कीयाना इनमूडांता या?

इद्रम कियाला आल्सना लेवेके इद्रम किसोर मंदाना क्वोमिंगतांग लोकर किन: मीटु जापानीरा बगिल मोरकुल कीसि मंतिर, असल इत्के इंजे वने ओरू मीवा मुन्ने मंतोर इंजी वेहाना। जापानी लोर मीवा पेरके-पेरके मुन्ने वायना शुरू कित्तेके बाता आयर?

जापानी सेना डोड्डा ता दूसरा बगिल तल कुस्कने उदसी हूडा मंतोर। ओरू तम्मा दूरबीन संगे मीवा तीरम-तीरम मायसोरे दायना मोरकुल किन हूडसी खुश आया मंतोर, मीवा पोरो बदे कार्यवाही किसोर हिल्लेरा। डोड्डा ओदा मीटु कीयाना प्रतिरक्षा ता वेल्ले बेहरा हिस्सांग किन विडचिसी बारांकु दाया मंतिर? जापानी सेना मीवा मोरकुल हूडला इचोन वेल्ले विचार बारांकु कींता? मीटु डोड्डा ओदा बने कीसि मत्ता मीवा प्रतिरक्षा-लाईन किन विडचिसी ओसो अदिना विशाल हिस्सा ता सेना किन खाली कीसि इचोन आराम बारांकु किया मंतिर?

निजी सम्पत्ति पोरो आधार आसी मंदाना समाज लोप्पा लोकर नरका हुंजना मुन्ने कीवाड केहिंतोर। इदु अंगडम तिप्पल ता निशानी आयवा

कल्लेर-डाकुर लोरगडल बचे मायला काजे कीयाना काम आंदू इंजी सब्बेतोरे पुत्तोर। नेंडु मीवा मुन्ने टा किवाड़ खुल्ला तासिस माकिन चोर-डाकुर नेंगना वेर्री हिल्लेया? किवाड़ खुल्ला मत्तेके ओसो चोर-डाकुर नेंगोर, इदिना कारण बातल?

मीटु चीन लोप्पटा कम्युनिस्ट लोर “प्रतिरोध युद्ध लोप्पा तोड़फोड़” किया मंतोर इंजी इंतिर, अनि मीटे “राष्ट्रकिन सबसे पोरों तासना” ता बारे ते सबसे ज्यादा ईमानदारी तोहंतिर। नेंडु मीटे दुश्मन किन मोरकुल तोहा मंतिर। निज्जमे वेहाटू असल ते मीटू बदिन किन “सबसे पोरों” तासंतिर?

मीटु कम्युनिस्ट लोरे “एकता किन तहस-नहस” किया मंतोर इंजी इंतिर अनि मीटे “जीवा कीसि एकता कीयाना” ता बारे ते सबसे ज्यादा ईमानदारी तोहंतिर। मति मीटे मूंड ग्रूप वाले सेना (एक फौजी कोर किन विडचसी) वाले बेहरा सेना किन बायनेट ओसो तोपकुना संगे लैस कीसि हंदी इलाका ता जनता पोरों हमला कियाला काजे लोहतिर, इदिन किने “जीवा कीसि एकता कीयाना” इंतोरा?

मीवा उंदी दूसरा पोल्लो किन हूडाकाल- मीटु “एकता” ता बारे ते “एकीकरण” ता बारे ते तासताचोन ध्यान हीविर आंतिर। अदिन काजे मीटु हंदी इलाका किन खत्म कियाला आल्सा मंतिर। “सामंती अलगाववाद” किन खत्म कीयाना ओसो हर कम्युनिस्ट किन हौकला आल्सा मंतिर। वेल्लेय बेस! एय्यो। जापानीर मीटु वेने शामिल मत्ता चीनी राष्ट्र किन लूटे कीसि कब्जा कीसि अदिना “एकीकरण” कीयाना तुकू मीटु बद्रम वेरियवीर?

मीटु मीटु उंदी झटका ते हंदी इलाका किन सफलतापूर्क “एकीकरण” कीयानास्के, कम्युनिस्ट लोर किन हौकनास्के, राष्ट्र ओसो मीटु जापन तोर कीयाना “एकीकरण” तल बचेमायला काजे जापानीर किन बदे “हुस्कड़ वायना दवाई” तिहची लेवेके बदे “होदेने संगे एड़हची” हुंजीह कियाकीर लेवेके बेहोश कियाला सफल आयकिर। मति इद्रम कीतेकाई क्वोमिंगतांग ता प्रिय साहेब लोर मीटु मीवा हुस्कड़ वायना गोलिंग ओसो एड़हना गुप्त पोलो ता बारे ते माकिन उचुन वेने वेहविरा?

मति मीवगा जापानीरा मुकाबला कियाला काजे बदे हुस्कड ता गोली ओसो होदे हिल्वेके माटु ओरा संगे बदे गुप्त समझौता किवे मत्तेके माटु मीकिन स्पष्ट रूप ते वेहा मंतोम- मीटु हंदी इलाका पोरो हमला कीयानायो इंजी, बिल्कुले इद्रम कीयानायो इंजी। “बस्के इत्तेके अस्के घोंघी ता लड़ाई आतेके अदिना फायदा हेम्मुल किना आंता।”, “जूरेंग केव्व कोय्येंग पोरो हमला कींतांग, मति पेरेकेटल कांचन पिट्टे अदिना काजे केपसी मंदिता” इव रेंडासी नीति कथाना लोप्पा सच्चाई मंता। मीटु मावा संगे कलियसी जापान कब्जा कित्ता इलाका त “एकीकरण” कित्तेके ओसो अदिन किन पूंडतेके बेस आयो या। माटु हंदी इलाका ता उचुने जमीन ता “एकीकरण” कियाला कियाला काजे इचोन गिर्दा ओसो जल्दबाजी बारांकु किया तोहा मंतिर? मना सुंदर देश ता विशाल इलाका दुश्मन ता कब्जा ते मंता मति ताना बारे ते मीटु बोरे आल्सोर हिल्वर, उल्टा हंदी इलाका पोरो हमला कियाला आल्सा मंतिर। कम्युनिस्ट पार्टी किन खत्म कियाला आल्सा मंतिर। बचोन लज्जा वायना लेक्कटा पोल्लो मंता इदु!

तीना पेरेके उचुक क्वोमिंगतांग पार्टी ता गतिविधिग पोरो ध्यान हियाकाल। कम्युनिस्ट पार्टी ता विरोध कियाला काजे क्वोमिंगतांग ता खुफिया एजेंट लोरा सौ टीम बनेकित्ताद मत्ता। ताना लोप्पा वेल्ले लंपट लोर किन भरती कित्ता। उदाहरण तुकू 6 जुलाई 1943 ते चीनी गणराज्य ता 32 वीं साल, प्रतिरोध युद्ध ता छठी वर्षगांठ तुकू मुन्ने क्वोमिंगतांग ता केंद्रीय समाचार-एजेन्सी उंदी समाचार प्रसारित कित्ता, अदिना लोप्पा शेनशी प्रान्त ता शीआन लोप्पा बदे “सांस्कृतिक संघ” ता उंदी सभा कीयाना अनि माओ त्सेतुंग किन लेटर लोहची तीसरी इन्टरनेशनल भंग आयानास्के फायदा एतसी चीनी कम्युनिस्ट पार्टी किन “भंग कीयाना” ओसो “हंदी इलाका ता अलगाववादी शासन किन समाप्त कीयाना” मांग कीयाना इंजी फैसला कित्तोर। पढेमायनोर इदिन किन उंदी “समाचार” समझेमातेकाई असल ते इदु उंदी पाड़ना कहानी आंदू।

इदु सब्बे खुफिया एजेंन्सी ता बचोनो टीम कुना लोप्पाटल बोरे वरोना आंदु इंतोर। तम्मा “राष्ट्रीय सरकार ता फौजी परिषद ता जांच-

पड़ताल, आंकड़ा ब्यूरो” ओसो “क्वोमिंगतांग ता केंद्रीय कार्यकारिणी कमेटी ता जांच-पड़ताल, आंकड़ा ब्यूरो”) ता आदेश अनुसार इद टीम इस्साल शीआन ता नजरबंदी कैम्प लोप्पा अनुशास ओसो क्वोमिंगतांग ता पैसा ते ताकना “प्रतिरोध ओसो संस्कृति” पोरोल ता उंदी देशद्रोही पत्रिका ते तन्ना कम्युनिस्ट-विरोधी लेख रासना तुकू बदनाम मत्ता त्रात्सकीवादी ओसो चीनी गद्दार चांग ती-फेइ किन आदेश कितोर। 12 जून ते इत्तेके केंद्रीय समाचार-एजेन्सी तन्ना समाचार प्रसारित कीयाना पच्चीस दिव्या मुन्ने ओरू 9 लोकर किन जमा कीसि 10 मीटिंग कितोर, अगा इल लेटर ता बारे ते वेहतोर।

इदु लेटर नेंड एवनल येनान एवताद हिल्ले मति इदिना लोप्पा रास्त विषय स्पष्ट मंता। मनम वेहत्ता लेक्का इद लेटर लोप्पा तीसरी इंटरनेशनल किन भंग कित्ताद मंता अदिन काजे चीनी कम्युनिस्ट पार्टी किन वेने इद्रमे “भंग कीयाना”, “माक्सवाद-लेनिनवाद बदनाम आता” इंदाना लेक्कटा पोल्लोंग रास्तद मंता।

मनम हूडतोमा क्वोमिंगतांग इद्रमताए पोल्लोंग किया मंता। क्वोमिंगतांग लेक्कटोरा तोड्डी तल (कल्लेर-कल्लेर काकाल-पेपीना मरीर) इंदान लेक्कटा पोल्लोंगे पेसिंतांग इंजी माकिन विश्वासे मत्ता।

इंजे चीन लोप्पा वेल्ले राजनीतिक पार्टींग मंतांग। क्वोमिंगतांग वेने रेंडु मंतांग। उंदी नानकिंग ओसो उचुक जागा ने बने कित्ता, तन्ना झंडा ते मोय्योल रंग नडमा पांडरी रंग ता पोडु बनेमासी मत्ता, तन्ना केंद्रिय कार्यकारिणी कमेटी ओसो खुफिया पुलिस टीमकु मंदाना वांग चिंग-वेइ मार्का क्वोमिंगतांग मंता। इदे आयवा जापान कब्जा ते मत्ता इलाकांग ना सब्बे जागा ने जापान समर्थक फासीवादी पार्टींग मंतांग।

क्वोमिंगतांग ता प्रिय नेता लोर! इन्टरनेशनल भंग आता पेरके मीटु कम्युनिस्ट पार्टी किन तो “भंग कियाला” जल्दी कोशिश किया मंतरि मति देशद्रोही जापान समर्थक पार्टींग किन भंग कीयाना ता बारे ते इत्तेके कैय वेने तेहविर इद्रम बारांकु? मीटु चांग ती-फेइ किन लेटर ता मसौदा तैयार कियाला आदेश हीतिर अस्के कम्युनिस्ट पार्टी किन भंग कीयाना मांग

आयवा देशद्रोही ओसो जापान समर्थक पार्टिंग किन भंग कीयाना मांग बारांकु कीविर?

कम्युनिस्ट पार्टिंग उंदी आयवा बचोनो मंतांग इंजी आल्सतिर बहे? पूरा चीन लोप्पा सिर्फ उंदे कम्युनिस्ट पार्टी मंता, क्वोमिंगतांग रेंडु मंतांग। बद पार्टी ज्यादा मंता?

क्वोमिंगतांग ता प्रिय नेता लोर! मीटु दोड़ रास्ता पोल्लोंग पोरो विचार कीतिरा? मीटे आयवा जापानी ओसो वांग चिंग-वेइ वेने कम्युनिस्ट पार्टी ता तख्ता पलटे कियाला पूरा कोशिश किया मंतोरा। ओरू सिर्फ कम्युनिस्ट पार्टिए ज्यादा मंता इंदाना पोल्लो पोरो वेल्ले जोर हिया मंतोरा। अदिन काजे अदिन किन खत्म कीयाना? ओरू क्वोमिंगांग वेल्ले कम मंता, संख्या वेने कम मंता हर जागा वांग चिंग-वेइ मार्का क्वोमिंगतांग ता पालन-पोषण किया मंतोरा इंजी समझेमाया मंतोरा।

क्वोमिंगतांग ता प्रिय नेतालोर! मीकिन जापानी ओसो वांग चिंग-वेइ किन क्वोमिंगतांग ओसो मूंड जन-सिद्धांत कुना संगे लगाव हिल्ले इंजी वेहला माटु उचुन वेने पेरके मुन्ने आयोमा बारांकु इत्तेके इव रेंडासी ना लोप्पा ओरू बदे फायदा एतना लेक्कटा चीज परहका मंतोरा। पहली विश्वयुद्ध पेरके, साम्राज्यवादीर ओसो चीनी गद्दार लोरा जीवा ते वेने क्वोमिंगतांग संगे लगाव हिल्ला मत्ता। ओरू ताना पोरो होंग आयनोर, अदिन किन खत्म कीयाना पूरा कोशिश कियानोर। 1924-27 ते डा. सुन यात-सेन अदिना पुनर्गठन कीसि ताना लोप्पा कम्युनिस्ट लोर किन भर्ती कीसि मत्तोरा। अदु लोप्पा राष्ट्रीय एकता रूप एतता। इद एकता लोप्पा क्वोमिंगतांग ओसो कम्युनिस्ट पार्टी उंदी-दूसरा संगे एकता आतांग। उंदी बेरा साम्राज्यवादी ओसो चीनी गद्दार लोर मूंड जन-सिद्धांत कुन बारे ते बदे लगाव हिल्ला मत्ता। ओरू इव सिद्धांत कुना पोरो होंग आयनोर, इविन किन खत्म कियाला आल्सानोर। इदे कालम ते डा. सुन यात-सेन इव सिद्धांत कुना रूपान्तर क्रांतिकारी मूंड जन-सिद्धांत कुना रूप ते कित्तोर, इविन किन क्वोमिंगतांग ता पहली राष्ट्रीय कांग्रेस ता घोषणापत्र लोप्पा पेश कित्ताद मत्ता। इद कालम किन विड़चसी, क्वोमिंगतांग कम्युनिस्ट

पार्टी किन तन्ना पार्टी तल बाहरे तेंडसिता अनि मूंड जन-सिद्धांत किन डा. सुन यात-सेन ना क्रांतिकारी भावना तल तेंडसिता। अदिन काजे इव रेंडासी ना संगे सब्बे साम्राज्यवादीर ओसो चीनी गद्दार लोर लगाव आता। इविना संगे जापानी फासीवादी ओसो चीनी गद्दार वांग चिंग-वेइ ना वेने लगाव आता। वीर अविन बदे मूल्यवान वस्तु लेक्का पालन-पोषण किया मंतोर। रेंडिना लोप्पा फर्क कियाला काजे वांग चिंग-वेइ मार्का क्वोमिंगतांग ता झंडा पोरो डावड़ बगिल उंदी कमकाल पित्त वाटसी मंदिता, मति इंजे अदिन किन वेने गुची कित्ताद मंता ओसो हर चीज किन उंदी लेक्का बने कित्ताद मंता, हूइला बेस दिसना इंजी। बचोन जबरदस्त लगाव मंता अय्यो!

वांग चिंग-वेइ मार्का क्वोमिंगतांग ता बचोनो निशानी जापान कब्जा ते मत्ता इलाकांग लोप्पा ओसो बेहरा इलाकांग लोपा वेने दोरकितांग। इविना लोप्पाटल गुप्त रूप ते काम कीयाना दुश्मन ता पांचवा लाईन आंदु। बाकी खुला रूप ते काम कीयाना तम्मा रोजी-रोटी क्वोमिंगतांग पोरो निर्भर आसी लेवेके पुलिस-एजेंट लोरा रूप ते काम कीतोर। जापान ता प्रतिरोध कियाला काजे उचुन वेने बाताले कीवोर अनि कम्युनिस्ट पार्टी ता विरोध कियाला काजे हमेशा तैयार मंदिता। ओरू वांग चिंग-वेइ ना ठप्पा वाटतद हिल्वेकाई पक्का ओनाए मानेय आंदुर। वीरू वेने दुश्मन ता पांचवी लाईन आंदु, वीरू लोकुर किन बकवल बने कियाला काजे उचुन अलग रूप धारण कित्तोर अचोने।

इंजे सब्बे पोल्लोंग स्पष्ट आतांग। मीटु चांग-ती-फेइ किन कम्युनिस्ट पार्टी किन “भंग कीयाना” मांग रासिस मत्ता लेटर ता मसौदा तैयार कीयाना आदेश हीतिर ताना लोप्पा जापान समर्थक पार्टिंग ओसो देशद्रोही पार्टिंग किन वेने भंग कीयाना मांग बारांकु कीवीर? बारांकु इत्तेके विचारधारा, नीति ओसो संगठन ता दृष्टि ते ओरा ओसो मीवा लोप्पा वेल्ले समानता मंता। मीवा विचारधारा ता बुनियादी नीति ता विशेषता कम्युनिज्म ओसो जनता ना विरोधी कीयाना मंता।

क्वोमिंगतांग लोकर, माटु मीकिन उंदी सवाल पूछेमायला आल्सा मंतोमा मीटु निज्जमे पूरा दुनिया लोप्पा ओसो चीन लोप्पा सिर्फ “बदनाम” वाद मार्क्सवाद-लेनिनवादे आंदिर बाकी सब्बे वाद वेल्ले महान मंता? वांग चिंग-वेइ मार्का मूंड जन-सिद्धांत के आयवा माटु इंजे पोरो वेहत्ता हिटलर, मसोलिनी ओसो हिदेकी तोजो ना फासीवाद ता बारे ते मीटु बाताल इंतिर? चांग ती-फेइ ना त्रात्सकीवाद ता बारे ते मीटु बातल इंतिर? चीन ता बचोनो जागा ना प्रतिक्रांतिकारी खुफिया विभाग ता प्रतिक्रांतिकारी सिद्धांत कुना बारे ते मीटु बातल इंतिर?

क्वोमिंगतांग ता प्रिय नेता लोर! माटु चांग ती-फेइ किन लेटर ता मसौदा तैयार कियाला आदेश हीतिर, अस्के मीट प्लेग, उडुम लेवेके नेय्य पींग लेक्कटा मीवा सब्बे पोल्लोंग ना बारे उंदी वेने वाक्य बारांकु जोड़े कीविर? मीवा हिसाब ते इव सब्बे प्रतिक्रियावादी कूड़ा-वियार निर्दोष मंता एय्यो, अनि सिर्फ मार्क्सवाद-लेनिनवादे सौ प्रतिशत बदनाम कीयाना लेक्का मंता एय्य?

सक्षिप्त रूप ते वेहाना इत्तेके माकिन मीवा लोकर जापान समर्थन ओसो देशद्रोही पार्टिंग संगे सांठगांठ कीसि काम किया मंतोर अदिन काजे मीटु ओसो ओरू “उंदे मोसोर बूकाते नेस्किंतिर”। अदिना कारण तेने मीटु ओसो दुश्मन अनि चीनी गद्दार लोरा पोल्लोंग कीयाना ओसो काम कीयाना लोप्पा वेल्ले समानता मंता, इदु निज्जमे एकता ओसो एकरूपता आंदू इंजी डावुट मंता। जापानी ओसो चीनी गद्दार लोर पूना चौथी सेना किन भंग कियान अदिन किन भंग कीयाना आदेश जारी तासना इंतोर: ओरू कम्युनिस्ट पार्टी किन भंग कीयाना इंजी आल्सिंतोर ओसो मीटु वेने इद्रमे आल्सिंति। ओरू हंदी इलाका किन देहना इंजी आल्सिंतोर, मीट वेने आल्सिंति। ओरू पीली डोड्डा ता रक्ष कीयाना इंजी आल्सोर, मीटु वेने अदिना रक्षा-कार्य किन तिलांजली हीतिर। ओरू हंदी इलाका पोरो हमला कींतोर (6 साल लोप्पा दुश्मन ता फौज कु स्वेइते, मीचि, च्याश्येन, ऊपाओ ओसो छिंगच्येन काउन्टिंग मुन्ने डोड्डा ओदा आठवीं राह सेना ता डोड्डा ओदा प्रतिरक्षा-व्यवस्था ते गोलीबारी बस्के बंद कीवोर), मीटु

वेने ओरा पोरु हमला कियाला आल्सा मंतरि: ओरू कम्युनिस्ट विरोधी मंतर, मीटु वेने इद्रमे किया मंतरि: ओरू कम्युनिज्म ता ओसो उदारवादी विचार कुना कड़ी आलोचना कींतोर, मीटु वेने अद्रमे कींतिर:¹ बस्के वेने ओरू वरोर कम्युनिस्ट किन पोयंतोर अनि अखबार लोप्पा तम्मा विचार कुन तिलांजली कीयाना सार्वजनिक घोषणा कियाला काजे मजबूर कींतोर, मीटु वेने इद्रमे कींतीर। ओरू कम्युनिस्ट पार्टी, आठवीं राह सेना ओसो पूना चौथी सेना लोप्पा चुपचाप नेंगसी तोड़फोड़ कियाला काजे प्रतिक्रांतिकारी एजेंट लोहतोर, मीटु वेने लोहिंतिर। मीवा ओसो ओरा नड़मा ज्यादा समानता, एकता बद्रम मंता? मीवा ओसो दुश्मन अनि चीनी गद्दार लोरा पोल्लोंग कीयाना ओसो काम कीयाना नड़मा पूर्ण समानता, एकता मंता। इद्रम ता परिस्थिति ते मीटु ओरा संगे सांठगांठ कीसि मंतरि लेवेके बदे गुप्त समझौता कीतिर इंजी मीवा पोरु बद्रम डावुट वायो आयार?

माटु क्वोमिंगतांग ता केन्द्रीय कार्यकारिणी कमेटी ता इगा रास्ता लेक्का औपचारिक रूप त विरोध कींतोम: डोड्डा ओदा रक्षा काजे तैनात कित्ता मुख्य सेना किन पेरके गुची कीस हंदीर इलाका पोरु हमला कीयाना ओसो गृहयुद्ध शुरू कीयाना तैयारी ता मीवा कार्यवाही एकदम गलत मंता ओसो इदिना अनुमति बिल्कुले हियमूडायो। मीवा केंद्रीय समाचार-एजेन्सी एकता किन तहस-नहस कींता इंजी 6 जलाई ते प्रसारित कित्ता अखबार वेने कम्युनिस्ट पार्टी ता अपमान कियाला काजे कित्ताद मंता, इदु गलत आंदू इद्रम बिल्कुले कीयानायो। इव रेंडासी गलतिंग बेहरा अपराधकु आंदुंग। इवु दुश्मन ओसो चीनी गद्दार लोर कीयाना अपराधकुनगडल अलग हिल्लेंग। मीटु इविनकिन सुधरे कीयाना।

माटु क्वोमिंगतांग ता नेताल च्यांग काई-शेक संगे औपचारिक रूप ते मांग कींतोम: माटू हू युंग-नान ता फौज कुन डोड्डा ता रक्षा कियालाकाजे वापस लोहना इंजी आदेश हियाना: केंद्रीय समाचार एजेन्सी पोरु अनुशासन पोरु नियंत्रण वाटना चीनी गद्दार च्यांग ती-फेइ किन सजा हियाना।

माटु डोड्डा ता रक्षा काजे तैना कित्ता सेना किन पेरक गुची कीसि हंदी इलाका पोरो हमला कीयाना ता समर्थन कीवा मंदाना ओसो कम्युनिस्ट पार्टी किन भंग कीयाना मांग ता समर्थन कीवा मंदाना क्वोमिंगतांग ता सब्बे सही देशभक्त सदस्य लोर किन अपील कीतोमः गृहयुद्ध ता संकट तल बचेमायला काजे तुरंत कार्यवाही कीमुटा माटु राष्ट्र किन बचे कियाला काजे आखरी एवनल मीवा सहयोग कियाला तैयार मंतोम।

नोट

1. इगा च्यांग काई-शेक प्रकाशित कित्ता “चीन का भाग्य” पोरोल ता कित्ताब ता बारे ते वेहताद मंता। इद पुस्तक लोप्पा च्यांग काई-शेक खुल्लमखुल्ला कम्युनिज्म ओसो उदारवादी विचार कुना विरोध कियाला लज्जे हिल्ला लेक्का विचार व्यक्त कित्तोर।

आधार इलाकांग लोप्पा लगान कम कीयाना,
उत्पादन बेरसी कीयाना ओसो “सरकार ता समर्थन
कीयाना ओसो जनता संगे संबंध बेरसी कीयाना”

आंदोलन किन विस्तार कीमुट

1 अक्तुबर 1943

इदु पार्टी आदेश कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे रासिस मतोर।

1. शरद ता फसल कोय्यना कालम वात्ता, अदिन काजे आधार इलाकांग ना नेतृत्वकारी संगठनकु तम्मा सब्बे स्तर कुने पार्टी, सरकार ता सगठन कुन लगान कम कीयाना मना नीति किन लागू कीयाना ता बारे जांच-पड़ताल कीयाना इंजी वेहाना। बेगा इद नीति ता ईमानदारी ते लागू आसोर हिल्ले अगा इयेंड बद्रम कीसि आई लगान कम कीयाना। इग काम बेगा सही तरीका ते कित्ताद हिल्ले अगा सही तरीका ते कियाला वेहना। पार्टी कमेटिंग तम्मा केंद्रीय कमेटी ता भूमि-नीति पोरो आधार ओसो स्थानीय परिस्थितिंग ना अनुसार तुरंत जारी कीयाना। पार्टी कमेटिंग खुद उचुक नाहकुना निरीक्षण कीयाना, इद्रम कीसि इद काम किन दूसरा जागा ने विस्तार कीयाना। संगे ने अखबार कुना लोप्पा लगान कम कीयाना ता बारे ते सम्पादकीय रासना। लगान कम कीयाना किसान लोरा जन संघर्ष आंदू, अदिन काजे पार्टी आदेशकु ओसो सरकारी आदेशकुना पोरो आधार आसी अदिना मार्गदर्शन कीयाना। जनता पोरो दया कित्ता लेक्का थोपे कीयाना कोशिश कियवा लेवा ओरा मदद कीयाना। लगान कम कीसि जनता पोरो दया कित्ता लेक्का आयवा जनता किन खुद तन्नाए कोशिश ते हासिल कीयाना लेक्का जागृत कीयाना गलत आयार ओसो इदिना बदे ठोस फायदा वेने दोरको आयार। लगान कम कीयाना संघर्ष ते किसान संगठन कुना स्थापना ओसो पुनर्स्थापना

कीयाना। सरकार लगान कीयाना ता बारे ते आदेश जारी कीयाना ओसो इद प्रक्रिया लोप्पा जमींदार ओस काश्तकारिरा अधिकार कुना समायोजित कीयाना। नेंडु आधार इलाकांग ना आकार घटेमाताद मंता, इद परिस्थिति ते पार्टी तन्ना धैर्यपूर्ण, ईमानदारी ओसो सही तरीका ते काम कीसि इवे आधार इलाकांग लोप्पा जनता किन तन्ना पक्ष ते कीयाना ओसो जनता ना सुख-दुख ते साथ हियानादु बदे वेने फौजी महत्व तुकू ज्यादा महत्व मंता। माटु इद हिरंगम कालम ता पोल्लो किन जांच-पड़ताल कितेके इद नीति बचोनो लागू आता इंदानदु ओसो लगान कम कीयाना काम किन सही तरीका ते पूरा किया परितोम। माटु किसान जनता ता पहलकदनी किन जागृत कियाला सफल आयकोम, परेंड (वायना साल) ते दुश्मन खिलाफ मन्ना संघर्ष किन तेज किया परितोम ओस उत्पादन आंदोलन किन बेरसी किया परितोम।

2. दुश्मन इलाका ते मत्ता आधार इलाकांग लोप्पा ज्यादातर कार्यकर्ता लोर इंजे वेने पार्टी, सरकार ता संगठन कुना कर्मचारि, सैनिक ओसो जनता (ताना लोप्पा महिला-पुरुष, सेडो-मुयतोर, लेय्या-लय्यो, सैनिक-असैनिक, सार्वजनिक इलाका लोप्पा काम कियानोर लेवेके निजी इलाका लोप्पा काम कियानोर, हर मानेय शामिल मत्तोर) किन व्यापक उत्पादन-कार्य लोप्पा बद्रम वाटना। इद हिरंग कालम ते हर आधार इलाका ता पार्टी कमेटी, सरकार ओसो सेना परेंड पूरा इलाका लोप्पा उंदी विशाल उत्पादन आंदोलन ताकी कीयाना तैयारी कीयाना। इद आंदोलन लोप्पा सार्वजनिक, निजी रेंडासी इलाकांग ना खेतीबाड़ी, उद्योग, दस्तकारी, परिवहन, पशुपालन ओसो वाणिज्य शामिल मंदाना। खेतीबाड़ी पोरो मुख्य जोर मंदाना। इद्रम ता आंदोलन संगे मनम मना कोशिश संगे मुश्किल कुन दूर किया परितोम (“वेल्ले खुराक(तिंदना-उंडना) ओसो कपड़ा-लता” ता नारा इंजे शेनशी-कानसू-निंगश्या हंदी इलाका किन विड़चसी दूसरा बेगाने वाटनायो।) उंदी-उंदी परिवार अनुसार योजना बने कीयाना, श्रम लोप्पा आपसी

सहायता किन अमल कीयाना(इदिन किन उत्तरी शेनशी ते श्रम-विनिमय दल¹ इंतोर ओसो च्यांगशी ता पाङना लाल इलाकांग लोप्पा मुन्ने पुहतानोरा दल लेवेके आपसी सहायता कार्यदल इंदानोर), श्रमवीर लोर किन पुरस्कार हियाना, उत्पादन लोप्पा आपसी होड़ अमल कीयाना अनि जनता ता सेवा कीयाना सहकारी समितिंग किन बेरसी कीयाना। वित्तीय ओसो आर्थिक क्षेत्र ते काउन्टी ओसो जिला स्तर ता पार्टी, सरकार ता कार्यकर्ता लोर तम्मा ताकत ता दस तल नौ हिस्सा किसान लोरा कृषि-उत्पादन बेरसी कीयाना लोप्पा सहायता हियाला खर्च कीयाना। दस तले सिर्फ उंदी हिस्सा ओरगडल टैक्स वसूल कियाला काजे वाटना। मुन्ने काम लोप्पा मेहनत कितेके दूसरा काम हल्को आंता। वर्तमान युद्ध कालम ते सब्बे संगठन, विद्यालय ओसो फौजी यूनिटकु कुसिर काया पंडिह कीयाना, पढिग पोसे कीयाना, अट्टला काजे वर्किंग जमा कीयाना, वर्किंग ना कोर्सेंग (कोयला) बने कीयाना, दस्तकारीरा विकास कीयाना ओसो खुद तम्मा काजे जरूरी अनाज ता उंदी हिस्सा पंडिह कीयाना पूरा कोशिश कीयाना। सब्बे सुडला-बेहरा युनिटकुना लोप्पा सामूहिक उत्पादन ता विकास कीयानाए आयवा हर मानेय (सिर्फ सेना ते काम कियानोर किन विड़चसी) किन जरूरत मत्तास्के बदे आई रकम ता कृषि ओसो दस्तकारी उत्पादन लोप्पा (व्यापार लोप्पा आयो) हिस्सा एतना अगाटल वात्ता आमदनी किन ओरू खुद तन्ना काजे तासा परिंतोर इंजी प्रोत्साहन हियाना। कुसिर काय ओसो पढिग पोसे कीयाना, किचन कियानोर किन बेस गाटो-कुसिर अट्टला ट्रेनिंग हियाला काजे 7-10 दिव्यांग एवनल ट्रेनिंग-कोर्स शुरू कीयाना। पार्टी, सरकार ओसो सेना तासब्बे संगठन लोप्पा बचत पोरो जोर हियाना, फिजूसखर्च ता विरोध कीयाना ओसो भ्रष्टाचार किन रोमी कीयाना। पार्टी, सरकार ओसो सेना ता संगठन ओसो विद्यालय लोप्पा सब्बे स्तर ते नेतृत्वकारी कार्यकर्ता लोर उत्पादन-कार्य लोप्पा जनता ता नेतृत्व कीयाना सब्बे नियम कुन पालन कीयाना लोप्पा एक्सपर्ट

बनेमायना। बोरु उत्पादन-कार्य ता बेस अध्ययन कियाला विफल आंतोर ओरू अंगडम ता नेताल मंदिंतोर। बोराई सैनिक लेवेक असैनिक मानेय उत्पादन-कार्य ता बारे गंभीर रुझान लागू कीवोर अनि तिंदला मुन्ने ओसो काम कियाला पेरके मंदिंतोर, ओरकिन बेसता सैनिक लेवेके वरोर बेसता नागरिक इनमूडायो। उत्पादन-कार्य तल अलग हिल्वा ग्रामीण पार्टी-सदसय लोर जनता नडमा आदर्श बनेमायला काजे उत्पादन बेरसी कीयाना पुरजोर कोशिश कीयाना इंजी समझेमायना। उत्पादन आंदोलन ताकनास्के, आर्थिक विकास किन नजरअंदाज कीसि सिर्फ आय ओसो लागत पोरो ने ध्यान केंद्रित कीयाना उंदी रूढ़िवादी ओसो विशुद्ध वित्तीय दृष्टिकोण लागू कीयाना गलता आयार। पार्टी, सरकार ओसो सेना ता बुनियादी लाईन ओसो जनता ना कोंदा लेक्का कीयाना श्रमशक्ति किन उत्पादन ता जन आंदोलन काजे संगठित कीयानाकाम किन नजरअंदाज कीसि, उचुने सरकारी कर्मचारी सिर्फ अनाज ओसो टैक्स, धन ओसो खाद्य-सामग्री तल सिर्फ अनाज ओसो धन ताए मांग कींतोर(क्वोमिंगतांग कित्ता लेक्का) ओसो उत्पादन बेरसी कीयाना लोप्पा मदद कीवेके गलत आयार। उचुन आर्थिक विभाग उचुन लोकर किन उत्पादन काजे संगठित कित्तेके उत्पादन ता व्यापक जन-आंदोलन शुरू कीयाना काम किन नजरअंदाज कित्तेके गलत आयार। ग्रामीण इलाकांग लोप्पा कम्युनिस्ट लोर तम्मा परिवार किन पाले-पोसे कियाला काजे कीयाना तम्मा स्थानीय उत्पादन ओसो सरकारी संगठन, विद्यालय लोप्पा कम्युनिस्ट लोर तम्मा रहन-सहन ता परिस्थिति किन सुधरे कियाला काजे कीयाना उत्पादन किन गलत ओसो स्वार्थपूर्ण समझेमातेके गलत आयार, बारांकु इत्तेके इदु पूरा प्रक्रिया क्रांतिकारी कार्य ता हित ते मंता। बदे वेने आधार इलाका ता जनता किन तीव्र संघर्ष ताकनास्के सिर्फ मुश्किल सहेमायला काजे प्रेरित किया ओसो उत्पादन बेरसी कियाला ओसो इद्रम ता तम्मा भौतिक परिस्थिति किन सुधरे कियाला काजे प्रोत्साहन हिवा मत्तेके

गलत आया। सहकारी समितिं किन पैसा कमई कीयाना कारोबार समझेमायना गलत आंदु। इव समितिं किन उचुने कर्मचारिरा फायदा काजे ताकी कीयाना, सरकार ताकी कीयाना लेक्कटा स्टोर समझेमायना, जनता तम्मा काजे ताकि कीयाना आर्थिक संगठन समझेमायवा मंदाना गलता आया। शेनशी-कानसू-निंगश्य हंदी इलाका ता उचुक कृषि श्रमवीर लोर इस्तेमाल कित्ता आदर्श कार्यवाहिंग(इत्तेके श्रम लोप्पा आपसी सहायता अमल कीयाना, बार-बार पूहना, बार-बार खुदाई-निंदाई कीयाना ओसो वेल्ले खतु वाटना) लेक्कटविन उचुक आधार इलाकांग लोप्पा लागू आया परवोंग इंजी लागू कीवा मंदानादु गलत आंदू। उत्पादन आंदोलन ताकनास्के, उत्पादन कार्य आर्थिक विकास ता इनचार्ज स्थानीय विभाग ता प्रमुख, फौजी सप्लाई विभाग प्रमुख किन सौंपे कीयाना, नेतृत्वकारी कार्यकर्ता लोर इद जिम्मेदारी किन खुद तम्मा पोरो एतवा लेवा खुद उत्पादन-कार्य लोप्पा शामिल आयवा लेवा मंदाना, नेतृत्वकारी ग्रूप जनता संगे गट्टिंग संबंध बने कियवा मंदाना ओसो सामान्य आह्वान किन विशेष ओसो ठोस मार्गदर्शन संगे काल्पवा लेवा मंदाना, जांच-पड़ताल ओसो अध्ययन कियवा लेवा फौरी ओसो महत्वपूर्ण मंदाना काम किन प्राथमिकता हियाना, हर मानेय किन इत्तेके महिला-पुरुष, लेय्या-लेय्योर, सेडो-मुयतोर संगे लंपट लोर किन उत्पादन कार्य लोप्पा शामिल कीयाना कोशिश कियवा मंदाना, कार्यकर्ता लोर किन प्रशिक्षण हियवा लेवा, जनता किन शिक्षित कियवा लेवा मंदाना गलत आंदू। वर्तमान परिस्थिति ते श्रमशक्ति किन संगठित कीयाना उत्पादन बेरसी कीयाना कुंजी आंदू। हर आधार इलाका ते वर्तमान युद्ध कालम ते वेने पार्टी, सरकारी ऑफिस ओसो सेना ता दसियों हजार महिला-पुरुष ओसो लाखों जनता ना श्रमशक्ति किन उत्पादन काम काजे संगठन कीयाना संभव मंता। स्वेच्छा (व्यक्तिगत इच्छा) ता सिद्धांत कुना पोरो आधार आसी अर्ध-श्रमशक्ति ओसो पूर्ण श्रमशक्ति ता रूप ते श्रम ते शामिल आया

परनोर किन संगठित कीयाना, लोन-लोन अनुसार योजना बने कीयाना तरीका किन लागू कीयाना, श्रम-विनिमय दल कुन संगठित कीयाना, परिवहन दल किन संगठित कीयाना, आपसी सहायता कार्यदल ओसो सहकारी समितिं किन संगठित कीयाना, समान ता मूल्य ता अनुसार विनिमय कीयाना नियम किन लागू कीयाना) जरूरी मंता। कम्युनिस्ट पार्टी ता सदस्य लोर श्रमशक्ति किन संगठित कीयाना सब्बे नियम ओसो तरीकांग किन पूराए ग्रहण कीयाना। इयेंड सब्बे आधार इलाकांग लोप्पो व्यापक रूप ते ओसो सही तरिका ते लगान कमी किताद मंता, वायना साल ते बेहरा स्तर उत्पादन बेरसी कियाला प्रोत्साहन दोरकियरा। पार्टी ओसो सरकार, सैनिक-असैनिक लोकुर, महिला-पुरुष, लेय्या-लेय्योर, सेडो-मुयतोर वायना साल ते अनाज ओसो बाकी जरूरी चीजकुना सप्लाई बेरसी कियाला काजे ओसो प्राकृतिक समस्यांग ना मुकाबला कीयाना तैयारी कियाला काजे महान उत्पादन आंदोलन ताकी कियानू। तीनगडल जापान विरोधी आधार इलाकांग किन बचे कियाला कादे भौतिक बुनियाद तैयार आयारा। लेवेके मना मुन्ने गंभीर मुश्किलकु वायनुंग।

3. पार्टी, सरकार ओसो सेना वायना साल ता जापान विरोधी संघर्ष ओसो उत्पादन आंदोलन किन विकसित कियाला काजे जनता संगे उंदी आयना। इदिना काजे हर आधार इलाका ता पार्टी कमेटी ओसो सेना, सरकार ता नेतृत्वकारी संगठनकु वायना चान्द्र-वर्ष (354.37 दिव्यांग मंदितांग। पाइना कालम ता कैलेंडर) ता पहली महीना ते “सरकार ता समर्थन कीयाना ओसो जापान संगे एकता बेरसी कीयाना” अनि “सेना ता समर्थन कीयाना ओसो जापान ता खिलाफ लडेमायना सैनिक लोरा परिवार किन प्राथमिकता हियाना” ता उंदी बेहरा स्तर ता जन-आंदोलन कीयाना तैयारी कीयाना। सैनिक लोर सार्वजनिक रूप ते ओसो उंदी बेरा “सरकार ता समर्थन कीयाना ओसो जनता संगे एकता बेरसी कीयाना” इंजी क्रिया कीयाना। आत्मालोचना कियाला काजे मीटिंग केयना, स्थानीय लोकुरा संगे

कलियना-समारोह कीयाना (तीना लोप्पा पार्टी, सरकार ता स्थानीय संगठन कुना प्रतिनिधिर वेने केयना)। हत्ता कालम ता जनता ना हितकुन उल्लंघन कित्तेके ताना काजे गलती माने मायना ओसो मुआवजा हियाना। स्थानीय पार्टी, सरकार ओसो जन-संगठन कुना नेतृत्व ते, जनता तम्मा बगिल तर ओसो उंदी बेरा सार्वजनिक रूप ते “सेना ता समर्थन कियाला ओसो जापान ता खिलाफ लड़ेमायना सैनिक लोरा परिवार किन प्राथमिकता हियाना” क्रिया कीयाना अनि फौजी यूनिटकुना अभिनंदन कीयाना ओसो तोहफा (गिफ्ट) लोहना काजे जोरदार आंदोलन कीयाना। इव आंदोलनकु ताकनास्के सेना तम्मा बगिल तल पार्टी, सरकार किन तम्मा बगिल तल, 1943 ता कमिंग ओसो गलतिंग किन सही तरीका जांच-पड़ताल कीयाना अनि अविन किन दृढ़ता ते सुधार कीयाना। इंजेटल हर चान्द्र साल ता पहली महीना ते उंदी रकम ता आंदोलन व्यापक रूप ते ताकी कीयाना, इद्रम ता आंदोलन ताकनास्के “सरकार ता समर्थन कीयाना ओसो जनता संगे एकता बेरसी कीयाना”, “सेना ता समर्थन कीयाना ओसो जापान खिलाफ लड़ेमायना सैनिक लोरा परिवार किन प्राथमिकता हियाना” क्रिया कीयाना किन बार-बार कीयाना। आधार इलाकांग लोप्पा सैनिक लोर पार्टी कार्यकर्ता लोर लेवेके सरकारी कर्माचारि, असैनिक लोकुरासंगे बदे वेने रकम ता गलत व्यवहार कित्तेके हिल्वेके पार्टी कार्यकरता लोर, सरकारी कर्मचारि लेवेके असैनिक लोकुर सैनिक लोरा ध्यान तासना लोप्पा बदे रकम ता कमी तोहतेके, ओरू खुल्लम-खुल्ला ओसो जनव्यापी स्तर ते बार-बार आत्मालोचना कीयाना (हर पक्ष तन्ना खुद ता आलोचना कीयाना, दूसरा पक्ष ता आयो) अस्केने अव कमिंग ओसो गलतिंग किन सही तरिका ते सुधरे किया परमूडायरा।

नोट

1. इदे ग्रन्थ ता “संगठित आयमूट!” पोरोल ता लेख ता नोट 5 किन हूडाटु।

क्वोमिंगतांग ता केंद्रीय कार्यकारिणी कमेटी ता ग्यारहवा पूर्ण अधिवेश ओसो तीसरी जन रणनीतिक परिषद ता दूसरा अधिवेशन ता बारे ते समीक्षा

5 अक्तूबर 1943

क्वोमिंगतांग तन्ना केंद्रय कमेटी कार्यकारिणी कमेटी ता ग्यारहवां पूर्ण अधिवेशन 6 तल 13 सितम्बर एवनल कित्ता। क्वोमिंगतांग सरकार तीसरी जन राजनीतिक परिषद ता दूसरा अधिवेशन 18 तल 27 सितम्बर एवनल ताकता। इव रेंडासी अधिवेशन कुना सब्बे दस्तावेजकु माकिन दोरकतांग, अदिन काजे इंजे माटु अविना बारे ता आम समीक्षा किया परितोम।

अंतरराष्ट्रीय परिस्थिति लोप्पा इंजे जल्दिए उंदी महान परिवर्तन आयाना लेक्का नालुंग बगिल दिस्सा मंता। योरोप ता धुरी ताकत कु इदिना बारे ते समझेमातांग ओसो हिटलर इत्तेके तम्मा आखरी जीवा मंदानजोम इंदान लेक्कटा नीतिंग लागू किया मंतोरा। मुख्य रूप ते इदु सोवियत संघे इद्रम ता बदलाव तत्ता परित्ता। सोवियत संघ इंजे इदिना फायद एता मंता, तन्ना मुन्ने सब्बे रकम ता बाधांग किन हेयसोरे, लड़ेमासोरे लाल सेना दनीपर ते एवनता। हिरंगम ता आक्रमणात्मक कार्यवाही पेरके अदु पूना सोवियत हंदी पोरो हनवेके पाड़ना सोवियत हंदी पोरो जरूर एवियरा। ब्रिटिश ओसो अमेरिका वेने इदे बदलाव ता फायदा एता मंतांगा। रूजवैल्ट ओसो चर्चिल फ्रांस लोप्पा नेगंला काजे हिटलर ना पतन ता पहला इशारा ता हर्ी हूडा मंतोरा। संक्षेप ते, जर्मन फासीवादीरा युद्ध-यंत्र जल्दिए छिन्न-भिन्न आयारा। योरोप ते फासीवादी-विरोधी युद्ध ता समस्या हल आयना गर्गे एवता। फासीवाद किन पूराए खत्म कीयाना मुख्य शक्ति सोवियत संघ आंदू विश्व फासीवादी-विरोधी युद्ध ता केंद्र योरप ते मत्तांकु ओसो उंदीबेरा इदु समस्या योरोप ते हल आतेके दुनिया ता रेंडु बेहरा प्रूपकु, फासीवाद

ओसो फासीवाद विरोधी ग्रूप ता पिस्वल बद्रम मंदियार इंजी निर्णय आथार। जापनी साम्राज्यवाद वेने हीकट ते हिरकता लेक्का मंता, वीरा नीतिंग वेने सिर्फ आखरी जीवा मंदानजोम संघर्ष कीयाना ताकत कु परताचोन जमा कीयाना इंजी आल्सा मंतोर। चीन लोप्पा ओरू कम्युनिस्ट लोर किन “खत्म” कियाला ओसो क्वोमिंगतांग किन आत्मसमर्पण कीयाना लालच तोहना इंजी आल्सा मंतोर। क्वोमिंगतांग वेने बदलाव किन समझेमाया मंता। इद्रम ता परिस्थिति ता सामना आतेके खुशी ओसो वेरी रेंडासी ना अनुभव कींता। योरोप लोप्पा युद्ध समाप्त आता पेरके ब्रिटिश ओसो अमेरिका अदिना बगिल तल जापान ता मुकाबला कियाला काजे खाली आयनुंग अनि कोशिश कियवा लेवा नानकिंग मलसी दायनुंग इंजी खुश आंतोर। मूंडासी फासीवादी ताकतकु ना पतन आता पेरके दुनिया उंदी महान मुक्ति-युग ते नेंगियर, क्वोमिंगतांग ता दलाल-पूंजीवादी-सामंतवादी फासीवादी तानाशाही स्वतंत्रता ओसो जनवाद ता विशाल समुद्र लोप्पा उंदी सुडला टापू लेक्का पिसियर इंजी वेरिया मंतोर। ओरू समुद्र ता लहर कुना संगे तम्मा लेक्कटा फासीवाद इतेके “उंदी पार्टी, उंदी वाद ओसो वरोर नेतांग” मंदाना टापू मुडंदियर इंजी वेरयंतोर।

शुरू ते क्वोमिंगतांग उंदी समाजवादी देश किन नष्ट कियाला काजे, सोवियत संघ हिटलर संगे वर्राए लडेमायर अनि जापान किन सोवियत संघ पोरो हमला कियाला काजे भडके किया परमूडायर इंजी आल्सता। अदु ब्रिटिश ओसो अमेरिका योरोप ते दूसरा ओसो तीसरा मोर्चा शुरू कियाला आल्सना तुकू मुन्ने तन्ना सेना किन पूर्व ते लोहची जापान किन चित कियानुंग अस्के चीनी कम्युनिस्ट पार्टी किन खत्म कियानुंग इंजी आल्सतोर। इद्रमे आल्ससी क्वोमिंगतांग मुन्ने “योरोप तुकु मुन्ने एशिया” ता रणनीति किन ओसो पेरके “योरोप ओसो एशिया बगिल बराबर ध्यान” हियाना इंजी कोलार पोयता। इयेंड अगस्त ते क्वेबैक सम्मेलन ता आखरी ते रूजवैल्ट ओसो चर्चिन क्वोमिंगतांग सरकार ता विदेश मंत्री टी.वी.सुंग किन क्वेबैक केयसी ओना संगे वडकतोर, अस्के क्वोमिंगतांग “रूजवैल्ट ओसो चर्चिल पूर्व बगिल मल्ला मंतोर” अनि “एशिया तुकु मुन्ने योरोप”

ता योजना बदलेमाता इंजी कोलार पोयतोर। “क्वैबैक सम्मेलन मूंड बेहरा शक्तिंग, ब्रिटिश, अमेरिका ओसो चीन ता सम्मेलन मत्ता” इंजी खुशी तोहना कोशिश कित्ता। मति इदु क्वोमिंगतांग काजे खुशी ता ओखरी मौका मत्ता। अस्केटले अदिना मूड बदलेमाता: “येनान तुकू मुन्ने एशिया”, “योरोप ओसो एशिया बगिल बराबर ध्यान हियाना” पोल्लो इतिहास ता म्युजियम ते एवनता। इंजे क्वोमिंगतांग नियंत्रित जन राजनीतिक परिषद ता दूसरा अधिवेशन इव स्कीम कुन शुरु कीयाना लेक्का मंतांग।

क्वोमिंगतांग ता केंद्रीय कार्यकारिणी कमेटी ता ग्यारवां पूर्ण अधिवेशन “प्रतिरोध-युद्ध लोप्पा तोड़फोड़ किया मंता ओसो राज्य काजे खतरा पैदा किया मंता” इंजी कम्युनिस्ट पार्टी पोरो आरोप वाटता। संगेने क्वोमिंगतांग “राजनीतिक हल” ओसो “वैधानिक सरकार ता तैयारी” ता पक्ष एतितंता इंजी ऐलान कित्ता। तीसरी जन राजनीतिक परिषद ता दूसरा अधिवेशन वेने तन्ना क्वोमिंगतांग बहुमत ता नियंत्रण ते ओसो अदिना तिकडम कुना संगे कम्युनिस्ट पार्टी ता विरुद्ध लगभग इद्रमताए प्रस्ताव पास कित्ता। इदे आयवा क्वोमिंगतांग ता केंद्रीय कार्यकारिणी कमेटी ता ग्यारहवीं पूर्ण अधिवेशन तन्ना तानाशाही मशीनरी किन मजबूत कियाला काजे च्यांग काई-शेक किन क्वोमिंगतांग सरकार ता अध्यक्ष “चुनेकित्ता”।

ग्यारहवीं पूर्ण अधिवेशन पेरेके इंजे क्वोमिंगतांग बाता योजना बने किया परिंता? सिर्फ मूंड सभाग मंतांग:

1. जापानी साम्राज्यवाद मुन्ने आत्मसमर्पण कीयाना।
2. पाड़ना हरीं ते नितसी मंदांना।
3. तन्ना राजनीकित कार्यदिशा किन बदले कीयाना।

क्वोमिंगतांग लोप्पा मत्ता परायवादिर् ओसो आत्मसमर्पणवादिर् जापानी साम्राज्यावादीरा “कम्युनिस्ट लोरा हमला कीयाना ओसो क्वोमिंगतांग किन लालच” हियाना उद्देश्य ता सेवा किसोरे हमेशाए आत्मसमर्पण ता पक्ष एतितोर। ओरू लगातार कम्युनिस्ट-विरोधी गृहयुद्ध ताकी कीयाना कोशिश कींतोर। बेगाने उंदी बेरा शुरु आता इत्तेकेने जापान

ता प्रतिरोध कीयाना मुश्किल आयर ओसो आत्मसमर्पण कीयाना हर्षी विड़चसी दूसरा बदे हर्षी मन्नो आयर। क्वोमिंगतांग उत्तर-पश्चिम चीन लोप्पा 4,00,000 तल 5,00,000 एवनल फौजकु केंद्रित कित्ता, इंजे वेने कुस्क-कुस्कने दूसरा मोर्चा तल ज्यादा फौजकु अगा लोहा मंता। अदिना जनरल वेल्ले साहसी दिसंतोर अनि “येनान पोरो कब्जा कीयाना बदे मुश्किल हिल्ले” इंजी ऐलान कित्तोर इंजी इंतोर। इद्रम पोल्लोंग ओरा ग्यारहवा पूर्ण अधिवेशन ते मिस्टर च्यांग काई-शेक हिता भाषण पेरकेटल वातांग, ताना लोप्पा ओरू कम्युनिस्ट समस्या किन “उंदी राजनीतिक समस्या आंदू ओसो अदिन राजनीतिक तरीका ते ने हल कीयाना” इंजी वेहची मत्तोर। इद अधिवेशन ते लगभग इद्रम ताए प्रस्ताव पास आता। इद्रम ता प्रस्ताव हत्ता साल क्वोमिंगतांग ता केंद्रीय कार्यकारिणी कमेटी ता दसवी पूर्ण अधिवेशन ते वेने पास कित्ताद मत्ता। इंजे वेने ओरा स्याही (सही) वेतद हिल्ले अनि इंजे जनरल लोर किन ओरू हंदी इलाका किन नष्ट कियाला काजे फौजी योजनांग बने कीयाना इंजी आदेश हित्तोर। इयेंड जून ओसो जुलाई ते हंदी इलाका ता खिलाफ उंदी बेहरा आक्रमण ता तैयारी ते सेना ता विनियोजन कित्ताद मंता। इदु स्कीम किन देश-विदेश ते लोकमत इदिना खिलाफ मत्तांकु अस्थाई रूप ते कैसल किया लागता। इंजे ओसो उंदी बेरा, ग्यारहवा पूर्ण अधिवेशन ता प्रस्ताव किन रास्ता पेरके, जनरल लोरा तारीफ ओसो फौज कुना अदला-बदली ता खबर वायलाता। “येनान पोरो कब्जा कीयाना बदे मुश्किल हिल्ले” – इदिनगडले जापानी साम्राज्यवाद मुन्ने आत्मसमर्पण कीयाना फैसला कित्ताद मंता इंजी समझेमाया मंता। क्वोमिंगतांग ता “येनान पोरो कब्जा कीयाना” ता पक्ष एतना सब्बे सदस्य लोर, अनिवार्य रूप ते जागरूक ओसो संकल्पबद्ध आत्मसमर्पणवादि आयोर। ओरा लोप्पाटल उचुन मुल “कम्युनिस्ट लोरा खिलाफ लड़ेमायना संगे-संगे माटु जापान ता वेने प्रतिरोध किया परितोम” इंजी आल्सितोर। अद्रमे ह्वांगफू गुट¹ ता बचोनो अफसर लोर आल्सितोर। इद्रम ता महानुभवी लोरकिन माट कम्युनिस्ट लोर सवाल पूछेमायला आल्सा मंतोमा। मीटू गृहयुद्ध ता दस साल ता सबक मरंगतिरा? बेगा उंदी

बेरा गृहयुद्ध शुरू आंता अगा संकल्पबद्ध आत्मसमर्पणवादी मीटु जापान ता खिलाफ युद्ध जारी तासला हिया परितिरा? जापानी ओसो वांग चिंग-वेइ मीकिन जापान ता खिलाफ लड़ाई जारी तासा हियानूर? मीटु निज्जमे गृहयुद्ध ओसो विदेशी दुश्मन खिलाफ उंदे बेरा लड़ेमाया परनाचोन शक्तिशाली मंत्रिरा? मीवगा 30 लाख सैनिक मंतोर, मति मीवा फौज ता हौसला काविड़ ता रेंडु बगिल वेड़िहची मत्ता अंडेंग लेक्का आताद मंता-अदु उंदे मुठभेड़ आता इत्तेकेने खत्म आयार। चुंगथ्याओ मेट्टा, थाएहांग मेट्टा, चच्यांग ओसो च्यांगशी, पश्चिम हुपे ओसो ताप्ये मेट्टा ना सब्बे अभियानकु इद्रमे आतांदा। अदिना कारण ते मीटु “कम्युनिस्ट लोरा विरोध कीयाना लोपा सक्रिय” आयना ओसो “जापानीरा विरोध कीयानालोप्पा निष्क्रिय” आयना लेक्कटा नुकसानदायक नीतिकंग लागू कींतिरा। उंदी राष्ट्रीय दुश्मन मना देश लोप्पा जेक एवनल नेंगता ओसो मीटु बचोन सक्रियता ता कम्युनिस्ट लोरा संगे लड़ेमायकिर, बचोन निष्क्रियता ते जापानीरा प्रतिरोध कियाकिर अचोने ज्यादा मीवा फौजकुना हौसला वेने कमजोर आयर। माटु विदेशी आक्रमणकारिरा संगे लड़ेमायना लोप्पा इचोन कोड़ही साबित आतिर, इद्रम आतास्के माटू अचानक कम्युनिस्ट ओसो जनता खिलाफ लड़ेमायला काजे मीवा फौज कु बद्रम तैयार आयनुंग? बेगा उंदी बेरा मीटु गृहयुद्ध शुरू आता इत्तेके मीकिन अदिना बगिल पूरा ध्यान हिया लागियर, “संगेने प्रतिरोध कीयाना” सब्बे विचार कुन अनिवार्य रूप ते तिलंजलि हिया लागियर: आखरी ते मीकिन अनिवार्य रूप ते जापानी साम्राज्यवाद ता मुन्ने आत्मसमर्पण कीयाना समझौता पोरो हस्ताक्षर (सही) किया लागियर। आत्मसमर्पण ता नीति लागू कीयाना विड़चसी मीवा मुन्ने दूसरा बदे हरीं मन्नो आयर। माटू गृहयुद्ध कियाला ओसो ताना लोप्पा सक्रियता ते हिस्सा एतला आल्सोर मत्तेके क्वोमिंगतांग लोप्पाडल आत्मसमर्पण कियाला तैयार हिल्वोर वेने अनिवार्य रूप ते आत्मसमर्पणवादी बनेमायनुर। मीटु आत्मसमर्पणवादी गुट ता डावपेज कित्तेके मीटु ग्यारहवा पूर्ण अधिवेशन ओसो जन राजनीतिक परिषद ता प्रस्ताव किन लोकमत जागृत कीयाना ओसो

कम्युनिस्ट-विरोधी गृहयुद्ध ता तैयारी कीयाना साधन ता रूप ते इस्तेमाल कित्तेके इद्रमे आयार। मीटु ओरा डावपेज ते वातेके मीटु गलत कदम तेहतेके, शुरू ते मीटु आत्मसमर्पण कीवेकाई आखरी ते मीटु जरूर आत्मसमर्पणवादी गुट संगे दुश्मन मुन्ने हथियार वाटसियाकिरा। क्वोमिंगतांग ता ग्यारहवा पूर्ण अधिवेशन पेरके लागू कीयाना दिशा संबंध ते उदु पहली संभावना मत्ता, इद पोल्लो लोप्पा वेल्ले बेहरा खतरा मंता। आत्मसमर्पणवादी गुट ता दृष्टि ते, “राजनीतिक हल” ओसो “वैधानिक सरकार ता तैयारी” ता पोल्लोंग कीयाना गृहयुद्ध इत्तेके आत्मसमर्पण काजे कीयाना तैयारिंग पोरो पर्दा वाटना तरीका आंदू। सब्बे कम्युनिस्ट लोर क्वोमिंगतांग ता सब्बे देशभक्त सदस्य लोर, सब्बे जापान विरोधी पार्टिंग लोर, जापान विरोधी मना सब्बे देशवासिर किन वेल्ले गंभीर खतरा तल सतर्क मंदाणा अनि इद पोयो (उम्मा) ता पर्दा तिंची धोखा तिनमाटु। क्वोमिंगतांग ता ग्यारहवा पूर्ण अधिवेशन पेरके पुटताचोन गृहयुद्ध ता खतरा मुन्ने बस्केने हिल्ला मत्ता।

इदु प्रस्ताव उंदी दूसरा दिशा ते ओया परिंता इत्तेके “उचुन जोम समस्या किन उंदी बगिल तासना अनि गृहयुद्ध शुरू कीयाना”। इदु दिशा, आत्मसमर्पणवादिर लागू कीयाना दिशा तकु उचुन अलग मंता। इदिन किन इंजे वेने जापान ता प्रतिरोध कियाला आल्सानोर, तम्मा कम्युनिस्ज्म-विरोधी ओसो तानाशाही शासन किन विड़सला तैयार हिल्लोर लागू क्रिया परिंतोर। इद्रम तोर इद दिशा किन अंतरराष्ट्रीय परिस्थिति ते वेल्ले बदलाव आयनदु अनिवार्य मंता ओसो जापानी साम्राज्यवाद ता सर्वनाश जरूर आयर इंदानदु हूडसी लागू कींतोर। ओरू क्वोमिंगतांग उंदी गंभीर संकट ता स्थिति ते वात्तादु, जनता नगडल अलग-थलग आतादु हूडितोर। अमेरिका, ब्रिटिश ओसो सावियत संघ वेने सब्बे चीन सरकार ता गृहयुद्ध ता विरोध कियामा मंता इंजी हूडितोर। इव सब्बे पोल्लोंग किन हूडसी ओरू तम्मा गृहयुद्ध ता स्कीम किन कैसल क्रिया परिंतोर अनि “राजनीतिक हल” ओसो “वैधानिक सरकार ता तैयारी” लेक्कटा कमजोर डावपेज बने कियालाए परिंतोर। ओरू तम्मा “थेनान पोरो कब्जा

कीयाना”, “कम्युनिस्ट पार्टी किन तहस-नहस कीयाना” कंजकड़ (सपना) किन मरंगितोर। इद्रम कीयानास्के ओरू आत्मसमर्पणवादी गुट संगे पूराए सहमत मंदितोर। अस्के वने ओरू जापान ता प्रतिरोध कीयाना लेक्का तोहचोर मंदाना आल्संतोर। ओरू क्वोमिंगतांग तम्मा अन्तरराष्ट्रीय प्रतिष्ठा किन पोहला आल्सोर, बस्के-बस्के स्थानीय ओसो अन्तरराष्ट्रीय लोकमत कीयाना आलोचना तल वेरियंतोर। अदिन काजे ओरू “राजनीतिक हल” ओसो “वैधानिक सरकार ता तैयारी” ता कवर एतसी समस्या किन अद्रमे लटके कीसि तासला आल्संतोर। इद्रमे ओरू वेल्ले अनुकूल परिस्थिति काजे हरीं हूडितोर। ओरू निज्जमे “राजनीतिक हल” ओसो “वैधानिक सरकार” तैयारी कियाला आल्सोर, इंजे इतेके बिल्कुले आयो। हत्ता साल, क्वोमिंगतांग ता केंद्रीय कार्यकारिणी कमेटी ता दसवी पूर्ण अधिवेशन गर्ने-गर्ने कम्युनिस्ट पार्टी ता केंद्रीय कमेटी कामरेड लिन प्याओ किन मिस्टर च्यांग काई-शेक संगे वड़कला छुंगछिंग लोहची मत्ता। ओरू इद महीना ता वेल्ले जोम एवनल छुंगकिंग ते हरीं हूडितोर, मति मिस्टर च्यांग काई-शेक ओसो क्वोमिंगतांग ता केंद्रीय कार्यकारिणी कमेटी ओरा संगे उंदी वेने ठोस सवाल ता बारे ते विचार –विमर्श कीयाना विचार कीवो। इयेंड मार्च महीना ते मिस्टर च्यांग काई-शेक “चीन ता पिस्वल” पोरोल ता तन्ना पुस्तक प्रकाशित कितोर, ताना लोप्पा कम्युनिज्म ओसो उदारवादी विचार कुना विरोध कुना पोरो जोर हितोर। दस साल ता गृहयुद्ध ता दोषी कम्युनिस्ट पार्टी किन वेहतोर। कम्युनिस्ट पार्टी, आठवीं राह सेना ओसो पूना चौथी सेना पोरो “उंदी पूना रकम ता युद्ध-सरदार” ओसो “उंदी पूना रकम ता अलगाववादी” मंदाना आरोप वाटतोर। इवु सब्बे ओरू कम्युनिस्ट लोर किन रेंडू साल ते खत्म कियाला आल्सा मंतोर इंजी वेहिंतांग। इयेंड 28 जून ते मिस्टर च्यांग काई-शेक चओ एन-लाई, लिन प्याओ ओसो बाकी कामरेड्स किन येनान वायला अनुमति हितोर। मति अस्केने पीली डोड्डा ते मत्ता तम्मा प्रतिरक्षा सेनांग किन हंदी इलाका बगिल कूच कीयाना इंजी आदेश हितोर। संगेने देश ता स्थानीय अधिकारि किन वेने तीसरी इंटरनेशनल भंग कीयाना मौका ता

फायदा एतसी, इंजेटा जन-संगठन कुना बगिल तल चीनी कम्युनिस्ट पार्टी किन वेने भंग कीयाना मांग पेश कीयाना इंजी वेने आदेश हितोर। इद्रम ता परिस्थिति ते माटु कम्युनिस्ट लोर क्वोमिंगतांग ओसो पूरा राष्ट्र किन गृहयुद्ध लेट कीयाना इंजी आह्वान कीयाना जिम्मेदारी मंदिता। क्वोमिंगतांग ता सब्बे दुष्टतापूर्ण स्कीम ओसो प्रतिरोध युद्ध ते तोड़फोड़ किसोर मत्ता, राज्य काजे खतरा पैदा कीयाना साजिश कुना पर्दाफाश कीयाना जिम्मेदारी मंदिता। ऐतिहासिक तथ्य कुनगा मनम वेल्ले साहस संगे काम कित्ता लेक्का दिसिंता। ऊहान ता पतन आतास्केटल उत्तरी ओसो मध्य चीन लोप्पा वेल्ले सुडला-बेहरा कम्युनिस्ट-विरोधी लड़ईंग आतांग। प्रशान्त महासागर ता युद्ध शुरू आसी इंजे रेंडु साल आया मंता। इव रेंडु सालकुना लोप्पा क्वोमिंगतांग मध्य ओसो उत्तरी चीन लोप्पा कम्युनिस्ट लोरा पोरो हमला किया मंता। च्यांगसू ओसो शानतुंग ते मुन्नेटले तैनात मत्ता फौजके आयवा ओरू वांग-चुंग-ल्येन ओसो ली श्येन-चओ ना कैद दोड़ मत्ता रेंडु ग्रूप सेनांग किन अगा लोहतोर। थाएहांग मेड्वांग इलाका ने फांग पिंग-श्युन ना ग्रूप-सेना किन तन्ना कार्यवाही सिर्फ कम्युनिस्ट लोरा खिलाफ कीयाना इंजी आदेश हितोर। इद्रमे आनह्वेइ ओसो हुपे ते मत्ता क्वोमिंगतांग फौज कुन वेने लोहना आदेश हितोर। वेल्ले जोम एवनल मनम इव तथ्य किन लोकर किन वेने वेहोम आतोम। क्वोमिंगतांग ता अखबार ओसो पत्रिका ने कम्युनिस्ट पार्टी पोरो आरोप वाटनदु उचुन वेने रोमी कीवो। मति वेल्ले जोम एवनल मनम ओरा जवाब ते उंदी वेने पोल्लो वड़कोम। क्वोमिंगतांग बदे कारण हिल्ला जापान खिलाफ बहादूरी ते लड़मासोर मत्ता पूना चौथी सेना किन भंग कीसिता। दक्षिणी आनह्वेइ ते मत्ता ओरा टीमकु ना नौ हजार तुकू ज्यादा सैनिक लोर किन खत्म कितोर। ये थंग किन गिरफ्तार कितोर, श्यांग इंग किन होकतोर अनि सैकड़ो कार्यकर्ता लोर किन जेल ते दोबसितोर। इदु जनता ओसो राष्ट्र काजे विश्वासघात मत्ता। मति मनम देश हित ते वेल्ले हल्को-पुल्को काम कीतोम अनि सिर्फ विरोध कीसि इद घटना ता समाधान कीयाना मांग कीतोम। च्यांग काई-शेक जून ओसो जुलाई 1937 ते कम्युनिस्ट पार्टी ता प्रतिनिधि कामरेड्स चओ ऐन-लाई

किन लूशान ते कलियतोर, अनि शेनशी-कानसू-निंगश्या हंदी इलाका किन उंदी आदेश संगे प्रशासनिक डिविजन ता पोरोल हियाना आयार इंजी किरिया कित्तोर। इदु डिविजन सीधा राष्ट्रीय सरकार ता कार्यकारिणी ख्वान दोड़ मंदियर अनि अदिना अफसर लोर किन औपचारिक रूप ते चुने कीयाना आयार इंजी किरिया कित्तोर। इंजे च्यांग कार्ड-शेक सिर्फ तन्ना पोल्लो तले आयवा हंदी इलाका ता फौजी, आर्थिक नाकेबंदी कियाला काजे ओनकिन 4,00,000 तले 5,00,000 एवनल सैनिक संगे घेराव कित्ताद मंता इंदाना पोल्लो तले वेने पेरेके गुचतोर। हंदी इलाका ता जनता ओसो आठवीं राह सेन ता इलाका किन विनाश कियवा लेवा ओरकिन आराम दोरको। आठवीं राह सेना ता राशन सप्लाई कीयाना पोल्लो तल पेरेके गुचनादु वेल्ले खतरनाक मत्ता। कम्युनिस्ट पार्टी किन उंदी “गद्दार पार्टी”, पूना चौथी सेना उंदी “विद्रोही सेना” ओसो आठवीं राह सेना उंदी “गद्दार सेना” आदु इंजी आरोप वाटनदु खतरनाक मत्ता। संक्षेप ते क्वोमिंगतांग ता इद्रम व्यवहार कीयाना सब्बे लोकर, कम्युनिस्ट पार्टी किन तम्मा दुश्मन समझेमांतोर। क्वोमिंगतांग ता कौंडा ते कम्युनिस्ट पार्टी पोरो जापानीर किनकु दस गुना लेवेके सौ गुना ज्यादा होंग मंता। क्वोमिंगतांग तन्ना पूरा होंग कम्युनिस्ट पार्टी पोरो केंद्रित कींता, अदिनके जापानीरा काजे तन्ना होंग पिस्सो आंता। इदु क्वोमिंगतांग कम्युनिस्ट पार्टी पोरो कीयाना अलग-अलग व्यवहार जापानी फासीवादी व्यवहार संगे कलियंता। जापानी फासीवादीर तम्मा होंग चीनी कम्युनिस्ट पार्टी पोरो वाटसी क्वोमिंगतांग काजे वेल्ले नरम व्यवहार कींतोर। ओरांग रेंडु नारांग-“कम्युनिस्ट लोरा विरोध कीमूट” ओसो “क्वोमिंगतांग किन खत्म कियमूट” लोप्पा इंजे वेने पहलाए पिस्ता। जापानीर ओसो वांग चिंग-वेइ ना नियंत्रण ते मत्ता अखबार ओसो पत्रिकांग लोप्पा इंजे वेने “क्वोमिंगतांग ता नाश आयना” ओसो “च्यांग कार्ड-शेक ना तखथा पलट किमूट” इंदान लेक्कटा नारांग प्रकाशित कित्ताद हिल्ले। जापान कम्युनिस्ट पार्टी ता मुकाबला कियाला काजे चीन ते मत्ता तम्मा फौज कुना 58 प्रतिशत हिस्सा वाटता। बाकी 42 प्रतिशत हिस्सा किन क्वोमिंगतांग पोरो कौंडा वाटसी

मंदालाकाजे तैनात कित्ता। इंजेने क्वोमिंगतांग किन आत्मसमर्पण कियाला तैयार कियाला काजे हल्को आथार इंजी अदु क्वोमिंगतांग पोरो कोंडा वाटसी तासना काम किन ढील हीसी तन्ना वेल्ले फौज कुन चच्यांग ओसो हपे तल गुची कित्ता। जापानी साम्राज्यवाद कम्युनिस्ट पार्टी किन आत्मसमर्पण कियाला काजे लालच हियाना कोशिश बस्केने कित्ताद हिल्ले। मति क्वमिंगतांग किन आत्मसमर्पण कियाला काजे लालच हियानदु अंत हिल्ला कोशिश कित्ता। क्वोमिंगतांग सिर्फ कम्युनिस्ट पार्टी ओसो जनता पोरोने खतरनाक रुझान लागू कींता। जापानीरा मुन्ने तन्ना इद खतरनाक रुझान किन आराम कियाला लोहिंता। इद लडई लोप्पा क्वोमिंगतांग शामिल आयवा लेवा उंदी जेक नितसी हूडना दर्शक लेक्का बनेमासी मंता। तन्ना माटा ने वेने जापानी साम्राज्यवाद कीयाना अपमान किना अदिना लालच ता डटेमासी विरोधी कीयाना साहस कीवो आंता। जापानीर “च्यांग काई-शेक ‘चीन ता पिस्वल’ पोरोल पुस्तक लोप्पा रास्ता दिशा गलत” हिल्ले इंजी इंतोरा च्यांग ओसो ओना पार्टी ता बदे दूसरा सदस्य इद पोल्लो ता खंडन कीतोर? हिल्ले, ओरू इद्रम कित्ताद हिल्ले ओरा लोप्पा इद्रम कीयाना हिम्मत वेने हिल्ले। जापानीर क्वोमिंगतांग किन अंगडम बारांकु समझेमायना। ओरू इत्तेके च्यांग काई-शेक ओसो क्वोमिंगतांग “फौज कुना आदेश ओसो सरकारी आदेश”, “अनुशासन” ता इस्तेमाल सिर्फ कम्युनिस्ट लोरा खिलाफे कींतोर इंजी हूडिंतोर। क्वोमिंगतांग ता केंद्रिय कार्यकारिणी कमेटी ता दुश्मन संगे हंजी कलियता बीस सदस्य ओसो 58 क्वोमिंगतांग जनरल लोरा खिलाफ ओरा इस्तेमाल कीयाना इच्छाए आयवा ओरा लोप्पा हिम्मत वेने हिल्ले। पूरा देश ता जनता ओसो पूना दुनिया ता गोतीता राष्ट्रकु च्यांग काई-शेक ओसो क्वोमिंगतांग पूना चौथी सेना किन भंग कित्ता, आठवीं राह सेना पोरो हमला कित्ता, हंदी इलाका ता घेराव कित्ता, ओरा पोरो “गद्दार पार्टी”, “गद्दार सेना”, “उंदी पूना रकम ता युद्ध-सरदार”, “उंदी पूना रकम ता अलगाववाद शासन”, “प्रतिरोध-युद्ध लोप्पा तोडफोड कीयाना”, “राज्य काजे खतरा पैदा कीयाना” लेक्कटा आरोपकु वाटतादु हूडतांग। लगातार

“फौजी आदेश ओसो सरकारी आदेश”, “अनुशासन ता सहार” एततादु हूडतांग। अवु च्यांग काई-शोक ओसो क्वोमिंगतांग केंद्रीय कार्यकारिणी कमेटी ता बीस सदस्य ओसो 58 क्वोमिंगतांग जनरल लोर दुश्मन संगे कलियतोर इंजी बस्केने हूडोंगा। ओरा खिलाफ बदे फौजी आदेश, सरकारी आदेश ओसो अनुशासनात्मक कार्यवाही लागू कित्तादु हूडोंगा। इद्रमे, क्वोमिंगतांग ता केंद्रीय कार्यकारिणी कमेटी ता ग्यारावी पूर्ण अधिवेशन लोप्पा ओसो जन राजनीतिक परिषद ता मीटिंग लोप्पा प्रस्ताव पास कित्ताद मत्ता। अवु सब्बे कम्युनिस्ट पार्टी ता खिलाफ मंतांग। अविना लोप्पा उंदी वेने क्वोमिंगतांग ता केंद्रिय कमेटी कार्यकारिणी कमेटी ता गद्दार बनेमासी दुश्मन संगे कलियता बचोनो सदस्य लोरा खिलाफ ओसो बचोनो फौजी जनरल लोरा खिलाफ उंदी वेने पोल्लो हिल्ले। पूरा देश ता जनता ओसो पूरा दुनिया ता दोस्त राष्ट्रकु क्वोमिंगतांग बारे ते बाताल आल्सोर मंदांनुंग? आल्सता लेक्काने ग्यारावी पूर्ण अधिवेशन लोपपा ओसो उंदी बेरा “राजनीतिक हल”, “वैधानिक सरकार ता तैयारी” ताए चर्चा आता। माटु द्रम ता चर्चा ता स्वागत कीतोम, अदिनके बेस आता। मति क्वोमिंगतांग हत्ता बचोनो साल कुना लोप्पा लागू कित्ता राजनीतिक कार्यदिशा किन हूडतेके इदु चर्चा जनताना कोंडा ते डुरोम वाटला काजे कित्ता चर्चाए आंदू। इदिना लक्ष्य जनता पोरो तन्ना तानाशाही शासन हमेशा तासला काजे गृहयुद्ध ता तैयारी काजे टाईम दोरकी कीयानादु मत्ता।

वर्तमान परिस्थिति विकास आयना लेक्का बदे तीसरी दिशा हिल्ले या? मंताए। क्वोमिंगतांग ता बचोनो सदस्य पूरा जनता ओसो माटु कम्युनिस्ट लोर इत्तेके इद्रमे आल्संतोमा। इदु तीसरी दिशा बातल आंदू? क्वोमिंगतांग ओसो कम्युनिस्ट पार्टी नड्मा ता संबंध कुना उंदी न्यायपूर्ण ओसो राजनीतिक हल तेंडना। उंदी सही जनवादी ओसो स्वतंत्र वैधानिक सरकार बने कीयाना, “उंदी पार्टी, उंदी वाद ओसो वरोर नेताल” वाले फासीवादी तानाशाही किन भंग कीयाना। प्रतिरोध-युद्ध ताकनास्के जनता उंदी निज्जम ता राष्ट्रीय एसेम्बली ता अधिवेशन कीयाना। माटु कम्युनिस्ट लोर इद दिशा किन शुरू तले लागू कित्ताद मंता। इदिन संगे क्वोमिंगतांग

ता वेल्ले सदस्य लोर वेने सहमत मंतोर। वेल्ले जोम एवनल माटु च्यांग काई-शेक ओसो क्वोमिंगतांग लोपा मना गुट ता लोकर वेने इदे दिशा लागू कियानूर इंजी आल्सा मंतोमा मति हत्ता उचुक साल कुना लोप्पा आता लेक्का नेंडु वेने आया मंता। इदिन हूडतेके च्यांग काई-शेक ओसो क्वोमिंगतांग ता सत्तारूढ लोकरा बहुसख्या इद्रम कियाला तैयार हिल्ले।

इदु दिशा किन लागू कीयाना मुन्ने बचोनो अन्तरराष्ट्रीय ओसो स्थानीय परिस्थितिं मंदाना जरूरत मंता। इंजे (योरोप लोप्पा साम्राज्यवाद तन्ना पूर्ण पतन गरे एवता) अन्तरराष्ट्रीय परिस्थिति चीन ता प्रतिरोध-युद्ध काजे अनुकूल मंता। मति इंजेने आत्मसमर्पण किया परना इंजी, जापानी ओसो वांग चिंग-वेइ वेने आत्मसमर्पण कियाला काजे दबाव बने कीयाना इंजी गृहयुद्ध कियाला तैयार मंतोर। इद्रम आत्मसमर्पणवादीर वेने गृहयुद्ध शुरू कियाला काजे तैयार मंतोर। वांग चिंग-वेइ (दोमेइ समचार-एजेसी ता 1 अक्तूबर ता समचार अनुसार) “ईमानदार तम्मोर हमेशा तम्मोर-तम्मोर मंदितोर, ओसो छुंगकिंग जरूर मावा हरीं पोयनूर, ओरू बचोन जल्दी इद्रम कीयाना अचोन बेस आयार इंजी” आल्संतोम इत्तोर। बचोन जीवा कींतोर, बचोन विश्वास कींतोर वीरु! इद्रम वर्तमान परिस्थिति ते क्वोमिंगतांग सबसे ज्यादा समस्या किन लटके कीसि तासिंता। अनि परिस्थिति निज्जमे अचानक वेल्ले गंभीर रूप ते खराब आता। तीसरी दिशा काजे जरूरी मत्ता सब्बे परिस्थितिं इंजे हिल्लेंगा। पूरा चीन ता सब्बे पार्टिंग देशभक्त ओसो पूरा जनता नालुंग बगिल तल इद्रम ता परिस्थितिं पैदा कीयाना कोशिशा कीयाना। च्यांग काई-शेक ग्यारावी पूर्ण अधिवेशन ते ऐलान कीतोर:

केंद्रीय अधिकारी कम्युनिस्ट पार्टी तल तन्ना सशस्त्र अलगावादी शासन किन विडसना, प्रतिरोध-युद्ध ते तोड़फोड़ कीयाना राष्ट्रीय सेना पोरो तम्मा हमलांग तिलांजली हियानाए मांग कींतोमा। कम्युनिस्ट पार्टी गणराज्य ता 26 वी साल 1937, राष्ट्र किन बचे कियाला काजे संयुक्त रूप ते कोशिशा कीयाना तन्ना ऐलान किन अमल कियार ओसो इद ऐलान लोप्पा कित्ता नालुंग किरियांग किन पूरा कियार इंजी आशा किया मंतोमा।

च्यांग कार्ड-शेक कित्ता “प्रतिरोध युद्ध लोप्पा तोड़फोड़ कीयाना हमलांग” ना चर्चा खुद तम्मा क्वोमिंगतांग पोरोने लागू आंता। इद्रम कम्युनिस्ट पार्टी पोरो आरोप वाटनदु वेल्ले होंग मत्ता लेक्काट पोल्लो आंदू ऊहान पतन आता पेरकेटल क्वोमिंगतांग मूंड कम्युनिस्ट विरोधी हमलांग कित्ता। अविनगडल हर हमला तल क्वोमिंगतांग फौज कम्युनिस्ट पार्टी पोरो अचानक हमलांग कित्ता। 1939 ता हिरंगम कालम तल 1940 ता वसंत कालम एवनल ताकता पहली अभियान ते क्वोमिंगतांग फौज कु तम्मा आक्रमक हमलांग लोप्पा आठवीं राह सेना तैनात मत्ता शेनशी-कानसू-निंगश्या हंदी इलाका ता छुनह्वा, श्युनई, चंगनिंग, निंगश्येन ओसो चनय्वान पोरोल ता पांच काउन्टि-केंद्र पोरो कब्जा कित्ता। इव फौजी कार्यवाहिंग लोप्पा हवाई-जाहज कुना इस्तेमाल आता। उत्तरी चीन लोप्पा, चू ह्वाए-पिंग ना फौजकुन थाएहांग मेट्टा इलाकांग लोप्पा मत्ता आठवीं राहसेना पोरो अचानक हमला कियाला काजे लोहता। अगा आठवीं राहसेना सिर्फ आत्मरक्षा काजे लड़ाई कित्ता। दूसरा अभियान जनवरी 1941 ते शुरू आता। पहली 19 अक्तूबर 1940 ते इंग-छिन ओसो पाए छुंग-शी ची तेह, फंगत-ह्वाए, ये थिंग ओसो श्यांग इंग किन लेटर लोहची पीली डोड्डा ता दक्षिण ते मत्ता आठवीं राह सेना ओसो पूना चौथी सेना ता सब्बे यूनिटकु कुन उंजी महीना लोप्पा पीली डोड्डा तु उत्तर बगिल गुची कीयाना इंजी कड़ा आदेश हित्तोर। माटु दक्षिणी आनह्वेइ ते मत्ता मना सेना उत्तर बगिल दायर इंजी वेहतोमा। इद्रम ता परिस्थिति ते बाकी फौज कुन उत्तर बगिल लोहना मुश्किल मत्ता अदिन काजे माटु जापानी आक्रमण विरोधी युद्ध लोप्पा जीत हासिल कित्ता पेरके अवु तम्मा जागा ते दायनुंग इंजी वेहतोमा। मति मना 9,000 सैनिक लोर इद आदेश असार 5 जनवरी ते दक्षिणी आनह्वेइ तल उत्तर बगिल दायना शुरू कीयाना मुन्ने ने च्यांग कार्ड-शेक “ओर सब्बे तोर किन फस्से कीयाना” दूसरा आदेश जारी कित्तोर। 6 तल 14 जनवरी नडुमा दक्षिणई आनह्वेइ ते मत्ता क्वोमिंगतांग फौजकु पूना चौथी सेना ता यूनिटकुन निज्जमे तम्मा षडयंत्र ते हिरकी कित्तोर। इदे आयवा 17 जनवरी ते च्यांग कार्ड-शेक पूरा पूना

चौथी सेना किन भंग कीयाना ओसो थिंग ना कोर्ट-मार्शल कीयाना इंजी आदेश हित्तोर। अस्केटल मध्य ओसो उत्तरी चीन ता जापान विरोधी आधार इलाकांग लोप्पा वेने क्वोमिंगतांग सेनांग मंतांग। अगा आठवीं राह सेना ओसो पूना चौथी सेना पोरा हमला कीतांग अनि रेंडासी सेनांग सिर्फ आत्मरक्षा काजे लड़ाई कीतांग। तीसरी अभियान लोप्पा इयेंड मार्च ते शुरू आता इंजे वेने जारी मंता। मध्य ओसो उत्तरी चीन लोप्पा आठवीं राह सेना ओसो पूना चौथी सेना पोरो क्वोमिंगतांग फौज कुना हमलांग जारी मंतांग। इदे आयवा च्यांग काई-शेक तन्ना “चीन ता पिस्वल” पुस्तक लोप्पा कम्युनिस्ट पार्टी ओसो जनता खिलाफ पोल्लोंग निंडसी मंतांग। ओरू पीली डोड्डा ते मत्ता बचोनो प्रतिरक्षा सेनांग किन हंदी इलाका पोरो अचानक हमला कियाला काजे लोहतोर। पूरा देश ता जन-संगठन कुन कम्युनिस्ट पार्टी किन भंग कियान मांग कीयाना इंजी उकसे कित्तोर। ओरू जन राजनीतिक परिषद लोप्पा आठवीं राह सेना ता खिलाफ रास्ता हो इंग-छिन ना रिपोर्ट ता जांच कीयाना अनि कम्युनिस्ट विरोधी प्रस्ताव पास कीयाना इंजी क्वोमिंगतांग बहुमत किन गोलबंद कित्तोर। इद्रम ओरू इद जापान-विरोधी परिषद किन क्वोमिंगतांग ता उंदी प्राइवेट एजेंसी लेक्का बदले कित्तोर। इदिन काम गृहयुद्ध काजे कम्युनिस्ट विरोधी लोकमत तैयार कीयानादे मंता। अद्रामासी परिषद ता कम्युनिस्ट सदस्य कामरेड तुंग पी-ऊ किन इदिन विरोध कियाला काजे हड़ताल किया लागता। इव मूंडासी कम्युनिस्ट विरोधी हमलांग किन योजनांग क्वोमिंगतांग पुंजी-पुंजी बने कीसि मत्ता। माटु ओरकिन पूछेमोंतोम, इव “प्रतिरोध-युद्ध लोप्पा तोड़फोड़ कीयाना” कार्यवाहिंग आयवेके बाताल आंदुंग?

गणराज्य ता 26 वी साल (1937) ते 22 सितम्बर ते चीनी कम्युनिस्ट पार्टी ता केंद्रीय कमेटी उंदी घोषणापत्र जारी कित्ता ताना लोप्पा राष्ट्र किन बचे कियाला काजे संयुक्त रूप ते कोशिश कीयाना आह्वा कित्ताद मंता। घोषणापत्र ते माटु इत्तोम: दुश्मन किन तम्मा षडयंत्र कियाला काजे बदे वेने मौका हियवा मंदाला काजे ओसो डावुट मंदानोरा डावुट किन दूर कियाला काजे ओरू राष्ट्रीय मुक्ति काम कि ईमानदारी ते कीयाना

ऐलान कीयाना इंजी चीनी कम्युनिस्ट पार्टी ता केंद्रीय कमेटी आल्सिंता। अदिन काजे ओसो उंदी बेरा पूरा राष्ट्र मुन्ने गंभीरतापूर्क ऐलान कींता:- 1. चीन किन जरूरत मत्ता डा. सुन यात-सेन ना मूंड जन सिद्धांत कुन पूर्ण रूप ते लागू कियाला काजे संघर्ष कियाला मना पार्टी तैयार मंदाना। 2. माटु क्वोमिंगतांग शासन किन तेकसी वाटला काजे बगावत कियाकोम ओसो जर्मीदार लोरा जमी किन जब्त कीयाना मना नीतिंग किन विडसाकोम। 3. माटु वर्तमान लाल सरकार किन पुनर्गठित कीसि उंदी विशेष इलाका किन जनवादी सरकार ता रूप हियाकोम इंजी राजसत्ता ता पूरा देश लोप्पा एकीकरण कियाकोम। 4. लाल सेना तन्ना पोरोल फौजी ओहदा बदले कियार, राष्ट्रीय क्रांतिकारी सेना ता उंदी हिस्सा ता रूप ते पुनर्गठित आयार अनि राष्ट्रीय सरकार ता फौजी परिषद दोड़ काम कियार। जापान-विरोधी मोर्चा बगिल दायर अनि तन्ना जिम्मेदारी पूरा किसोरे कूच कीयाना आदेश मानेमायला तैयार मंदियार।

माटु नालुंग ऐलानकुन सही तरीका ते पूरा कित्ताद मंता: माटु इविना लोप्पाटल बाताले कीवोम इंजी च्यांग काई-शेक ओसो क्वोमिंगतांग ता बोराई मानेय मावा पोरो आरोप वाटा परवोर। मुन्ने शेनशी-कानसू-निंगश्य हंदी इलाका लोप्पा ओसो दुश्मन ता इलाका लोप्पा मत्ता जापान-विरोधी आधार इलाकांग लोप्पा, कम्युनिस्ट पार्टी लागू कित्ता नीतिंग डा. यात-सेन ना मूंड जन सिद्धांत कुना अनुसारे मत्तांग। अविना उल्टा बिल्कुले हिल्ला मत्तांग। दूसरा, बस्के एवनल क्वोमिंगतांग राष्ट्रीय दुश्मन मुन्ने आत्मसमर्पण कीवो अस्के एवनल क्वोमिंगतांग-कम्युनिस्ट सहयोग किन तहस-नहत कीवो। बस्के एवनल कम्युनिस्ट लोरा खिलाफ गृहयुद्ध शुरू कीवो अस्के एवनल माटु क्वोमिंगतांग शासन ता तख्ता पलट कीयाना ओसो जर्मीदार लोरा जमीन जब्त कियाला काजे बल-प्रयोग कीवोम इंदाना मना किरिया पोरो नितसी मंदाकोम। माटु हत्ता कालम ते कित्ता किरियांग वर्तमान कालम ते वेने इविना पोरो नितसी मंतोम वायना कालम ते वेने इविना पोरो नितसी मंदाकोम। इत्के क्वोमिंगतांग दुश्मन मुन्ने आत्मसमर्पण कियार, एकता किन तहस-नहस कियार ओसो गृहयुद्ध

शुरू कियार अस्केने माटु मना किरियांग भंग कियाला काजे मजबूर आयकोम, बारांकु इत्तेके इद्रम ता परिस्थिति ते माकिन मना किरियांग पोरो नितसी मंदाना मुशिकल आयारा। तीसरा, मूल लाल सरकार ता पुनर्गठन प्रतिरोध युद्ध ता मुन्नेटा साल ते कित्ताद मत्ता। जनवादी सरकार ता “तीन-तिहाई व्यवस्था” वेल्ले जोम ताकसोर मत्ता। मति नेंडु एवनल क्वोमिंगतांग शेनशी-कानसू-निंगश्या हंदी इलाका किन मान्यता हियाना तन्ना किरिया पूरा कित्ताद हिल्ले। इदे आयवा मावा पोरो “सामंती अलगाववाद” आरोप वेने वाटता। च्यांग काई-शेक ओसो क्वोमिंगतांग ता बाकी सदस्य लोर केंजाटु! मीटु इंजेट परिस्थिति ते “अलगाववाद” बोरकिन इंदा मंतिर इंजी पुंजी मंदाना। इत्तेके शेनशी-कानसू-निंगश्या हंदी इलाका ओसो जापान विरोधी आधार इलाकांग किन क्वोमिंगतांग सरकार मान्यता हियाना इंजी माटु बस्केने मांग कित्ताद हिल्ले, मीटु जबरदस्ती मावा पोरो थोपे कीतद मंता। मीटु खुद मीवा पोल्लो तल पेरके गुचंतिर। हंदी इलाका किन मान्य हियाना मना किरिया किन देहिंतिर, अगा मत्ता जनवादी सरकार किन स्वीकार किवाए मंदानास्के मीटु मावा पोरो “अलगाववाद” ता आरोप बद्रम वाटा परिंतिर? माटु हंदी इलाका किन मान्यता हियाना इंजी मांग कींतोम अनि मीटु इनकार कींतारा। इद परिस्थिति ता जिम्मेदार बोरु? च्यांग काई-शेक “चीन ता पिस्वल” पोरोल ता तन्ना पुस्तक ते “अलगाववाद” ता आरोप वाटसी इदिना जिम्मेदार ओरू खुद मंतोर इंजी तोहचितोर। ओरू खुद क्वोमिंगतांग ता महानिर्देशक ओसो ओरा सरकार ता अध्यक्ष मंतोर? च्यांग काई-शेक ओसो उंदी बेरा माटु मावा किरिया पूरा कीयाना इंजी मांग कित्ता ग्यारावी पूर्ण अधिवेशन ताकनास्के मौका ता फायदा एतसी माटु वेने जनवादी ता सिद्धांत कुन अमल आसोर मत्ता शेनशी-कानसू-निंगश्या हंदी इलाका किन ओसो दुश्मन इलाका ते मत्ता जापान-विरोधी जनवादी आधार इलाकांग किन कानूनी मान्यता हियाना तम्मा किरिया पूरा कीयाना इंजी मांग कींतोम। ओरू मान्यता हियवा मंदाना तम्मा नीति पोरो नितसी मत्तेके ओरू माटु वेने “अलगाववाद” किन जारी तासना इंजी आलिंसंतोर। इदु हत्ता कालम ता लेक्काने मावा गलत आरोप वाटना लेक्का मंता।

चौथा, लाल सेना किन तन्ना “पोरोल ओसो फौजी ओहदा” बदलेमासी “राष्ट्रीय क्रांतिकारी सेना ता उंदी हिस्सा ता रूप ते पुनर्गठित आसी”, “राष्ट्रीय सरकार ता फौजी परिषद दोड़” वासी वेल्ले जोम आता। इदु किरिया किन वेल्ले मुन्नेने पूरा कित्ताद मंता। सेना इंजे कम्युनिस्ट पार्टी ता केंद्रीय कमेटी दोड़ मंता अनि राष्ट्रीय क्रांतिकारी सरकार ता फौजी परिषद दोड़ हिल्ले, अदु राष्ट्रीय क्रांतिकारी सेना ता पूना चौथी सेना आंदू। 17 जनवरी 1941 ते फौजी परिषद ता प्रतिक्रांतिकारी आदेश कुना कारण ते प्रतिरोध युद्ध लोप्पा तोड़फोड़ कित्ता ओसो राज्य किन खतरा ते वाटना, पूना चौथी सेना किन “विद्रोही सेना” इंजी “भंग कित्ता”, इदे आयवा अदिन किन रोज क्वोमिंगतांग फौज कुना हमलांग ना सामना किया लागता। मति इद सेना मध्य चीन ते जापानीरा लगातार मुकाबला कित्ता। नालुंग किरियांग लोप्पाटल मूंड किरियांग किन पूरा कित्ता। इदे आयवा अदु ओसो उंदी बेरा “राष्ट्रीय सरकारी ता फौजी परिषद दोड़” वायला तैयार मंता। च्यांग काई-शेक किन माटु इद सेना किन भंग कीयाना आदेश किन रद्द कीयाना ओसो फौजी ओहदा किन पुनर्स्थापना कियाला हियाना इंजी मांग कीतोमा। इद्रम कित्तेके अदु चौथी किरिया किन वेने पूरा किया परिता।

ग्यारावी पूर्ण अधिवेशन लोप्पा कम्युनिस्ट पार्टी ता बारे ते स्वीकार कित्ता दस्तावेज कुना लोप्पा इद्रम वेने वेहत्ताद मंता:

बाकी समस्यांग किन हल कियाला काजे राष्ट्रीय एसेम्बली लोप्पा पेश किया परमूडांता। बारांकु इत्तेके युद्ध खत्म आता परेके उंदी साल लोप्पा राष्ट्रीय एसेम्बली केयना अनि संविधान बने कीसि अदिन जारी कीयाना इंजी वर्तमान अधिवेशन ते फैसला कित्ताद मंता।

इगा दूसरा समस्यांग इत्तेके क्वोमिंगतांग ता तानाशाही किन खत्म कीयाना, फासीवाद ता खुफिया विभाग किन भंग कीयाना, पूरा देश लोप्पा जनवादी शासन ता स्थापना कीयाना, आर्थिक नियंत्रणकु, वेल्ले टैक्स ओसो अलग-अलग रकम ता लेवी, जनता काजे नुकसानदायक मंदानावु, लगान, सूद कम कीयाना भूमि-नीति किन ओसो सुडला मध्यम उद्योग

कुना मदद कीयाना ओसो मजदूर लोरा रहन-सहन सुधरे कीयाना आर्थिक नीति किन राष्ट्रव्यापी स्तर ते लागू कीयाना। 22 सितम्बर 1937 ता घोषणापत्र लोप्पा राष्ट्र किन बचे कियाला काजे संयुक्त रूप ते कोशिश कीयाना आह्वाम कीयानास्के मना पार्टी इद्रम इत्ता:

जनवाद किन अमल कीयाना। उंदी संविधान बने कीयाना ओसो अदिन स्वीकार कीयाना, राष्ट्रीय पुनरुद्धार ता नीति बने कियाला काजे उंदी राष्ट्रीय एसेम्बली केयाना। चीनी जनता किन सुख-समृद्धि ता पिस्वल पिस्सना लेक्का बने कियाला काजे गारंटी , सबसे मुन्ने अकाल पीड़ित लोरा सहायता कीयाना, स्थिर पिस्वल ता गारंटी कीयाना, प्रतिरक्षा-उद्योग कुना विकास कीयाना, जनता ना तिप्पल दूर कीयाना ओसो अदिना रहन-सहन ता परिस्थिति ते सुधार कियाला काजे कारगर ओसो ठोस कदम तेहना।

इद घोषणापत्र किन च्यांग काई-शेक दुसराए दिय्या (23 सितम्बर ते) तन्ना उंदी स्टेटमेंट हीसी स्वीकार कित्तोर। अदिन काजे सिर्फ कम्युनिस्ट पार्टी तले नालुंग किरियांग किन पूरा कीयाना मांग कियवा लेवा, खुद क्वोमिंगतांग ओसो क्वोमिंगतांग सरकार तल वेने तम्मा किरियांग किन पूरा कीयाना इंजी मांग कीयाना। च्यांग काई-शेक सिर्फ क्वोमिंगतांग ताए महानिर्देशक आयोर ओरू क्वोमिंगतांग सरकार (पोरोल तुके राष्ट्रीय सरकार) ता अध्यक्ष वेने बनेमातोर। अदिन काजे ओरू माट कम्युनिस्ट लोर किन ओसो पूरा देश ता जनता संगे कित्ता किरियांग किन देहना ओसो उंदी पोल्लो वडकना अनि दूसरा काम कीयाना लेक्काटा परिस्थिति लेक्काटा जनवाद ओसो जनता ना पिस्वल ता बारे ते इव शर्त कुन ओसो गिनती हिल्वाचोन किरियांग किन पूरा कीयाना। पूरा जनता संगे कलियसी माटु कम्युनिस्ट लोर कीयाना मांग काम कीयानादु मंदिता अंगडम ता पोंगडिंग कियानादु आयो। उंदी पोल्लोंग कीयानादिन काम कीयाना लोपा लागू कित्तेके माकिन बेसे लागियार। कीयाना हिल्वा अंगडम ता पोल्लोंग जनता किन ज्याद कालम एवनल धोखा हिया परवोंग। माटु च्यांग काई-शेक ओसो क्वोमिंगतांग किन इद्रमताए मांग कीतोमा। प्रतिरोध युद्ध किन

आखरी एवनल ताकी कीयाना, आत्मसमर्पण ता खतरा तल बचेमायाना: सहयोग जारी तासना, गृहयुद्ध ता संकट वायला हियमाटु, हंदी इलाका ओसो दुश्मन इलाका ते मत्ता जापान-विरोधी आधार इलाकांग ना जनवादी सरकारी किन मान्याता हियमूट, पूना चौथी सेना किन पुनर्गठित कीमुट, कम्युनिस्ट विरोधी अभियान खत्म कीमुट। शेनशी-कानसू-निंगश्या हंदी इलाका किन इंजे एवनल घेराव कीसि मत्ता 4,00,000-5,00,000 सेनी गुचिह कीमुट: जन राजनीतिक परिषद किन कम्युनिस्ट विरोधी लोकमत तैयार कीयाना क्वोमिंगतांग प्राइवेट एजेन्सी लेक्का इस्तेमाल कीयाना बंद कियमूट। भाषण हियाना, सभा केयना, संगठन बने कीयाना आजादी किन आजाद कीमूट, क्वोमिंगतांग ता एकदलीय तानाशाही किन खत्म किमुट: लगान, सूद कम कीमुट। तीना लोप्पा ज्यादातर काम कीयाना किरिया कीतिरा। मीटु इव किरियांग किन पूरा कित्तेके माटु मावा किरियांग जरूर पूरा कियाकोमा। च्यांग काई-शेक ओसो क्वोमिंगतांग तैयार मत्तेके रेंडासी पक्ष नडमा वार्तालाप शुरू कियाला माटु हमेशा तैयार मंतोमा।

संक्षेप ते, क्वोमिंगतांग मूंड दिशांग लागू कीयाना लेक्का मंता। अविना लोप्पा पहली दिशा आत्मसमर्पण, गृहयुद्ध ता दिशा, च्यांग काई-शेक ओसो क्वोमिंगतांग काजे विनाश ता हरीं आंदू। दूसरा दिशा इत्तेके टाईम दोरकी कियाला काजे झूठ ओसो धोखाधड़ी ता सहारा एतना ओसो फासीवादी तानाशाही संगे टुंडसी मंदाना, चुपचाप वेल्ले सक्रियता ते गृहयुद्ध ता तैयारी किसोर मंदाना वेने च्यांगकाई-शेक ओसो क्वोमिंगतांग काजे सही हरीं हिल्ले। तीसरा दिशा, इत्तेक फासीवादी तानाशाही, गृहयुद्ध ता गलत हरीं किन विडसना ओसो जनवाद-एकता ता हरी ते ताकनादे च्यांग काई-शेक किन ओसो क्वोमिंगतांग काजे सही हरीं मंदिता। मति च्यांग ओसो क्वोमिंगतांग लोकुरगडल विश्वास दोरकी कियाला काजे इंजे एवनल तीसरी दिशा ते दायाना लेक्का बाताले कित्ताद हिल्ले। अदिन काजे देश ता जनता अदिना आत्मसमर्पण ओसो गृहयुद्ध ता वेल्ले गंभीर खतरा तल सावधान मंदाना।

क्वोमिंगतांग ता सब्बे देशभक्त सदस्य एकताबद्ध आयाना, ओसो क्वोमिंगतांग अधिकारि किन पहली दिशा ते दायला हियानायो, दूसरा दिशा ते वेने दायला हियानायो। तीसरी दिशा ते दायना इंजी मांग कीयाना।

सबब देश देशभक्त जापान विरोधी पार्टिंग ओसो लोकुर एकताबद्ध आयाना। क्वोमिंगतांग अधिकारि किन पहली दिशा ते दायना तुकू रोमी कीयाना। दूसरा दिशा ते वेने दायला हियानायो। तीसरा दिशा ते दायना मांग कीयाना।

दुनिया ते उंदी मुन्ने बस्केने आयवा लेक्काट बदलाव अनिवार्य मंता। च्यांग काई-शेक ओसो क्वोमिंगतांग ता सदस्य लोर मना युग ता इद महत्वपूर्ण मोड़ ते पूर्ण भूमिका निभे कियानूर इंजी आशा किया मंता। सब्बे देशभक्त पार्टिंग ओसो देशभक्त लोकुर वेने तीना लोप्पा तम्मा भूमिका पूर्ण रूप ते निभे कियानूर इंजी आशा किया मंताना।

नोट

1. ह्वांगफु गूट इत्तेके उंदी कालम ते ह्वांगफू फौजी आकदमी लोप्पा शिक्षक ओसो शिक्षार्थी(करियानोर) मत्ता क्वोमिंगतांग जनलर, अफसर लोरा बारे ते वेहत्ताद मंता। क्वोमिंगतांग सेना लोप्पा ओरू च्यांग काई-शेक ना घनिष्ठ अनुयायी(समर्थक) मत्तोर।

संगठित आयमूट!

29 नवम्बर 1943

इद भाषण कामरेड माओ त्से तुंग शेनशी-कानसू-नियांगश्या सीमांत क्षेत्र ता श्रमवीर साम्मान दरोक्तोरा नड़मा हित्तोरा।

कम्युनिस्ट पार्टी ता केंद्रीय कमेटी बगिल तल नन्ना, इद सत्कार-समारोह ता मौका ते शेनशी-कानसू-निंगश्या हंदी इलाका ता नाहकुना, कारखानांग, सशस्त्र सेनांग, सरकारी-दूसरा संगठनकु ओसो विद्यालय कुना लोप्पाटल चुनेमासी वात्ता सब्बे श्रमवीर-श्रमवीरांगना ओसो उत्पादन-कार्य किसोर मत्ता बाकी आदर्श कार्यकर्ता लोरा काजे उचुक पोल्ल्लोंग वड़ककाना। संक्षिप्त रूप ते ना पोल्ल्लो-“संगठित आयमूट!” इयेंड हंदी इलाका ता आम किसान लोर, सेना, सरकारी, बाकी संगठनकु, विद्यालय, कारखानांग लोप्पा काम कीयाना लोकर, हत्ता साल हिरंगम कालम ते केंद्रीय कमेटी ता उत्तर-पश्चिमी ब्यूरो कित्ता वरिष्ठ कार्यकर्ता लोरा सम्मेलन ता प्रस्ताव कुना अनुसार उत्पादन आंदोलन किया मंतोरा। इयेंड, हर उत्पादन क्षेत्र ते वेल्ले बेसता सफलतांग दोरकताद मंता। वेल्ले विकसित आसी हंदी इलाका पूराए बदलेमाता लेक्का दिस्सा मंता। तथ्य कुन हूडसी वरिष्ठ कार्यकर्ता लोरा सम्मेलन लोप्पा लोगू नीति सही मंता इंजी समझेमाया मंता। इद नीति ता संक्षिप्त रूप इद्रम मंता: आम जनता किन संगठित कीयाना, मत्ता सब्बे शक्तिंग किन- आम जनता, सेना, सरकारी-बासी संगठनकु, विद्यालय कुन- अर्ध-श्रमशक्ति ता रूप ते लेवेके पूर्ण श्रमशक्ति ता रूप ते श्रम किया परनासब्बे महिला पुरुष, लेय्या-लेय्योर, सेडो-मुयतोर किन श्रम कीयाना उंदी विशाल सेना लेक्का गोलबंद

कीयाना, संगठित कीयाना। मनगा लड़ेमायला काजे उंदी फौज मंता संगेने श्रम कियाला काजे वेने उंदी फौज मंता। लड़ेमायला काजे मनगा आठवीं राह सेना ओसो चौथी सेना मंता। मति इव वेने दोहरा काम कीतांग, लड़ेमायना ओसो उत्पादन कीयाना। इव रेंडु रकम ता फौजकु मत्तेके, लड़ेमायना फौज ता रेंडु काम ओसो जन-कार्य कीयाना लोप्पा बेस मत्तेके, माटु मना मुश्किल कुन दूर किया परितोम अनि जापानी साम्राज्यावादी किन हारे किया परितोम। पाड़ना उचुक सलकुना लोप्पा हंदी इलाका ता उत्पादन आंदोलन ता सफलतांग वेल्ले बेहरांग ओसो वेल्ले महत्वपूर्ण हिल्वा मत्तांग। मति इयेटा सफलतांग निज्जमे स्पष्ट रूप ते साबित कीसितांग।

हंदी इलाका लोप्पा इयेंड जमीन तूसता सब्बे सशस्त्र टीम कुना लोप्पा, सैनिक लोर हर मानेय औसतन अठारह मू 1 जमीन ते खेतीबाड़ी कीतोर: ओरू लगभग हर चीन पैदा किया परितोर लेवेके बने किया परितोर: खुराक (कुसिर काया, हव्विंग, तिंदाना-निय्य), गेत्तेंग(रूईदार गेत्तेंगे, ऊनी गेत्तेंग, मोजांग-जूतांग), मंगाना जागा(पांजांग, लोहकु, सभा-भवन), रोज जरूरत ता चीजकु(टेबल, कुर्सी, बैंच, लेखन-सामग्री) ओसो ईंधन(किस्स मासला काजे वर्किंग, कोर्से काजे वर्किंग, बंडांग ना कोर्सेंग)। खुद तम्मा कैदा इस्तेमाल कीयाना, माटु “वेल्ले खुराक-गेत्तेंग” पैदा कीयाना लक्ष्य किन सफल कीतोम। हर सैनिक किन सिर्फ साल ता मूंड महीनांग उत्पादन-कार्य ते शामिल आयना जरूरत मंदिता। बाकी नौ महीनांग ओरू ट्रेनिंग, लड़ाई लोप्पा वाटा परितोर। मना फौज तम्मा तख्वाह(वेतन) काजे क्वोमिंगतांग सरकार या हंदी सरकार लेवेके जनता पोरो निर्भर आसी मन्नो आंता। ओरू तम्मा पूरा जिम्मेदारी खुद एतितोर। मना राष्ट्रीय मुक्ति-कार्य काजे बचोनो जबरदस्त महत्व मत्ता पूना कार्यविधि मंता एय्यो! जापानी आक्रमण विरोधी युद्ध ता हत्ता साढ़े छौ साल कुना लोप्पा मना जापान विरोधी आधार इलाकांग दुश्मन ता मुन्ने अरता सब्बे चीज किन बोड़सना, मुन्ने अरता सब्बे तोर किन हौकना, सब्बे लूटे कीयाना इंदानदिना “मूंड रकम ते सफाया कीयाना” नीति ता

शिकार मत्ता। क्वोमिंगतांग शेनशी-कानसू-निंगश्या हंदी इलाका ता वेल्ले जबरदस्त नाकेबंदी कित्ता, वित्तीय-आर्थिक दृष्टि ते माटु वेल्ले कठीन परिस्थिति ते फंसेमासी मत्तोम। मना सेना लडेमायवा लेवा मत्तेके, माटु मना समस्यांग किन इनपडे हल किया परवोम आसी मन्नेम। इंजे हंदी इलाका ता मना फौज उत्पादन-कार्य करियताद मंता। अद्रमे म लड़ाई ते तैनात मत्ता उचुक सेनांग वेने उत्पादन-कार्य करियतांग अनि बाकी करिया मंतांग। मना वीरतापूर्ण युद्ध-कुशल आठवीं राह सेना ओसो पूना चौथी सेना ता हर सैनिक लडेमायला, जन-कार्य कीयानाए आयवा उत्पादन-कार्य वेने कित्तेके, मनकिन बदे वेने मुश्किल तल वेरियाना जरूरत हिल्ले। मनम मेनशियस ना पोल्लो ने “मोय्योल दोड़ जीत”² जीत हासिल कियाकोम। मना संगठन, विद्यालय वेने इयेंडे इद दिशा ते उंदी वेल्ले बेहरा कदम तेहता। ओरा खर्च ता उंदी सुडला हिस्साए ओरकिन सरकार तिंची दोरकता, ज्यादा हिस्सा ओरू तम्मा उत्पादन-कार्य कीसिए कमाई कित्तोर। हत्ता साल सिर्फ 50 प्रतिशत कुसिर काया पंडिर कीसि मत्तोर मति इयेंड ओरगा कुसिर काया बचोन खपत आंतायो अचोने प्रतिशता ओरू खुद पंडिह कित्तोर। ओरू पडिग पोसे कित्तोर अद्रमासी इगा हब्विना खपत वेल्ले बेरसता, रोज जरूरत मत्ता साधारण चीजकु बने कियाला काजे ओरू बचोनो वर्कशापकु खोले कित्तोर। फौज, विभिन्न संगठकु ओसो विद्यालय इंजे तम्मा भौतिक जरूरत कुन पूर्ण लेवेके ज्यादातर खुद पूरा कींता, अदिन काजे जनता तल कम टैक्स वसूल आया मंता, इद्रम अदु तन्ना मेहनत किन तन्नाए उपभोग किया परिंता। सैनिक ओसो नागरिक इरवुरासी उत्पादन बेरसी किया मंतोर अदिन काजे सब्बे लोकरगा तिंदना-उंडना, करला काजे गेतेंग मंतांग अनि ओरू खुश दिसितोर। मना कारखानांग लोप्पा वेने उत्पादन बेरस्ता, अवुना लोप्पा मकसी मत्ता जसूस लोर किन पोयतोम, उत्पादन-क्षमता वेल्ले बेरसता। पूरा हंदी इलाका ता कृषि ओसो औद्योगिक उत्पादन ते संगठन, विद्यालय लोप्पा ओसो फौज ते वेने वेल्ले संख्य ते श्रमवीर मुन्ने वातोर। माटु हंदी इलाका लोप्पा उत्पादन सही हरदे

ताका मंता इंजी वेहा परितोमा इदु सब्बे आम जनता ना ताकत किन संगठित कित्ता कारण ते आता।

आम जनता ना ताकत किन संगठित कीयाना, इद उंदी नीति आंदू। इदिना प्रतिकूल नीति बदे मंताया? इंगो, मंता! इद्रम ता नीति लोप्पा जन-दृष्टिकोण ता कमी मंता, ताना लोप्पा आम जनता पोरो भरोसा कियानदु हिल्ले, ओर किन संगठित कीयानादु हिल्ले। ताना लोप्पा सिर्फ वित्तीय संगठन, सप्लाई संगठन लेवेके व्यापारी संगठन लोप्पा काम कीयाना उचुन लोकर किन संगठित कीयाना पोरो ध्यान हियमूडांता। नाहकु लोप्पा फौज ते, सरकारी, संगठनकु, विद्यालय ओसो कारखानांग लोप्पा काम कीयाना व्यापक जन-समुदाय किन संगठित कीयाना बगिल ध्यान हियानदु मन्ने आंता। ताना लोप्पा आर्थिक कार्य किन उंदी व्यापक आंदोलन लेवेके उंदी विस्तृत मोर्चा लेक्का ताकी कियवा लेवा वित्तीय नुकसान भरपाई कीयाना साधन लेक्का समझेमायमूडांता। दूसरा नीति आंदू, इदु उंदी गलत नीति आंदू। शेनशी-कानसू-निंगश्या हंदी इलाका लोप्पा मुन्ने इद्रमताए नीति लागू कित्ताद मत्ता, मति हत्ता उचुक सालकुगडल सही मार्गदर्शन दोरकतागडल ओसो खासकर हत्ता साल ता वरिष्ठ कार्यकर्ता लोरा सम्मेलन अनि इयेटा जन-आंदोलन पेरेके अद्रम आल्सना लोकरा संख्या कम आता लेक्का मंता। जोरशोर ते लड़ाई ताकसोर मत्ता ओसो नेतृत्वकारी संस्थांग इदिना बगिल वेल्ले ध्यान हीवा मत्ता उत्तरी-मध्य चीन ता आधार इलाकांग लोप्पा आम जनता ताकी कीयाना उत्पादन आंदोलन इंजे वेने व्यापक आया परताद हिल्ले। मति इयेंड अक्तूबर ते केंद्रीय कमेटी जारी कित्ता आदेशकुना पेरेके वायना साल ता उत्पादन आंदोलन काजे हर जागा तैयारिग आया मंतांग। शेनशी-कानसू-निंगश्या हंदी इलाका तुकू मोर्चा ता परिस्थिति ज्यादा मुश्किल मंता। अगा सिर्फ भीषण लड़ाईए आयवा उचुक जागाने ने वेल्ले प्राकृतिक समस्यांग वेने वाया मंतांग। इद्रम आतेकाई माटु दुश्मन संगे लड़ेमायना ओसो उत्पादन कीयाना काम काजे पूरा पार्टी, सरकार, सेना ओसो जनता किन गोलबंद कीयाना। अस्के ने युद्ध ता समर्थना किया परमूडांता। “मूंडु रकम ता सफाया” वाले दुश्मन ता

नीति ता सामना किया परमूडांता अनि नुकसान आता जागा ने सहायता किया परमूडांता। हत्ता उचुक सालकुना लोप्पा मोर्चा ते वात्ता उत्पादन संबधित अनुभवकु ओसो इयेटा हिरंगम ते आता विचारधारात्मक, संगठनात्मक, भौतिक तैयारिंग ना कारण ते वायना साल ते उंदी व्यापत आंदोलन ताकी किया परमूडायर, निज्जने इदु आंदोलन पक्का ताकियारा। लडाईं जारी मत्ता अग्रिम मोर्चा ते वायना इलाकांग लोप्पा, इंजे वेने “वेल्ले खुराक-गेत्तेंग” दोरकी किया परताद हिल्ले मति “माटु खुद मना कै-कालकुना इस्तेमाल कीसि मुशिकलकुन दूरू कीयाना” वेल्ले जरूरी मंता।

आर्थिक क्षेत्र ते इस्सल सहकारी समितिंग सामूहिक संगठन कु सबसे महत्वपूर्ण रूप ते मंतांग। मना फौज कुना लोप्पा, मना सरकारी, संगठनकुना लोप्पा, मना विद्यालय कुना लोप्पा, जनता ना ताकसोर मत्ता उत्पादन संबधित कामकाज कुन सहकारी समितिंग ना पोरोल हियाला वेहना जरूरत हिल्ले। इव कामकाज कुना स्वरूप सहकारी समितिंग लेक्काने मंता, बारांकु इत्तेके इव कामकाज कु विभिन्ना विभाग, इकाइ ओसो मानेय ना भौतिक जरूरत कुन पूरा कियाला काजे सामूहिक श्रम पोरो आधार आसी उंदी केंद्रीकृत नेतृत्व ते ताकी कीयाना। इवु वेने उंदी रकम ता सहकारी समितिंग आंदुंग।

आम किसाना लोप्पा हजारों सालकुनल व्यक्तिगत अर्थव्यवस्था ता प्रथा ताकसोर वाया मंता। तीना लोप्पा हर परिवार लेवेके लोन उंदी उत्पादन इकाई बनेमांता। उत्पादन ता बिखरेमाता रूप, व्यक्तिगत रूप सामंती शासन ता आर्थिक बुनियाद मंदिता। इदु किसान लोर किन स्थाई रूप ते कंगाल बने किसिंता। इद परिस्थिति किन बदले कीयाना तरीका सिर्फ सामूहिकरण कियानदे मंता। सामूहिकरण कीयाना तरीका लेनिन वेहत्ता लेक्का सिर्फ सहकारी समितिंगे बने कीयाना।⁴ माटु हंदी इलाका लोप्पा किसान लोरा वेल्ले सहकारी समितिंग बने कीतोम। मति इंजे सिर्फ शुरूआती रकम ताए मंतांग, सामूहिक फार्म इंदान लेक्काट सोवियत रकम ता सहकारी समितिंग बने कीयाना मुन्ने अविन किन विकास ता बचोनी चरण कुनगडल वेंडा लागियरा। मना अर्थव्यवस्था नवजनवादी

अर्थव्यवस्था मंता। मना सरकारी समितिंग इंजे वेने उंदी रकम ता सामूहिक श्रम-संगठने मंता अनि व्यक्तिगत अर्थव्यवस्था पोरो आधार आसी मंता। इदे आयवा अदिना बचोनो रकम कु मंतांगा। उंदी रकम- आपसी सहायता काजे कृषि श्रम-संगठन इत्तेके “श्रम-विनिमय दल”ओसो “श्रम-विनिमय अनि मजदूरी ते काम कीयाना दल”⁵ लेक्काटवु। इद्रम ता संगठन च्यांगशी ता लाल इलाकां लोप्पा “आपसी सहायता कार्यदल” लेवेके “पूहतानोरा दल”⁶ इंदानोरा। इंजे मोर्चा ना उचुक जागाने “आपसी सहायता दल” इंतोरा बस्के एवनल लोकर खुद तम्मा मर्जी ते (जबरदस्ती बिल्कुल कीयानायो) शामिल आयनुर, अस्के एवनल इद्रम ता सामूहिक आपसी सहायत संगठन मंदानुंग। अस्के एवनल अवु अविना पोरोल बदलेमातेकाई, अविना लोप्पा उचुने लोकर लेवेके उचुन दर्जन लोकर, लेवेके सैकडों लोकर मत्तेकाई अविना लोप्पा सब्बे तो पूर्ण श्रमशक्ति ता रूप ते श्रम किया परनोर मत्तेकाई ओसो उचुन मुल उर्ध-श्रमशक्ति ता रूप ते श्रम कियानोर मंदानोर अस्के एवनल मंदितांगा। ओरा सदस्य जन-शक्ति, पशु-शक्ति लेवेके औजार कुना संगे वरोनकु-वरोना सहायता कीयाना ओसो खेती कीयाना कालम ते संगें-संगे मंदाना ओसो संगे-संग तिंदाना। अव संगठकु अस्थाई मत्तेकाई लेवेके स्थाई मत्तेकाई, सामूहिक आपसी सहायता ता इव तरीकांग खुद तन्ना-तन्नाए विकास आयना। हत्ता कालम ते च्यांगशी ता जनता नडमा माटु इद्रम ता अनुभव कुन संक्षिप्त रूप ते तेंडतोम अनि इंजे माटु उत्तरी शेनशी लोप्पा वेने इद्रम ता अनुभव कुना संक्षिप्त रूप तेंडा मंतोम। हत्ता साल वरिष्ट कार्यकर्ता लोरा सम्मेलन ताकनास्के श्रम ते आपसी सहायता किन बेरसी कित्ता पेरके ओसो इयेंड पूरा साल अदिना पोरो अमल कित्ता पेरके हंदी इलाका लोप्पा इद काम मुन्ने तुकु बचोनो बेस विकसित आता। हंदी इलाका ता वेल्ले श्रम-विनिमय दलकु तम्मा पूहना, उरसना, निंदाई, फसल तुकू दो गुना मंता। इंजे जनता इद्रम ता ठोस सफलतांग हूडता अदिन काजे वायना साल ते ज्याद लोकर इद तरीका किन लागू कियानूर इंदानिदिना पोरो बदे डावुट हिल्ले माटु सीमन्त इलाका ता पूर्ण श्रमशक्ति ता रूप ते लेवेके अर्ध-श्रमशक्ति ता रूप ते श्रम किसोर

मत्ता लाखो लोकुर साल लोप्याने सब्बे तोर सहकारी समितिंग लोप्या संगठित आयनुर इंजा आशा कियोम। उचुक सालकुना लोप्या इद लक्ष्य जरूर पूरा किया परमूडायर। सब्बे महिला लोर वेने बदे-बदेआई काम कियाला काजे गोलबंद कीयाना। सब्बे लंपट लोर किन उत्पादन-कार्य लोप्या शामिल कीयाना अस्केने ओरू सुधरेमासी वरोर बेसता नागरिक बनेमायनूर। उत्तरी-मध्य चीन ता सब्बे जापान विरोधी आधार इलाकांग लोप्या इद्रम ता सामूहिक उत्पादक सहकारी समितिंग व्यापक रूप ते स्वेच्छा पोरो आधार आसी संगठित कीयाना।

कृषि उत्पादन काजे सामूहिक सहकारी समितिंगे आयवा मूंड दूसरा रकम ता संगठन वेने मंतांगा येनान ता दक्षिण इलाका ता सहकारी समिति-उंदे काम आयवा बचोनो काम कीयाना सहकारी समिति, उत्पादन, उपभोक्ता, परिवहन(ओवोर सप्लाई), कर्ज हियाना काम किन उंदे जागा काल्पिता। सप्लाई सहकारी समितिंग(ओवोर सप्लाई दल), ओसो दस्ताकारी सहकारी समितिंग मंतांगा।

जनता नडमा इव नालुंग रकम ता सरकारी समितिंग ना ओसो फौज लोप्या सरकारी, दूसरा संगठनकु ओसो विद्यालय कुना लोप्या सामूहिक-श्रम सहकारी समितिंग ना स्थापना कीसि माटु जनता ना सब्बे ताकत कुना श्रम ता उंदी विशाल फौज ता रूप ते संगठित किया परितोम। जनता काजे सिर्फ उंदे मुक्ति हरी मंता। गरीबी तिंची खुशहाली बगिल दायना सिर्फ इदे उंदी हरी मंता। जापानी आक्रमण विरोध युद्ध लोप्या जीत हासिल कियाला सिर्फ इदे उंदी हरी मंता। हर कम्युनिस्ट लोर आम जनता ना श्रम किन संगठित कायना काम कजरूर करियना। बुद्धिजीवी कम्युनिस्ट लोर वेने उद काम जरूर करियाना। बेगा उंदी बेरा ओरू इद्रम ता काम कीयाना शुरू कितोर इत्तेके ओरू छै महीनांग लेवेके सालमेंड लोप्याने करियंतोरा। उत्पादन संगठन कीयाना ओसो अनुभव कुना संक्षिप्त रूप तेंडना लोप्या आम जनता किन मदद किया परितोरा। बाकी काम कुना लोप्या कुशलता(काम किन बेस किया परना) दोरकी कीयानाए आयवा मना कामरेड्स बस्के एवनल आम जनता ना श्रम किन संगठित कियाला

करियानूर। इत्तेके ओरू स्थानीय उत्पादन योजनांग बने कियाला किसान लोरा मदद कियाल करियानूर, श्रम-विनिमय दल, ओवोर सप्लाई दल ओसो उंदी तुकू ज्यादा काम कीयाना सहकारी समितिंग निल्पी कीयाना करियानूर, फौज, सरकार, संगठन, विद्यालय कुना लोप्पा उत्पादन ता संगठन कियाला करियानूर, कारखानांग लोप्पा उत्पादन ता संगठन कीयाना, उत्पादन लोप्पो पोटी वाटना आंदोलन ताकी कीयाना, श्रमवीर किन प्रातसोहन-पुरस्कार हियाना, उत्पादन प्रदर्शन कियाला करियानूर, मना कामरेड्स आम जनता ना सृजनात्मक शक्ति ओसो पहलकदमी ता विकास कियाला करियानूर, अस्के माटु जरूर जापानी साम्राज्यवादीरि किन पूंड परितोम ओसो पूरा जनता संगे कलियसी पूना चीन ता निर्माण किया परितोम।

कम्युनिस्ट लोरा लोप्पा सब्बे पोल्लो ने खुद किन आम जनता संगे कलियी कीयाना क्षमता मंदाना। मना पार्टी-मेम्बर कोली लोप्पा मंजी पूरा पिस्वल पिस्तेके ओसो दुनिया ता सामना कीयाना, तूफान कुना मुकाबला कियाला काजे बस्के बाहरी दुनिया ते पेसवेके, चीनी जनता किन ओरगडल बाताले फायदा मंताया? उचुन वेने हिल्ले! इद्रम ता पार्टी-मेम्बर मना किन जरूरत हिल्ले। मना कम्युनिस्ट लोर दुनिया ता सामना कीयाना ओसो तूफान कुना मुकाबला कियान, जन-संघर्ष कुना विशाल दुनिया, जन-संघर्ष कुना जबरदस्ता तूफान कुना मुकाबला कीयाना। “मुव्वुर-मोचीर उंदी आसी तम्मा अकल इस्तेमाल कित्तेके, ओरू चूके ल्यांग⁷ ना लेक्का किया परितोर।” दूसरा माटाने वेहना इत्तेके आम जनता लोप्पा वेल्ले महान सृजनात्मक शक्ति मंदिता। असल इत्तेके चीनी जनता नड़मा हजारो-लाखों चूके ल्यांग मंतोर। हर नाटे, हर कस्बा ता वरोर चूके ल्यांग मंदिंतोर। मनम आम जनता नगा हिंजी करियाना, जनता ना अनुभव कु जमा कीसि अविन सुधरे कीसि, सिद्धांत ओसो तरीकांग ना रूप हियाना। ताना पेरेके आम लोकुरा नड़मा प्रचार-कार्य शुरू कीयाना। इव सिद्धांत ओसो तरीकांग किन तम्मा समस्यांग हल कियाला जे ओसो मुक्ति, खुशहाल पिस्वल दोरकी कियाला काजे अमल कीयाना इंजी जनता किन

आह्वान कीयाना। स्थानीय काम कीयाना मना कामरेड्स आम जनता नगडल अलग-थलत आंतोरा। ओरा विचार कुन समझेमायना लोप्पा ओसो उत्पादन ता संगठन कियाला अनि रहन-सहन किन सुधरे कियाला काजे ओरा मदद कीयाना लोप्पा विफल आतेके, ओरू “राष्ट्रीय पुनरुद्धार काजे सार्वजनिक अनाज” जमा कीयाना एवनले तम्मा किन सीमित कीसि तासिंतोरा। मति काम कि कियाला काजे सिर्फ 10 प्रतिशत ताकते हालना लेक्का मंदिता। ओरू मुन्ने “जनता ना खुद ता पुनरुद्धार काजे ओरा निजी अनाज” ता समस्या किन समाधान कियाला सहायता हियाला काजे तम्मा 90 प्रतिशत ताकत वाटतेके, अस्केने वीर कामरेड्स क्वोमिंगतांग ता कार्यशैली लागू किया मंतोर इंजी ओसो ओरा नौकरशाही ता माच तुंडता इंजी इनमूडायरा। क्वोमिंगतांग जनता नगडल सिर्फ मांग कींता, ताना बदला ते बाताले हीवो आंता। मना पार्टी ता बोराई सदस्या इद्रम ता काम कींतोर इत्तेके ओना कार्यशैली क्वोमिंगतांग लेक्का मंता। ओना मोककाम पोरो तुंडता नौकरशाही माच किन कास्ता एर संगे वेल्ले नोहकसी-नोहकसी नोर्ना जरूरत मंता। नावा हिसाब ते मना सब्बे जापान विरोधी आधार इलाकांग ना स्थानीय काम लोप्पा इद नौकरशाही शैली दोरकिंता। मनगा जनतानगल अलग-थलग आसी मत्ता उचुन कामरेड्स वेने मंतोर बारांकु इत्तेके ओरा लोप्पा जन-दृष्टिकोण ता कमी मंता। मनम इव कार्यशैली किन पक्का विडसन। सिर्फ अस्केने माटु जनता संगे घनिष्ठ संबंध स्थापित किया परितोमा।

इदे आयवा फौज संबंध ते मना काम लोप्पा उंदी रकम ता युद्धपति लेक्काटा शैली दोरकिंता। इदु वेने क्वोमिंगतांग ता विशिष्ट कार्यशैलिये आंदू। अदिना फौज आम जनता तल बिल्कुले कटेमासी मंता। मना सेना किन फौज ओसो जनता नडमा, फौज ओसो सरकार नडमा, फौज ओसो पार्टी नडमा, अफसर ओसो साधार सैनिक लोरा नडमा, फौजी कार्य ओसो राजनीतिक कार्य नडमा ता संबंध कुन, कार्यकर्ता लोरा नडमा ता संबंध कुना संचालन कीयाना सही नियम कुना पालन कीयाना। मना सेना किन युद्धपतिवाद लेक्काटा गलती कीयाना अनुमति हिल्ला। अफसर लोर

साधारण सैनिक लोरा संगे कलियसी मंदाना व्यवहार कीयाना, ओरा सुख-सुविधांग किन हूडसी उदास आयनायो ओसो ओरकिन शरीरिक सजा हियानायो: फौज किन जनता संगे कलियसी व्यवहार कीयाना अनि जनता ना अधिकार कुन बिल्कुले नुकसान कीयानायो। फौज सरकार ओसो पार्टी ता सम्मान कीयाना बस्के वेने “स्वतंत्र मंदाना इंजी” वेहनायो। मना आठवीं राह सेना ओसो पूना चौथी सेना जनता ना सेना आंदू अदु हमेशा वेल्ले बेसता सेना मत्ता। निज्जमे अदु पूरा देश मेटा सबसे बेसता सेना मंता। मति इंजेटा परिस्थिति ते उंदी रकम युद्धपतिवाद ता गलतिंग पुट्टना शुरू आतांग इंदानदु निज्जमे। फौज लोप्पा काम कीयाना उचुन कामरेडस सैनिक, जनता, सरकार ओसो पार्टी ता नैतिक नियम कुना पालन कियवा लेवा तम्मा विचार वात्ता लेक्का ताका मंतोर। ओरू स्थानीय कार्य कीयाना कामरेड्स किने दोष हींतोर अनि तम्मा बस्केने मानेमायोर। तम्मा सफलतांग ना बारे तेने हमेशा आल्ससोर मंदिंतोर, तम्मा गलतिंग ना बारे ते बस्केने आल्सोर। चापलूसी किन ज्यादा विचार कींतोर, आलोचना किन आयो। उदाहरण तुकू शेनशी-कानसू-निंगश्या हंदी इलाका लोप्पा इद्रम ता घटनांग दोरकिंतांग। हत्ता साल वरिष्ठ कार्यकर्ता लोरा सम्मेलन ओसो फौजी, राजनीतिक कार्यकर्ता लोरा मीटिंग आतांकु ओसो इद साल वसंतोत्सव ताकनास्के “सरकार ता समर्थन कीयाना ओसो जनता संगे घनिष्ठ संबंध बेरसी कीयाना”, “सेना ता समर्थन कीयाना अनि जनता संगे घनिष्ठ संबंध बेरसी कीयाना” ओसो “सेना ता समर्थन कीयाना” आंदोलन ताकतांकु, इदु रुझान दूर आता। मति इंजे वेने इदिना हिस्सांग पिस्तांगे अविनकिन खत्म कियाला काजे मनम ओसो ज्यादा कोशिश कीयाना। उत्तरी-मध्य चीन ता आधार इलाकांग लोप्पा वेने इद्रम ता दोष मंतांग, अगटा पार्टी-संगठन ओसो फौज कु इव दोष कुन खत्म कीयाना कोशिश कीयाना।

स्थानीय काम लोप्पा नौकरशाही बगिल ओयना रुझान मत्तेकाई लेवेके फौजी कार्य लोप्पा युद्धपतिवाद बगिल ओयना रुझान मत्तेकाई इद दोष असल ते उंगे स्वरूप ता मंदिंता। इत्तेके जनता तल अलग-थलग

मंदाना। मना कामरेड्स लोप्पाटल ज्यादतर लोकुर बेसता कामरेड्स मंतोरा। बोनगा इद्रम ता रुझान हिल्ले ओरकिन उंदी बेरा आलोचना कित्तेके ओरा गलती वेहतेके ओरू अदिन जरूर सुधरे किया परितोरा। मति आत्मालोचना उंदी वेल्ले जरूरी चीज मंता। गलत रुझान कुना मुकाबला कीयाना, ईमानदारी ते अविना सुधार कीयाना। स्थानीय काम लोप्पा नौकरशाही बगिल लेवेके फौजी काम लोप्प युद्धपतिवाद बगिल दायना रुझान कुना आलोचना कीयाना तुकू चुकितेके, ओरू क्वोमिंगतांग कार्यशैली किन तासला आल्सा मंतोर अनि दूसरा तरीका ते तन्ना साफ मोक्कम पोरो नौकरशाही लेवेके युद्धपतिवाद ता माच तरहला आल्संतोर, इद्रम तोर बेसता कम्युनिस्ट मन्नोर आंतोरा। इव रेंडासी रुझान कुन खत्म कित्तेके मना सब्बे काम इत्तेके उत्पादन आंदोलन वेने सही तरीका ते ताकियरा।

मना हंदी इलाका बदलेमाती बारांकु इत्तेके अगाटा किसान किन हूडाटु लेवेके सरकारी ओसो बाकी संगठनकु, विद्यालय, फौज लेवेके कारखानांग, उत्पादान लोप्पा सब्बे जागा ने सफलता दोरकी कित्तादु मंता। फौज ओसो जनता ना आपसी संबध वेल्ले बेस आताद मंता। इव सब्बे पोल्लोंग निगडल मना कामरेड्स ना लोप्पा तुलनात्मक रूप ते मजबूज जन-दृष्टिकोण मंता इंजी समझेमांता। आम जनता संगे उंदी आयना ता बारे ते ओरू वेल्ले सफलता दोरकी कित्तोरा। मति मना लोप्पा आत्मसंतोष(खुशी) ता भावना पैदा आयवा लेवा मनम आत्मालोचना जारी तासना अनि ज्यादा से ज्यादा विकास कियाला काजे कोशिश किसोर मंदाना। मना चेहरा पोरो माच मंदाना संभावना मंदिता, अदिन काजे अदिन माटु रोज वियार हैयता लेक्का हर दियाना नोरना। स्थानीय काम ते नौकरशाही बगिल दायना लेवेके फौजी काम लोप्पा युद्धपतिवाद बगिल दायना रुझान किन साधारण रूप ते दूर कित्ताद मत्तेकाई इव गलत रुझान कु ओसो तेदा परितंतांग। माटु जापानी साम्राज्यवाद ओसो चीनी प्रतिक्रियावाद ता संगठित ताकत ता घेराव लोप्पा अरी मंतोमा अनुशासनहीन निम्न-पूँजीपति वर्ग नडुमा मंतोम अदिन काजे नौकरशाही

ओसो युद्धपतिवाद गंदगी हर दिव्या मावा चेहरा ते अरिंता। अदिन काजे सफलता दोरकतेक माटु खुशी ता भावना पैदा आयला बिल्कुले हियानायो। मनम आत्मसंतोष ता भावना रोमी कीसि तासना अनि खुद ता कमजोरिंग ना लगातार आलोचना किसोर मंदाना। रोज वियार हैयसी साफ किता लेक्का रोज खुद ता मौक्कम किन नोरसोरे मंता।

उत्पादन काम कीयाना श्रमवीर ओसो आदर्श कार्यकर्ता लोर! मीटु जनता ना नेता लोर आंदिर, मीटु मीवा काम लोप्पा वेल्ले सफलता दोरकी किया मंतर। नन्ना मीटु आत्मसंतोष ता भावना ता शिकार आतद हिल्ले इंजी आशा किया मंताना। मीटु क्वानचुंग, लुंगतुंग, सानप्यन, स्वेइते ओसो येनान ता उपक्षेत्र कुना काउन्टिंग लोप्पा मलसी वायकिर, मीटु मीवा संगटन, विद्यालय, फौजी यूनिटकु लेवेके कारखानांग लोप्पा मलसी वायकिर, अस्के जनता ना नेतृत्व कियाकिर, आम लोकुरा नेतृत्व कियाकिर, लेवेके मुन्ने तुकू ज्यादा बेस काम कियाकिर, सबसे मुन्ने लोकुर किन स्वेच्छा पोरो आधार आसी सहकारी समितिंग लोप्प संगठित कियाकिर, ओरकिन मुन्ने तुकू ज्यादा बेस ओसो ज्यादा संख्य ते संगठित कियाकिर इंजी आशा किया मंतान। मीटु मलसी वासी वायना साल ते आयना श्रमवीर लोरा सम्मेलन एवनल माटु ओसो ज्यादा बेहरा-बेहरा सफलतांग दोरकी किया परना इंजी इद काम किन ओसो ज्यादा बेस प्रचार कियाकिर।

नोट

1. मू जमीन नापे कीयानादु उंदी मू ते 10 फन मंदिता ओसो 15 मू ते उंदी हेक्टर ता बराबर मंदिता।
2. “लूकयरसा” ग्रन्थ 3, “कुंगसुन छओ”, भाग 1, अध्याय 5।
3. केंद्रीय कमेटी ता 1 अक्तूबर ता आदेश “आधार-इलाकांग लोप्पा लगान कम कीयाना, उत्पादन बेरसी कीयाना ‘सरकार ता समर्थन कीयाना ओसो जनता संगे घनिष्ठ संबंध बेरसी कीयाना’ आंदोलन किन विस्तार कीयाना” इंजी मत्ता, इदे ग्रन्थ लोप्पा मंता।

4. वी. आई. लेनिन, “सहकारिता” लोप्पा हूडाट्टु।
5. “श्रम-विनिमय दल” ओसो “श्रम-विनिमय ओसो मजदूरी एतसी काम कीयाना दल”, इव रेंडासीए शेनशी-कानसू-निंगश्या हंदी इलाका ते सामूहक कृषि उत्पादन लोप्पा आपसी सहायता कीयाना श्रम-संगठनकु मत्तांग। श्रम-विनिमय किसान लोरा श्रमशक्ति किन सुधरे कीयाना उंदी साधन मत्ता। मानेय ना श्रम ता दिव्यांग ना विनिमय मानेय ना श्रम दिव्या संगे कीयाना आंता। कोंदा ना श्रम दिव्या ना विनिमय कोंदाना श्रम दिव्याना विनिमय संगे कीयाना आंता। मानेय ना श्रम दिव्या ना विनिमय कोंदा ना श्रम दिव्या ना श्रम दिव्या संगे कीयाना इंदाना लेक्काटवु। इवु किसान लोरा श्रम-विनिमय दल लोप्पा शामिल आताद मत्ता, ओरू हर सदस्य-परिवार ता भूमि किन सामूहिक रूप ते ओसो उंदी-उंदी कीसि पूहला काजे तम्मा श्रमशक्ति लेवेके पशु-शक्ति वाटितोर। हिसाब कीयानास्के श्रम दिव्या किन विनिमया ता उंदी इकाई मानेमांतोर। बोरु ज्यादा संख्या ते मानेय ना श्रम दिव्या लेवेके पशु ता श्रमदिव्या वाटितोर, ओरकिन कम संख्या ते श्रम दिव्या वाटनोर इद अंतर ता बराबर पारिश्रमिक हींतोर। “श्रम-विनिमय-मजदूरी ते काम कीयाना दल” साधारण रूप ते ज्यादा जमीन मंदाना किसान लोर बनेकींतोर। आपसी सहायता काजे आपसी श्रम-विनिमय कीयानाए आयवा सदस्य सामूहिक रूप ते वेने श्रमशक्ति ता कमी मंदाना परिवार कुना काजे वेने मजदूरी एतसी क्रियानोर।
6. “मावा आर्थिक नीति” नोट 2 (“माओ त्सेतुंग ना संकलित रचानांग”, ग्रन्थ 1 हूडाट्टु।
7. चूके ल्यांह (181-234 ई.) चीनी सामंती समाज ता वरोर राजनीतिकार ओसो रणनीतिकार मत्तोर। वीन किन चीनी ऐतिहासिक उपन्या लोपा “सान क्वो येन ई” (मूंड राज्य कुना कहानी) ते वरोर सुयोग्य ओसो बुद्धिमान मानेय ना लेक्का पेश कित्ताद मत्ता।

मावा अध्ययन ओसो वर्तमान परिस्थिति

12 अग्रेल 1944

चीनी कम्युनिस्ट पार्टी ता केंद्रीय कमेटी नेतृत्वकारी संगठन ओसो वरिष्ठ कार्यकर्ता लोर 1942 तल 1944 एवनल पार्टी इतिहास पोरो(विशेष रूप ते 1931ता शुरू तले 1934 ता आखरी एवनल) बहस कितोरा। इद बहस (चर्चा) तल मार्क्सवाद-लेनिनवाद पोरो आधार आसी पार्टी ते विचारधारात्मक एकता तत्ताना लोप्पा वेल्ले सहायता दोरकता। जनवरी 1935 ते क्वेइचओ प्रान्त ता चुनई लोप्पा 1931 ता शुरू तल 1934 ता आखरी एवनल ताकसी गलत “वामपंथी” कार्यदिशा किन दूर कित्ता केंद्रीय कमेटी ता राजनीतिक ब्यूरो ता विस्तृत मीटिंग केंद्रीय नेतृत्वकारी संगठन ता बनावट किन बदले किसिंता। कामरेड माओ त्सेतुंग ना कैदे नेतृत्व वात्ता ओसो पार्टी कार्यदिशा किन मार्क्सवाद-लेनिनवाद ता सही हरदे ओतोर। मति वेल्ले पार्टी कार्यकर्ता लोर पाडना गलत कार्यदिशा ता स्वरूप किन बेस समझेमायोर आतोर। पार्टी कार्यकर्ता लोरा मार्क्सवादी-लेनिनवादी विचारधारात्मक स्तर किन ओसो ज्यादा पोरो तेहला काजे राजनीतिक ब्यूरो 1942-43 ते पार्टी ता इतिहास पोरो बचोनो बहस कितोर, पेरके 1943-44 नडना पूरा पार्टी ता वरिष्ठ कार्यकर्ता लोरा इद्रमताए बहस कुना संगठित कितोर। इव बहसकु 1945 ते पार्टी ता सातवीं राष्ट्रीय कांग्रेस काजे महत्वपूर्ण तैयारी ता रूप ते मत्तांग। इवु चीनी कम्युनिस्ट पार्टी इतिहास लोप्पो अभूतपूर्व(इदिनकु मुन्ने बस्के आयवा लेवके हिल्ला मत्तादु) विचारधारात्मक ओसो राजनीतिक एकता बने कीयाना लेक्का बने कितोर। “मावा अध्ययन ओसो वर्तमान परिस्थिति” इव बहस कुना बारे ते येनान लोप्पा वरिष्ठ कार्यकर्ता लोरा सम्मेलन ते हिता कामरेड माओ त्सेतुंग ना भाषण आंद।

1

हत्ता साल ता हिरंगम कालम ताल मना पार्टी ता वरिष्ठ कार्यकर्ता लोर मना पार्टी ता इतिहास ते मत्ता रेंडु कार्यदिशा ता समस्या ना अध्ययन किया मंतोर। इदिनगडल बचोनो वरिष्ठ कार्यकर्ता लोरा राजनीतिक स्तर वेल्ले बेरसता। इद अध्ययन ताकनास्के कामरेड लोर वेल्ले सवालकु

तेहतोरा। केंद्रीय कमेटी ता राजनीतिक ब्यूरो इव सवाल कुना लोप्पाटल उचुक महत्वपूर्ण सवाल कुना बारे ते जवाब दोड़ रास्ता लेक्का हित्ताद मंता।

- 1) मना ऐतिहासिक अनभुव कुना अध्ययन कीयानास्के बद रुझान लागू कीयाना इंदाना सवाल ता जवाबा केंद्रीय कमेटी ता राय-पार्टी इतिहास लोप्पा तेदना सवाल कुना बारे ते माटु कार्यकर्ता लोर किन विचारधारात्मक रूप ते तम्मा समझदारी स्पष्ट कीयाना लेक्का बने कीयाना इंजी हींता। संगेने बोर कामरेड्स मुन्ने गलतिंग कित्तोर ओरा बारे ते निर्णय कीयानास्के नरम नीति लागू कीयाना। अस्केने कार्यकर्ता लोर किन मना पार्टी ऐतिहासिक अनुभव किन पूर्ण रूप ते समझमायना ओसो पाड़ना गलतिंग किन दोबारा कीयानायो। दूसरा, सब्बे कामरेड्स किन मावा सामूहिक कोशिश कुना काजे एकजुट कीयाना। मना पार्टी ता इतिहास लोप्पा छनतू-श्यू ओसो ली ली-सान ना गलत कार्यदिशांग ना खिलाफ महान संघर्ष ताकतांग इविना वेल्ले जरूरत मत्ता वेने। अविना लोप्पा लागू कित्ता तरीकांग लोप्पा कमी मत्तांग। उंदी, कार्यकर्ता लोर किन गलतिंग ना कारण कुना बारे ते, बद परिस्थिति ते गलतिंग आतांग अव परिस्थिति ना बारे ते, ओरकिन सुधरे कीयाना विस्तृत तरीका ना बारे ते पूरा विचाराधात्मक जानकारी हित्ताद हिल्ले। अदिन काजे इद्रम ता गलतिंग पेरके वेने आतांगे। दूसरा, व्यक्ति ना जिम्मेदारी पोगे वेल्ले ज्यादा जोर हियमूडाता। अदिना कारण ते तम्मा सामूहिक कोशिश कुना काजे मनम परताचोन लोकर किन एकजुट किया परवोम आतोमा। मनम इव रेंडु कमेजोरिंग निगडल सबक एतना। इंजे पार्टी इतिहास ता सवाल कुना पोगे विचारा कीयानास्के माटु उचुन कानरेड्स ना व्यक्तिगत जिम्मेदारी ते आयवा बद परिस्थिति ते अव गलतिंग आतांग अव परिस्थिति ना विश्लेषण कीसि, अविना विषय-वस्तु ओसो अविना सामाजिक, ऐतिहासिक ओसो विचाराधारात्मक मोदोल पोगे जोर हियाना। ओसो “मुन्ने वायना गलतिंग निगडल बचेमायला काजे

पाड़ना गलतिंग निगडल सबक एतना” ओसो “बीमार बचे कियाला काजे ओना बीमारी ता इलाज कीयाना” विचार कीयाना। इद्रम कित्तेके विचारधारा लोप्पा स्पष्टता तत्ताला ओसो कामरेड्स लोरा लोप्पा एकता स्थापित कीयाना दोहरा उद्देश्य किन हासिल किया परिमूडांता। अलग-अलग कामरेड्स लोरा समस्यांग पोरो विचार कीयानास्के सावधानी ते व्यवहार कीयाना। बदे पोल्लो पिस्सना वेने आयो ओसो कामरेड्स किन नुकसान वेने आयनायो, मना पार्टी मजबूत आयना ओसो कोडसना-पुंगार पूयना निशानी आंदू।

- 2) सब्बे सवाल कुना बारे ते विश्लेषणात्मक तरीका लागू कीमुट, हर चीज निषेध कीयानायो। उदाहरण तुकू, चौथा पूर्ण अधिवेशन¹ तल चुनई मीटिंग एवनल केंद्रीय कमेटी नेतृत्वकारी संगठ ता मार्गदर्शक कार्यदिशा ता सवाल ता रेंडु पहलुंग ना विश्लेषण कीयाना। उंदी बगिल केंद्रीय नेतृत्वकारी संगठन लागू कित्ता राजनीतिक कार्यनीति, सैनिक कार्यनीति ओसो कार्यकर्ता-नीति मुख्य रूप ते गलत मत्ता इंजी स्पष्ट कीयाना, मति दूसरा बगिल च्यांग काई-शेक ना विरोध कियान ओसो भूमि-क्रांति ओसो लाल सेना ता सशस्त्र संघर्ष किन ताकी कीयाना बुनियादी पोल्लोंग पोरो मना लोप्पा ओसो गलतिंग कित्ता कामरेड्स ना लोप्पा बदे मतभेद हिल्वा मत्ता। कार्यनीति संबंध ते पहलु ता विश्लेषण ता वेने जरूरत मत्ता। उदाहरण काजे, भूमि-समस्या पोरो ओरा अति-वामपंथी नीति ता गलती बाताल मत्ता इत्तेके ओरू जमांर लोर किन भूमि हीवा मत्तोर ओसो धनी किसान लोरकिन खराब जमीन हित्तोर। मति ओरू कामरेड्स जमींदार लोरा जमीन जवत कीसि किसान लोरा लोप्पा तूसना, भूमिहीन लेवेके उचुन जमीन मत्तोर किन तूसना इंदाना मना पोल्लो संगे सहमत आतोर। ठोस परिस्थित ता ठोस विश्लेषण कीयाना लेनिन ना अनुसार “माक्सवाद ता वेल्ले मूल वस्तु मंता, माक्सवाद ता जिंदा-वेलियाना आत्मा आंदू”²। विश्लेषणात्मक रुझान ता कमी मत्तांकु मना वेल्ले कामरेड्स जटिल समस्यांग ना बार-बार गहराई ते विश्लेषण ओसो अध्ययन

कियवा लेवा सीधा निष्कर्ष तेंडला विचार कींतोर। इद्रम ता निष्कर्ष पूराए गलत मंदिता लेवेके पूराए सही मंदिता। मना अखबार लोप्पा विश्लेषणात्मक लेख कुना कमी मंदिता ओसो मना पार्टी विश्लेषण ता आदत इंजे पूर्ण रूप ते लागू कित्ताद हिल्ले। इदिनगडले इद्रम ता कमी मंता इंजी समझेमांता। इंजेटल मनम मना परिस्थिति किन सुधरे कीयाना।

- 3) पार्टी ता छठी कांग्रेस ता दस्तावेज कुना पोरो बहस ता बारे ते। छठी राष्ट्रीय कांग्रेस ता कार्यदिशा बुनियादी रूप ते सही मत्ता इंजी जरूर वेहाना बारांकु इत्तेके इद कांग्रेस वर्तमान क्रांति ता स्वरूप ता व्याख्या कीयानास्के इदिन पूंजीवादी-जनवादी क्रांति इत्तोर। अनि तत्काल परिस्थिति किन रेंडु क्रांतिकारी उभार कुना नडमा ता कालम इत्तोर। अवसरवाद ओसो अभियानबाजी खंडन कित्ताद मत्ता, दससूत्री कार्यक्रम² घोषित कित्ताद मत्ता। इदे सब्बे सही मत्ता। इदु कांग्रेस ता वेने कमजोरिंग मत्तांग। उदाहरण तुकु, चीनी क्रांति ता वेल्ले दीर्घकालीन स्वरूप ओसो क्रांति लोप्पा ग्रामीण आधार-इलाकांग ना वेल्ले बेहरा महत्व किन तोहला विफल आता। इदे आयवा अदिना दूसरा कमी ओसो गलतिंग वेने मंतांग। मति छठी राष्ट्रीय कांग्रेस मना पार्टी ता इतिहास लोप्पा प्रगतिशील भूमिका निभे कित्ता।
- 4) 1931 ते शांघाई ते अस्थाई केंद्रीय नेतृत्वकारी संगठन निल्पी कित्तादु, ओसो ताना पेरके पांचवी पूर्ण अधिवेशन⁴ केयतादु सही हिल्ला मत्ता इंदाना सवाला। केंद्रीय कमेटी ता जवाब, इव रेंडासी सही मत्तांग, मति चुनाव काजे लागू कित्ता कार्यनीति कमजोर मत्ता अनि इद घटना किन उंदी ऐतिहासिक सबक समझेमायाना।
- 5) पार्टी इतिहास ते गुट कुना सवाल कुना पोरो। मना पार्टी इतिहास ते मुन्ने बद गुट मत्ता ओसो बदु उंदी बेसता भूमिका निभे क्वा लेवा मत्ता, अवु चुनई मीटिंग पेरके आता बदला ता कारण ते अवु इंजे हिल्लेंग इंजी वेहना जरूरी मंता। मना पार्टी लोप्पा रेंडु कार्यदिशा ना मना वर्तमान अध्ययन लोप्पा गुट कु मत्तांग ओसो ओसो बेसता

भूमिका निभे कीवोंग इंजी वेहाना वेल्ले जरूरत मंता। मति अद्रमाताए गलत राजनीतिक कार्यक्रम ओसो संगठनात्मक रूप कुनासंगे पार्टी लोप्पा गुट इंजे वेने मंता इंजी आल्सना गलत आयरा। पार्टी लोप्पा वेल्ले अंदरूनी संघर्षकु जनवरी 1935 ता चुनई मीटिंग, अक्तूबर 1938 ते छठी केंद्रीय कमेटी ता छठा पूर्ण अधिवेशन, सितम्बर 1941 ते राजनीतिक ब्यूरो ता विस्तृत अधिवेशन⁵, 1942 ते पार्टी-व्यापी दोष-निवारण आंदोलन ओसो 1943 ता हिरंगम कालम ता पार्टी लोप्पा रेंडु कार्यदिशांग नड़मा पाड़ना संघर्ष कुना अध्ययन कियाला काजे शरू कित्ता आंदोनल संगे बदला तत्ताद मंता। पाड़ना गुट खत्म आता। सिर्फ कठमुल्लावादी ओसो अभुववादी विचारधारा ता हिस्सांग पिस्तांग। इविन दोष-निवारण आंदोलन किन जारी तासिसी ओसो तेज कीसि दूर किया परमूड़ान्त। मति मना पार्टी लोप्पा लगभग हर जागा दोरकना सबसे खतरनाक रुझान उंदी अंधी “पहाड़ी दुर्ग” आंदू। उदाहरण तुकू विभिन्न शाखांग ना कामरेड्स नड़मा आपसी समझदारी, आपसी सम्मान ओसो अकता ता कमी मंता, ओरू काम कीयाना संघर्ष इलाकांग ना असमानतांग लोप्पाटल (उंदी आधार-इलाका ओसो दूसरा आधार-इलाका नड़मा ओसो जापान कब्जा ते मत्ता इलाकांग, क्वोमिंगतांग-शासित इलाकांग ओसो क्रांतिकारी आधार-इलाका नड़मा) ओसो ओरा काम ता विभाग कुना असमानतांग (उंदी फौजी यूनिट ओसो दूसरा फौजी यूनिट नड़मा ओसो उंदी रकम ता काम ओसो दूसरा रकम ता काम नड़मा) पैदा आंतांग। इदु अचोन गंभीर पोल्लो हिल्ले, मति इदु पार्टी ता एकता ओसो संघर्ष-क्षमता ता विकास ते वल्ले हरा बाधा वार्टिता। पहाड़ी दुर्ग (मेड्डा किला) रुझान ता सामाजिक ओसो ऐतिहासिक मोदोल चीन ते निम्न-पूँजीपति वर्ग ते लोकुरा संख्या विशेष रूप ते ज्यादा मंता ओसो मना ग्रामीण इलाकांग ना आधार इलाकांग किन वेल्ले कालम तिंची दुश्मन तोर उंदी इलाका किन दूसरा इलाका तल अलग-थलग कीसि तासतोर, इदिना मनोगत कारण पार्टी लोप्पा मत्ता

शिक्षा ता कमी। मना मुन्ने इंजे महत्वपूर्ण काम-मनम इव कारण कुन वेहाना ओसो कामरेड्स किन तम्मा कोंडा मुन्ने मत्ता हीकट किन दूर कियाला, ओरा राजनीतिक समझदारी ता स्तर किन पोरो तेहला, कामरेड्स ना लोप्पा अलवाग तत्ताना विचारधारात्मक कटघरा किन ओहचियाना ओसो आपसी समझदारी आपसी सम्मान ता विचार किन बेरसी कियाला प्रेरण हियाना। अस्केने पूरा पार्टी लोप्पा एकता स्थापित आया परिंता।

पूरा पार्टी लोप्पा इव सवाल कुन स्पष्ट समझेमातेके सिर्फ पार्टी लोप्पा वर्तमान अध्ययन-आंदोलन किन सफल बने कीयानाए आयवा चीनी क्रांति ता जीत वेने पक्का आया इंजी गारंटी कींता।

2

वर्तमान परिस्थिति ता रेंडु विशेषतांग मंतांगः उंदी, फासीवादी-विरोधी मोर्चा दृढ़ आसोर दाया मंता। फासीवादी मोर्चा कमजोर आयोर दाया मंता। दूसरा फासीवादी मोर्चा लोप्पा जन-शक्तिंग सुदृढ़ आसोर दाया मंता। जन-विरोधी शक्तिंग कमजोर आसोर दाया मंता। पहली विशेषता एकदम स्पष्ट ओसो तुरंत हूड़ा परमूडांता। हिटलर वेल्ले जल्दी हारेमायनूर अनि जापानी आक्रमणकारिंर वेने हारेमाया मंतोर। दूसरा विशेषता अचोन स्पष्ट हिल्ले अदिन काजे समझेमासोर हिल्ले। मति योरप ते ब्रिटिश, अमेरिका लोप्पा ओसो चीन ता दिव्या-दिव्या वेल्ले स्पष्ट आसोर दाया मंता।

चीनी ते जन-शक्ति ता विकास ता व्याख्या मना पार्टी किन तस्वीर ता केंद्र-बिंदु बने कीसि कीयाना जरूरत मंता।

जापानी आक्रमण विरोधी युद्ध ताकनास्के माना पार्टी ता विकास किन मूंड मंजिल कुने तूसमूडांता। पहली मंजिल 1937 तल 1940 एवनला। इद मंजिल तुकु मुन्ने रेंडु साल लोप्पा 1937 ओसो 1938 ते, जापानी युद्ध-सरदार क्वोमिंगतांग किन प्रमुख ओसो कम्युनिस्ट पार्टी किन गौण समझेमाताद मत्ता। अदिन काजे ओरू तम्मा मुख्य शक्ति क्वोमिंगतांग मोर्चा ता खिलाफ वाटतोर अनि क्वोमिंगतांग पोरो तम्मा नीति सैनिक

आक्रमण किन प्रधानता ओसो आत्मसमर्पण कियाला काजे राजनीतिक लालच तोहना नीति लेक्का लागू कित्तोर। कम्युनिस्ट पार्टी ता नेतृत्व ते जापान विरोधी आधार इलाकांग मत्तांग अविन किन जापानीर बदे महत्व हीवोर आतोर। ओरा हिसाब ते अगा मुट्टामेंड कम्युनिस्ट लोर मत्तोर, ओरू छापामार लड़ाई लड़ेमाया मंतोर। मति अक्तूबर 1938 ते ऊहान पोरो अधिकार कित्ता पेरके जापानी साम्राज्यवाद तम्मा नीति किन बदले कीयाना ओसो कम्युनिस्ट पार्टी किन प्रमुख ओसो क्वोमिंगतांग किन गौल समझेमायना शुरू कित्तोर। क्वोमिंगतांग पोरो ओरा नीति लोप्पा आत्मसमर्पण कियाला काजे राजनीतिक लालच तोहना नीति प्रमुख आता। ओसो सैनिक आक्रमण अदुना पूरक बनेमाता। इदिन संगे ओरू तम्मा मुख्य शख्ति तीरम-तीरम कम्युनिस्ट लोरा विरुद्ध वाटतोर, बारांकु इत्तेके जापानी साम्राज्यवादीर इंजे क्वोमिंगतांग तुकु ज्यादा खतरनाक कम्युनिस्ट पार्टी मंता इंजी समझेमातोर। 1937 ओसो 1938 लोप्पा क्वोमिंगतांग प्रतिरोध युद्ध काजे तुलनात्मक रूप ते ज्यादा कोशिश कित्ता, मना पार्टी संगे ताना संबंध तुलनात्मक रूप ते बेस मत्ता, अदु जनता किन जापान विरोधी जनआंदोलन पोरो वेल्ले प्रतिबंध वाटतेकाई तुलनात्मक रूप ज्यादा आजादी तासिस मत्ता। मति ऊहान पतन आता पेरके युद्ध लोप्पा तन्ना हार आता कारण ओसो कम्युनिस्ट पार्टी पोरो तम्मा बेरसोर मत्ता दुश्मनी ता कारण ते, क्वोमिंगतांग तीरम-तीरम वेल्ले प्रतिक्रियावादी आसोर दाया मंता। कम्युनिस्ट पार्टी ता खिलाफ ज्यादा सक्रिय ओसो प्रतिरोध-युद्ध लोप्पा ज्यादा निष्क्रिय आसोर दाया मंता। 1937 ते गृहयुद्ध कालम तेकारण कम्युनिस्ट पार्टी लोप्पा सिर्फ 40 हजार संगठित सदस्य ओसो 30 हजार सैनिक मत्तोर। जापानी युद्ध सरदार लोर इदिन हेय समझेमातोर। मति 1940 ते पार्टी सदस्यता 8 लाख एवता, सेना बेरससी लगभग 5 लाख आता अनि आधार इलाकांग ना कुल जनसंख्या, तीना लोप्पा माकिन अनाज टैक्स हियानोर, मना किन ओसो जापानीर, कठपुतली मत्ता लोकर किन अनाज टैक्स हियाना⁷ लोकर शामिल मत्तोर, लगभग 10 करोड़ मत्तोर। मना पार्टी उचुन साल लोप्पाने युद्ध ता वेल्ले

बेहरा इलाका मुक्त कित्तोर। लगभग साढ़े-पांच साल एवनल माटु क्वोमिंगतांग मोर्चा ता खिलाफ जापानी हमलावर लोरा मुख्य शखित ता रणीतिक आक्रमण किन रोमी कीसि तासता, दुश्मनत इव सेनांग किन तम्मा बगिल आकर्षित कित्ता, क्वोमिंगतांग किन संकट तिंची बचे कित्ता ओसो दीर्घकालीन प्रतिरोध युद्ध जारी तासता। मति इद मंजिल ते मना पार्टी ते उचुन कामरेड्स लोर उंदी गलती कित्तोर। ओरू जापानी साम्राज्यवाद शक्ति किम कम आल्सतोर (अदिन काजे ओरू युद्ध ता दीर्घकालीन ओसो क्रूर स्वरूप किन हूडा परवोर ओरू बेहरा-बेहरा फारेसन संगे चलायमान लड़ाई किन प्रमुख बने कीयाना पक्ष एतितोर अनि छापामार युद्ध किन कम महत्व हितोर), क्वोमिंगतांगा पोरो भरोसा कीसि शांतिपूर्वक उंदी स्वतंत्र नीति लागू कियाला सफल आतोर(क्वोमिंगतांग पोरो आत्मसमर्पण ओसो साहस संगे स्वतंत्र रूप ते जन-समुदाय किन गोलबंद कीसि दुश्मन ता इलाका ते जापान विरोधी जनवादी आधार इलाका बने कीयाना ओसो पार्टी ता नेतृत्व ते लडेमायना सेना किन वेल्ले ज्यादा बेरसी कीयाना नीति पोरो अमल कीयाना लोप्पा दुलमुलपन उत्पन्न आता)। अस्के ने मना पार्टी वेल्ले पूना सदस्य लोर किन भर्ती कित्ता, ओरू अनुभवहीन मत्तोर, ओरू दुश्मन ता इलाका ते सब्बे पूना-पूना आधार इलाकांग स्थापित कित्ता मति अवु सुदृढ़ हिल्ला मत्ता। इद मंजिल ते आम परिस्थिति अनुकूल मत्तांकु मना पार्टी ओसो सेना बेरसतांकु पार्टी लोप्पा उंदी रकम दम्भ() ता भावना उत्पन्न आता, वेल्ले सदस्य लोरा दिमाग ते नेंगता। मति इद मंजिल ते मना पार्टी लोप्पा दक्षिणपंथी भटकाव किन दूर कित्ता उंदी स्वतंत्र नीति लागू कित्ता। माटु सिर्फ जापानी साम्राज्यवाद किने करारा जवाब हियाना, आधार इलाका बने कितोम ओसो आठवीं राह सेना, पूना चौथी सेना किन बेरसी कीयानाए आयवा क्वोमिंगतांग तुकु मुन्ने कम्युनिस्ट-विरोधी हमला किन वेने हारे कित्ताद मंता।

1941 ओसो 1942 ते दूसरा मंजिल मत्ता। ब्रिटिश ओसो अमेरिका ता खिलाफ युद्ध ता तैयार कीयाना ओसो अदिन ताकी कियाला काजे जापानी साम्राज्यवादिर तम्मा ऊहान ता पतन आता पेरके लागू कित्ता,

क्वोमिंगतांग आयवा कम्युनिस्ट पार्टी खिलाफ ज्यादा ताकत वाटना नीति किन जोरशोर ते अमल कित्तोर। ओरू मना पार्टी किन तम्मा हमला किन निशाना वाटसी तम्मा मुख्य शक्ति ता ज्यादा हिस्सा किन कम्युनिस्ट नेतृत्व वाले सब्बे आधार इलाकांग ना गर्रे-गर्रे जना कित्तोर अनि उंदी पेरके उंदी “खत्म कीमुट” अभियान ताकी कित्तोर अनि “मुन्ने वात्ता सब्बे चीजकुन पोत्तिह कीमुट, मुन्ने वात्ता सब्बे तोर किन होकाटु, मुन्ने वाती सब्बे चीज कुना लूटे कियमूट” इंदाना बर्बर नीति पोरो अमल कित्तोर। तीना कारण ते 1941-42 ता रेंडु साल ते मना पार्टी वेल्ले गंभीर मुश्किल परिस्थिति ना सामना किया लागता। इद मंजिल ते पार्टी ता आधार इलाकांग कम आतांग, आबादी पांच करोड़ तुकु कम आता। आठवीं राह सेना घटेमासी तीन लाख पिस्ता, मना कार्यकर्ता लोरा बेहार संख्या नुकसान आता। मना वित्तीय-आर्थिक परिस्थिति वेल्ले कमजोर आता। इद्रम ता परिस्थिति ते क्वोमिंगतांग तन्ना किन दबाव तल मुक्त आसी मना पार्टी ता खिलाफ बचोनो षडयंत्र कुना इस्तमाल कित्ता। तम्मा दूसरा बेहरा कम्युनिस्ट विरोधी हमला शुरू कित्ता ओसो जापानी साम्राज्यवादीरा संगे सांठगांठ कीसि मावा पोरो हमला कित्ता। मति इद कठिन परिस्थिति माट कम्युनिस्ट लोर किन शिक्षित कित्ता ओसो माटु वेल्ले पोल्लोंग करियतोमा। माटु दुश्मन ता “खत्म कीमुट” वाले अभियान संगे मना इलाका किन “खत्म कीयाना” नीति^१ ता, अदिना “मुन्ने अरता सब्बे चीजकुन पोत्तिह कीयाना, मुन्ने वात्ता सब्बे तोर किन हौकना, सब्बे लूटे कीयाना” नीति ता ओसो राजनीतिक रूप ते लालच तोहना नीति ता मुकाबल कियाला करियतोर। माटु संयुक्त मोर्चा राजनीति सत्ता ता संगठन लोप्पा “तीन-तिहाई व्यवस्था” किन लागू कीयाना, भूमि-नीति किन अमल कीयाना, तम्मा अध्ययन-शैली, पार्टी-संबंध किन निभे कीयाना शैली ओसो लेखन-शैली किन सुधरे कियाला काजे दोष-निवारण आंदोलन ताकी कीयाना, बेसता फौज ओसो सरल प्रशासन ता नीति किन अमल कीयाना, एकीकृत नेतृत्व ता नीति किन अमल कीयाना, सरकार ता समर्थन कीयाना ओसो जनता संगे घनिष्ठ संबंध बेरसी कीयाना आंदोलन ताकी कीयानाष उत्पादन विकास कियाला

करियाना ओसो करियाना शुरू कितोम। माटु पहली मंजिल ते पैदा आता वेल्ले लोकुरा घमंड भावनांग, मना वेल्ले कमजोरिंग किन दूर कीतोम। दूसरा मंजिल लोप्पा माकिन वेल्ले नुकसान तेहा लागता मति माटु गड्ढिंग नितसी मत्तोम। माटु उंदी बगिल जापानी आक्रमणकारिरा हमलांग किन हारे कितोम ओसो दूसरा बगिर क्वोमिंगतांग ता दूसरा बेहरा स्तर ता कम्युनिस्ट विरोधी हमला किन हारे कीतोम। कम्युनिस्ट पार्टी पोरो क्वोमिंगतांग ता हमला ता कारण ओसो अव संघर्ष कुना कारण ते माकिन मना बचाव कियाला काजे किया लागतांकु मना पार्टी लोरा उंदी रकम ता अति-वामपंथी भटकाव पैदा आता, अदिना कारण क्वोमिंगतांग-कम्युनिस्ट पार्टी ता एकता जल्दिए देगियर इंजी विश्वास पैदा आयनादु मत्ता। अद्रमासी जर्मीदार लोरा पोरो वेल्ले हमला कियामूडाता अनि पार्टी ता बाहर मत्ता समर्थक लोरा संगे एकता कियानदिन नजरअंदाज कीयाना आता। मति माटु इद भटकाव के वेने दूर कीतोम। क्वोमिंगतांग पैदा किता भटकाव ता विरुद्ध संघर्ष ते माटु “न्यायोचित आधार, ता फायदा हूडसी ओसो संयुक्त रूप ते” संघर्ष चाकी कीयाना सिद्धांत ता समर्थन कीतोम ओसो संयुक्त मोर्चा ता काम ते “एकता, संघर्ष, संघर्ष संगे एकता” ता जरूरत पोरो जोर हीतोम। इद्रम माटु जापान विरोधी राष्ट्रीय संयुक्त मोर्चा पूरा देश लोप्पा ओसो मना आधार इलाकांग लोपा अखंडता ता निर्माण कीतोम।

तीसरी मंजिल 1943 तल इंजे एवनल मत्ता। मना विभिन्न नीतिंग वेल्ले कारगर साबित आतांग, विशेष रूप ते दोष-निवारण आंदोलन ओसो उत्पादन ता विकास ता कारण ते मना पार्टी विचारधारात्मक ओसो भौतिकरेंडासी लोप्पा जीडता। इदे आयवा हत्ता साल माटु कार्यकर्ता लोरा पाइना इतिहास जांच कीयाना स ता बारे ते मना नीति किन ओसो गुप जासूस लोरा पर्दाफाश कीयाना मना नीति बद्रम ताकी कीयानादु करियाना शुरू कीतोम, करियाना शुरू कीतोम। इद्रम ता परिस्थिति ने मना आधार इलाकांग ओसो बेरसतांग, अविना जन संख्या 8 करोड़ तुकू ज्यादा एवता ताना लोप्पा सिर्फ मनाकिन अनाज टैक्स हियानोर, जापानीर-कठपुतलीर

किन ओसो मनाकिन अनाज टैक्स हियानोर शामिल मंतोर। मना सेना ता संख्य 4,70,000 ओसो मना मिलिशिया ता संख्य 22,70,000 ओसो मना पार्टी सदस्यता 9 लाख तुकू वेने ज्यादा एवता।

1943 ते जापनी युद्ध-सरदार लोर चीन पोरो लागू कित्ता तम्मा नीति ते बदे खाल बदलाव कित्ताद हिल्ले। तम्मा मुख्य हमला कम्युनिस्ट पार्टी खिलाफ जारी तासितोर। मूंड सालकुनल ज्यादा कालम तल 1941 तल इंजे एवनल, चीन लोप्पा मत्ता जापानी सेना ता 60 प्रतिशत ज्यादा सैनिक मना पार्टी ता नेतृत्व वाले जापान विरोधी इलाकांग पोरो दबाव वाट मंतोर। इव साल कुना लोप्पा बचोनो लाख क्वोमिंगतांग सैनिक लोर जापानी साम्राज्यवादीरा हमलांग ना सामना कियाला असफल आतोर, लगभग आधा सैनिक लोर आत्मसमर्पण कित्तोर। लगभग आधा खेती ता जमीन पिस्ता ओसो सिर्फ मुड्डामेंड सैनिक लोरे पेरेके रिटिरिट आसी वातोर। क्वोमिंगतांग ता आत्मसमर्पण कित्ता सैनिक लोर जापानी लोरा संगे कलियतोर ओरू मना पार्टी पारो आक्रमण कित्तोर। इद्रम पार्टी किन 90 प्रतिशत तुकु ज्यादा कठपुतली सैनिक लोरा संगे लड़ेमाया लागता। क्वोमिंगतांग किन स्रफ 40 प्रतिशत तुकू कम सेना ओसो 10 प्रतिशत तुकु कम कठपुली सेना ता मुकाबला किया लागता। अक्तूबर 1938 ते ऊहान ता पतन तल पूरा साढ़े पांच साल एवनल जापानी युद्ध-सरदार क्वोमिंगतांग मोर्चा खिलाफ उंदी वेने रणनीतिक आक्रमण कित्ताद हिल्ले। तुलनात्मक रूप ते उचुके बेहरा अभियानकु(चच्यांग-च्यांगशी, छांगश, पश्चिमी हुपे, दक्षिणी हनान ओसो छांगते लोप्पा) ताकी कित्ताद मत्ता। इविन अभियानकु वेल्ले सुडला मत्तांग, ओरू तम्मा असल ध्यान मना पार्टी नेतृत्व मत्ता जापान विरोधी आधार इलाकांग पोरो केंद्रित कीसि तास्तोर। इद परिस्थिति ते क्वोमिंगतांग “मेड्वांग बगिल रिटिरिट आयना ओसो “लड़ेमायनास्के दूसरोर किन हूडसोर” मंदाना नीति लागू कित्ता। अदु सिर्फ दुश्मन बेरसतास्के ने हमला रोमी कीयानादु। दुश्मन पेरेके गुचतास्के अदु आराम कियानदु। 1943 ते क्वोमिंगतांग तन्ना स्थानीय नीति लोप्पा ओसो

ज्यादा प्रतिक्रियावादी बने माता अदु तन्ना कम्युनिस्ट विरोधी तीसरा बेहरा हमला कित्ता, इदिन किन माटु पेरेक तुरसितोमा।

1943 तल इयेटा वसंत-कालन एवनल, प्रशान्त माहासागर ता मोर्चा ते जापानी हमलावर लोर कमजोर आया मंतोर। अमेरिका तन्ना प्रत्याक्रमण किन तेज कित्ता, इंजे पश्चिम ते सोवियात संघ ता लाल सेना ता जबरदस्त हमलांग हिटलर किन सांगि किया मंतांग। तम्मा हार तिंचि बचेमायला काजे जापानी साम्राज्यवादिर पेफिंग-हानखओ ओसो हानाओ-क्वांगचओ रेलवे किन ताकी कियाला काजे आल्सतोर। अनि हुंगकिंग ते क्विंगतांग किन आत्मसमर्पण काजे तैयार कीयाना नीति ते असफल आतोर। अदिन काजे ओरू अदिना पोरो ओसो उंदी हमला कीयाना जरूरी समझेमातोर। ओरू इयेंड क्वोमिंगतांग पोरो बेहरा हमला कीयाना योजना कित्तोर। हनान अभियान ¹⁰ उंदी महीना तुकू ज्यादा कालम तल ताकसोर मत्ता। दुश्मन सेना ता अगा सिर्फ उचुने डिविजनकु मंतांग मति बचोनो लाख क्वोमिंगतांग सैनिक लोर लडेमायवा लेवा मैदान विडस्तोर, सिर्फ अलग-अलग पोरोल ता सेनांगे उचुन मुकाबला कीतांग। थांग अन-पो ना कमान ते एकदम अराजकता फैलेमाता। अफसर तम्मा सैनिक लोरा संगे ओसो सैनिक जनता संगे सम्पर्क हिल्ला अदिन दो-तिहाई तुकु ज्यादा सैनिक-शक्ति खत्म आता। इद्रमे हनान ते लोहता हू चुंग-नान डिविजनकु, दुश्मन संगे पहली मुठभेड ते हारेमातांग। इदु क्वोमिंगता हत्ता उचुक सालकुना लोप्पा वेल्ले ध्यान हीसी लागू कित्ता ओरा प्रतिक्रियावादी नीतिंग ना कारण ते आता। ऊहान पतन आता पेरेके साढे पांच साल लोप्पा कम्युनिस्ट पार्टी ता नेतृत्व मत्ता मुक्त इलाकांग ना युद्ध मोर्चा जापानी ओसो कठपुतली सेनांग ना मुख्य शक्ति ता मुकाबला कित्ता। वायना कालम ते उचुन बदलवाकु आया परिंतांग, मति अवु सिर्फ अस्थाईए मंदितांग। बारांकु इत्तेके क्वोमिंगितांग जापाना ता निष्क्रिय प्रतिरोध कियाला ओसो कम्युनिस्ट लोरा सक्रिय विरोधी कीयाना प्रतिक्रियावादी नीति लागू किया मंता। अद्रमासी अद गंभीर रूप ते पतन आयार ओसो हारेमायनादु पक्का मंता। इद्रम आतेके मना पार्टी ता

जापानीर ओसो कठपुतली लोरा संगे लड़ेमायाना काम ओसो ज्यादा बेरसियार। साढ़े पांच साले एवनल आराम किसोर मत्ता क्वोमिंगतांग दोरकि कित्ता सफलता अदिना लड़ेमायाना क्षमता घटेमातादु मंता। साढ़े पांच साल एवनल कठोर लड़ाई ओसो संघर्ष संगे कम्युनिस्ट पार्टी दोरकी कित्ता सफलता अदिना लड़ेमायाना क्षमता बेरस्तादू मंता। इदिनगडले चीन ता पिस्वल ता फैसला आयार।

कामरेड्स जुलाई 1937 पेरेके सात साल लोप्पा मना पार्टी ता नेतृत्वा ते जनता ना जनवादी शक्तिंग मूंड मंजिल कुन वेंडतादु हूडा पिरंतोर- उत्तान, पतन ओसो पूना उत्थान। माटु जापानीरा क्रूर आक्रमण किन हारे कीतोम, व्यापाक क्रांतिकारी आधारा इलाकांग स्थापित कीतोम, पार्टी ओसो सेना रेंडासी वेल्ले विकसिता आतांगा, क्वोमिंगतांग ता कम्युनिस्ट विरोधी मूंड हमलांग किन विफल कीतोम ओसो पार्टी लोप्पा दक्षिणपंथी ओसो “वामपंथी” गलता विचार कुन दूर कीतोम ओसो पूरा पार्टी वेल्ले मूल्यवा अनुभवकु दोरकी कित्ता। हत्ता सात साल कुना लोप्पा मना काम ता निचोड़ आंदू।

मना इंजेटा काम मना किन इदिनकु वेने बेहरा जिम्मेदारी काजे तैयार किया लागियर। मनम जापानी हमलावर किन बद्रमाई कीसि चीन तल पूंडना तैयारी कीयाना। पार्टी किन इद जिम्मेदारी एतना लेक्का बने कियाला काजे मन मनापार्टी किन मना सेना किन ओसो मना आधारा इलाकांग किन ओसो बेरसी कीयाना, सुदृढ़ कीयाना। मनम बेहरा शहर कु ओसो दायना वायना मुख्य लाईन कुना काम पोरो ज्यादा ध्यान हियाना, शहर ता काम किन आधारा इलाकांग ना काम लक्का महत्वपूर्ण बने कीयाना।

आधार इलाकांग लोप्पा मना काम ता संबंध- पहली मंजिल ते इलाकांग किन बेरसी कीतोम मति सुदृढ़ कित्ताद हिल्ले। अदिन काजे दूसरा मंजिल ते दुश्मन तोर हमला कित्तोर इत्तेके कमजोर आतांदा। दूसरी मंजिल ते मना पार्टी ता नेतृत्व ते मत्ता सब्बे जापान-विरोधी आधार इलाकांग सब्बे अग्नी-दीक्षा() तल वेंडतांग अनि पहली मंजिल तुकु

ज्यादा मजबूत आतांगा कार्यकर्ता लोर ओसो पार्टी-सदस्य लोरा विचाराधारात्मक ओसो राजनीतिक स्तर वेल्ले बेरसता। ओरू मुन्ने पुनवा बचोनो पोल्लोंग करियतोर। मति विचाराधारात्मक पोल्लोंग स्पष्ट कीयाना नीति ता अध्ययन कीयाना लोप्पा वेल्ले टाईम पोयता, मनम ओसो वेल्ले करियाना मंता। मना पार्टी इंजे वने वेल्ले मजबूत हिल्ले, ताना लोप्पा एकता ओसो दृढ़ता वेने वेल्ले कम मंता। अदिन काजे माटु इंजे बचोन जिम्मेदारी एतताद मंतायो अदिनकु ज्यादा जिम्मेदारी एता परवोमा इंजेटल मना समस्या प्रतिरोध-युद्ध किन जारी तासिसी मना पार्टी, सेना ओसो आधार-इलाकांग किन बेरसी कीयाना सुदृढ़ बने कीयाना मंता। वायना कालम ता महान काम संबंध ते मना विचारधारात्मक ओसो भौतिक तैयार कीयाना जरूरत मंता। इद तैयारी लेवा माटु जापान सेना किन हौकना लेवेके पूंडा परवोम ओसो पूरा चीन किन मुक्त किया परवोम आयकोम।

बेहरा शहर कुने दायना-वायना मुख्य हरीं ने मना काम हमेशाए हलाचोन मन्नो आंता। इंजे माटु बेहरा-बेहरा शहरकुना लोप्पा दायना-वायना हरीं ने जापानी साम्राज्यवाद तिंची उत्पीड़ित लाखों-करोड़ों मेहनकश जनता ओसो नगरवासिर किन पार्टी हेरे-हेरे जमा कीयाना कोशिश कियवेके, सशस्त्र जन-विद्रोह ना तैयारी कियवेके, शहर तिंची सहयोग दोरकवा कारण ते मना सेना ओसो ग्रामीण आधार इलाकांग किन सब्बे रकम ता मुश्किल कुना सामना कियाला लागिंय। दस साल तुकु ज्यादा कालम तल माटु ग्रामीण इलाकांग लोप्पा मंतोम। अदिन काजे माटु लोकुर किन ग्रामीण इलाकांग किन वेल्ले बेस समझेमायना ओसो ग्रामीण आधार इलाकांग स्थापना कियाला काजे प्रोत्साहित कीतोम। इव दस सालकु कालम लोप्पा शहर ते विद्रोह ता तैयारी ता काम इत्तेके पार्टी ता छठी राष्ट्रीय कांग्रेस ता फैसला कित्ता लेक्का, आया परताद हिल्ले ओसो आया परवो वेने। मति इंजे परिस्थिति बदलेमाता ओसो सातवी राष्ट्रीय कांग्रेस पेरके छठी राष्ट्रीय कांग्रेस ता प्रस्ताव किन अमल किया लागिंय। सातवी कांग्रेस परताचोन जल्दी आयर अनि शहर कुना लोप्पा मना काम

किन सुदृढ़ बने कियाला ओसो देशव्यापी जीत हासिल कीयाना समस्यांग पोरो विचार कियमूड़ायर।

इंजे ताकसोर मत्ता शेनशी-कानसू-निंगश्या हंदी इलाका ता औद्योगिक सम्मेलन, वेल्ले महत्वपूर्ण मंता। हंदी इलाका लोप्पा फैक्टरी मजदूर लोरा संख्य 1937 ते सिर्फ 700 मत्ता। 1942 ते इदु 7,000 आता, इंजे 12,000 आता। इव आंकड़ांग किन नजदअंदाज कियमूड़ायो। इंजे माटु आधार इलाकांग लोप्पा मत्तेकाई माटु बेहरा शहर कुना उद्योग, व्यापार ओसो दायाना-वायना ता प्रशासन-कार्य करियाना, लेवेके टाईम वात्तास्के मनम बटुहनेए हूडसोर मंदाकोम। वायना कालम काजे मना विचारधारात्मक ओसो भौतिक तैयारी लोप्पा दूसरा जरूरी काम मनम बेहरा-बेहरा शहर कुना लोप्पा दायना-वायना मुख्य लाईनकुने हथियारबंद विद्रोह किन संगठन कीयाना ओसो उद्योग, व्यापार ता प्रशासन-कार्य करियानादु मंता। इदु तैयारी हिल्ला माटु जापानी सेना किन पूजा परवोम।

3

पूना जीत हासिल कियाला काजे मनम मना पार्टी ता कार्यकर्ता लोर किन ओरू बोजा कांजना तुकु बचेमायला काजे मशीनरी चालू कीयाना इंजी आह्वान कीयाना। “बोजा कांजना तल बचेमायना” इत्तेके तम्मा दिमाग ते मत्ता बचोनो बाधांगनगडल मुक्त आयना। वेल्ले चीजकु मना दिमाग ता बोजा लेवेके मना हरदा बाधा बनेमांतांग। मनम मना कौंडा मुचसी अविन गुण-दोष कुना विवेचना कियवा लेवाए अविना संगे तुंडसी मंतोम। उचुक उदाहरणकु हूड़ाटु। गलतिंग कित्ता पेरके मीवा दिमाग ते अव गलतिंग बस्केने हनवा लेक्कटा विचार वांता अदिन काजे मायूसी ता शिकार आया परिंतिरा। मीटु गलतिंग कीवेके मीवा दिमाग ते गलती किवा मंदांना घमंड पैदा आया परिंता। काम ते सफलतांग होरकी कियवा मत्तेके निराशा ओसो आत्मविश्वास कमजोर आया परिंता। अनि सफलतांग दोरकतेके घमंड पैदा आया परिंता ओसो पोंगडिंग कीयाना परिस्थिति पैदा आंता। बोरु कामरेड्स किन संघर्ष ता ज्यादा अनुभव हिल्ले इंजी

जिम्मेदारी एतला तैयार आयोर आंतोर। ओसो पाड़ना अनुभव तासना कामरेड्स तम्मा संघर्ष ता दीर्घकालीन अनुभव ता कारण ते घमंड तोहा परिंतोर। मजदूर-किसान कामरेड्स तम्मा वर्ग-उत्पत्ति ता घमंड ते बुद्धिजीविर किन तम्माकिनकु दोड़े हूडिंतोर। ओसो बुद्धिजीविर तम्मा बदेआई उचुन ज्ञान दोरकी कीसि मत्तांकु मजदूर-किसान कामरेड्स किन तम्माकिनकु दोड़ हूडिंतोर। बदे वेने विशेष क्षमता ता कारण ते घमंड ता रुझान ओसो दूसरोर किन कमजोर समझेमायना रुझान पैदा आया परिंता। जवान लोकर तम्मा स्फूर्ति ओसो क्षमता ता कारण ते मुयतोर किने सुडला हूडा वेने परिंतोर। दूसरा बगिल मुयतोर तम्म अनुभव ता कारण ते जवान लोरकिन सुडला हूडा परिंतोर। गुण-दोष ता विविचना किवेके इद्रम ता सब्बे चीजकु मना हरदे बाधा वाटिंतांग ओसो मना तल्ला बोझा वाटिंतांग। इद्रम ता बोदा किन तेहची मत्ता कारण ते उचुन कामरेड्स जनता तल अलग मंजी वेल्ले घमंडी बनेमांतोर अनि बार-बार गलतिंग कींतोर। जनता संगे मंदाना ओसो कम गलतिंग कियाला काजे इदु उंदी जरूरी शर्त मंता-मानेय किन तन्ना बोजा ता जांच कीयाना अनि अदिनगडल तन्ना दिमाग किन मुक्त कीयाना। मना पार्टी ता इतिहास लोप्पा बचोनो बेरा इद्रम बोजा कांजतांकु मनाकिन नुकसान तेहा लागता। पहली बेरा 1927 ता पूर्वार्थ ते। उत्तरी अभियान सेना ऊहान एवसी मत्ता ओसो उचुन कामरेड्स वेल्ले घमंड ते वासी ओरू तम्मा पोरो क्वोमिंगतांग हमला कियार इंदानदु वेने मरंगतोर। अदिना कारण ते छन तू-श्यू कार्यदिशा ता गलती आता, अद्रमासी क्रांति असफल आता। दूसरी बेरा 1930 ते-फंग य्वी-श्यांग ओसो येन शी-शान ना विरुद्ध च्यांग काई-शेक ना व्यापक युद्ध¹¹ तल फायद एतसी लाल सेना बचोनो लड़ाईंग जीडता। अद्रमासी कामरेड्स ओसो उंदी बेरा घमंडी बनेमातोर। अदिना कारण ते ली ली-सान कार्यदिशा ते गलती आता। इदिनगडल क्रांतिकारी शक्तिंग किन ओसो उंदी बेरा नुकसान तेहा लागता। तीसरी बेरा 1931 ते- लाल सेना क्वोमिंगतांग ता “घेराव कीयाना ओसो विनाश कीयाना” तीसरी अभियान किन विफल कित्ता। ताना तुरंत पेरके जापानी आक्रमण खिलाफ पूरा देश ता जनता उंदी

उर्ग वेडिय लेक्का वीरतापूर्वक जापान विरोधी आंदोलन ताकी कित्ता। अस्के ओसो उंदी बेरा मना कामरेड्स घमंडी बनेमातेरा। इदिना कारण ते राजनीतिक कार्यदिशा ते मुन्ने तुकू बचोनो बेहरा गलती आता। इदिनागडल मना वेल्ले मेहनत कीसि जमा कीसि मत्ता लगभग 90 प्रतिशत क्रांतिकारी ताकत खत्म आता। चौथी बेरा 1938 ते- प्रतिरोध-युद्ध शुरु आसी मत्ता ओसो संयुक्त मोर्ता स्थापित आसी मत्ता। अस्के ओसो उंदी बेरा मना कामरेड घमंडी बनेमातेरा। अनि छन तू-श्यू ना कार्यदिशा संगे कलियना लेक्काट गलती कित्तोरा। तीनो लोप्पा क्रांतिकारी काम किन वीर कामरेड्स ना गलत विचार कुना प्रभाव मत्ता जागा ने विशेष रूप ते ज्यादा धक्का देलगता। घमंडी ओसो गलतिंग ना उदाहरण कुनगडल मना पूरा पार्टी कामरेड्स किन सबक एतना जरूरत मंता। इंजेटा परिस्थिति ते कामरेड्स इद्रम ता गलतिंग लोप्पटल सबक एतना ओसो सफलतांग दोरकी कित्तास्के घमंडी बनेमासी दुबारा अव गलतिंग कीयानायो इंजी माटु ली चि-छंग ता बारे ते क्वो मो-जो ना लेख¹² दुबारा प्रकाशित कित्ताद मंता।

“मशीनरी चालू कीयाना” इत्तेके दिमाग ता सही उपयोग कीयाना। उचुन मुल तम्मा दिमाग ते बोजा तासोर आंतोर ओसो ओरा लोप्पा जनता संगे सम्पर्क तासना गुण मंता, मत्तेकाई वेने ओरू बदे सफलता दोरकी कियाला असफल आंतोर, बारांकु इत्तेके ओरू सही तरीका ते आल्सला पुन्नोर आंतोर ओसो ओरा दिमाग किन ज्यादा गहराई ते आल्सला काजे इस्तेमाल कियाला तैयार आयोर आंतोर। दूसरा लोकर तम्मा दिमाग किन इस्तेमाल कियाला इनकार कींतोर बारांकु इत्तेके ओरू तम्मा बुद्धि किन दबे कीसि तासिस मत्ता बोजा कांजिसि मंदिंतोर। लेनिन ओसो स्टालिन हमेशा लोकर किन तम्मा दिमाग कि इस्तेमाल कीयाना इंजी सलाह हींतोर अद्रमासी मनम वेने इदे सलाह हियाना। इद यंत्र-दिमाग- ता विशेष काम मंता आल्सना। मेनशियस वेहत्ता लेक्का, “मस्तिष्क ता काम चिन्तन कीयाना मंता।”¹³ ओरू मस्तिष्क ता काम ता बारे ते सही वेहची मत्तोरा। माटु हमेशा मना दिमाग किन इस्तेमाल कीयाना ओसो हर चीज पोरोर

वेल्ले बारीकी ते विचार कीयाना। उंदी हट्टे मंता “मना दिमाग पोरो जोर वाटतेके, मीकिनर जरूर बदे आई तरीका समझेमायरा” दूसरा माटा ने ज्यादा चिन्तन-मनन कित्तेके बुद्धि ताविकास आंता। आल्सवा लेवा समझेमायवा लेवा काम कीयाना तरीका तल मुक्त आयमूडायरा। इद्रम ता रुझान मना पार्टी गंभीर रूप ते मंता, मनम मना कामरेड्स किन ओरू चिन्तन-मनन कीयाना इंजी प्रोत्साहित कीयाना। विश्लेषण कीयाना तरीका करियाना ओसो विश्लेषण कीयाना आदत वाटना। मना पार्टी लोप्पा इदु आदत वेल्ले कम मंता। मनम बोजा तल बचेमातेके ओसो मशीनरी चालू कित्तेके, मनम हल्को आसी गहराई ते आल्सना शुरू कित्तेके मना जीत पक्का आयारा।

नोट

1. चीनी कम्युनिस्ट पार्टी ता छठी केंद्रीय कमेटी ता चौथा पूर्ण अधिवेश जनवरी 1931 ते कित्ताद मत्ता।
2. वी.आई. लेनिन “कम्युनिज्म”। “चीन ता क्रांतिकारी युद्ध ता रणनीतिक समस्यांग”, नोट 10 (“माओ त्सेतुंग ना संकलित रचनांग”, ग्रन्थ 1) हूडाटू।
3. “जापानी साम्राज्यवाद विरोधी कार्यनीतिक ता बारे ते” नोट 30 (“माओ त्सेतुंग ना संकलित रचनांग”, ग्रन्थ 1) हूडाटू।
4. चीनी कम्युनिस्ट पार्टी ता छठी केंद्रीय कमेटी ता पांचवी पूर्ण अधिवेशन जनवरी 1934 ते आता।
5. सितम्बर 1941 ते राजनीतिक ब्यूरो ता इद अधिवेशन पार्टी ता इतिहास लोप्पा खासकर द्वितीय क्रांतिकारी गृहयुद्ध कालम ते लागू कित्ता राजनीतिक कार्यदिशा ता समस्या ता पुनर्विचन कित्ता।
6. “पहाड़ी दुर्ग” रुझान गुट बने कीयाना रुझान मत्ता: इदु मुख्य रूप ते दीर्घकालीन छापामार युद्ध ता परिस्थिति ने ग्रामीण क्रांतिकारी आधार इलाकांग बिखरेमासी मत्ता ओसो उंदी-दूसरा तल कटेमासी मत्तागडल पैदा आता। ज्यादातर आधार इलाकांग बिखरेमासी ओसो उंदी-दूसरा तलकटेमासी मत्तांग। ज्यादातर इलाकांग आधार इलाकांग मेड्डा इलाकांग लोप्पा स्थापित कित्ताद मत्ता। उंदे पहाड़ी दुर्ग लेक्का हर उंदी आधार इलाका खुद उंदी अलग इकाई समझेमायना शुरू आता। इदु गलत रुझान ता पोरोल “पहाड़ी दुर्ग” इंजी अरता।

7. आधार इलाकांग तुलनात्मक स्थाई हिस्सा ने लोकुर नियमित रूप ते अनाज टैक्स सिर्फ जापान विरोधी जनवादी सरकार किन हियानोरा मति दुश्मन लगातार पेशान कीयाना आधार इलाकांग ना हंदी इलाका ओसो छापामार इलाका ने लोकुर दुश्मन ता कठपुतलू सरकार किन वेने उंदी दूसरा अनाज टैक्स हियाला मजबूर आयनोरा।
8. इदु जापानी साम्राज्यवादीर जापान विरोधी आधार इलाकांग लोप्पा बेहरा स्तर ता हमलांग लोप्पा हारेमाता पेरके लागू कित्ता तरीका मत्ता। इत्तेके एकदम हड़पे कियवा लेवा वेल्ले कालम एवनल “कोरकसोर” मंदाना तरीका। जापानी साम्राज्यवादीर तीरम-तीरम मुन्ने दायना ओसो जापान-विरोधी आधार इलाकांग किन अलग-थलग कीयाना तरीका किन लागू कीसि अविन किन सरदसोरे तम्मा कब्जा मत्ता इलाकांग बेरसी कीयाना कोशिश किसोरे मत्तोरा।
9. मार्च 1941 ते उत्तरी चीन लोप्पो जापानी सेना ओसो चीनी गद्दार लोर “सार्वजनित सुरक्षा किन सुदृढ़ बने कीयाना” आंदोलन ता ऐलान कितोरा। इद आंदोलन लोप्पा जनता ना लोहकुना जबरदस्ती तलाशी एतना, पाओ-च्या व्यवस्था ता स्थापना कीयाना, लोन-लोन हंजी जांच कियान ओसो कठपुतली सेना निर्माण कीयाना शामिल मत्ता। इविना लक्ष्य जापान विरोधी ताकत कुन खत्म कीयाना मत्ता।
10. मार्च 1944 ते जापानी सेना हनान प्रान्त लोप्पा 50-60 हजार सेना संगे तम्मा अभियान शुरू कित्ता। च्यांग चिंग-वन, थांग अन-पो ओसो हू चुंग-नान कै दोड़ 4 लाख क्वोमिंगतांग सेना जापानी सेना मुन्ने कोहरा अरता लेक्का अरता। 38 काउंटिंग, चंगचओ ओसो लोयंग शामिल मत्ता, उंदी-उंदी-उंदी कीसि दुश्मन ना कैदे हत्ता। थांग अन-पो ता सेना तन्ना 2 लाख मानेय पोहता।
11. युद्ध-सरदार लोरा नड़मा इदु बेहरा स्तर ता युद्ध मत्ता। तीना लोप्पा उंदी बगिल च्यांग काई-शेक ओसो दूसरा बगिल फंग य्वी-श्यांग अनि येन शी-शान मत्तोरा, लुंगहाए ओसो थ्येनचिन-फूखओ रेलवे लाईन हेरे-हेरे ताकता। इदु युद्ध मई तल अक्तूबर 1930 एवनल छै महीनांग ताकता। तीना लोप्पा रेंडासी बगिल तल 3 लाख लोकुरा नुकसान आतोरा।
12. क्वो मो-जो 1944 ते मिंग वंश ता आखरी साल ते ली चि-छिंग ना नेतृत्व ते आता किसान विद्रोह ता जीत ता 300 वीं वर्षगांठ ता मौका ते “1644 ता विद्रोह ता 300वीं जयंती” हेडिंग वाले लेख रास्तोरा। ओरू इद विद्रोह 1645 ते हारेमाता इंजी वेहतोरा। बारांकु इत्तेके 1644 ते किसान सेना पेकिंग ते नेंगता पेरके उचुन खुशी ता पिस्वल संगे भ्रष्ट आतोरा अनि ओरू आपस तेने लड़ेमायना शुरू आतोरा। इदु लेख मुन्ने छंगकिंग ना “नव चीन दैनिक” ते

प्रकाशित आसी मत्ता। पेरके येनान ओसो बाकी मुक्त इलाकंग लोप्पा वेने
पुस्तक ता रूप ते प्रकाशित आता।

13. “मेनशियस”, ग्रन्थ 11, “काओ चि”, भाग 1।

जनता ना सेवा कियमूट!

8 सितम्बर 1944

इद भाषण कामरेड माओ त्सेतुंग चांह स-त किन श्रद्धांजलि अर्पित कियाला काजे चीनी कम्युनिस्ट पार्टी ता केंद्रीय कमेटी ता प्रत्यक्ष रूप ते अगाटा विभागकु कीयाना शोकसभा लोप्पा हीसी मत्तोर।

मना कम्युनिस्ट पार्टी ओसो मना पार्टी ता नेतृत्व ते काम कीयाना आठवीं राह सेना ओसो पूना चौथी सेना क्रांतिकारी दलम आंदू। मना इव दलमकु पूर्ण रूप ते जनता ना मुक्ति-कार्य किया मंतांग ओसो पूराए जनता ना अधिकार काजे काम किया मंतांग। कामरेड् चांग स-त¹ मना इवे दलम कुना वरोर कामरेड मत्तोर।

हर मानेय बस्केनाई जरूर डोलिंतोर, मति हर मानेय ना हामूर ता महत्व अलग-अलग मंदिता। चीन ता प्राचीन लेखक समा छयेन वेहत्ता लेक्का “हामूर ता सामना सब्बेतोर किन बराबरे किया लागिंता, मति उचुन लोकुरा हामूर महत्व थाएशान मेट्टा तुकू वेने ज्यादा बेहरा मंदिता ओसो उचुन लोकुरा हामूर ता महत्व मारे तुकू वेने हल्को मंदिता।”² जनता काजे जीवा हियाना थाएशान मेट्टा तुकू वेने बेहरा महत्व मंता ओसो फासीवाद काजे काम किसोरे शोषक वर्ग काजे जीवा हियानदु मारे तुकू वेने कम महत्व मंदिता। कामरेड चांग स-त जनता काजे तन्ना जीवा हित्तोर अदिनकाजे ओना हामूर ता महत्व जरूर थाएशान मेट्टा तुकू वेने ज्यादा बेहरा मंता।

मना लोप्या कमिंग मत्तेके, माटु बोराई बाता इंतोर बहे, बोराई आलोचना कींतोर बहे इंजी वेरियोम आंतोम बारांकु इत्तेके माटु जनता ना सेवा कींतोमा हर मानेय(बोरे वेन) मना कमिंग किन वेहा परितोर। मनम ओना पोल्लो सही मत्तेके मना कमिंग किन सुधरे कियाकोमा ओना राय हिसाब ते जनता किन फायदा आतेके माटु ओना राय पोरो अमल कियाकोमा “बेसता फौज ओसो सरल प्रशासन” ता राय गैर पार्टी ता मानेय श्री ली तिग-मिंग³ पेश कीसि मत्तोर। ओरू जनता किन फायदा आयना लेक्का राय हितोर अदिन काजे माटु ओना राय पोरो अमल कीतोमा माटु जनता ना अधिकार काजे सही पोल्लोंग पोरो दृढता ते डटेमासी मत्तेके ओसो गलत पोल्लोंग किन सुधरे किसोर मत्तेके मना लाईन जरूर कोडससोरे-पूयसोरे मंदियार। माटु मना देश ता कोंटा-कोंटा तल इगा वातद मंता ओसो उंदी सामूहिक क्रांतिकारी लक्ष्य काजे जमा आताद मंता। मनम जनता ना विशाल बहुसख्या संगे इद लक्ष्य बगिल दायना हरदे ताकना। नेंडु माटु 9 करोड़ 10 लाख आबादी वाले आधार इलाकांग⁴ ना नेतृत्व किया मंतोम, मति इदु हालनाचोन हिल्ले। पूरा राष्ट्र ता नेतृत्व किसोर मंतोम मंति इदु हालनाचो हिल्ले। पूरा राष्ट्र किन मुक्त कियाला काजे ओसो ज्यादा आधार इलाकांग मंदाना जरूरत मंता। मुश्किल परिस्थिति मना कामरेड्स तम्मा सफलतांग किन नजरअंदाज कीयानायो, तम्मा वायना काल मंता बेसता पिस्वल किन सुरता तासना अनि तम्मा साहस किन बेरसी कीयाना। चीनी जनता वेल्ले तिप्पल ते मंता। अदिन किन बचे कीयाना कर्तव्य आंदू अदिन काजे मनम परताचोन संघर्ष कीयाना। बेगाने वेने संघर्ष आतेके अगा कुरबानी हिया लागिता ओसो डोलनादु उंदी आम घटना बनेमांता। मति मना जीवा ते जनता ना अधिकार लोकुरा बेहरा संख्य ता तिप्पलकु मंतांग। मनम जनता काजे कुरबान आंतोम अस्के अदु उंदी गौरवशाली हामुर बनेमांता। मति माटु गैर जरूरी कुरबानिंग निगडल बचेमायला पूरा कोशिश कीयाना। मना कार्यकर्ता लोर मना हर सिपाही ध्यान तासना ओसो क्रांतिकारी लाईन ता

सबबे लोकर वरोर-वरोना ध्यान तासना, वरोर-वरोना पोरो जीवा कीयाना ओसो दूसरो ना मदद कीयानाय

इजेटल मना लाईन बदेआई हामुर आतेके (गाटो अट्टनोर आई लेवेके वरोर सिपाही आई, बोराई बदे फायदा काम कितोर इत्तेके मनम ओना अंतिम संस्कार कीयाना ओन किन श्रद्धांजलि अर्पित कियाला काजे शोकसभा कीयाना। इदिन उंदी नियम बने कीयाना। इदिन आम जनता लोप्पा वेने प्रचार कीयाना। नाटे ने बोराई डोलतेके वेने उंदी शोकसभा कीयाना। इद्रम मनम डोलता मानेयकिन मना श्रद्धांजलि अर्पित किया परितोम ओसो पूरा जनता किन एकताबद्ध किया परितोम।

नोट

1. कामरेड चांग स –त चीनी कम्युनिस्ट पार्टी ता केंद्रीय कमेटी ता गार्ड रेजिमेंट ता सैनिक मत्तोर। ओरू 1933 ता क्रांति ते शामिल मत्तोर। ओरू बेहरा अभियान लोप्पा शामिल आतोर अनि तन्ना फौजी सेवा कीयानास्के घायल आसी मत्तोर। ओरू जनता ना काजे ईमानजारी ते काम कीयाना पार्टी-सदस्य मत्तोर। 5 सितम्बर 1944 ते उत्तरी शेनशी प्रान्त ता आनसाए काउन्टी ता मेड्डा इलाका ते वर्की ना कोसैंग बने कीयानास्के उंदी भट्टी ते अरसी डोलतोर।
2. समा छयेन ईसापूर्व दूसरी शताब्दी ता मशहूर चीनी साहित्यकार ओसो इतिहासकार मत्तोर। ओरू “स ची” (ऐतिहासिक अभिलेख) पोरोल ता पुस्तक रासतोर। ताना लोप्पा 130 लेख मंतांग। इत वाक्य ओना “रन शाओ-छिंग ना चिट्टी ता उत्तर” इंजी हेडिंग मत्ता लेख तल पोयताद मंता।
3. ली तिं-मिंग उत्तरी शेनशी प्रान्त ता वरोर जागूरक जमींदार मत्तोर। ओरू उंदी बेरा शेनशी-कानसू-निंगश्या हंदी इलाका ता सरकार ता उपाध्यक्ष चुनेमातोर।
4. इदु अस्केटा शेनशी-कानसू-निंगश्या हंदी इलाका ता ओसो उत्तरी-मध्य-दक्षिणी चीन ता सबबे मुक्त इलाका ना कुल आबादी मत्ता।

10 अक्तूबर ता तिहार ते च्यांग कार्ड-शेक हिता भाषण ता बारे ते

11 अक्तूबर 1944

इदु पोल्लो कामरेड माओ त्सेतुंग शिनह्वा समाचार एजेंसी काजे रासिस मत्तोरा

10 अक्तूबर ते च्यांग कार्ड-शेक हिता भाषण ता महत्व बाताल मत्ता इत्तेके ताना लोप्पा विषय-वस्तु ता पूर्ण रूप ते कमी मत्ता, ताना लोप्पा जनता बद परिस्थिति ता बारे ते वेरियसी मंतायो अद परिस्थिति ता बारे ते उंदी वेने सवाल हिल्ला मत्ता। च्यांग कार्ड-शेक दुश्मन तल वेरियानायो बारांकु इत्तेके इंजे बेहरा इलाकांग विस्तृत रूप ते मंतांग इंजी ऐलान कित्तोरा एकतंत्रवादी क्वोमिंगतांग नेतालोर इंजे एवनल राजनीतिक सुधार कीयाना ओसो दुश्मन किन रोमी कीयाना विचार ओसो क्षमता इत्तेके तोहतादे वेने हिल्ले। ओरा काजे सिर्फ “इलाकाए” ओरा पूंजी लेक्का मंता इदिना सहारा ओरू दुश्मन ता प्रतिरोध कियाला काजे एतितोरा मति सिर्फ इद पूंजी पोरो निर्भर आसी मंदाना हालना लेक्का मन्नो इंजी सब्बे तोर स्पष्ट समझेमाया मंतोर, बारांकु इत्तेके उंदी सही नीति हिल्ला ओसो लोकुरा कोशिश लेवा मेयता-पिस्ता इलाकांग काजे जापानी साम्राज्यवाद ता खतरा रोजे मंदिता। च्यांग कार्ड-शेक इद खतरा ता तीव्र रूप ते समझेमायना सम्भावना मंता। बारांकु इत्तेके ओरू बार-बार लोकुरा मुन्ने बदे खतरा हिल्ले इंजी वेहितोरा ओरू इंतोर “नावा ह्वांगफू फौजी अकादनी लोप्पा सेना ता स्थापना पेरेके नेंड एवनल इत्तेके बीस साल कुना लोप्पा क्रांतिकारी परिस्थिति ते नेंडु मत्ताचोन स्थिरता मुन्ने बस्केने वात्ताद हिल्ले इंजी।” ओरू लगातार “मनम

मना आत्मविश्वास कमजोर कीयानायो” इंजी वेने इंतोर। इव सब्बे पोल्ल्लोंग निगडल क्वोमिंगतांग ता लाईन लोप्पा ओसो क्वोमिंगतांग इलाकांग ना जाने-माने सार्वजनिक लोकरा लोप्पाटल वेल्ले लोकरा आत्मविश्वास कमजोर आता। च्यांग काई-शेक इद आत्मविश्वास ता पुनस्थापना कियाला काजे बदेआई तरीका परहकना कोशिश किया मंतोर। मति राजनीतिक, फौजी, आर्थिक ओसो सांस्कृति लोप्पा तम्मा नीति लेवेके तम्मा काम ता जांच-पडताल कीसि इद्रम ता तरीकांग ना खोज कियवा लेवा आलोचनांग किन मानेमायला इनकार कीयाना ओसो तम्मा गलतिंग किन मक्किह कीयाना सहारा एतितोर। अनि सब्बे “विदेशी प्रक्षक” “समस्या ना मोदोल समझेमासोर हिल्ले” इंतोर अनि “मना फौजी ओसो राजनीतिक समस्यांग ना विदेशिर कीयाना आलोचनांग ना उर्ना वेडियु” पूर्ण रूप ते “आक्रमणकारिरा ओसो चीनी गद्दर लोरा अंगडम प्रचारकु ओसो चालबाजिंग” पोरो विश्वास कीसि अविन स्वीकार कित्ता कारण ते तेदता इंजी इंतोर। फ्रंकलिन डी. रूजवैल्ट लेक्काटा विदेशी ओसो सुंग छिग-लिंग लेक्काटा क्वोमिंगतांग सदस्य, जन राजनीतिक परिषद ता बचोनो सदस्य ओसो चीन ता सब्बे ईमानदार लोकर च्यांग काई-शेक ओसो ओना पोरो विश्वास कियानोर पेश कित्ता स्पष्टीकरण कुना पोरो विश्वास कीवोर। अनि ओरू वेने “मना फौजी, राजनीतिक समस्यांग ना आलोचना ता उर्ना वेडियु” निल्पी किया मंतोर। च्यांग काई-शेक इद परिस्थिति तिंची वेल्ले परेशा ना आतोर, मति इयेटा 10 अक्तुबर ता तिहार तुकु मुन्ने ओरू “आक्रमणकारिर ओसो चीनी गद्दर लोरा अंगडम प्रचार, चालबाजी” पोरो विश्वास कींतोर इंदाना तर्क किन खोज कियाला सफल आयोर। अदिन काजे तन्ना भाषण लोप्पा च्यांग काई-शेक “आक्रमणकारी ओसो चीनी गद्दर लोरा अंगडम प्रचार ओसो चालबाजी” लोरा तीव्र निंदा कित्तोर। ओरू इद्रम निंदा कीसि सब्बे चीनी वासिर ओसो विदेशिरा तोड्डी बंद किया परितोर इंजी बस्केने आल्सवा मत्तोर। बोराई ओना फौज ओसो राजनीतिक समस्या ना “आलोचना ना उर्ना वेडियु” निल्पी कित्तेके ओनकिन “आक्रमणकारी ओसो चीनी गद्दर

लोरा अंगडम प्रचार ओसो चालबाजी” रा पोरो विश्वास कियानोर इंजी समझेमायमूड़ायार! माटु च्यांग कार्ई-शेक ना आरोप किन एकदम मजाक समझेमांतोम। बारांकु इत्तेके आक्रमणकारिर ओसो चीनी गद्दार लोर क्वोमिंगतां ता एकतंत्रवादी आंदुर। बारांकु इत्तेके ओरा विचार हिल्ला लेक्का प्रतिरोध-युद्ध ताकी कीयाना, ओरा भ्रष्टाचार, अक्षमता, ओरा सरकार ता फासीवादी आदेशकु, पराजयवादी फौजी आदेश कुना आलोचना बस्केने कीवोर, उल्टा ओरकिन बेस इंजी वेहतोरा बोरे विचार कीवा मत्ता “चीन ता पिस्वल” पोरो ता च्यांग कार्ई-शेक ना पुस्तक किन जापानी साम्राज्यवादीर बार-बार हार्दिक बधाई हित्तोर। आक्रमणकारिर ओसो चीनी गद्दारो लोर राष्ट्रीय सरकार ओसो ओरा सबसे पोरोटा कमान ता पुनर्गठन कीयाना ता बारे ते उंदी वेने माटा कीवोर, बारांकु इत्तेके ओरू तन्ना जीवा लोप्पाटले जनता किन उत्पीड़ित कीयाना ओसो लड़ाई ते हारमासोर मंदाना इद सरकार ओसो सर्वोच्च कमान सुरक्षित मंदाना इंजी आल्सिंतोर। च्यांग कार्ई-शेक ओसो ओना ग्रूप हमेशए आत्मसमर्पण काजे जापानी साम्राज्यवाद हियाना लालच ता निशाना बनेमासोर मंता इंदानदु निज्जम आयो या? जापानी साम्राज्यवादीर शुरूआत ते पेश कित्ता रेंडु नारांग लोप्पाटल उंदी किन इत्तेके “क्वोमिंगतांग ता खत्म कीमूट!” इंदाना नारा किन वेल्ले कालम मुन्ने विडसताद मंता ओसो दूसरा नारा, इत्तेके “कम्युनिस्ट लोरा विरोध कमूट!” इंदाना नाराए इंजे मंता इंदानादु निज्जम आयो या? नेंडु एवनल वेने जापानी साम्राज्यवादीर वेहत्ता लेक्का क्वोमिंगतांग सरकार खिलाफ युद्ध ता घोषणा कित्ताद हिल्ले। नेंडु एवनल वेने आक्रमणकारिर ओसो चीनी गद्दार लोर शांघाई, नानकिंग, निंगपो लेक्कटा जागा ने क्वोमिंगतांग ता बेहरा-बेहरा ओहदेदार लोरा जायदाद पोरो ध्यान हित्ताद हिल्ले। दुश्मन ता सरगना (सरदार) शुनरोकु हाताल च्यांग कार्ई-शेक ना पुरखा ना गुमियांग (गुडिंग) पोरो भेंट तरहला काजे तम्मा प्रतिनिधि लोर किन फंघहा लोहंतोर। शांघाई ते ओसो बाकी जागा ने च्यांग कार्ई-शेक ना विश्वास मत्तोर गुप्त रूप ते लोहता दूत लोर जापानी आक्रमणकारिरा संगे लगातार सम्पर्क किसोर मंदानोर अनि संगे मक्सी-

मक्सी समझौर-वार्त ताकी किया मंतोर। बस्केने जापानी आक्रमण किन बेरसी कितेके इव सम्पर्क कु ओसो समझौता-वार्तांग लोप्पा ज्यादा बढेत्तरी आयार। इव सब्बे पोल्लोंग निज्जम आयो या? च्यांग काई-शेक ओसो ओना ग्रूप ता फौझी, राजनीतिक समस्यांग किन“आलोचना ता उर्रा वेड़ियु” निल्पी कींतोर ओरू निज्जमे “समस्या ता मोदोल किन पुन्नोर”, लेवेके इदिन उल्टा ओरू इद समस्या ता बारे ते वेल्ले बेस पुत्तोर? असल इत्तेके इद समस्या ता मोदोल बेगा मंता, “आक्रमणकारि ओसो चीनी गद्दार लोरा अंगडम ता प्रचार ओसो चालबाजींग” लोप्पा लेवेके खुद च्यांग काई-शेक ओसो ओना ग्रूप लोप्पा?

तन्ना भाषण हियानास्के ओसो उंदी पोल्लो किन च्यांग काई-शेक इनकार कित्तोर, अदु चीन लोप्पा गृहयुद्ध शुरू आयनदु। मति ओरू मुन्ने “वायना कालम ते बस्के ने वेने वांग चिंग-वेइ ओसो उकसे लेक्काटोर गणराज्य संगे गद्दारी कीयाना ओसो प्रतिरोध युद्ध ते तोड़फोड़ कीयाना हिम्मत बोर कीवोर आयनूर इंजी इत्तोर।” इगा च्यांग काई-शेक गृहयुद्ध काजे बदे बहाना परहका मंतोर अनि ओनकिन दोरकता। दिमाग ज्यादा कमजोर हिल्वा हर मानेय चीन किन 1941 ते चीन ता वतनफरोश लोकर पूना चौथी सेना किन भंग कीयाना आदेश हीसी मत्तोर इंजी सुरता मंदियार ओसो चीनी नजता तेदसी गृहयुद्ध ता संकट किन रोमी किसोर मत्ता, च्यांग काई-शेक उंदी भाषण ते “कम्युनिस्ट लोरा विनाश” कियाला काजे बस्के ने बदे युद्ध कीयानायो इंजी इत्तोर। युद्ध कीतेकाई अदु बागी लोरा दमन कीयाना दंडात्मक युद्ध मंदियार। बोरू लोकर “चीन ता पिस्वल” पोरोल ता पुस्तक पढेमात्तोर, ओरू किन च्यांग काई-शेक ना चीनी कम्युनिस्ट पार्टी 1927 ते ऊहान सरकार बने कियाला काजे वांग चिंग-वेइ संगे “सांठगांठ किया मंता” इंदाना पोल्लो सुरता मंदियार। 1943 ते क्वोमिंगतांग ता केंद्रीय कार्यकारिणी कमेटी ता ग्यारहवीं पूर्ण अधिवेशन ता प्रस्ताव ते चीनी कम्युनिस्ट पार्टी पोरो आठ चीनी अक्षर वाले “प्रतिरोध-युद्ध ते तोड़फोड़ किया मंता ओसो राज्य काजे खतरा पैदा किया मंता” लेबल वाटमूडता। ओना वर्तमान भाषण केंजता पेरके माटु गृहयुद्ध ता खतरा मंता

इंजीए आयवा बेरसा मंता इंजी वेने समझेमातोम। इंजे चीनी जनता तम्मा दिमाग ते बस्के च्यांग काई-शेक बागी लोरा खिलाफ दंड-अभियान ताकी कीयाना आदेश हियानूर अनि अदिन आरोप “गणराज्य संगे गद्दारी कीयाना”, “प्रतिरोध-युद्ध ते तोड़फोड़ कीयाना” ओसो “वांग चिंग-वेइ, ओना लेक्कटोर हिम्मत कीयाना लेक्का” इंजी मंदियार इंजी उंदी कीयाना। च्यांग काई-शेक इद खेल लोप्पा एक्सपर्ट मंतोर। ओरू फांग पिंग-श्युन, सुन ल्यांग-छंग ओसो छन श्याओ-छ्यांग² लेक्काटोर किन बागी इंजी ओरा निंदा कीयाना ओसो ओरा खिलाफ दंड-अभियान ताकी कियाला बिल्कुले वायो। मध्य चीन ते मत्ता पूना चौथी सेना ओसो शानशी ते मत्ता हामुर तुकु वेरियवा मत्ता पलाटुन³ किन “बागी” इंजी प्रचार कियाला एक्सपर्ट मंतोर अनि ओरा खिलाफ दंड-अभियान ताकी कियाला इतेके वेल्ले ज्यादा एक्सपर्ट मंतोर। चीनी जनता गृहयुद्ध शुरू कीयाना ऐलान कियान संगे-संगे च्यांग काई-शेक इंजे एवनल 7, 75, 000 सैनिक लोहची आठवीं राह सेना, पूना चौथी सेना ओसो दक्षिणी चीन ते मत्ता जन-छापामारा लोर किन घेराव कीसि हमला कियाला वाटतोर इंजी बस्केने मरंगनायो।

च्यांग काई-शेक ना भाषण ते बदे वेने सकारात्मक पोल्लो हिल्ला मत्ता। ओरू जापान विरोधी मोर्चा ता परिस्थिति किन सुधरे कीयाना चीनी जनता ना तीव्र इच्छा किन पूरा कीवोर आतोर। नकारात्मक पक्ष ते, ओना भाषण बचोनो खतरनाक सम्भावनांग संगे निंडसी मत्ता। ओना रुझा ज्यादा से ज्यादा असंगत बनेमासोर दाया मंता। ओरू जनता कीयाना राजनीतिक बदलाव ता मांग किन कड़ी विरोध किया मंतोर, चीनी कम्युनिस्ट पार्टी पोरो तीव्र विरोध कींतोर अनि ओरू तैयारी किसोर मत्ता कम्युनिस्ट विरोधी गृहयुद्ध शुरू कीयाना बगिल इशारा कींतोर। मति ओरू तन्ना सब्बे षडयंत्र कुना लोप्पा बदे सफलता दोरकी किया परोवोर आयनूर। बस्के एवनल खुद तन्ना तरीकांद बदले कियाला तैयार आयोर अस्के एवनल बदे वेने बेहरा बंडा किन तेहची खुद तन्नाए कालदुन कोहकानूर। माटु ओरू तन्ना तरीकांग किन बदले कियानूर इंजी जीवा कीसि आशा कीतोम, बारांकु

इत्तेके ओरू इंजे पोयता हरी ओनकिन बेगाने विड़सो आया। ओरू “राय हियाला मुन्ने तुकू ज्यादा आजादी हियमूड़ायर”⁴ इंजी ऐलान कितोर, अदिन काजे ओरू लोकरा पोरो आरोप वाटसी ओरकिन धमकी हियाना ओसो “आलोचना ता उर्रा वेड़ियु” किन दबे कीयानायो। ओरू “आक्रमणकारि ओसो चीनी गद्दर लोरा अंगडम प्रचार ओसो चालबाजींग” पोरो विश्वास कितोर इंजी। ओर “राजनीतिक अभिभावकता ता कालम घटे कीयाना आया” इंजी ऐलान कितोर, अदिन काजे ओरू सरकार ओसो सर्वोच्च कमान ता पुनर्गठन कीयाना मांग किन ठुकरे कीयानायो। ओरू “कम्युनिस्ट लोरा समस्या किन राजनीतिक तरीका ते हल कीयाना” इंजी ऐलान कितोर, अदिन काजे गृहयुद्ध ता तैयारी काजे ओसो उंदी बहाना परहकनायो।

नोट

1. इदु 1911 ते ऊहान ते आता सशस्त्र विद्रोह ता जंयती ता दिव्या आंदू। इद विद्रोह ते छिंग राजवंश ता तानाशाही शासन ता तख्ता पलट कीयाना क्रांति ता सूत्रपात आता।
2. फांग पिंग-श्युन, सुन ल्यांग-छंग ओसो छन श्याओ-छ्यांग क्वोमिंगतांग जनरल मत्तोर। वीरू खुलेआम वितसी जापानी आक्रमणकारिरा संगे कलियतोर।
3. शानशी ते मत्ता हामुर तुकू वेरियवा लेवा मंदाना पलाटुन जनता ना उंदी जापानी विरोधी सेना मत्ता। इदिन विकास कम्युनिस्ट पार्टी ता नेतृत्व ओसो प्रभाव ते जापानी आक्रमण विरोधी युद्ध ता शुरूआत ते आता। “सब्बे जापान विरोधी ताकत किन एकताबद्ध कीमुट ओसो कम्युनिस्ट विरोधी कट्टरतावादिरा खिलाफ संघर्ष कीमुट”, नोट 3 (“माओ त्सेतुंग ना संकलित रचनांग”, ग्रन्थ 2) हूडाटू।
4. अप्रैल 1944 ते क्वोमिंगतांग “राय हियाना आजादी मुन्ने तुकू ज्यादा हियमूड़ाया इंजी” ऐलान कित्ता। इदिन लक्ष्य जनता ना कोंडा तो उंडुल वाटनदु मत्ता। बारान्कु इत्तेतेके क्वोमिंगतांग-शासित इलाकांग लोप्पा अद साल ता शुरू तेने जनता व्यापाक रूप ते क्वोमिंगतांग तानाशाही खत्म आयाना इंजी मांग कित्ता, लोकशाही निल्पी कीयाना ओसो भाषण हियाना आजादी ता गारंटी कीयाना इंजी मांग कित्ता। मई ते क्वोमिंगतांग ता केंद्रीय कमेटी कार्यकारिणी कमेटी ता बारार्वी पूर्ण अधिवेशन ते ओसो उंदी बेरा ओरू “भाषण हियाना आजादी ता रक्षा” कियार इंजी ऐलान

कित्तोर। मति क्वोमिंगतांग मजबूर आसी तन्ना उंदी वेने किरिया पूरा कित्ताद हिल्ले।
बद्रम-बद्रम जनता जनवादी आंदोलन ते मुन्ने हत्ता, अद्रम-अद्रम ओरू लोकमत
पोरो दमन कियाला काजे ज्यादा से ज्यादा तरीकांग लागू कित्ता।

सांस्कृतिक कार्य लोप्पा संयुक्त मोर्चा

30 अक्तूबर 1944

इद भाषण कामरेड माओ त्सेतुंग शेनशी –कानसू-निंगश्या हंदी इलाका ता सांस्कृतिक, शैक्षणिक कार्यकर्ता लोरा उंदी सम्मेलन ते हितोर।

मना पूना काम ता उद्देश्य जापानी साम्राज्यवादिरा तखता पलट कीयाना मंता। हिटलर ना लेक्का जापानी साम्राज्यवाद वेने तन्ना सर्वनाश ता गर्रे एव्वा मंता। मति माटु मना कोशिश जारी तासना, बारांकु इत्तेके सिर्फ इद्रम जारी तासिसीए अंतिम रूप ते तखता पलट किया पिरंतोम। मना काम ते युद्धकर्म सबसे मुन्ने वांता, ताना पेरेके उत्पादन-कार्य वांता ओसो ताना पेरेके सांस्कृतिक कार्य। बद सेना ता संस्कृति हिल्ले अदु बकवल सेना मंदिता अनि इद्रम ता सेना तन्ना दुश्मन किन बस्केने हारे किया परवो।

मुक्त इलाकांग ना संस्कृति ता तन्ना प्रगतिशील पक्ष मंता, मति अदिना उंदी पेरेके अरता पक्ष इंजे वेने मंता। मुक्त इलाकांग ना तम्मा उंदी पूना संस्कृति मंता, उंदी जन-संस्कृति मंता, मति अगा सामंतवाद ता बचोनो अवशेषकु इंजे वने मंतांग। शेनशी-कानसू-निंगश्या हंदी इलाका ता 15,00,000 आबादी 10,00,000 तुकू ज्यादा लोकुर अनपढ़ मंतोर, 2,000 जादू-टोना कियानोर मंतोर, अनि व्यापक जनता इंजे वने अन्धविश्वास ता प्रभाव ते मंता। इव सब्बे आम जनता ना दिमाग ते मत्ता दुश्मन आंदुंग। आम जनता ना दिमाग ते मत्ता दुश्मन ता मुकाबला कीयाना हमेशा जापानी साम्राज्यवाद ता मुकाबला कीयाना तुकू ज्यादा मुशिकल मंता। माटु जनता किन तम्मा अनपढ़ता, अंधविश्वास, स्वास्थ्य काजे नुकसान मत्ता आदत कुना खिलाफ संघर्ष कियाला काजे तेदना इंजी

आह्वान कीयाना। इद संघर्ष काजे उंदी व्यापक संयुक्त मोर्चा निल्पी कीयाना जरूरी मंता। उद संयुक्त मोर्चा किन शेनशी-कानसू-निंगश्य हंदी इलाका लेक्काटा जागा विशेष रूप ते व्यापक आयाना। बेगा आबादी बिखरेमासी मंता, संचार-साधन वेल्ले कम मंता ओसो मनम उंदी वेल्ले दोड़ स्तर ता संस्कृतिक आधार बने कीयाना, संगेने उंदी युद्ध वेने ताका मंता। अदिन काजे मना शैक्षणिक क्षेत्र ते सिर्फ एकिकृत नियमित प्राइमरी ओसो सेकेंडरी स्कूले आयवा बिखरेमासी मत्ता अनियमित ग्रामीण स्कूल, अखबार पड़ेमायना ग्रूप ओसो साक्षरता कक्षांग वेने मंदाना। मनगा सिर्फ आधुनिक रकम ता स्कूले आयवा मना पाड़ना रकम ता ग्रामीण पाठशालांग ना वेने इस्तेमाल कीयाना ओसो अविना लोप्पा बदलावा कीयाना। कला ता क्षेत्र ते मनगा आधुनिक नाटके आयवा छिन आपेर¹ ओसो यांगको² नृत्य वेने मंदाना। मनगा सिर्फ पूना-पूना छिन आपेरा ओसो पूना-पूना यांगको नृत्य आयवा मनम पाड़ना आपेरा कम्पनिंग ओसो पाड़ना यांगको मंडलिंग किन वेने तीरम-तीरम बदले कीयाना। इंजे यांगको मंडिंग ना संख्या 90 प्रतिशत मंता। इदु दृष्टिकोण चिकित्सा क्षेत्र ते ओसो वेने ज्यादा जरूरत मंता। शेनशी-कानसू-निंगश्या हंदी इलाका ते मानेय ओसो जानवर डोलनदु वेल्ले ज्यादा मंता। संगेने वेल्ले लोकुर इंजे वने जादू-टोना पोरो विश्वास कींतोरा। इद्रम ता परिस्थिति ते सिर्फ आधुनिक डॉक्टर लोरा पोरोने निर्भर मंजी समस्या हल आया परवो। आधुनिक डॉक्टर पाड़ना रकम ता डॉक्टर लोरा मुकाबला ते बेस मंदितोर मति ओरू जनता ना तिप्प कुना परवाह किवेके, जनता काजे पूना डॉक्टर लोर किन प्रशिक्षित किवेके, हंदी इलाका ता पाड़ना रकम ता उंदी हजार तुकू ज्यादा डॉक्टर ओसो ढोर-डॉक्टर लोरा संगे एकता किवेके, ओरकिन विकसित कियाला मदद किवेके ओरू निज्जमे जादू-टोना कियानोरा मदद कींतोर अनि मानेय ओसो जानवर कुना डोलना संख्या बेरसोर मत्तादुनि नजदअंदाज कीयाना रुझाना लागू कियानूरा। संयुक्त मोर्चा ता रेंडु नियमकु मंतांगः पहली नियम, एकता कीयाना, दूसरा नियम आलोचना कीयाना, शिक्षित कीयाना ओसो बदलाव कीयाना। संयुक्त मोर्चा ते आत्मसमर्पणवाद गलत मंता। इद्रमे

दूसरोर किन अलग-थलग कीयाना ओसो सुडला हूडना संकीर्णतावाद वेने गलत मंता। मना काम पाडना रकम ता उपयोगी साबित आयना सब्बे बुद्धिजीविर, कालाकार, डॉक्टर लोरा संगे एकता कीयाना,ओरा मदद कीयाना, ओरा लोप्पा प्रगतिशील बदलाव तत्तान ओसो बदलाव कीयाना। ओरा बदलाव कीयाना मुन्ने ओरा संगे एकता कियाना। माटु इद काम पूर्ण रूप ते कित्तेके ओरू मना सहायता किन स्वागत कियानूर।

मना संस्कृति उंदी जन-संस्कृति आंदू। मना सांस्कृतिक कार्यकर्ता लोर वेल्ले गिर्दा ओसो जीवा कीसि जनता ना सेवा कीयाना। जनता संगे घनिष्ठ संबंध बने कीयाना, जनता तल अलग-थलग मंदानायो। जनता संगे घनिष्ठ संबंध बने कियाला काजे ओरकिन जनता ना जरूरत अनुसार काम किया लागिगर। जनता काजे कीयाना सब्बे काम ता जनता ना जरूरत कुना पोरो आधार आसी मंदाना बोनाए व्यक्तिगत जरूरत पोरो आधार आसी आयो। वस्तुगत रूप ते जनता काजे बदे बदलाव ता जरूरत मंता, मति मनोगत रूप ते अदु इद जरूरत काजे इंजे जागरूक आताद हिल्वा मत्तादु ओसो इद बदलाव काजे इंजे तैयार ओसो संकल्पबद्ध हिल्वा मत्तादु हमेशा हूडमूडंता। इद्रम ता परिस्थिति ते मनम हिम्मत कीसि हरीं हूडना। मनम बस्के एवनल मना कार्य संगे जनता ना ज्यादातर हिस्सा इद जरूरी बदलाव काजे जागरूक आयो आंता ओसो अदु अदिन लागू कियाला तैयार ओसो संकल्पबद्ध आयो, अस्के एवनल मनम इद जरूरी बदलाव तत्तानायो। बस्के एवनल जनता शामिल आयन जरूरत मत्ता जागा ते शामिल आयना लेक्का जनता जागरूक ओसो तैयार आयो अस्के एवनल मनम बदे काम कीयानायो। लेवेके इद काम असफल आयार। इदु हड्डो “जल्दबाजी ते काम कित्तेके सफलता हासिल आयो”³ इंदाना लेक्का। इत्तेके माटु जल्दी काम कीयानायो इंजी आयो, इदिना अर्थ मनम जोश ते वासी काम कीयानायो इंजी आंता। जोश ते वाली काम कित्तेके सिर्फ असफलताए दोरिक्ता। इद हर रकम ता काम पोरो लागू आंता, अनि खासकर संस्कृति ओसो शैक्षणिक काम पोरो ज्यादा लागू आंता। बारांकु इत्तेके इदिना लक्ष्य जनता ना विचारधारा ता बदलाव कीयाना मंता। इगा

रेंडु नियम कु मंतांगः पहली नियम, जनता ना वास्तविक जरूरतकु, मनम आल्सता लेक्कटा जरूरतकु आयो। दूसरा नियम, जनता ना इच्छा, अदिना संकल्प अदु खुद कीयाना, मनम मना संकल्प ओरा पोरो थोपे कीयानायो।

नोट

1. छिन आपेरा शेनसी प्रांत ता उंदी पाइना रकम ता आपोरा आंदू। प्राचीन कालम ते शेनशी प्रान्त छिन राज्य लोप्पा मत्ता अदिन काजे इदिना पोरोल छिन आपेरा इंजी अरता।
2. यागंको उंदी रकम ता लोक-नृत्य आंदू।
3. “कनफ्यूशियस ना सूक्ति-संग्रह” पोरोल ता पुस्तक लोप्पा मंता।

माटु आर्थिक काम कियाला करियाना

10 जनवरी 1945

इद भाषण कामरेड माओ त्सेतुंग शेनशी-कानसू-निंगश्य हंदी इलाका ता सांस्कृतिक, शैक्षणिक कार्यकर्ता लोरा उंदी सम्मेलन ते हीसी मत्तोर।

श्रमवीर ओसो आदर्श कार्यकर्ता लोर!

मीटु सम्मेलन लोप्पा शामिल आतिर मीवा अनुभव कुना निचोड़ तेंडतिरः माटु मीवा स्वागत कीतोम अनि मीवा सम्मान कीतोम। मीवा लोप्पा मूंड रकम ता बेसत गुण मंतांग ओसो मीटु मूंड रकम ता भूमिकांग निभे कीतिर। पहली, मीटु उंदी शुरूआत कीयाना कार्यकर्ता लेक्का भूमिका निभे कीतोरो। दूसरा माटा ने मीटु णीवा असाधारण कोशिश ओसो गिनती हिल्वा सृजन कुना संगे मीवा काम लोप्पा दूसरो काजे आदर्श पैदा कीतिर। काम ता स्तर बेसरी कीतिर अनि बाकी लोरकिन प्रेरणा हीतिर। दूसरा मीटु उंदी मेरुदंड ता भूमिका निभे कीतिर। मीवा लोप्पाटल ज्यादातर लोकर इंजे वेने पदाधिकारी-कार्यकर्ता बनेमातद हिल्ले, मति मीट जनता ना मेरुदंड बनेमातिर। मीटु ओरा अंतःस्थल() बनेमातिरः मीटु मंदानास्के मावा काम किन मुन्ने ओयाना हल्को आता। वायना कालम ते मीटु वेने पदाधिकारी-कार्यकर्ता बनेमाया परिंतीर। इंजे मीटु वायना कालम ते बनेमायना पदाधिकारी-कार्यकर्ता लोरा रिजर्व दलम ते मंतिर। तीसरा, मीटु उंदी सेतु ता भूमिका निभे कीतिर। मीटु नेतृत्व ओसो व्यापक जनता नड़मा उंदी सेतु ता काम कीतिर। मीवाए संगे आम जनता ना राय नेतृत्व एवनल ओसो नेतृत्व ता राय आम जनता एवनल एविंता। मीवा लोपपा वेल्ले बेसता गुण मंतांग ओसो मीटु वल्ले योगदान कीतिर। मति मीटु हमेशा घमंडी

बनेमायनायो इंदाना पोल्लो सुरता तासना। मीवा सब्बे तोर सम्मान कींतोर इंदानदु बेसे। मति इदिनगडल हल्कोए घमंड पैद आया परिंता। मीवा लोप्पा घमंड पैदा आतेके मीटु मीवा नम्रता पोहतेके मीवा पूरा ताकत संगे काम कीयाना बंद कित्तेके ओसो मीटु दूसरोरा सम्मान कीयाना बंद कित्तेके, मीटु श्रमवीर ओसो आदर्श कार्यकर्ता लोर मनवीर आयकीरा। हत्ता कालम ते इद्रतोर पैदा आताद मंता। अदिन काजे नन्ना मीटु ओरा हरदे ताकिविर इंजी आश कींताना।

इद सम्मेलन ते मीवा अनुभव कुना सारामश तेंडताद मंता। इदु सारांश वेल्ले बेस मंता अनि इदिन बाकी मुक्त इलाकांग लोप्पा वेने लागू किया परमूडंता। मति नन्न इदिना चर्चा कीवोना नन्ना सिर्फ मना आर्थिक काम ता बारेतेने उचुक पोल्लो वडककाना।

हत्ता साल माटु प्राथमिक रूप आर्थिक काम बद्रम कीयाना इंजी करियतोम अनि इदिना लोप्पा बेहरा-बेहरा सफलतांग दोरकी कीतोम। मति इंजे सिर्फ शुरूआते कित्ताद मंता। मनम रेंडु-मूंड साल लोप्पाने शेनशी-कानसू-निंगश्या हंदी इलाका ओसो दुश्मन ता इलाका ते मत्ता मुक्त इलाकांग अनाज, तैयार कित्ता माल अनुसार पूर्ण ओसो मुख्य रूप ते आत्मनिर्भर बनेमायना ओसो इव चीज कुन अतिरिक्त हियाना कोशिश कीयाना। मनम कृषि उद्योन, व्यापार लोप्पा ज्यादा बेहरा सफलतांग दोरकी कीयाना। सिर्फ अस्केने माटु मना बारे ते माटु आर्थिक काम ता ज्यादा जानकारी दोरकी कितोम ओसो इद काम किन ज्यादा बेस कियाला करियतोम इंजी इंदा परिंतोम। बवु जागा ना सेना ओसो जनता ना रहन-सहन ता परिस्थिति ते बदे सुधार आताद हिल्ले, अगा प्रत्याक्रमण कीयाना भौतिक परिस्थितिं इंजे रोमताद हिल्ले। कृषि, उद्योग, व्यापार हर साल विकास आयवा लेवा ठप आसोर दाया मंता अगा स्पष्ट रूप ते पार्टी सरकार ओसो सेना ता कार्यकर्ता लोर इंजे आर्थिक काम बद्रम कीयाना इंजी करियताद हिल्ले। इद्रम ता जागा ने बदे डावुट हिल्ला बेहरा मुश्कल कुना सामना किया लागिंता।

उंदी पोल्लो नन्ना ओसो उंदी बेरा मीकिन वेहाकाना। अदु बातल इत्तेके मना विचार प्रत्यक्ष वात्तावरण ता अनुसार मंदाना इंजी। मना प्रत्यक्ष वात्तावरण ग्रामीण मंतांग। इदिना लोप्पा बदे डावुट हिल्ले, बारांकु इत्तेके माटु ग्रामीण इलाका ने मंतोम इंजी सब्बेतोरे पुत्तोरा। एय्यो! मति इद्रम हिल्ले। वेल्ले कामरेड्स ग्रामीण किन बिल्कुले समझेमाया परवोर लेवेके कम से कम गंभीरता ते समझेमांतोर, मति ओरू अगा मंतोर अनि ग्रामीण किन समझेमांतोर इंजी आलिसंतोर। ओरू मावा वात्तारवरण ग्रामीण आंदू इंजी, इदु व्यक्तिगत अर्थव्यवस्था पोरो आधार आसी मंता इंजी, दुश्मन अलग-अलग विभाजित आसी मंता इंजी पुन्नोर आंतोर। छापामार युद्ध लोप्पा मत्तांकु राजनीतिक, फौजी, आर्थिक, संस्कृतिक समस्यांग ओसो पार्टी समस्यांग किन हल कीयाना लोप्पा मजदूर, किसान, नौजवान, महिला आंदोलन किन ताकी कीयानास्के हमेशा गलत ओसो आंशिक रूप ते सही रुझान लागू कींतोर। ओरू ग्रामीण समस्यांग किन शहरी दृष्टिकोण ते हूडिंतोर अनि उंदी हमेशा उंदी मोटा दिवार पोरो तल्ला कोहकींतोर, बारांकु इत्तेके ओरू मनोगत रूप ते बचोनो अंगडम ता योजनांग बनेकींतोर, अविन किन जबरदस्ती लागू कींतोर। हत्ता साल ते मना कामरेड्स वेल्ले सफलता दोरकी कित्तोर अदिना कारण दोष-निवारण आंदोलन ओसो काम कीयानास्के दोरकता असफलतांग। मति माटु इंजे वेने मना विचार कुन पूर्ण रूप ते वात्तावरण ता अनुसार बनेकित्ताद हिल्ले इंजी ध्यान तासना, सिर्फ अस्केने माटु काम ता हर क्षेत्र ते सफलतांग दोरकी किया परिंतोम, वेल्ले जल्दी दोरकी किया परिंतोम। माटु निज्जमे इंजे मनगा मत्ता ग्रामीण आधार इलाकांग व्यक्तिगत अर्थव्यवस्था पोरो आधार आसी मंतांग, दुश्मन अलग-अलग विभाजित आसी मंता ओसो छापामार युद्ध ताका मंता इंजी समझेमातेके मना वेल्ले स्पीड ते दोरकसोर मत्ता सफलतांग, शहरी दृष्टिकोण, उचुक दूसरा पोल्लोंग किन आधार बने कीसि दोरकी कीयाना सफलतांग ना बराबरी बद्रम किया परिंतांग? तीरम आयना अलग मंता, मति रफ्तार वेल्ले तेज मंता। बारांकु इत्तेके माटु शहरी दृष्टिकोण किन आधार बने कीसि ताकतेके ओसो वर्तमान कालीन

वास्तविकता किन नजरअंदाज कीतोम अस्के माटु ते रफ्तार तले, सीधा माटु हंदी हिल्लाचोन बाधांग-मुशिकलकुना लोप्पा हिरकिंतोम ओसो मनाकिन इदिनगडल बदे वेने सफलता दोरका परवो आयार।

स्पष्ट रूप ते इदिना उदाहारण सैनिक-असैनिक उत्पादन आंदोलन ता वर्तमान रूप के मुन्ने ओयना लोप्पा दोरकी किता बेहरा सफलतांग मंतांग।

माटु जापानी आक्रमणकारिरा पोरो भीषण हमला कियाला आल्सिंतोम अनि शहर कुना पोरो कब्जा कीयाना, पोहता इलाकांग किन कब्जा कीयाना तैयारी कियाला आल्सिंतोम। मति माटु इद लक्ष्य किन बद्रम पूरा किया परितोम। मनम इत्तेके उंदी ग्रामीण इलाकांग लोप्पा मंतोम अनि इदु इलाका व्यक्तिगत अर्थव्यवस्था पोरो आधार आसी मंता, दुश्मन अलग-अलग विभाजित आसी मंतोर। इगा छापामार युद्ध ताकसोर मंता। इंदानास्के बद्रम? माटु क्वोमिंगतांग ता नकल किया परवोम, बारांकु इत्तेके अदु खुद उंजी जिट्टी वेने उरहोए, सूती गेत्ते लेक्कटा जरूरी चीज काजे वेने अदु विदेशीरा पोरो निर्भर आसी मंता। माटु आत्मनिर्भरता ता पक्ष एतितोम। माटु विदेशी सहायता दोरकी कियाला आल्सिंतोम, मति ताना पोरो निर्भर आसी मन्नोम: माटु मना खुद ता कोशिश कुना पोरो निर्भर आसी, पूरा सेना ओसो पूरा जनता ना सृजन शक्ति पोरो निर्भर आसी मंतोम। मति माटु इव सब्बे बद्रम कीतोम? इदिन काजे माटु सेना, जनता लोप्पा उंदी बेहरा स्तर ता उत्पादन आंदोलन ताकी किंतोम। बारांकु इत्तेके माटु ग्रामीण ते मंतोम, अगा जन-बल ओसो भौतिक साधन बिखरेमासी मंतांग, अदिन काजे माटु उत्पादन ओसो सप्लाई काजे “एकीकृत नेतृत्व ओसो विकेंद्रित प्रबंध” ता नीति लागू किताद मंता।

बारांकु इत्तेके माटु ग्रामीण इलाका ते मंतोम, अगा किसान अलग-अलग व्यक्तिगत जमीन पोरो खेतीबाड़ी कीतोर ओसो उत्पादन ता पेरके अरता साधन कुना इस्तेमाल कीतोर अनि अगाटा ज्यादातर जमीन इंजे वेने जर्मीदार लोरा कैदे मंता। सामंतीर लगान वसूल कीसि किसान लोरा शोषण कीतोर, अदिन काजे माटु लगान ओसो सूद कम कीयाना, श्रम ते

आपसी सहायता वाले नीतिंग लागू कीसि अविन अमल कीतोम। इद्रम किच्चेके उत्पादन-काम काजे किसान लोरा गिर्दा बेरसिंता, कृषि उत्पादन-क्षमता बेरसी कियमूडांता। लगान कम कित्ता पेरके उत्पादन-क्षमता लोप्पा बढेत्तरी आता। नन्ना उत्तरी चीन ओसो मध्य चीन ता विभिन्न जागा ना सामग्री जमा कित्तान, अदु लगान लोप्पा कटौती कित्ता पेरके किसान उत्पादन-काम लोप्पा मुन्ने टुकू बचोनो ज्यादा गिर्दा तोहा मंतोर इंजी वेहिंता। मना श्रम-विनिमय दल कुनाए लेक्का आपसी सहायता दल कु संगठिनत कियाला तैयार आंतोर। इदिना लोप्पा मुव्वुर मानेय ना उत्पादन-क्षमता हत्ता कालम ता नालवुर मानेय ना उत्पादन-क्षमता ता बराबर मंता। इद्रम ता परिस्थिति ते 9 करोड़ लोकुर 12 करोड़ लोकुरा बराबर काम किया परिंतोम। इरवुर मानेय मुव्वुर मानेय ना काम कित्ता उदाहरणकु वेने हूडला दोरकतांगा जोर-जबरदस्ती ओसो आदेशकुना जागा ते तुरंत सफलता दोरकी कीयाना खोज कीसि मनम असफलता ता कारण बनेमांतोम, लोकुरा मुन्ने बेसता उदाहरण निल्पी कीसि माटु ओरकिन समझे कीयाना नीति लागू किच्चेके ज्यादातर किसान लोर वायना सालकुना लोप्पा कृषि-उत्पादन ओसो दस्ताकारी-उत्पादन कीयाना आपसी सहायता दलकुना लोप्पा संगटित कीयाना संभव आयार। उंदी बेरा इद्रम ता उत्पादन दल निल्पी कीयाना आम आतेके सिर्फ उत्पादने आयवा सब्बे रकम ता सृजन आयनाए आयवा राजनीतिक प्रगति वेने आयार, शिक्षा ता स्तर बेरसियर, स्वास्थ्य-रक्षा ता काम लोप्पा प्रगति आयार, गुंडा-बदमाश लोरा सुधार आयार, सामाजजिनक रीति-रिवाज कुना लोप्पा बदलाव आयार अनि उत्पादन ता काम वायना औजार कुन वेने जल्दी सुधरे कियमूडायार। इव ससब्बे आता पेरके ग्रामीण समाज ता का तीरम-तीरम उंदी पूना आधार पोरो पुनर्निर्माण आयार।

मना कार्यकर्ता लोर इद काम लोप्पा सावधानी ते अध्ययन किसोर मत्तेके ग्रामीण जनता किन उत्पादन आंदोलन ता विकास कीयाना लोप्पा वेल्ले सक्रियता ते मदद हीसोर मत्तेके उचुके सालकुना लोप्पा ग्रामीण लोप्पा अनाज ओसो बाकी जरूरी सामान हालनाचोन सप्लाई आतेके,

माटु सिर्फ युद्ध जारी तासना ओसो फसल खराब आयना परिस्थिति ता सामनाए आयवा वायना कालम काजे वेने अनाज ओसो बाकी जरूरी सामान ता वेल्ले बेहरा गोदाम बने किया परितोमा किसान लोरे आयवा फौजी युनिटकु ओसो सरकारी, बाकी संगठन कुन वेने उत्पादन कियाला काजे संगठित कीयाना।

बारांकु इत्तेके माटु उंदी ग्रामीण इलाका ते मंतोमा अगा दुश्मन बार-बार दमन कींतोरा। अगा उंदी दीर्घकालीन युद्ध ताका मंता। अदिन काजे फौजी युनिटकु ओसो सरकारी, अनि बाकी संगठन कुना काजे उत्पादन काम कीयाना वेल्ले जरूरी आंता। छापामार युद्ध उंदी व्यापक इलाका ते ताकसोर मत्तांकु ओरा काजे इद्रम कीयाना संभव मंता। इदे आयवा मना शेनशी-कानसू-निंगश्या हंदी इलाका ता सैनिक, सरकारी कर्मचारिा संख्या कुल आबादी किन हूइतेके वेल्ले बेहरा मंता। ओरू खुद उत्पादन काम कीवेके करविनेये डोलिंतोरा। दूसरा बगिल जनता तल वेल्ले ज्यादा पोयतेके ओरा पोरो वेल्ले बोजा वाटतेके जनता करविने डोलियर। अदिन काजे माटु उंदी बेहरा स्तर ता उत्पादन आंदोलन शुरू कियाला काजे संकल्पबद्ध मंतोमा। शेनशी-कानसू-निंगश्या हंदी इलाका ताए उदाहारण हूडाकाल। इगा फौजी यूनिटकु ओसो सरकार, संगठनकु हर साल कुल 2, 60,000 तान (1 तान 300 चिन ता बराबर मंता) उसता अनाज ता जरूरत मंदिता, तीना लोप्पाटल 1, 60, 000 तान ओरू जनता तल पोयंतोर अनि बाकी खुद पंजी कींतोरा। ओरू खुद उत्पादम काम कीवेके ओरे करविने डोलिंतोर लेवेके जनता किन करविने मंदा लागिंता। मना उत्पादन आंदोलन ताए कारण तेने माटु करवु तिंचि मुक्ति दोरकी कीतोम, सैनिक, जनता किन निज्जमे बेस तिंदना-उंडना दोरकिंता।

हंदी इलाका ता सरकारी, बाकी संगठन, अनाज, गेत्तंग, पलंग-कटुल किन विडचसी तम्मा ज्यादातर जरूरत कुना काजे ओरू आत्मनिर्भर आताद मंता। उचुक इकाईंग इत्तेके पूराए आत्मनिर्भर आसी मंतांग। वेल्ले इकाईंग अनाज, गेत्तंग, कटुल-पलंग लेक्कटव वेने आंशिक रूप ते आत्मनिर्भर आताद मंता। हंदी इलाका ता फौजी यूनिटकु इदिना लोप्पा

वेल्ले बेहरा सफलतांग दोरकी कीतांदा। वेल्ले यूनिटकु अनाज, गेत्तेंग, पलंग-कटुल ओसो सब्बे बाकी सामान पूर्ण रूप ते आत्मनिर्भर आतांग। इत्तेके 100 प्रतिशत आत्मनिर्भर आताद मंता सरकार तल बदे वेने चीज तालकोरा। इव सब्बे बेहरा स्तर आंदू, सबसे पोरोटा दर्जा, इदिन तीरम-तीरम बचोनो साल तल कित्ताद मंता।

बेगा लड़ाई ता जरूरत मंता अगा इदु स्तर ता लड़ाई कियमूडायो। अगा दूसरा लेवेके तीसरा दर्जा ता स्तर तत्ता लागिंता। दूसरा दर्जा ते सरकार सप्लाई कीयाना अनाज, गेत्तेंग, पलंग-कटुल विड़चसी दोड़ रास्ता चीज कुना उत्पादन कीसि आत्मनिर्भरता दोरकी कियाना: तिंदान-निय्यु(0.5 ल्यांग हर मानेय हर दिव्या), होवोर (0.5 ल्यांग हर मानेय हर दिव्या), कुसिर-काया(1-1.5 चिन हर मानेय हर दिव्या), हव्विंग (1-2 चिन हर मानेय हर महीना), ईधन, दफ्तर ता काम वायाना सामान, विभिन्न खर्च, शिक्षा, स्वास्थ्य संबंधी अनुदान, हथियार कुना सफाई कीयाना खर्च, तम्बाखू, जूता, मोजा, दस्ताने, तौलिया, पलकु साफ कियाला काजे ब्रुश लेक्काटवना खर्च: इव सब्बे चीजु कुना कुल व्यव ता 50 प्रतिशत खर्च आंता। इदु दर्जा तीरम-तीरम रेंडु-मूंड साल कुना लोप्पा निल्पी कियमूडंता। उचु जागा ने इदु सफलता दोरकी कित्ताद मंता। अदु दर्जा स्थिर आधार इलाकांग लोप्पा निल्पी कित्ताद मंता।

तीसरा दर्जा हंदी इलाकांग लोप्पा ओसो छापामार इलाकांग लोप्पा निल्पी किया परमूडंता। अगा 50 प्रतिशत आत्मनिर्भरता संभव हिल्ले, 15-25 प्रतिशत आत्मनिर्भरताए संभव मंता। अगा इद दर्जा ते एव्वनदु बेसे इंजी आल्सा लागियिर।

संक्षिप्त ते, असाधारण परिस्थिति ते मत्ता इकाइंग किन विड़चसी, बाकी सब्बे फौजी यूनिटकु ओसो सरकारी, बाकी संगठन कु लड़ाई, ट्रेनिंग ओसो काम नडमा ता कालम ते उत्पादन काम कीयाना। इद्रम ता नडमा ता कालम किन सामूहिक उत्पादन काजे इस्तेमाल कीयानाए आयवा, मना उचुन कर्मचारिर किन उत्पादन काम काजे संगठित कीयाना, ओरकिन फार्म, कुसिर-काया ना बगीचा, मेहना दिम्मा, वर्कशाप, सुडल-सुडला

कारखानांग, सप्लाई-दल ओसो सहकारी समितिंंग ना संचालन कियाला ओसो किसान लोरा संगे कलियसी अनाज, कुसरिंग पंडिह कीयाना काम सौंपे कीयाना। वर्तमान परिस्थिति ते हर संगठन ओसो फौजी यूनिटकु मुश्किल कुना पोरो जीत हासिल कियाला काजे तम्मा खुद ता “स्थानीय अर्थव्यवस्था” निल्पी कीयाना। इद्रम कियाला तैयार हिल्ला मंदाना लंपंट लोरा लक्षण आंदू ओसो इदु वेल्ले लज्जा वायना लेक्कटा पोल्लो मंता। उत्पादन बेरसी कियाला काजे माटु उत्पादन काम लोप्पा प्रत्यक्ष रूप ते शामिल आयना सब्बे तोरा काम ता क्वालिटी ता अनुसार व्यक्तिगत बोनस हियाना व्यवस्था वेने बने कीयाना। इदे आयवा, काम किन कारगर रूप ते मुन्ने ओयल काजे हर संगठन ता प्रधान खुद वेने जिम्मेदारी एतना अनि काम लोप्पा व्यक्तिगत रूप ते शामिल आयना। नेतृत्वकारी ग्रूप किन जनता संगे काल्पना ओसो सामान्य आह्वान किन विशेष ओसो ठोस मार्गदर्शन संगे काल्पना तरीका लागू कीयाना।

उचुन मुल फौजी यूनिटकु उत्पादन काम शुरू कित्तेके ट्रेनिंग ओसो युद्ध ता काम किया परवोर, सरकारी, बाकी संगठन कु वेने इद्रम कित्तेके ओरू वेने तम्मा खुद ता काम किया परवोर आयनूर इंतोरा। इदु उंदी अंगडम पोल्लो आंदू। हत्ता उचुक सालकुना लोप्पा हंदी इलाका लोप्पा मत्ता मना फौजी यूनिटकु तम्मा काजे वेल्ले तिंदाना ओसो केरला काजे वेल्ले बेहरा स्तर ता उत्पादन काम कीतांग, संगेने तम्मा ट्रेनिंग, राजनीतिक शिक्षा ओसो साक्षरता-कोर्स, बाकी कोर्स किन मुन्ने टुकू बचोनो ज्यादा सफलतापूर्क कीतांग। सेना ओसो जनता नड्मा मुन्ने तुकु बचोनो ज्यादा घनिष्ठ एकता आतांग। हत्ता साल उंदी बगिल मोर्चा ते बेहरा स्तर उत्पादन आंदोलन तीक कित्ताद मत्ता, अगा दूसरा बगिल युद्ध भूमि ते वेने सफलतांग दोरकी कित्ताद मंता, इदे आयवा उंदी व्यापाक ट्रेनिंग आंदोलन वेने ताकी कित्ताद मंता। उत्पादन काम कितांकु, सरकारी, बाकी संगठन कुना कर्मचारिरा रहन-सहन मुन्ने तुकु बेस आता। ओरू मुन्ने तुकु ज्यादा जीवा कीसि काम कीयाना शुरू कित्तोरा। इदु परिस्थिति हंदी इलाका ता ओसो मोर्चा ते रेंडासी जागा ने मत्ता।

इंद्रमे ग्रामीण इलाकांग लोप्पा छापामार युद्ध ताकनास्के फौजी यूनितकु ओसो सरकारी, बाकी संगठनकु आत्मनिर्भता काजे उत्पादन-काम कीतांग, अणु लडाई, ट्रेनिंग, कामकाज ते मुन्नेटुकु ज्यादा शक्ति ओसो सक्रियता तोहिंतांग ओसो तम्मा अनुशासन लोप्पा सुधार कीतांग। तम्मा अंदरूनी एकता ओसो सिविलियन लोरा संगे एकता कीयाना लोप्पा बेरसी कीतांग। आत्मनिर्भरता काजे उत्पादन मना देश ता दीर्घकालीन छापामार युद्ध ता उपज आंदू, इदु मावा गौरव आंदू उंदी बेरा माटु तीना लोप्पा सफल आतेके बदे वेने रकम ता भौतिक मुश्किल माकिन रोमी किया परवो आयार। मना स्फूर्ति ओसो क्षमता हर साल बेरसोरे दायार, हर लडाई पेरके माटु ज्यादा से ज्यादा शक्तिशाली आसोर दायकोम। माटु बदे डावुट हिलवा दुश्मन तुकु ज्यादा शक्तिशाली आयकोम।

मोर्चा ते काम कीयाना कामरेड्स ना ध्यान किन उंदी दूसरा पोल्लो बगिल पिडंगना जरूरी मंता। मना इंजे स्थापना कित्ता उचुक आधार इलाकांग भौतिक साधन-स्रोत कुना संगे वेल्ले समृद्ध मंतांग। इदिन सुरता तासिसी अगटा मना कार्यकर्ता लोर बचत कीयाना ओसो उत्पादन काम कियाला काजे तैयार हिल्लो। इदु बेल्ले लब्बड पोल्लो मंता, इदिना कारण ते ओरकिन पेरके वेल्ले मुश्किल ता सामना किया लागिंयार। माटु बेगा मत्तेकाई माटु मना जन-बल ओसो भौतिक साधन-स्रोत कुना कदर कीयाना। वायना कालम ता बारे आल्सवा लेवा काम कीयानायो, फिजुल खर्च कीयानायो, शाही खर्च कीयानायो। माटु बेगा मत्तेकाई माटु मना काम तुकु मुन्ने साल तले वायना साल ता बचोनो सालकुना पोरो ध्या हियाना। मनम जारी तासना मना दीर्घकालीन युद्ध पोरो ध्या हियाना, प्रत्याक्रमण पोरो ध्यान हियाना, दुश्मन किन बाहर पूंडता पेरके पुनर्निर्माण काम पोरो ध्यान हियाना। उंदी बगिल फिजुल खर्च ओसो शाही खर्च बिल्कुले कीयानायो। दूसरा बगिल उत्पादन ता सक्रियता ते विकास कीयाना। उचुका जागा ने लोकर वेलल् मुश्किल कुना सामना किया लागता, बाराकु इत्तेके ओरू वायना कालम ता बारे आल्सोर आतोर अनि जन-बल, भौतिक साधन-स्रोत कुना बचत कीयाना ओसो उत्पादन ता विकास

कियाला बगिल ध्यान हीवोर आतोर। इविनगडल मनम सबक एतना ओसो इविना बगिल ध्यान हियाना।

तैयार माल ता बारे वेहना इत्तेके, शेनशी-कानसू-निंगश्य हंदी इलाका फैसला कित्ता लेक्का कपास, सूति कपड़ा, लोहा, कागज ओसो बाकी जरूरी सामान लोप्पा रेंडु साल लोप्पा पूराए आत्मनिर्भरता दोरीक कित्ताद मंता। बवु चीजकुना उत्पादन इगा आसोर हिल्ले लेवेके वेल्ले कम उत्पादन आंता, अविना उत्पादन कीयाना, अविन किन तैयार कीयाना अवना सप्लाई कीयाना, बाहर ता खोत कुना पोरो बिल्कुले निर्भर आसी मंदानायो। पूरा काम सार्वजनिक, निजी ओसो सहकारी कारोबार कुना संगे पूरा कीयाना। सब्बे उत्पादन कुना काजे मना मांग मात्रा आयवा क्वालिटी वेने मंता, इत्तेके ताना लोप्पा टूट-फूट सहन कीयाना क्षमता मंदाना। हंदी इलाका ता सरकार आठवीं राह सेना ता संयुक्त प्रतिरक्षा हेडक्वार्टर ओसो पार्टी ता केंद्रीय कमेटी ता उत्तर-पश्चिम ब्यूरो इव पोल्लोंग पोरो वेल्ले ध्यान हीसि सही काम कित्ता। नन्ना मोर्चा ते सब्बे जागाने इद्रम कीयाना आयार इंजी आशा किया मंताना वेल्ले जागा ने इद्रम ता काम जारी मंता ओसो ओरा सफलता आसा कींतान।

मना हंदी इलाका ते ओरू बाकी मुक्त इलाकांग लोप्पा आर्थिक काम ता हर शाखा संबंधित जानाकीर हासिल कियाला कीयाना लोप्पा रेंडु-मूंड साल ओसो पोयता। मना जरूरत ता पूरा लेवेके ज्यादातर हिस्सा खुद पंडिह कियाकोम, मना जरूरत ता ज्यादातर चीजकु मनम खुद तैयार कियाकोम अस्के इद्रम ता पूर्ण रूप लेवेके मुख्य रूप ते आत्मनिर्भर बनेमायनुंग। मनगा अतिरिक्त चीजकु वेने मंदानुंग, मनम ग्रामीण आर्थिक काम ता हर शाखा लोप्पा एक्सपर्ट बनेमाता दिव्या वेने बस्केने वायारा। माटु शहर ता दुश्मन किन खत्म कियाकोम, अस्के माटु आर्थिक काम ता पूना शाखा किन कैदे पोया परकोम। माटु भरपूर कोशिश कीयाना करियाना, बारांकु इत्तेके चीन तन्ना पुनर्निर्माण काजे मावा पोरो निर्भर आसी मंता।

उत्पादन-कार्य छापामार इलाकांग लोपपा संभव मंता

31 जनवरी 1945

इद स्यादकीय कामरेड माओ त्सेतुंग येनान ता “मुक्ति दैनिक” काजे रासिस मत्तोर।

दुश्मन ता इलाकाल ते मत्ता मुक्त इलाकांग लोपपा तुलनात्मक रूप ते स्थिर मत्ता आधार इलाकांग लोपपाटा सेना, जनता लोपपा उत्पादन आंदोलन कीयाना परमूडांता लेवेके ताकी कीयाना इंदाना सवाल मुन्ने ने हल कित्ताद मंता ओसो इदिना बारे ते इंजे बदे डावुट हिल्ले। मति इद आंदोलन किन छापामार इलाकांग ओसो दुश्मन इलाका ता बिल्कुस पेरके अरता इलाका लोपपा वेने ताकी कीयाना आंता या आयो इंदाना सवाल इंजे वेल्ले लोकुरा दिमाग ते मंता अनि इदु हल आताद हिल्ले। इदिना कारण सबूत हिल्ला मंदानादु मंता।

मति इंजे मनगा सबूत मंता। 1944 ते शानशी-छाहाड़-हपे हंदी इलाका ता वेल्ले छापामार इलाकांग लोपपा बेहरा स्तर ते उत्पादन कार्य कित्ताद मंता। तीना वेल्ले सफलतांग वेने दोरकतांग। शानशी-छाहाड़-हपे हंदी इलाका ता छापामार दल कुना उत्पादान आंदोलन ता बारे ते कामरेड चांग फिंग-खाए ना “मुक्ति दैनिक” ते 28 जनवरी ते प्रकाशित आता रिपोर्ट लोपपा वेहत्ताद मत्ता। इद रिपोर्ट ते रास्ता इलाकांग ना पोरो इगा रास्ता लेक्का मंतांग:- मध्य हपे, छठ उपक्षेत्र, दूसरा उपक्षेत्र ता चौथाई इलाकाई टुकड़ी, चौथा उपक्षेत्र ता आठवीं इलाकाई टुकड़ी, शानशी ते ताएश्येन ओसो क्वोश्येन काउन्टिंग लोपपा मत्ता फौजी टीमकु। इव इलाकांग लोपपा लोपपा परिस्थिति वेल्ले अनुकूल मत्ता।

अद जागा दुश्मन ता फौज ओसो कठपुतली फौड कुना अड्डा ओसो किलेबंदी कुना कमी हिल्ला जागा आंदू बंकर, दिवार ओसो सडक कुना जाल वाटताद मंता। दुश्मन इव सब्बे सुविधांग ना फायदा एतसी मना पोरो अचानक हमलांग ओसो घेराव कीसि “खत्म कीयाना” अभियानकु ताकी कीता। इद्रम ता परिस्थिति ते छापामार दलम कुन हमेशा बचोनो बेरा इलाका विडचसी दाया लागिंता।

इद परिस्थिति ते वेने छापामार दलम लड़ाईंग नडमा मौका दोरकतास्के उत्पादन-काम जारी तासना व्यवस्था कीता। इदिना कारण ते: इंजे हर मानये मुन्ने तुकु ज्यादा राशन दोरकिंता, हर मानेय रोज 0.5 ल्यांग तिंदाना निय्य, 0.5 ल्यांग होबोर, उंदी चिन कुसरी, महीना ते 1.5 चिन हल्विंग सप्लाई कियमूडांता। इदे आयवा, वेल्ले सालकुनल दोरकसोर हिल्ला मत्ता पलकु साफ कियाला काजे ब्रुश, मंजन, पढाई-लिखाई कीयाना सामान वेने इंजे दोरका मंता।

उचुन आल्साटू! बोरु छापामार इलाकांग लोप्पा उत्पादन कार्य संभव हिल्ले इंजी इंतोर?

वेल्ले लोकर आबादी ज्यादा मत्ता इलाकांग लोप्पा एकसट्टा जमीन इंजी इंतोर। अगा एकसट्टा जमीन हिल्ले अदिन काजे उचुन शानशी-छाहाड-हपे हंदी इलाका किन हूडाटू:

पहली पोल्लो-इगा कृषि पोरो मुख्य ध्यान हियाना नीति ता अनुसार भूमि-समस्या किन हल कित्ताद मंता। ओरू कुल 9 तरीका ना इस्तेमाल कींतोर: 1. दुश्मन नाकेबंदी काजे इस्तेमाल कीयाना गूडी मुट्टीह कीयाना ओसो गुमियांग किन पाटे कीसियाना। 2. दुश्मन दायाला-वायला इस्तेमाल कीयाना बेहरा सडक कुन नष्ट कीसि अविना ओदा खेती कीयाना। 3. बंजर जमीन ता सुडला-सुडला हिस्सा किन खेतीबाडी काजे इस्तेमाल कीयाना। 4. सशस्त्र संरक्षण संगे मिलिशिया किन मदद हिसी, लेंज वेहची ते दुश्मन ता परवा किवा लेवा ओरा किलेबंदी ना हेरेहेर खेती कीयाना। 5. श्रमशक्ति कम मत्ता किसान लोरा संग सामूहिक रूप पूहाना-वीतना कीयाना। 6. दुश्मन ता अड्डां ओसो ओरा किलेबंदी ना हेरे-हेरे ता

जमीन पोरो पूहला दायनास्के सैनिक लोर किसान लोरो ड्रेस ता इस्तेमाल कीयाना। 7. पाडिंग बने कीयाना, उस्का उंदी बगिल कीसि अद जमीन किन खेती कीयाना लेक्का बने कीयाना अनि डोड्डा ता रेंडु बगिल ता जमीन ता इस्तेमाल कीयाना। 8. वेत्तता जमीन पोरो सिंचाई व्यवस्था कियाला काजे किसान लोरा मदद कीयाना। 9. लोकर सक्रिय मत्ता हर नाटे खेतीबाड़ी काम काजे मदद कीयाना।

मति कृषि-उत्पादन संभव मत्तेके दस्ताकारी ओसो बाकी रकम ता उत्पादन वेने संभव आयो बहे? इद्रम निज्जमे आया परिंताया? उचुन शानशी-छाहाड़-हपे हंदी इलाका किन हूड़ाटू:

दुश्मन ता नाकाबंदी वाले बंकर ओसो लाईनकु ना बाहर मत्ता मना सेनांग तम्मा उत्पादन-कार्य किन सिर्फ कृषि एवनले सीमित तासवा लेवा स्थिर इलाकांग ना लेक्का ओरू दस्ताकारी ओसो परिवहन का वेने विकास कीतांग। चौथी इलाकाई टुकड़ी उंदी फैल्ट-कैप वर्कशाप, उंदी कोल्हू (निय्य पीरनादु) उंदी आटा-चक्की बनेकीतांग। सात महीनांग लोप्पा स्थानीय मुद्र ता 5,00,000 य्वान मुनाफा कमई कीतांग। अबु सिर्फ तम्मा खुद ता मुश्किल कुन हल कीयानाए आयवा तम्मा छापामार इलाका ता जनता ना जरूरत कुन वेने पूरा कीतांग। सैनिक इंजे तम्मा सब्बे ऊनी स्वेटर ओसो मौजांग ना सुविधा खुद किया परिंतोर।

बारांकु इत्तेके छापामार इलाकांग लोप्पा फौजी कार्यवाहिंग बार-बार आंतांग। अदिन काजे सेनांग उत्पादन काम कित्तेके युद्धभूमि पोरो असर अरिंता बहे? इद पोल्लो निज्जमा? अद्रम इत्तेके शानशी-छाहाड़-हपे हंदी इलाका किन हूड़ाटू:

श्रमशक्ति ओसो सशस्त्र शक्ती किन उंदी दूसरा संगे कलियसी ताकना नियम कुन लागू किसोरे ओरू उत्पादन काम ओसो युद्धभूमि किन समान महत्व हींतोर। उदाहरण तुकु दूसरा उपक्षेत्र ता चौथी इलाकाई टुकड़ी किने हूड़ाटू। ओरू तम्मा वसंत कालम ते पूहना शुरू कित्तास्के दुश्मन पोरो हमला कियाला काजे तम्मा विशेष दल लोहतोर संगे उंदी शक्तिशाली राजनीतिक आक्रमण शुरू कित्तोर। अद्रममासिए अगा फौजी कार्यवाहिंग

लोप्पा वेने मुन्ने तुकू ज्यादा सक्रियता वात्ता अनि सेना ता युद्ध-क्षमता बेरसता। फरवरी तल पोयसी सितम्बर ता शुरुआत एवनल सुडला दलम 71 लडाई लडेमाता, चतुंगशे, शांग-च्वांग, येच्वांग,फंगच्याचाए ओसो याथाओ पोरोल ता अड्डांग पोरो कब्जा कित्ता। दुश्मन सेना ओसो कठपुतली सेना ता 165 लोकरु किन नुकसान कित्ता, 91 कठपुतली सैनिक लोर किन बंदी बने कित्ता, 3 लाईट-मशीनगन ओसो 101 रायफल, पिस्तौलकु तम्मा कब्जा ते कित्ता।

फौजी कार्यवाहिंग महान उत्पादन आंदोलन ता प्रचार नड्मा तालमेल कीसि, तुरंत उंदी राजनीतिक आक्रमण शुरु कीतोर: “बदे महान उत्पादन आंदोलन लोप्पा तोडफोड कीयाना कोशिश कींतोर, ओनकुन गुमिया ता वाट्टू!” ताएश्येन ओसो क्वोश्येन पोरोल ता काउन्टी-केद्र लोप्पा दुश्मन अगटा निवासिर किन पूछेमाता: “आठवीं राह सेना इस्साल इचोन खतरनाक बारांकु आता इंजी?” ओरू जवाब हीतोर:- “बारांकु इत्तेके मीटू हंदी इलाका ता महान उत्पादन आंदोलन किन तहस-नहस कीयाना कोशिश किया मंतरि।” कठपुतली सैनिक लोर वरोर-दूसरोन किन इत्तोर: “वीरू लोकरु महान उत्पादन आंदोलन कीयानास्को बाहर दायाना बेस हिल्ले इंजी।”

छापामार इलाकांग लोपाटा जनता वेने उत्पादन आंदोलन किया परिंताया? इंजे लगान कम कित्ता हिल्ला इलाकांग लोप्पा वेने किसान लोरा उत्पादन बेरसी कीयाना लोपा गिर्दा तोहिंतोर? शानशी-छाहाड-हपे हंदी इलाका लोप्पा इद सवाल ता जवाब माटु इंगो इंजी हीतोमा।

इदे आयवा दुश्मन ता नाकाबंदी वाले बंकर ओसो लाईन कुना बाहर मत्ता मना सेनांग उत्पादन आंदोलन किन फैले कीसि स्थानीय जनता किन प्रत्यक्ष सहायता कींता। उदी बगिल अवु तम्मा सशस्त्र शक्ति संगे उत्पादन जमा किसोरे जनता ना रक्षा कींतांग। दूसरा बगिल तम्मा मेहनत संगे जनता ना व्यापक रूप ते सहायता कींतांग। उचुक यूनिटकु खेतीबाडी कीयाना कालम ते तम्मा जनशक्ति ता 50 प्रतिशत जनता ना सहायता काजे हियाना इंजी नियम बने कीतांग। इद्रम उत्पादन ता बारे ते जनता ना उत्साह वेल्ले

ज्यादा बेरसता, सेना सो जनता नड़मा ता संबंध ज्यादा मजबूत आता, जनता किन हालनाचोन तिंदना-उंडना सामान दोरका मंता। छापामार इलाकांग लोप्पा कम्युनिस्ट पार्टी ओसो आठवीं राह सेना किन जनता ना सहानुभूति ओसो समर्थन बेरसता।

इद्रमे छापामार इलाकांग लोप्पा सेना ओसो जनता बेहरा स्तर ते उत्पादन आंदोलन ताकी किया परिंता या परवो इंदाना सब्बे सवाल कुना जवाब हित्ताद मंता। माटु मुक्त इलाकांग लोप्पा ओसो छापामार इलाकांग लोप्पा पार्टी, सरकार, सेना ते काम कीयाना सब्बे कार्यकर्ता लोर किन इद पोल्लो किन पूरा समझेमायना इंजी वेहितोम, बारांकु इत्तेके ओरू “आया परिंता” लेवेके “इद्रम आयाना लेक्का मंता” इंदान लेक्का समझेमातेके उत्पादन कार्य हर जागा शुरू आयार। इद पोल्लो किन सुरता तासिसी शानशी-छाहाड़-हपे हंदी इलाका लोप्पा उत्पादन-कार्य ता शुरूआता कित्ताद मत्ता।

उत्पादन आंदोलन ते दुश्मन ना नाकाबंदी वाले बंकर ओसो लाईन कुना बाहर मत्ता मना सेना सिर्फ पांच महीनांग लोप्पा ने तम्मा उत्पादन-योजना किन पूरा कीयानाए आयवा मुन्ने हंजी ओरू बचोनो व्यवहारिक सृजन वेने कित्तोर। इदिना कारण कार्यकर्ता लोर तम्मा विचार किन बदले कित्तादु मत्ता। उत्पादन-कार्य ओसो श्रमशक्ति किन सशस्त्र शक्ति संगे तालमेल कीयाना पोरो गंभीरता ते ध्यान हित्तोर, जनता नड़मा ता श्रमवीर ओसो आदर्श कार्यकर्ता लोर किन मुन्ने तत्तोर(उंदी शुरूआती सारां अनुसार 66 श्रमवीर ओसो आदर्श कार्यकर्ता लोर किन मुन्ने) तत्तोर।

1945 ते पूरा मुक्त इलाकांग तम्मा सब्बे रकम ता कोशिश कुना संगे मुन्ने तुकू बचोनो ज्यादा बेहरा स्तर ता सैनिक-असैनिक उत्पादन आंदोलन ताकी कीतांग अनि वायना कालम ता हिरंगम ते माटु सब्बे इलाकांग ना तुलना कियाकोम।

युद्ध सिर्फ उंदी फौजी ओसो रोजानीतिक प्रतियोगिताए आयवा उंदी आर्थिक प्रतियोगिता वेने आंदू। जापानी आक्रमणकारिर किन हारे कियाला काजे, बाकी सब्बे कामके आयवा माटु आर्थिक काम वेने

कीयाना, अनि रेंडु-मूंड साल लोप्पा अद काम लोप्पा सफलता दोरकी कीयाना। इयेंड 1945 ते माटु मुन्ने बचोनो ज्यादा बेहरा सफलतांग दोरकी कीयाना। चीनी कम्युनिस्ट पार्टी ता केंद्रीय कमेटी पूरा मुक्त इलाकांग ना सब्बे कार्यकर्ता लोर ओसो जनता इद लक्ष्य किन पूरा कीता इंजी आशा किया मंता।

चीन ता रेंडु रकम ता पिस्वल

23 अग्रेल 1945

इदु कामरेड माओ त्सेतुंग चीनी कम्युनिस्ट पार्टी ता सातवी राष्ट्रीय कांग्रेस ते हिता उद्घाटन भाषण आंदू।

कामरेड्स!

चीनी कम्युनिस्ट पार्टी ता सातवी राष्ट्रीय कांग्रेस नेंडु शुरू आया मंता। मना इद कांग्रेस ता महत्व बातल मंत? इदु कांग्रेस किन चीन ता 45 करोड़ जनता ना पिस्वल पोरो प्रभाव वाटियर इंजी वेने इंतोरा। बोरे इदिना बारे ते उंदी पुस्तक वेने रास्तद मंता: ¹ मना कांग्रेस चीन ता दूसरा पिस्वल ता प्रतिनिधित्व कींता अनि माटु वेने तीना बारे ते उंदी पुस्तक रासना।² मना कांग्रेस ता उद्देश्य जापानी साम्राज्यवाद ता तख्ता पलट कीयाना ओसो पूरा चीन ता जनता किन मुक्त कीयाना मंता। मना कांग्रेस जापानी साम्राज्यवादिर किन हारे कसी उंदी पूना चीन ता निर्माण कियाला काजे कित्ताद मंता, पूरा चीनी जनता ना एकता ओसो पूरा दुनिया ता जनता ना एकता संगे आखरी जीत हासिल कियाला काजे कित्ताद मंता।

वर्तमान कालम वेल्ले अनुकूल मंता। योरप ते हिटलर ना तख्ता जल्दिए पलटेमायर। दुनिया ता फासीवाद विरोधी युद्ध ता मुख्य मंच पश्चिम मंता। अगा सोवियत लाल सेना ता कोशिश मत्तांकु लड़ाई सफलतापूर्क जल्दी समाप्त आया। इंजे लाल सेना ता तोपकु पोक्कनादु बरलिन ते केंजा वाया मंता। इदु जल्दिए पतन आयना संभावना मंता। पूर्व ते वेने जापामी साम्राज्यवाद ता तख्ता पलट काजे ताकि कित्ता युद्ध सफल आयना गर्ते मंता। मना कांग्रेस फासीवाद विरोधी युद्ध ता आखरी जीत तुकु उचुन मुन्ने आया मंता। चीनी जनता मुन्ने रेंडु हर्रिंग मंतांग-वेहच ता हरी ओसो हीकट

ता हरीं। चीन ता रेंडु रकम ता पिस्वल मंता- वेहच ता पिस्वल ओसो हीकट ता पिस्वला जापानी साम्राज्यवाद इंजे हारेमाताद हिल्ले। मति अदु हारेमाता पेरके वेने मना मुन्ने रेंडु रकम ता वायना कालम कु मंदितांग। उंदी चीन स्वाधीन, स्वतंत्र, जनवादी, एकीकृत, समृद्ध ओसो शक्तिशाली मंदाना इत्तेके वेहच ते मंदाना चीन, ओसो उंदी पूना चीन ताना लोप्पा जनता मुक्त आसी मंदिता। लेवेके उंदी अर्ध-औपनिवेशिक, अर्ध-सामंती विभाजित, गरीब ओसो शक्तीहीन मंदाना इत्तेके पाड़ना चीन। पूना चीन ओसो पाड़ना चीन-इव रेंडु वायना कालमकु आंदुंग इवु चीनी जनता, चीनी कम्युनिस्ट पार्टी ओसो मना वर्तमान कांग्रेस मुन्ने मंता।

बारांकु इत्तेके जापान इंजे हारेमातद हिल्ले, बारांकु इत्तेके इवु रेंडु वायाना कालमकु अदिना हार आता पेरके वेने मना मुन्ने मंदितांग, इद्रम ता परिस्थिति ते माटु मना काम बद्रम शुरू कीयाना? मना काम बातल मंता? मना काम सिर्फ दृढ़ता ते जनता किन गोलबंद कीयाना, जनशक्ति ता विस्तार कियान, एकताबद्ध किया परताचोन देश ता सब्बे शक्तिंग किन एकताबद्ध कीयाना। अस्के ने मना पार्टी ता नेतृत्व ते जापानी आक्रमणकारिर किन हारे कीयाना ओसो उंदी वेहच ते मत्ता पूना चीन ता निर्माण कियाला काजे, उंदी स्वाधीन, स्वतंत्र, जनवादी, एकीकृत, समृद्ध ओसो शक्तिशाली चीन ता निर्माण कियाला काजे संघर्ष किया परमूझायारा। मनम उंदी वेहच ते मत्ता पिस्वल काजे उंदी हीकट वाले पिस्वल ता खिलाफ संघर्ष कीयाना भरपूर कोशिश कीयाना। सिर्फ इदे मावा दृढ़ता पूर्वक कीयाना काम आंदू! बदे डायुट हिल्ला मना कांग्रेस ता काम वेने इदे आंदू, मना पूरा पार्टी ता काम, पूरा चीनी जनता ना काम आंदू।

1. उंदी समृद्ध अनुभव मत्ता शक्तिशाली कम्युनिस्ट पार्टी ओसो ताना सदस्याता-12,10,00- मंता।
2. शक्तिशाली मुक्त इलाका, इदिना कुल आबादी 9, 55, 00, 000 मंता ओसो 9,10,000 सेना ओसो 22,00,000 मिलिशिया मंता।
3. पूरा देश ता जनता ना समर्थन मंता।

4. दुनिया ता सब्बे देशकुना जनता ना ओसो खासकर सोवियत संघ ता समर्थन मंता।

इद परिस्थिति उंदी शक्तिशाली कम्युनिस्ट पार्टी, शक्तिशाली मुक्त इलाकांग ओसो पूरा देश ता जनता ओसो पूरा दुनिया ता जनता ना समर्थन मत्तांकु मना आशा पूरा आया परिताया? माटु पूरा विश्वास संगे इंतोम अवु पूरा आयनुंग इंजी। चीन लोप्पा इद्रम ता परिस्थिति मुन्ने बस्के ने वात्ताद हिल्ले। इविना लोप्पाटल उचुक परिस्थितिंग बचोनो साल एवनल मत्तांग मति मुन्ने बस्केने अवु नेंडु मत्ताचोन ज्यादा पूर्ण रूप ते हिल्ला मत्तांग। चीनी कम्युनिस्ट पार्टी मुन्ने बस्केने इचोन शक्तिशाली हिल्ला मत्ता। मना क्रांतिकारी आधार इलाकांग ना आबादी मुन्ने बस्केने इचोम ज्यादा हिल्ला मत्ता अनि ओरगा मुन्ने बस्केने इचोन ज्यादा सेना हिल्ला मत्ता। जापान कब्जा ते मत्ता इलाकांग लोप्पा, क्वोमिंगतांग शासन मत्ता इलाकांग लोप्पा जनता नड्मा कम्युनिस्ट पार्टी ता प्रभाव मुन्ने तुकु बचोनो ज्यादा बेरसता। सोवियत संघ ता ओसो सब्बे देश कुना जनता ना क्रांतिकारी शक्तिंग मुन्ने तुकू बचोनो ज्यादा बेरसता। इद परिस्थिति ते आक्रमणकारि किन हारे कीयाना ओसो पूना चीन ता निर्माण कीयाना निज्जमे संभव मंता इंदा परितोमा।

मना काजे उंदी सही नीति लागू कीयाना जरूरी मंता। मना नीति ता बुनियादी पोल्लो दृढ़ता ते जनता किन गोलबंद कीयाना ओसो जनशक्ति ता विस्तार कीयाना इंजी मंता। इद्रम कित्तेके मना पार्टी ता नेतृत्व ते आक्रमणकारि किन हारे कियमूडायर अनि पूना चीन ता निर्माण कियमूडायार।

1921 ते मना स्थापना पेरके 24 साल ता मना पिस्वल ते चीनी कम्युनिस्ट पार्टी तन्ना वीरतापूर्ण संघर्ष ता मूंड ऐतिहासिल काल- उत्तरी अभियान, भूमि-क्रांति युद्ध ओसो जापानी आक्रमण विरोधी युद्ध-तल वेंडता अनि समृद्ध अनुभव दोरकी कित्ता। इंजे मना पार्टी जापान ता प्रतिरोध कीयाना ओसो राष्ट्र ता पुनरुद्धार कीयाना चीनी जनता ना संघर्ष ता केंद्र बनेमाता। मुक्ति दोरकी कियाला काजे अदिना संघर्ष ता केंद्र

बनेमाता, आक्रमणकारिरा किन हारे कीयाना ओसो ओसो उंदी पूना चीन ता निर्माण कियाला काजे तन्ना संघर्ष ता केंद्र बनेमाता। चीन ता केंद्र इंदे आंदू, दूसरा बदे हिल्ले।

मनम नम्र ओसो विविकशील मंदाना, घमंड ओसो जल्दबाजी तल बचेमायना अनि तन-मन ते चीनी जनता ना सेवा कीयाना। अस्केने चीनी जनता किन वर्तमान काल ते जापानी आक्रमणकारीर किन हारे कियाला काजे ओसो वायना कालम ते उंदी पूना नवजनवादी राज्य ता निर्माण कियाला काजे एकताबद्ध किया परमूडायरा। माटु इद्रम कीवके, माटु सही नीति लागू कीवके, कलियसी मंजी कोशिश कीवके इद काम किन बस्के पूरा किया परवोम आंतोम।

जापानी साम्राज्यवाद खत्म आयना!

चीनी जनता ना मुक्ति जिंदाबाद!

चीनी कम्युनिस्ट पार्टी जिंदाबाद!

चीनी कम्युनिस्ट पार्टी ता सातवीं राष्ट्रीय कांग्रेस जिंदाबाद!

नोट

1. इगा च्यांग काई-शेक ना “चीन ता पिस्वल” पोरोल ता पुस्तक ता बारे ते वेहत्ताद मंता। इदु 1943 ते प्रकाशित आता।
2. इगा कामरेड माओ त्सेतुंग कांग्रेस ते पेश कित्ता “मिलीजुलू सरकार कुना बारे ते” हेडिंग वाले रिपोर्ट ता बारे ते वेहत्ताद मंता।

संयुक्त मोर्चा सरकार बारे ते

24 अप्रैल 1945

इदु उंदी राजनीतिक रिपोर्ट आंदू इदिन किन कामरेड् माओ त्सेतुंग चीनी कम्युनिरस्ट पार्टी ता सातवी राष्ट्रीय कांग्रेस ते पेश किसी मतोर।

1 चीनी जनता ना बुनियादी मांगकु

मना कांग्रेस दोड़ रास्ता परिस्थितिग लोप्पा ताका मंता। चीनी जनता जापानी आक्रमणकारिरा खिलाफ लगभग आठ साल एवनल गट्टिग नितसी वीरातपूर्वक ओसो रोमवा लेवा संघर्ष कित्ता पेरके, ओसो इद संघर्ष लोप्पा अदिन किन वेल्ले बेहरा मुश्किल कुना सामना किया लागता अनि गिनती हिल्वा कुरबानिंग हिया लागता, उंदी पूना परिस्थिति पुटता। पूरा दुनिया लोप्पा फासीवादी हमलांग विरुद्ध कित्ता न्यायिक ओसो पुनीत संग्राम ते निर्णायक जीत दोरकी कित्ताद मंता। इंजे चीनी जनता तन्ना एकताकारी देशकुना संगे तालमेल कीसि जापान किन हारे कीयाना टाईम गर्रे वात्ता। मति चीन इंजे वेने एकताबद्ध आताद हिल्ले, अदु इंजे वेने उंदी गंभीर संकट ता सामना किया मंता। इद्रम ता परिस्थिति ते मनम बाताल कीयाना? इद्रम ता परिस्थिति लोप्पा मनम सब्बे राजनीतिक पार्टिंग ओसो ग्रूप कुना प्रतिनिधिरा ओसो पार्टी संगे संबंध हिल्वा लोकुरा प्रतिनिधि लोरा संगे एकताबद्ध कीयाना ओसो उंदी अस्थाई जनवादी गठबंधन सरकार ता स्थापना कीयाना सबसे फौरी जरूरत मंता। अस्के ने जनवादी सुधार किया परमूडायर, वर्तमान संकटकिन वेंडा परमूडायर, चीनी जनता किन जापानी आक्रमणकारीगडल मुक्त कीयाना उद्देश्य ते जापानी

आक्रमणकारिण किन हारे कियाला काजे एकता कीयाना देश कुना संगे कारगर तालमेल बने कीसि लड़ाई लड़ेमायला काजे देश ता सब्बे जापान विरोधी ताकत कुन गोलबंद ओसो एकीकृत किया परमूडायरा। ताना पेरेके माटु व्यापक जनवाद पोरो आधार आसी उंदी राष्ट्रीय एसेम्बली केयना अनि व्यावहारिक रूप ते संगठित उंदी जनवादी सरकार ता निर्माण किया लागिगर। इदिना स्वरूप उंदी संयुक्त सरकार ताए स्वरूप मंदियर, तीना लोप्पा मुन्ने तुकू ज्यादा बेहरा स्तर ते सब्बे पार्टिंग, ग्रूपकु ओसो निर्दलीय लोकुरा प्रतिनिधित्व मंदिता। इदु उंदी स्वाधीन, स्वतंत्र जनवादी, एकीकृत, समृद्ध ओसो शक्तिशाली पूना चीन ता निर्माण कियाला काजे सम्पूर्ण देश ता मुक्त जनता ना नेतृत्व कियार। संक्षेप ते माटु एकता ओसो जनवाद ता कार्यदिशा लागू कीयाना, आक्रमणकारिण किन हारे कीयाना अनि उंदी पूना चीन ता निर्माण कीयाना।

माटु इदिना संगे ने चीनी जनता ना बुनियादी मांग कुना मांग आया परिंता इंजी माकिन विश्वास मंता। अदिन काजे नन्ना नावा रिपोर्ट ते मुख्य रूप ते इवे मांग कुना चर्चा कियकाना उंदी जनवादी गठबंधन सरकार ता स्थापना कीयाना या कीयानायो इंदाना पोल्लो पोरो चीनी जनता ओसो एकताकारी देश कुना जनवादी लोकमत काजे वेल्ले गंभीर चिंता ता विषय मंता। अदिन काजे नावा रिपोर्ट इदे सवाल ता बारे ते वेहना पोरो जोर हियार।

जापानी-आक्रमण-विरोधी युद्ध ता आठ साल कुना लोप्पा चीनी कम्युनिस्ट पार्टी वेल्ले मुश्किल कुन वेंडसोर वात्ता अनि महान सफलतांग किन दोरकी कित्ता। मति नेटा परिस्थिति ते वेने मना पार्टी ओसो जनता ना मुन्ने गंभीर समस्यांग मंतांग। नेटा परिस्थिति ता मांग मना पार्टी ज्यादा कारगर रूप ते ओसो स्पीड ते काम कीयाना ओसो मुश्किल कुन वेंडसोर दायना, चीनी जनता ना बुनियादी मांग कुन पूरा कियाला काजे कोशिश कीयाना इंजी मंता।

2 अन्तरराष्ट्रीय ओसो स्थानीय परिस्थिति

चीनी जनता इव बुनियादी मांग कुन सही साबित किया परिंता या? इदु पोल्लो अदिना राजनीतिक चेतना, अदिना एकता ओसो अदिना कोशिश ता स्तर पोरो निर्भर आसी मंता। संगेने वर्तमान अन्तरराष्ट्रीय ओसो स्थानीय परिस्थिति वेल्ले अनुकूल मौका हींता। चीनी जनता इव अनुकूल मौकांग ना फायदा एतसी सक्रियता ते, दृढ़ता ते ओसो गट्टिग नितसी तन्ना लड़ाई जारी तासा परतेके अदु बदे डावुट हिल्ला आक्रमणकारिर किन हारे किया परिंता ओसो उंदी पूना चीन ता निर्माण किया परिंता। इदु पवित्र काम किन पूरा कियाला काजे अदिन तन्ना संघर्ष ताकनास्केटा कोशिश कुना दुगुना कीयाना।

वर्तमान अन्तरराष्ट्रीय परिस्थिति बद्रम मंता?

वर्तमान फौजी परिस्थिति सोवियत सेना बरलिन पोरो हमला किया मंता। ब्रिटिश, अमेरिका, फ्रांस ता संयुक्त सेनांग इद आक्रमणात्मक कार्यवाहिंग संगे तालमेल कीसि हिटलर ना पिस्ता सेना पोरो हमला किया मंता ओसो इटालियन जनता विद्रोह किया मंता। इव सब्बे कार्यवाहिंग हिटलर किन हमेशा काजे खत्म कियानुंग। हिटलर किन खत्म किता पेरके, जापानी आक्रमणकारिरा हार वेने गर्रे वायारा चीनी ओसो विदेशी प्रतिक्रियावादीरा भविष्यवाणी ता उल्टा, फासीवादी आक्रमणकारी ताकत कुम जरूर तेहकसी वाटमूड़ायर, जनता ना जनवादी ताकत कुनाए जीत आयारा। दुनिया जरूर विकास ता हरीं पोयार, प्रतिक्रियावाद ता आयो। मनम पूर्ण रूप ते सतर्क मंदाना ओसो घटनांग आयनास्के उचुक अस्थाई ओसो गंभीर उतार-चढ़ाव कुना सम्भावनांग बगिव वेने ध्यान हियाना। देश लोप्पा ओसो देश ता बाहर ता जनता ना एकता, विकास ओसो मुक्ति ता खिलाफ मंदाना बचोको देशकु इंजे वेने जबरदस्त प्रतिक्रियावादी ताकतकु मंतांग। बोरु इविना पोरो नजरअंदाज कियानूर ओरू राजनीतिक गलती कियानूर। मति इतिहास ता सामान्य धारा बिल्कुल स्पष्ट रूप ते तय आताद मंता, इदु बदलेमायो। इदु सिर्फ फासीवाद काजे मददगार मंता, मति सब्बे

देशकुना जनता ओसो संगठित जनवादी ताकत कुना काजे इद सही आंदू सिर्फ जनताए दुनिया ता इतिहास ता निर्माण कीयाना प्रेरक शक्ति मंदिता। सोवियत सजनता तन्ना लोप्पा महान शक्ति पैदा कित्ता, अदु फासीवाद किन हारे कीयाना मुख्य ताकत बनेमाता। अदिना कोशिशकु, संगे दूसरा फासीवाद-विरोधी एकताकारी देश कुना जनता ना कोशिश का कारण ते फासीवाद ता विनाश संभव आता। युद्ध जनता किन शिक्षित कित्ता, इदे जनता युद्ध जीड़ियर, शांति दोरकी कियार, विकास कियार।

उंदी पूना परिस्थिति प्रथम विश्व युद्ध ता परिस्थिति तिंची बिल्कुले अलग मंता। अस्के सोवियत संघ इंजे अस्तित्व ते वात्ताद हिल्ले, जनता राजनीतिक रूप ते नेंडु दुनिया ता बचोनो देशकुना जनता जागृत आताचोन जागृत आताद हिल्ले। दूसरी विश्व युद्ध रेंडु बिल्कुल अलग युग ता प्रतिनिधित्व कींता। इत्तेके फासीवाद आक्रमणकारी देश कुना हारा आयना, दूसरा विश्वयुद्ध समाप्त आयना ओसो अन्तरराष्ट्रीय शांति स्थापना आता पेरके आग्र संघर्ष आयो आयार इंजी आयो। इंजे एवनल वेल्ले फैलेमासी मत्ता फासीवाद ता पिस्ता ताकतकु, जरूर गड़बड़ किसोर मंदानुंग अनि फासीवादी आक्रमण ता विरुद्ध लड़ेमायनोरा लोप्पा जनवाद ता विरोध कीयाना ओसो दूसरा राष्ट्र ता उत्पीड़न कीयाना ताकतकु मंतांग। इवु देश ता विभिन्न देश कुना जनता ओसो उपनिवेश, अर्ध-उपनिवेश ता उत्पीड़न किसोर मंदानुंग। अदिन काजे अन्तरराष्ट्रीय शांति स्थापित आता पेरके वेने दुनिया ता वेल्ले बेहरा हिस्सा ते बचोनो संघर्ष:- फासीवाद विरोधी जनता ओसो पिस्ता-मेयता फासीवाद तत्व कुना नड़मा, जनवाद, जनवाद विरोधी नड़मा, राष्ट्रीय मुक्ति ओसो राष्ट्रीय उत्पीड़न नड़मा आसोरे मंदानुंग। जनता तन्ना दीर्घकालीन ओसो लगातार कोशिश कुना संगेने फासीवाद ता पिस्ता-मेयता ताकत कुन, जनवाद-विरोधी ताकत कुन ओसो सब्बे साम्राज्यवादी ताकत कुन हारे कित्ता पेरके ने वेल्ले व्यापक जीत हासिल किया परिंता। इदु दिथ्या वेल्ले जल्दि लेवेके हल्कोए तो वायो आयार मति इदु दिथ्या वायर पक्का वायर। फासीवाद विरोधी दूसरी विश्वयुद्ध ते दोरकता जीत युद्ध पेरके संघर्ष लोप्पा जानता ना जीत ता हरीं

पोयोर। टिकाऊ ओसो स्थाई शांति इव संघर्ष कुना लोप्पा जीत हासिल कित्ता पेरकेने दोरकी कियमूड़ायार।

वर्तमान स्थानीय परिस्थिति बद्रम मंता?

चीन ता दीर्घकालीन युद्ध लोप्पा चीनी जनता किन वेल्ले कुरबानिंग हिया लागसी मत्ता अनि वायना कालम ते वेने हिया लागियर। मति संगेने इदे युद्ध चीनी जनता किन लोहा लेक्का मजबूत वेने बने कीसिता। इद युद्ध चीनी जनता किन हत्ता सौ साल ता सब्बे महान संघर्ष किनकले ज्यादा जागृत ओसो एकताबद्ध कित्ता। छीनी जनता सिर्फ उंदी जबरदस्त राष्ट्रीय दुश्मन ता सामना किसोर मत्तादे आयवा दुश्मन ता सहायता किसोर मत्ता शक्तिशाली स्थानीय प्रतिक्रियावादी ताकत कुना वेने सामन किया मंता। इदु तस्वीर ता उंदी पहलू आंदू। मति दूसरा पहलू चीनी जनता ना राजनीतिक चेतना इंजे मुन्नेटा बदे वेने कालम तुकू बचोनो ज्यादा बेरसता। इदे आयवा अदु शक्तिशाली मुक्त इलाका ना वेने स्थापना कित्ता, दिय्या-दिय्या तुकू मुन्ने हंजोर मत्ता उंदी राष्ट्रव्यापी जनवादी आंदोनल वेने ताकी कित्ता। इव अनुकूल स्थानीय परिस्थितिंग मंतांग। हत्ता सौ साल लोप्पा चीनी जनता किन तन्ना सब्बे संघर्ष लोप्पा हार ता सामना किया लागता लेवेके अस्थाई असफलतांग ना सामना किया लागता अविना कारण उचुक जरूरी अन्तराष्ट्रीय ओसो स्थानीय परिस्थितिंग ना कमी मत्तेके नेटा परिस्थिति अलग मंता- सब्बे जरूरी परिस्थितिंग नेंडु मंतांग। नेटा हार तल बचे मायला जीत हासिल कियाला हर संभावना चीन जतना मुन्ने मंता। माटु पूरा जनता किन गट्टिग नितसी कीयाना संघर्ष ते वाटा परतेके अदिना सही नेतृत्व किया परतेके माटु जरूर जीत हासिल किया परितोम।

चीनी जनता किन इंजे अदु एकताबद्ध आसी दुश्मन किन हारे किया परित्ता, उंदी पूना चीन ता निर्माण किया परित्ता इंजी ओसो ज्यादा पक्का विश्वास आता। इंजे ताना काजे सब्बे बाधांग किन दूर कीयाना ओसो महान ऐतिहासिक महत्व वाले तन्ना बुनियादी मांग कुन पूरा कीयाना टाईम वात्ता। तीना पोरो बदे डावुट मंताया? नावा हिसाब ते हिल्ले।

3 जापानी आक्रमण विरोधी युद्ध लोप्पा रेंडु कार्यदिशांग

चीन ता समस्यांग ना कूजी

स्थानीय परिस्थिति ता चर्चा कीयानास्के, माटु चीन ता प्रतिरोध युद्ध तावने ठोस रूप ते विश्लेषण कीयाना।

चीन फासीवाद विरोधी युद्ध लोप्पा शामिल आयाना पांच सबसे बेहरा देश कुना लोप्पल उंदी आंदू। एशिया महाद्वीप लोप्पा जापानी आक्रमणकारिरा संगे लड़ेमायाना मुख्य देश आंदू। चीनी जनता सिर्फ जापानी आक्रमण विरोधी युद्ध लोप्पा वेल्ले महान भूमिका निभे कित्ता। ओसो युद्ध पेरके दुनिया ता शांति ता रक्षा कीयाना लोप्पा वने अदु वेल्ले महान भूमिका निभे कियार। पूर्व बगिल ता शांति ता रक्षा कीयाना लोप्पा इत्तेके अदु निर्णायक भूमिका निभे कियार। जापानी आक्रमण विरोधी युद्ध ता आठ साल ते खुद किन मुक्त कीयाना ओसो एकताकारी देश कुना मदद कियाला काजे चीनी वेल्ले बेहरा कोशिश कित्ता। इव कोशिशकु मुख्य रूप ते चीनी जनता नाए कोशिशकु आंदुंग। चीनी सेना ता अफसर ओसो सिपाही लोर बेहरा संख्या ते मोर्चा ते युद्ध कित्तोर, तम्मा नेत्तुर पोहतोर: चीनी ता मजदूर, किसान, बुद्धिजीविर, उद्योगपतिर पृष्ठभाग ते वेल्ले मेहनता ते काम कित्तोर। प्रवासी चीनी लोर युद्ध लोप्पा योगदान हियाला काजे चंदा जमा कित्तोर। अनि सब्बे जापान विरोधी राजनीतिक पार्टिंग(इविना लोप्पा जनता विरोधी सदस्या लोर किन विड़चसी) युद्ध लोप्पा तम्मा भूमिका निभे कींतांग। संक्षेप ते चीनी जनता तम्मा हेपुर-नेत्तुर संगे आठ साल दीर्घकालीन जापान विरोधी युद्ध वीरतापूर्वक कित्तोर, मति चीन ता प्रतिक्रियावादी बचोन सालकु युद्ध तल चीनी जनता कीयाना भूमिका ता सच्चाई किन दुनिया तल मक्किह कायला काजे गलत प्रचार किया मंतोर। लोकमत किन गुमराह कींतोर। इदे आयवा युद्ध ता आठ साल कुना लोप्पा चीन दोरकी कित्ता अलग-अलग रकम ता अनुभव कुना पूरा निचोड़ तेंडताद हिल्ले। अदिन काजे जनता किन शिक्षित कियाला काजे

ओसो पार्टी किन तम्मा-नीतिंग बने कीयाना आधार दोरकना इंजी इद कांग्रेस अवु अनुभव कुना निचोड़ तेंडसी हियाना।

इद्रम ता निचोड़ तेंडना सवाल वांता अस्के सब्बे तोर किन चीन लोप्पा इंजे रेंडु अलग-अलग मार्गदर्शक कार्यदिशांग मंतांग स्पष्ट आंता। उंदी कार्यदिशा जापानी आक्रमणकारीरा बगिल ओंता अनि दूसरा सिर्फ ओरा हार किन असंभव बने कीयानाए आयवा जापानी आक्रमणकारि किन मदद कींता अनि मना प्रतिरोध युद्ध किन नुकसाम कींता।

क्वोमिंगतांग सरकार जापान पोरो लागू कीत निष्क्रिय प्रतिरोध नीति ओसो जनता पोरो कित्ता सक्रिय दमन ता प्रतिक्रियावादी स्थानीय नीति ता कारण ते फौजी असफलतांग वातांग। विशाल प्रदेश कि पोहनूडाता, वित्तीय, आर्थिक संकट पैदा आता, जनता किन उत्पीड़न ओसो मुश्किल कुना सामना किया लागता अनि राष्ट्रीय एकता ता तहस-नहस आता। इद्रम ता प्रतिक्रियावादी नीति युद्ध किन प्रभावकारी तरीका ते ताकी कियाला काजे चीनी जनता ना सब्बे जापान विरोध ताकत कुन गोलबंध कीयाना ओसो अविन किन एकीकृत कियाला काजे हरीं पंडना लोप्पा बाधा साबित आता। इदु जनता ना जागृति ओसो एकता ता हर्दे रुकावट पैदा कित्ता। इद्रम आतेकाई चीनी जनता ना जागृति ओसो एकता विकसित आयनदु बस्केने रोमताद हिल्ले। जापानी आक्रमणकारि ओसो क्वोमिंगतांग सरकार ता दोहरा दमनचक्र नडमा विंको-वंको हर्दे ने मुन्ने हत्ता। वेल्ले दिव्या तल चीन लोप्पा रेंडु कार्यदिशांग मंतांग-क्वोमिंगतांग सरकार लागू कित्ता जनता ना उत्पीड़न कीयाना ओसो निष्क्रिय प्रतिरोध कीयाना कार्यदिशा, चीनी जनता लागू कित्ता लोकयुद्ध ताकी कियाला काजे तम्मा चेतना ओसो एकता ता स्तर बेरसी कीयाना कार्यदिशा मत्ता इदे चीन ता सब्बे समस्यांग ना कुंजी आंदू।

विंको-वंको हरीं ने वेलियाना इतिहास

इव रेंडु कार्यदिशांग ना सवाल चीन ता सब्बे समस्यांग ना कुंजी बारांकु मंता- इद सवाल किन हल कियाला लोकरा मदद कियाला काजे जापानी आक्रमण विरोधी युद्ध इतिहास पोरो नजर वाटना जरूरी मंता।

चीनी जनता ना प्रतिरोध युद्ध विंको-वंको हरदेने ताकिंता। अदु वेल्ले मुन्ने 1931 ते शुरू आता। अदिन साल 18 सितम्बर ते जापानी आक्रमणकारिर शनयांग पोरो कब्जा कित्तोर। क्वोमिंगतांग सरकार प्रतिरोध कियवा मंदाना नीति लागू कित्ता। मति इदु प्रांत ता जनता ओसो अगटा फौजकुना देशभक्त हिस्सा क्वोमिंगतांग सरकार ता खिलाफ चीनी कम्युनिस्ट पार्टी ता नेतृत्व ते लेवेके अदिना सहायता ते जापान विरोधी सेवक ओसो जापान विरोधी संयुक्त मोर्चा ता संगठन कित्तोर अनि वीरतापूर्वक छापामार युद्ध ताकी कित्तोर। बस्केने इदु वीरतपूर्वक छापामार युद्ध बेहरा स्तर ते विकसित आसी मत्ता, बचोनो बाधांग ओसो असफलतांग वातेकाई, दुश्मन तोर इदिन नष्ट किया परवोर आतोर। 1932 ते जापानी आक्रमणकारिर शांघाई पोरो आक्रमण कित्तोर अस्के क्वोमिंगतांग लोप्पा देशभक्त लोरा उंदी ग्रूप ओसो उंदी बेरा क्वोमिंगतांग सरकार ता खिलाफ हंजी जापानी आक्रमणकारिरा प्रतिरोध कियाला 199वी राह सेना ता नेतृत्व कित्ता। 1933 ते जापानी आक्रमणकारिर जेहोल ओसो छाहाड़ प्रांत पोरो आक्रमण कित्तोर, क्वोमिंगतांग लोप्पटा देशभक्त लोरा ओसो उंदी ग्रूप तीसरी बेरा क्वोमिंगतांग सरकार विरोध कित्ता अनि दुश्मन ता प्रतिरोध कियाला काजे जापान विरोधी एकता सेना ता गठन कियाला कम्युनिस्ट पार्टी ता समर्थ कित्ता। मति जापानी आक्रमण खिलाफ कीयाना इव सब्बे संघर्ष कुना लोप्पा चीनी जनता, चीनी कम्युनिस्ट पार्टी, दूसरा जनवादी ग्रूपकु ओसो देशभक्त प्रवासी चीनी लोरा मदद दोरकता। क्वोमिंगतांग सरकार प्रतिरोध कियवा मंदाना तन्ना नीति ता कारण ते बदे सहायता हित्ताद हिल्ले। इदिना उल्टा शांघाई ओसो छाहाड़ इव रेंडासी जागा ना जापान विरोधी कार्यवाहिंग किन क्वोमिंगतांग सरकारे तहस-नहस कित्ता। 1933 ते अदु फ्यूच्येन लोप्पा 19वी राह सेना स्थापित कित्ता जन-सरकार किन वेने तहस-नहस कित्ता।

तत्कालीन क्वोमिंगतांग सरकार जापानी आक्रमण ता प्रतिरोध कियवा मंदाना नीति बारांकु लागू कित्ता? इदिना मुख्य कार 1927 ते

क्वोमिंगतांग-कम्युनिस्ट एकता किन ओसो चीनी जनता ना एकता किन तहस-नहस कीसि मत्ता।

1924 ते चीनी कम्युनिस्ट पार्टी ता प्रस्ताव किन स्वीकार कीसि डा. सुन यात-सेन क्वोमिंगतांग ता प्रथम राष्ट्रीय कांग्रेस केयतोर अनि ताना लोप्पा कम्युनिस्ट लोर वने शामिल आतोर। कांग्रेस ते रूस संगे एकता, कम्युनिस्ट पार्टी संगे एकता ओसो किसान-मजदूर लोरा एकता ता मूंड महान नीतिंग तय कित्ताद मत्ता। ह्वाफू फौजी आकाडमी बनेकियमूडाता, क्वोमिंगतांग कम्युनिस्ट पार्टी ओसो जनता ना सब्बे समूब कुना उंदी राष्ट्रीय संयुक्त मोर्चा निल्पी कित्ताद मत्ता। इदिना कारणते, 1924-25 ते क्वांगतुंग प्रान्त लोप्पा प्रतिक्रियावादी ताकत कुन तहस-नहस कित्ताद मत्ता। 1926-27 ते जीइता उत्तरी अभियान ताकी कित्ताद मत्ता। यांगत्सी डोड्डा ओसो पीली डोड्डा ओदा ज्यादातर इलाकागं पोरो कब्जा कित्तोर। उत्तरी युद्ध सरदार लोरा सरकार किन हारे कित्तोर। चीन ता इतिहासल ते उंदी अभूतपूर्व स्तर ता जन-मुक्ति संघर्ष शुरू कित्तोर। मति उत्तरी अभियान ता विकास ता कमजोर परिस्थिति ते 1927 ते वसंत कालम ता आखरी ते ग्रीष्म ता शुरूआत ते क्वोमिंगतांग अधिकारि लागू कित्ता “पार्टी-शुद्धि” ओसो कल्लेआम ता विश्वासघाती ओसो जन विरोधी नीतिंग इद राष्ट्रीय संयुक्त मोर्चा किन क्वोमिंगतांग, कम्युनिस्ट पार्टी ओसो चीनी जनता ना मुक्ति-कार्य किन सफल कियाला काजे बने कित्ता जनता ना सब्बे समूह ना संयुक्त मोर्चा किन, इद संयुक्त मोर्चा ता सब्बे क्रांतिकारी नीतिंग किन तहस-नहस कित्ता। निन्ने एवनल एकताकारी समझेमायना, चीनी कम्युनिस्ट पार्टी ओसो चीनी जनता किन इंजे दुश्मन समझेमाया मंता। निन्ने एवनल दुश्मन समझेमायना साम्राज्यवाद ओसो सामंतवाद किन, इंजे एकताकारी समझेमाया मंता। इद्रम ता षड्यंत्र कीसि चीनी कम्युनिस्ट पार्टी ओसो चीनी जनता पोरो अचानक हमला कित्ता ओसो उंदी महान, जिंदा, जबरदस्त क्रांति किन खत्म कीसिता। ताना पेरके एकता ता जागा ते गृहयुद्ध वात्ता, लोकशाही ता जागा ते तानाशाही वात्ता, वेहच ते मत्ता चीन ता जाहा ते हीकट लोप्पा नेंगसी मत्ता चीन वात्ता। मति चीनी

कम्युनिस्ट पार्टी ओसो चीनी जनता किन वेरियी किया परवो, जीड़ा परवो ओसो अदिन खत्म किया वेने परवो। अदु तेदता अनि तन्ना नेत्तुर अरता डोंगे किन मिंजी कीसि तन्ना शहीद लोर किन मिससी ओसो लड़ाई कियाला पेस्ता। क्रांति ता महान झंडा पोरो तेहची अदु सशत्र प्रतिरोध शुरुप कित्ता, चीन ता विशाल क्षेत्र ते जन-सरकार ता स्थापना कित्ता, भूमि-सुधार कित्ता, उंदी जन-सेना-चीनी लाल सेना – निर्माण कित्ता अनि चीनी जनता ना क्रांतिकारी ताकत किना रक्षा बगिल विस्तार कित्ता। क्वोमिंगतांग प्रतिक्रियावादिर त्याग कित्ता डा. सुन यात-सेन ना क्रांतिकारी मूंड जन-सिद्धांत किन जनता, कम्युनिस्ट पार्टी ओसो दूसरा जनवादी लोरकुर मुन्ने ओतोर।

जापानी आक्रमणकारिर मूंड उत्तर-पूर्वी प्रान्त लोप्पा अतिक्रमण कित्ता पेरके, 1933 ते चीनी कम्युनिस्ट पार्टी अद कालम ते क्रांतिकारी आधार-इलाकांग ओसो लाल सेना पोरो हमला किसोर मत्ता सब्बे क्वोमिंगतांग सेनांग मुन्ने जापान ता संयुक्त रूप ते प्रतिरोध कीयाना इंजी युद्ध विराम समझौता कीयाना प्रस्ताव तासता। इदु प्रस्ताव इव मूंड शर्त कुना संगे तासताद मत्ता- हमला रोमी कीयाना, जनता किन आजादी ता अधिकार हियाना, जनता किन हथियारबंद कीयाना। मति क्वोमिंगतांग। अधिकारिर इदिन स्वीकार कीवोर।

अस्केटल क्वोमिंगतांग सरकार ता गृहयुद्ध ता नीति ओसो ज्यादा भंयकर आता। चीनी जनता ना गृहयुद्ध किन खत्म कियाला काजे ओसो जापान ता संयुक्त रूप ते प्रतिरोध कीयाना मांग ओसो वने ज्यादा शक्तिशाली आता। शांघाई ओसो बचो दूसरा जागा ने सब्बे रकम ता देशभक्तिपूर्ण जन-संगठन बनेमायना शुरु आतांग। 1934 तल 1936 नडमा, पार्टी केंद्रीय कमेटी ता नेतृत्व ते, यांगत्सी डोड्डा ता उत्तर ओसो दक्षिण ते मत्ता इलाकांग लोप्पा मंदाना लाल सेना ता मुख्य सेनांग वेहा परवाचोन मुश्किल कुना सामना किसोरे उत्तर-पश्चिमी चीन ते हत्तांग अनि अगा मत्ता लाल सेना ता यूनिट कुन कलियतांग। अवे रेंडु साल कुना लोप्पा चीनी कम्युनिस्ट पार्टी पूना परिस्थिति किन हूडसी उंदी पूना

सर्वांगीण राजनीतिक कार्यदिशा-जापान-विरोधी राष्ट्रीय संयुक्त मोर्चा ता कार्यदिशा बने कित्तोर अनि अदिन किन लागू कित्तोर। अदिना लक्ष्य जापान ता संयुक्त रूप ते प्रतिरोध कीयाना, उंदी नवजनवादी गणराज्य ता स्थापना कियाला कजे संघर्ष कीयाना मत्ता। 9 दिसम्बर 1935 ते पेफिंग ता विद्यार्थी समूह मना पार्टी ता नेतृत्व ते उंदी वीरतापूर्ण ओसो देशभक्ति पूर्ण आंदोलन ताकी कित्ता। ओरू चीनी राष्ट्रीय मुक्ति हिरावल दस्ता¹ बने कित्तोर। इद आंदोलन किन चीन सब्बे बेहरा-बेहरा शहर कुना लोप्पा फैले कित्ता। 12 दिसम्बर 1936 ते क्वोमिंगतांग लोप्पा जापान ता प्रतिरोध कीयाना ता पक्ष ते मत्ता देशभक्त लोर, उत्तर-पूर्वी सेना ओसो 17वी राह सेना क्वोमिंगतांग अधिकारिर जापान संगे समझौता कियान ओसो देश लोप्पा जनता ना कत्लेआन कीयाना रूप ते लागू कित्ता प्रतिकरियावादी नीति ता विरोध ते, दृढतापूर्वक, विख्यात शीआन घटना कित्तोर। इद्रमे क्वोमिंगतांग लोप्पा दूसरा देशभक्त लोर वेने क्वोमिंगतांग अधिकारिरा तत्कालीन नीतिनगडल खुश हिल्वा मत्तोर। इव परिस्थितिंग लोप्पा क्वोमिंगतांग अधिकारिर किन तम्मा गृहयुद्ध ता नीति विडसना अनि जनता ना मांग किन स्वीकार कियाला काजे मजबूर आया लागता। शीआन घटना ता शांतिपूर्वक हल उंदी मोड़ बनेमाता। पूना परिस्थितिंग लोप्पा आन्तरिक सहयोग स्थापित आता ओसो राष्ट्रव्यापी जापान आक्रमण विरोधी युद्ध शुरू आता। लूकओछयाओ घटना ता उचुन कालम मुन्ने, मई 1937 ते मना पार्टी ता उंदी ऐतिहासिक महत्व वाले राष्ट्रीय सम्मेल केयताद मत्ता। ताना लोप्पा पार्टी ता केंद्रीय कमेटी 1935 ताल लागू किसोर मत्ता पूना राजनीतिक कार्यदिशा ता बारे ते वेहताद मत्ता।

7 जुलाई 1937 ता लूकओछयाओ घटना तल पोयसी अक्तूबर 1938 ता ऊहान ता पतन आयनाजोम, क्वोमिंगतांग सरकार प्रतिरोध युद्ध लोप्पा तुलनात्मक रूप ते सक्रिय मत्ता। इद कालम ते जापानी आक्रमणकारिर बेरा स्तर ते कीयाना हमलांग पूना जनता लोप्पा बेरसोर मत्ता देशभक्तिपूर्ण होंग क्वोमिंगतांग सरकार किन जापानी आक्रमणकारिरा प्रतिरोध कियालाकाजे तन्ना नीति ता केंद्र-बिन्दु बने कीयाना इंजी मजबूर कित्ता।

अदिना कारण ते पूरा सेना ओसो जनता किसोर मत्ता जापानी आक्रमण विरोधी युद्ध लोप्पा उभार पैदा कीयाना हल्को आता, उचुन कालम काजे पूना ओसो जिंदा वात्तावरण पैदा आता। पूरा जनता, तीना लोप्पा कम्युनिस्टा पार्टी ओसो जनवादी लोकुर वेने शामिल मत्तोर, क्वोमिंगतांग सरकार इद मौका काजे पूरा आशा कीसि मत्ता। मति अस्ल इत्तेके हक्के राष्ट्र खतरा ते मत्ता ओसो जनता लोप्पा जोश निंडसी मत्ता। फायदा एतसी सुधार कीयाना ओसो डा. सुन यात-सेन ना क्रांतिकारी मूंड-सिद्धांत कुना पोरो अमल कीयार। मति ओरा इद्रम आशा कीयाना अंगडम आता। जापानी आक्रमणकारिरा तुलनात्मक सक्रिय प्रतिरोध कीयाना रेंडु साल कुना लोप्पा वेने क्वोमिंगतांग अधिकारीर लोकयुद्ध काजे व्यापक जनता किन गोलबंद कीयाना ता काम विरोध किसोरे ओसो जापान विरोधी, जनवादी कार्यवाहिंग काजे एकताबद्ध आयना अदिना स्वतःस्फूर्त कोशिश कुना पोरो पाबंदी वाटसोरे मत्तोर। बेगा उंदी बगिल क्वोमिंगतांग सरकार चीनी कम्युनिस्ट पार्टी ओसो दूसरा जापान विरोधी पार्टिंग ना पोरो तम्मा पाड़ना रुझान लोप्पा उचुन बदलाव कित्ता अगा दूसरा बगिल ओरा समान दर्जा हियाना नामंजूर किसोर मंता। ओसो ओरा कार्यवाहिंग पोरो बचोनो रकम ता पाबंदिग वाटसोर मत्ता। देशभक्त राजनीतिक कैदी अस्के वेने बेहरा संख्या ते जेल ते मत्तोर। इदिनकु वेने मुन्नेटा पोल्लो क्वोमिंगतांग सरकार अस्के थैलीशाही ता तानाशाही किन इत्तेके 1927 ते गृहयुद्ध शुरूप कित्ता पेरके स्थापित कित्ता तानाशाही किन अद्रमे तासता। अदिन काजे पूरा राष्ट्र ता प्रतिनिधित्व कीयाना उंदी जनवादी गठबंधन सरकार ता निर्माण किया परताद हिल्ले।

इद कालम ता शुरूआत तेने माटु कम्युनिस्ट लोर चीन ता जापानी आक्रमण विरोधी युद्ध काजे रेंडु वैकल्पिक कार्य दिशांग मंतांग, उंदी मना किन जीत बगिल ओयना सर्वव्यापी लोकयुद्ध ता कार्यदिशा ओसो दूसरा उंदी आंशिक युद्ध ता कार्यदिशा तीना लोपपा जनता उत्पीड़न ता परिस्थिति ते मंदिता अनि मना किन हार बगिल ओंता इंजी वेहतोम। माटु युद्ध दीर्घकालीन मंदिता ओसो तीना लोप्पा अनिवार्य रूप ते वेल्ले

बाधांग, मुशिकलकु वांतांग, मति चीनी जनता तम्मा कोशिश ते जरूर आखरी जीत हासिल कियार इंजी वेहतोम।

लोकयुद्ध

इदे कालम ते चीनी कम्युनिस्ट पार्टी ता नेतृत्व ते ताकना उत्तर-पश्चिमी चीन लोप्पा हत्ता लाल सेना ता मुख्य ताकत चीन ता राष्ट्रीय क्रांतिकारी सेना ता आठवीं राहसेना ता पोरोल ते पुनर्गठित आता। यांगत्सी डोड्डा ता रेंडु बगिल ता विभिन्न जागा ने मत्ता चीनी लाल सेना ता छापामार यूनिट किन चीनी ता राष्ट्रीय क्रांताकरी सेना ता पूना चौथी सेना पोरोल ते पुनर्गठित कित्तोर। आठवीं राह सेना उत्तरी चीन ता मोर्चा ते लड़मासोर मत्ता अनि पूना चौथी सेना मध्य चीन ता मोर्चा ते। गृहयुद्ध कालम ते, उत्तरी अभियान कालमते ह्वांगफू फौजू अकादमी ओसो राष्ट्रीय क्रांतिकारी सेना ता जनवादी परंपरा किन सुरक्षित तासता ओसो विकसित कित्ता चीनी लाल सेना ता सैनिक लोरा संख्य उंदी कालम ते बचोनो लाख एवनल बेरसिस मत्ता। मि जापानी आक्रमण विरोधी युद्ध शुरू आयनास्के एवनल अदिना सैनिक लोरा संख्य घटेमासी दसियों हजारे पिसिस मत्ता। ताना कारण क्वोमिंगतांग सरकार ता मना दक्षिणी इलाकांग पोरो कित्ता बर्बतापूर्वक विध्वंसाकारी कार्यवाहिंग, बेहरा अभियानकु ताकनास्के आता नुकसानकु आंदुंग। अदिना कारण ते उचुन मुल इद सेना किन नजरअंदाज कियानोर, ओरू जापान ता प्रतिरोध कियाला काजे मुख्य रूप ते क्वोमिंगतांग पोरो निर्भर मंदाना इंजी आल्संतोर। मति जनता वेल्ले बेसता पारखी मंदिता। अदु कालम ते संख्या कम आतेकाई आठवीं राह सेना ओसो पूना चौथी सेना इव रेंडासी गुणात्मक रूप ते उंदी ऊंचा दर्जा ता सेना मंता इंजी पुत्ता। सिर्फ इद्रमताए सेना निज्जम ता लोकयुद्ध ताकी किया परिंतांग। बेग अवु उंदी बेरा जापान विरोधी मोर्चा ते एवनतांग अगटा व्यापक जनता संगे कलियातांग, अगा ओरा हंदी हिल्वाचोन वेहच ते मत्ता वायना कालम ता पिस्वल काजे हरी पंडसोर दांतांग। जनता बिल्कुल सही मत्ता। इंजे नन्ना इद रिपोर्ट पेश किया मंता, मना सेना ता संख्या 9, 10, 000 एवसी मत्ता,

सामान्य उत्पादन-कार्य संगे मत्ता मना ग्रामीण मिलिशिया ता संख्या 22,00,000 तुकू ज्यादा मत्ता। मति मना नियमित सेना इंजे वेने क्वोमिंगतांग सेना (तीना लोप्पा केंद्रीय ओसो स्थानीय रकम ता नियतंत्रण ते कार्यवाही कीयाना क्वोमिंगतांग यूनिटकु शामिल मंतांग) तुकू संख्या ता रूप ते वेल्ले कम मत्ता। मति अदु चीन ता जापानीआक्रमण विरोधी युद्ध ते मुख्य शक्ति बनेमासी मतत्ता। इदु पोल्लो अदिना लड़ाई लोप्पा हिरकी कीसि मत्ता जापानी, कठपुतली सैनिक लोरा संख्य ओसो अदिना युद्ध-मोर्चा ता विस्तार तल, अदिना युद्ध-क्षमता तल, अदिना फौजी कार्यवाहिंग लोप्पाटल व्यापाक जनता तल दोरकना समर्थन तल, अदिना राजनीतिक गुण, आन्तरिक एकीकरण ओसो एकता तले दिसिंता।

इदु सेना उंदी शक्तिशाली सेना मंता बारांकु इतेके सब्बे सदस्य लोर जागृत आसी अनुशासन ता पाल किंतोर: ओरू उचुन लोकुरा लेवेके संकीर्ण गुट लेक्का निजी हित काजे आयवा व्यापाक जनता ओसो पूरा राष्ट्र ता हित काजे उंदी आसी लडेंतोर। इद सेना उद्देश्य चीनी जनता ना दृढतापूर्क पक्ष एतना ओसो जीवा कीसि अदिना सेवा कीयाना।

इद उद्देश्य तल प्रेरित आसी इव सेनांग उंदी अदम्य भावना तासिंता अनि तन्ना सब्बे दुश्मन किन हारे कीयाना ओसो बस्के लोंगवा वेला मंडाला काजे संकल्पबद्ध आंता। बचोन मुश्किल वातेकाई, बस्के एवनल वरोर मानेय मंदितोर अस्के एवनल अदु लड़ाई जारी तासिंता।

इद उद्देश्य तल प्रेरित आसी इद सेना तन्ना लाईन ते ओसो तन्ना लाईन ता बाहर ता लोकुरा संगे उल्लेखनीय तरीका ते एकता कींता। इदिना लाईन लोप्पा अफसर ओसो सिपाही लोरा नडमा, ऊंचा रैंक ओसो दोड़ता रैंक नडमा फौजी कार्य, राजनीतिक कार्य ओसो पृष्ठभागीय सेवाकार्य नडमा एकता कीतांद मंता। इदिना लाईन तुकू बाहर सेना ओसो जनता नडमा, सेना ओसो सरकारी संगठन ता नडमा, मना सेना ओसो दोस्त सेना नडमा एकता कित्ताद मंता। इद एकता किन नुकसान कीयाना हर बाधा किन दूर कीयाना वेल्ले जरूरी मंता।

इद उद्देश्य तल प्रेरित आसी इद सेना दुश्मन ता अफसर ओसो सिपाही लोर किन तम्मा पक्ष ते कीयाना ओसो युद्धबंदीरा संगे व्यवहारा कीयाना कीयाना ता बारे ते उंदी सही नीति लागू कित्ता। बिना अपवाद ते आत्मसमर्पण कित्ता, मना पक्ष ते वात्ता, लेवेके हथियार वाटता पेरके दुश्मन खिलाफ लड़ेमायना विचार तासना दुश्मन ता सेनांग सब्बे सदस्य लोरा स्वागत कीयाना। बोराई युद्धबंदी किन हौकना, ओना संगे गलत व्यवहार कीयाना लेवेके ओना अपमान कीयाना अनुमति हिल्ले।

इद उद्देश्य तल प्रेरित आसी इद सेना लोकयुद्ध काजे जरूरी मत्ता रणनीति ओसो कार्यनीति ता व्यवस्था बने कित्ता। इद सेना बदलेमासोर मत्ता ठोस परिस्थितिंग ना अनुसार लचीला छापामार युद्ध ताकि किया परिंता ओसो चलायमान लड़ाई वेने किया परिंता।

इद उद्देश्य तल प्रेरित आसी इद सेना लोकयुद्ध काजे जरूरी मत्ता राजनीतिक कार्य ता व्यवस्था बने कित्ता। तीना लक्ष्य तन्ना लाईन लोप्पा एकता बेरसी कीयाना, दोस्त-सेना ओसो जनता संगे एकता बेरसी कीयाना ओसो दुश्मन-सेना किन छिन्न-भिन्न कीयाना ओसो लड़ाई लोप्पा जीत हासिल कीयाना गारंटी एतना ता।

इद उद्देश्य तल प्रेरित आसी इदु पूरा सेना छापामार युद्ध ता परिस्थिति ते लड़ाईंग नड़मा मौक ओसो प्रशिक्षण-कालम नड़मा ता मौका हूडसी अनाज ओसो रोज ता जरूरत मत्ता चीज कुना उत्पादन किया परिंता। आर्थिक मुश्किल कुना पोरो काबू किया परना इंजी, सेना ता रहन-सहन लोप्पा सुधार कीयाना इंजी, जनता पोरो मत्ता बोजा कम किया परना इंजी इद्रम किसोरे मंता, इद्रम अदु पूर्ण या आधा रूप ते लेवेके आंशिक रूप ते आत्मनिर्भर बनेमाता। विभिन्न फौजी आधार इलाकांग लोप्पा परताचोन फायदा एतसी बचोनो लघु युद्ध-उद्योग बने कित्ता।

इदे आयवा इद सेना उंदी शक्तिशाली सेना मंता बारांकु इत्तेके इदिनगा तन्ना आत्मरक्षा कोर ओसो मिलिशिया जन-समुदाय ता व्यापक सशस्त्र संगठन मंता। इदु तीना संगे तालमेल किसोरे लड़ेमांता। चीन ता मुक्त इलाकांग लोप्पा सब्बे नौजवान ओसो प्रौढ़ महिला आई लेवेके पुरुष

आई, तन्ना विचार ते जनवाद पोरो आधार आसी तन्ना उत्पादन काम विडसवा लेवा जनता जापान विरोधी आत्मरक्षा कोर ते संगठित आतोर। आत्मरक्षा कोर ता बेसता सदस्य लोर किन (सिर्फ सेना या छापामार दलम ते शामिल आयनोर किन विडचसी) मिलिशिया ता शामिल कीयाना आंता। जनता ना इव सशस्त्र ताकत कुना सहयोग लेवा दुश्मन किन हारे कीयाना असंभव मंता।

आखरी ते इद सेना उंदी शक्तिशाली सेना मंता बारांकु इत्तेके इदु रेंडु भाग ते विभाजित आसी मंता- मुख्य फौजी फारमेशन ओसो प्रादेशिक फौजी फारमेशन ते। मुख्य फौजी फारमेशन जरूरत आतास्के बदे वेने प्रदेश ते कार्यवाही किया परिंता। ओसो प्रादेशिक फारमेशन ता काम मिलिशिया ओसो आत्मरक्षा को संगे सहयोग कीसि तन्ना प्रदेश ता रक्षा कीयाना ओसो अगटा दुश्मन पोरो हमला कीयाना पोरो केंद्रित कीयाना मंता। इद कार्य-विभाजन कियवा लेवा सिर्फ मुख्य फौजी फारमेशन ता भूमिका पोरो ने ध्यान हीतेके ओसो प्रादेशिक फौजी फारमेशन किन नजरअंदाज कीतेक चीन ता मुक्त इलाकांग ना परिस्थिति ते दुश्मन किन हारे कीयाना असंभव आयार। प्रादेशिक फौजी फारमेशन ते वायना बचोनो सशस्त्र कार्य-दल संगठित कित्ताद मंता। अविन बेस प्रशिक्षित कित्ताद मंता अदिन काजे फौजी कार्य, राजनीतिक कार्य ओसो जन-कार्य कीयाना लोप्पा ज्यादा क्षमता तासिंतांग। अवु दुश्मन ता पृष्ठभाग ता बिल्कुल पेरकेटा इलाकांग लोप्पा नेंगिंतांग, दुश्मन पोरो हमला कींतांग अनि जनता किन जापान विरोधी संघर्ष काजे जागृत कींतांग। इद्रमे अवु विभन्न मुक्त इलाकांग मुन्ने मोर्चा ते दायना तैयारी कीयाना फौजी कार्यवाहिंंग संगे तालमेल कींतांग। इव सब्बे काम लोप्पा अवु वेल्ले सफलता दोरकी कींतांग।

चीन ता मुक्त इलाका लोप्पा जनवादी सरकार कुना नेतृत्व ते पूरा जापान विरोधी जनता किन मजदूर, किसान, नौजवान, महिला संगठनकु, सांस्कृतिक, व्यावसायिक ओसो बाकी संगठनकुना लोप्पा ओसो सशस्त्र सेना ता सहायता कीयाना विभिन्न काम लोप्पा जोरशोर ते शामिल आयना इंजी आह्वान कींता। इद काम सिर्फ जनता किन फौज ते शामिल

कियाला काजे गोलबंद कीयाना फौज किन अनाज एवसी कीयाना, जापान विरोधी सैनिक लोरा परिवार पोरो ध्यान हियाना ओसो फौज ता भौतिक जरूरत कुन पूरा कियाला ओरा मदद कीयानाए आयवा ओरा लोप्पा छापामार दल, मिलिशिय ओसो आत्मरक्षा कोर किन गोलबंद कीयाना काम वेने शामिल मंता। अस्केने दुश्मन पोरो जबरदस्त वार किया परमूडायार, अदिना खिलाफ बम विस्फोट लेक्कटा विध्वंस कीयाना कार्यवाहिर किया परमूडायार, अदिना हरीं केपा परमूडायार, गद्दार ओसो जासूस लोर किन खत्म किया परमूडायार, घायल लोर किन ओसी ओरा रक्षा कीयाना व्यवस्था किया परमूडायार, फौजी कार्यवाहिंग लोप्पा सीधा हिस्सा एता परमूडायार। संगेने सब्बे मुक्त इलाकांग ना जता विभिन्न रकम ता राजनीतिक, आर्थिक, सांस्कृतिक ओसो स्वास्थ्य संबंधित निर्माण-कार्य किन वेल्ले गिर्दा ते किया मंता। इदिन लोप्पा सबसे महत्वपूर्ण पोरोर पूना जनता किन अनाज ओसो दैनिक जरूरत ता सामान उत्पादन काजे गोलबंद कीयाना ओसो सब्बे सरकार संगठन, विद्यालय, खास परिस्थिति वाले संगठन, विद्यालय किन विडचसी, खाली टाईम ते तम्मा जरूरत ता सामान ता खुद उत्पादन कीयाना। अस्के ने जनता ओसो सेना ता आत्मनिर्भरता काजे कीयाना उत्पादन आंदोलन किन मदद दोरियर। इद्रमे जापान आक्रमण विरोधी दीर्घकालीन युद्ध जारी तासला काजे उत्पादन ते वेल्ले उभार तत्ता परमूडायर। चीन ता मुक्त इलाकांग लोप्पा दुश्मन वेल्ले नुकसान कित्ता। ऊसा ओसो मुसूर लेवा नुकसान कीयाना पुडकु पुटसी मत्तांग। मति मुक्त इलाकांग ना जनवादी सरकार पूराना जनता ना नेतृत्व ते संगठित रूप ते इव मुशिकल कुना पोरो जीत हासिल कीतांग। नुकसान कीयाना पुडकुन नाश कीयाना ऊसा रोमी कीयाना ओसो अकाल खत्म कीयाना महान जनव्यापी आंदोलन ते अभूतपूर्व परिणाम हासिल कित्तोरा। इद्रमे जापानी आक्रमण विरोधी युद्ध लोप्पा दीर्घकाल एवनल नितसी मंदा परमूडता। संक्षेप ते सब्बे मोर्चा काजे सब्बे जापानी आक्रमणकारिरा हार ओसो चीनी जनता ना मुक्ति काजे चीन ता मुक्त इलाकांग ना पूरा सेना ओसो पूरा जनता काजे उंदी आम नारा मंता, उंदी आम नीति मंता।

उंदी निज्जम ता लोकयुद्ध इद्रमे मंदिता। सिर्फ इद्रमताए लोकयुद्ध ताकसी माटु मना राष्ट्रीय दुश्मन को हारे किया परितोम। क्वोमिंगतांग लोकयुद्ध ता विरोध कींता अदिन काजे अदु हारेमांता।

बेगा उंदी बेरा चीन ता मुक्त इलाकांग ना सेना आधुनिक हथियार संगे लैस आंता अगा अदु ओसो ज्यादा शक्तिशाली आंता। जापानी आक्रमणकारिर किन अंतिम रूप ते हारे किया परिंता।

रेंडु युद्ध-मोर्चांग

चीन ता जापानी आक्रमण विरोधी युद्ध लोप्पा शुरू तले रेंडु युद्ध मोर्चांग मंतांग। क्वोमिंगतांग मोर्चा ओसो मुक्त बदलाव ना मोर्चा।

अक्तुबर 1938 ते ऊहान ता पतन पेरके जापानी आक्रमणकारिर क्वोमिंगतांग ता मोर्चा खिलाफ बदलाव रणनीतिक आक्रमण बंद कित्तोर। तीरम-तीरम तन्ना मुख्य सेना किन मुक्त इलाकांग ना मोर्चा ते बदलाव कित्तोर। अस्केने क्वोमिंगतांग सरकार ता पराजयवादी बदलाव ता फायदा एतसी ओरू क्वोमिंगतांग सरकार संगे शांति समझौता कियाला तैयार आत्तोर। चीनी राष्ट्र किन धोखा हियाना नीति लागू कीसि देश किन वम्मसियाना वांग चिंग-वेइ किन छुंग-किंग विडसना ओसो नानकिंग लोप्पा उंदी कठपुतली सरकार निल्पी कीयाना लालच हित्तोर। अस्केटल क्वोमिंगतांग सरकार तन्ना नीति बदलाव कीयाना शुरू कित्ता ओसो जापान ता प्रतिरोध कीयाना बदलाव ते तीरम-तीरम कम्युनिस्ट पार्टी ओसो जनता ना विरोध कीयाना पोरो जोर हित्ता। इदु बदलाव सबसे मुन्ने फौजी कार्यवाहिंग लोप्पा दिसता। तन्ना खुद ता फौजी ताकत किन सुरक्षित तासला काजे क्वोमिंगतांग सरकार जापान पोरो निष्क्रिय प्रतिरोध ता नीति लागू कित्ता। जापानी आक्रमणकारिर किन मुक्त इलाकांग पोरो जोरदार आक्रमण कीयाना बदलाव छूट हीसी युद्ध बेहरा बदलाव मुक्त इलाकांग पोरो वाटना अनि खुद “मेट्टा पोरो उदसी रेंडु डुव्वस्कुना लड़ेमायना तमाशा हूइसोर मत्ता”।

1939 ते क्वोमिंगतांग सरकार “दुश्मन पार्टी ना कार्यवाहिंग किन रोमी कीयाना तरीका” पोरोल ता प्रतिक्रियावादी तरीका लागू कीयाना अनि जनता ओसो सब्बे जापान विरोधी पार्टींग ना प्रतिरोध युद्ध ता शुरूआत ते दोरकी कित्ता सब्बे अधिकार कुन ऊंदता। अस्के क्वोमिंगतांग बदलाव ता सब्बे जनवादी पार्टींग, ओसो सबसे मुन्ने ओसो मुख्य रूप ते चीनी कम्युनिस्ट पार्टी किन क्वोमिंगतांग सरकार भूमिगत बदलाव काजे मजबूर कित्ता। इव इलाकांग ना हर प्रांत ता जेलखाना ओसो नजदबंदी कैम्प कम्युनिस्ट, नौजवान देशभक्त ओसो जनवाद काजे लडमायना योद्धा बदलाव संगे निडसी मत्तांग। 1939 तल 1943 ता हिरंगम एवनल पांच साल ता कालम ते क्वोमिंगतांग सरकार राष्ट्रीय एकता ते फूट वाटला काजे मूंड बेहरा स्तर ता “कम्युनिस्ट विरोधी बदलाव”² कित्ता अनि इद्रम गृहयुद्ध ता गंभीर खतरा पैदा कित्ता। इदे कालम ते पूना चौथी सेना किन “भंग कीयाना” आदेश जारी कित्ता। दक्षिणई आनह्वेइ ते अदिना 9000 तुकू ज्यादा सेना किन खत्म कित्ता। इदे घटना पूरा दुनिया किन सांगी कीसिता। इद कालम ते वेने क्वोमिंगतांग फौज मुक्त इलाकांग ना सेना पोरो कीयाना हमलांग बंद आत्ताद हिल्ले। संगेने क्वोमिंगतांग प्रतिक्रियावादी हर रकम ते आरोप बदलाव मंतोर ओसो हर रकम ता पोलोंग रांगा मंतोरा वीरु “गद्दार पार्टी”, “गद्दार सेना”, “गद्दार इलाका”, ओसो “प्रतिरोध युद्ध लोप्पा तोडफोड कीयाना ओसो राज्य काजे खतरा पैदा कीयाना” लेक्कटा लेबल वाटसी झूठा प्रचार कीसि कम्युनिस्ट पार्टी, आठवीं राह सेना ओसो पूना चौथी सेना, मुक्त इलाकांग पोरो आरोप वाटतोरा। इद संकट ता सामना कियाला काजे, चीनी कम्युनिस्ट पार्टी ता केंद्रिय कमेटी 7 जुलाई 1939 ते उंदी घोषणापत्र जारी कित्तोर ताना लोप्पा इव नारांग पेश कित्ताद मत्ता - “प्रतिरोध युद्ध ते डटेमासी मंदाना ओसो आत्मसमर्पण ता विरोध कीयाना! गड्डिंग एकता मंदाना ओसो फूट ता विरोध कीयाना! प्रचार कीयाना ओसो प्रतिगमन ता विरोध कीयाना!” इव पांच साल कुना लोप्पा मना पार्टी इव नारांग पोरो अमल किसोरे मूंड प्रतिक्रियावादी ओसो जन विरोधी

“कम्युनिस्ट विरोधी हमलांग” ना पूरा ताकत वाटसी मुन्ने हत्ता अनि बार-बार संकट किन पार कित्ता।

इव सालकुना लोप्पा, क्वोमिंगतांग ता मोर्चा ते निज्जमे बदे गंभीर लड़ाई आत्ताद हिल्ले। जापानी आक्रमणकारि तम्मा बदलाव ता निशाना मुख्य रूप ते मुक्त इलाकांग किन बने कित्तोर। 1943 एवनल मुक्त इलाकांग ना सेना, जनता 64 प्रतिशत जापानी आक्रमणकारी सेना संगे ओसो 95 प्रतिशत कठपुतली सेना संगे लड़ेमाता, अनि क्वोमिंगतांग ता मोर्चा सिर्फ 36 प्रतिशत जापानी आक्रमण सेनाता ओसो 5 प्रतिशत कठपुतली सेना ता सामना कित्ता।

1944 ते जापानी आक्रमणकारि चीन ता उत्तर तल दक्षिण दायना मुख्य रेलवे किन सीधा बदलाव-वायला काजे जबरदस्ती तेरियला काजे तम्मा फौजी कार्यवाहिंग कित्तोर। वेरियसी मत्ता क्वोमिंगतांग फौजकु प्रतिरोध कियाला बिल्कुले तैयार हिल्ले। उचुने महिनांग लोप्पा हनान, हुनान, क्वांगशी ओसो क्वांगतुंग प्रान्त ता विस्तृत इलाका दुश्मन ता कब्जा ते हत्ता। अस्केने रेंडासी मोर्चांग ने तैनात मत्ता दुश्मन ता सैनिक लोरा अनुपात ते उचुन बदलाव आत्ता। मति इद रिपोर्ट पेश कीयानास्के एवनल चीन ते जापानी आक्रमणकारी सेना ता 5,80,000 जापान सैनिक मत्ता (उत्तर-पूर्व ता मूंड प्रतिशत कुना लोप्पा मत्ता जापानी सैनिक शामिल हिल्लेर) कुल 40 डिविजन कुना लोप्पाडल 3,20,000 सैनिक मत्ता 22.5 डिविजनकु ओसो कुल सेना ता 56 प्रतिशत शामिल मत्ता। मुक्त इलाकांग ना मोर्चा ते तैनात मत्ता ओसो ज्यादा से ज्यादा 2,60,000 सैनिक मत्ता 17.5 डिविजनकु ओसो कुल सेना ता सिर्फ 44 प्रतिशत शामिल मत्ता, क्वोमिंगतांग मोर्चा ते तैनात मत्ता। रेंडासी मोर्चांग पोरो तैनात मत्ता कठपुतली सैनिक लोरा अनुपात ते बदे बदलाव वात्तादु हिल्ले।

8,00,000 तुकू ज्यादा संख्या मत्ता कठपुतली सेना ते (नियमित ओसो स्थानीय रेंडासी रकम ता सेना किन काल्पसी) मुख्य रूप ते क्वोमिंगतांग कमांडर बदलाव मुन्ने आत्मसमर्पण कित्ता यूनिटकु शामिल मत्तांग ओसो क्वोमिंगतांग अफसर लोर आत्मसमर्पण पेरके संगठित कित्ता

यूनिकु शामिल मंतांग। क्वोमिंगतांग प्रतिक्रियावादीर इव कठपुतली फौज कु मुन्नेटले उंदी देशद्रोही झूठा सिद्धांत इत्तेके “विंको-वंको हरदल राष्ट्र किन बचे कीयाना” सिद्धांत संगे लैस कित्तोर। ओरा आत्मसमर्पण पेरेके ओरू नैतिक ओस संगठनात्मक समर्थन हित्तोर। अनि ओर जापानी आक्रमणकारिरा संगे तालमेल कीसि चीनी जनता ना मुक्त इलाकांग पोरो आक्रमण कीयाना इंजे आदेश हित्तोर। इदे बदलाव प्रतिक्रियावादीर शेनशी-कानसू-निंगश्या हंदी इलाकांग ओसो बाकी मुक्त इलाकांग ना नाकेबंदी कीयाना ओसो विना पोरो आक्रमण कियाला काजे 7,97,000 सैनिक वाले बेहरा सेना वेने जमा कित्तोर। क्वोमिंगतांग सरकार ता समाचार किन दबे कीयाना नीति ता कारण ते इद गंभीर परिस्थिति ता जानकारी वेल्ले चीनी ओसो विदेशी लोकुर किन दोरकी आंता।

चीन ता मुक्त इलाकांग

कम्युनिस्ट पार्टी नेतृत्व कीयाना चीन ता मुक्त इलाकांग ना कुल आबादी इंजे 9,55,00,000 आत्ता। ओरा बदलाव उत्तर ते मंगोलिया लोप्पाटल दक्षिण ते हाएनान द्वीप एवनल फैलेमासी मंता। इद बदलाव वेने दुश्मन दांतोर लगभग सब्बे बदलाव ने अदिन आठवीं राह सेना ओसो पूना चौथी सेना लेवेके जनता ना बदे दूसरा सेना ता कार्यवाहिंग ना सामना किया लागिंता। इद विशाल मुक्त प्रांत ते 19 प्रमुख मुक्त प्रांत मंतांग, ल्याओनिंग, जेहोल, छाहाड़, स्वेय्वान, शेनशी, कानसू, निंगश्या, शानशी, हपे, हनान, शानतुंग, च्यांगसू, चच्यांग, आनह्वेइ, च्यांगशी, हपे, हुनान, क्वांगतुंग ओसो फूच्येन प्रांत ता बेहरा लेवेके सुडला हिस्सांग शामिल मंतांग। येनान इविना केंद्र मंताना। इव सब्बे मुक्त इलाकांग ना मार्गदर्शन आंता। पीली डोडूडा ता पश्चिम ते मत्ता शेनशी-कानसू-निंगश्या हंदी इलाका ओसो 15,00,000 आबादी मत्ता चीन ता इद विशाल मुक्त प्रांत ता 19 इलाकांग लोप्पाटल उंदी मत्ता। आबादी ता हिसाब ते पूर्वी चच्यांग प्रांत ता उंदी मुक्त इलाका ओसो हाएनान द्वीप ता उंदी दूसरा मुक्त इलाका किन विड़चसी अदु सबसे सुडला मत्ता। पुनवा मत्ता उचुन लोकुर चीन ता

मुक्त प्रांत कुना लोप्पा मुख्य रूप ते शेनशी-कानसू-निंगश्या हंदी इलाकाए आंदू इंजी आलिसंतोर। इदु गलत धारणा क्वोमिंगतांग सरकार ता नाकेबंदी ता नीति ता कारण ते पैदा आत्ता। हर मुक्त इलाका ते जापान विरोधी राष्ट्रीय संयुक्त मोर्चा ता सब्बे जरूरी नीतिंग पोरो अमल कित्ताद मंता। जनता चुनेकित्ता सरकार इत्तेके स्थानीय गठबंधन सरकार ता स्थापना कित्ताद मंता। कम्युनिस्ट पार्टी ओसो बाकी जापान विरोधी पार्टिंग ना प्रतिनिधिर आपास ते एकता किया मंतोर। मुक्त इलाकांग लोप्पा जनता ना पूरा ताकत किन गोलबंद कित्ताद मंता। अद्रमासी दुश्मन ता बदलाव, क्वोमिंगतांग ता फौजी नाकेबंदी ओसो अदिना हमलांग ओसो बाहर तिंची मदद पूर्ण रूप ते कमी मत्तेकाई, चीन ता मुक्त इलाकांग मजबूती ते नितसी मंतांग। दुश्मन ता कब्जा ते मत्ता इलाकांग किन कम किसोरे मना इलाकांग किन विस्तार किसोरे लगातार मुन्ने बदलाव मंतांग। अवु उंदी जनवादी चीन ता आदर्श बनेमांतांग, अवु एकताकारी देश कुना संगे फौजी तालमेल बने किसोरे जापानी आक्रमणकारीर किन बाहर पूंडना ओसो चीनी जनता किन मुक्त कीयाना मुख्य ताकत बनेमातांग। चीन ता मुक्त इलाकांग ना सशस्त्र सेनांग-आठवीं राह सेना, पूना चौथी सेना ओसो बाकी जन सेनांग सिर्फ जापान ता मुकाबला कीयाना लोप्पा बहादूरी तोहानदे बदलाव जापान विरोधी राष्ट्रीय संयुक्त मोर्चा ता सब्बे जनवादी नीतिंग किन लागू कीयाना लोप्पा वेने उंदी उदाहरण पेश कित्तांग। चीनी कम्युनिस्ट पार्टी ता केंद्रीय कमेटी 22 सितम्बर 1937 ते जारी कित्ता घोषणापत्र लोप्पा “डा. सुन यात-सेन ना मूंड जन सिद्धांत कुना नेंडु चीन किन जरूरत मंता, अविन पूर्ण रूप ते लागू कियाला काजे संघर्ष कियाला मना पार्टी तैयार मंता” चीन ता मुक्त इलाकांग लोप्प पूराए अमल कित्ताद मंता।

क्वोमिंगतांग बदलाव

तम्मा तानाशाही शासन किन जारी तासिसी क्वोमिंगतांग ता मुख्य शासक गुट जापान ता निष्क्रय प्रतिरोध कीयाना नीति ओसो जनता ना विरोध कीयाना स्थानीय नीति लागू कित्ता। इदिना कारण ते, अदिना सशस्त्र

सेनांग ना संख्या ओरा मूल संख्या तल घटेमासी आधा तुकु वेने कम आत्ता। ज्यादातर सेनांग लडेमायना क्षमता पोहतांग। इद गुट ओसो व्यापक जनता नडा गंभीर फूट अरता अनि व्यापक गरीबी, दुक्कम ओसो व्यापक विद्रोह ता गंभीर संकट पैदा आत्ता। सिर्फ प्रतिरोध युद्ध लोप्पाने आयवा इदिना भूमिका वेल्ले कम आयवा इदु चीन जनता ना पूरा जापान विरोधी ताकत कुन गोलबंद कीयाना ओस अदिन नडमा एकता कीयाना हरदा उंदी बाधा बनेमाता।

क्वोमिंगतांग ता मुख्य शासक गुट ता नेतृत्व ते इद्रम ता गंभीर परिस्थिति बद्रम पैदा आत्ता? बारांकु इत्तेके इद गुट चीन ता बेहरा-बेहरा दलाल-पूंजीपतिरा हित कुना प्रतिनिधित्व कींता। इद प्रतिक्रियावादी समूह ता मुट्टामेंड लोकर क्वोमिंगतांग सरकार ता सब्बे महत्वपूर्ण फौजी, राजनीतिक, आर्थिक ओसो सांस्कृतिक संगठन कुन तम्मा कब्जा ते तास्तोर। ओरू तम्मा हित कुन रक्षा कीयाना कार्य किन पहली जागा ते तासिंतोर ओसो जापान ता प्रतिरोध कीयाना किन गौण (दूसरा नंबर) ते तासतोर। ओरू “राष्ट्र सबसे मुन्ने मंता” इंतोर मति ओरा काम कीयानादु राष्ट्र ता बहुसंख्यक जनाता ना मांग कुना संगे कलियो आंता। ओरू पोल्लोंग “राष्ट्र सबसे मुन्ने इंदाना” कींतोर मति ओरा हिसाब ते राज्य इत्तेके बेहरा-बेहरा जमींदार, बेहरा-बेहरा बैंक-मालिक ओसो बेहरा-बेहरा दलाल-पूंजीपतिरा सामंती फासीवादी तानाशाही इंजी आंता। जनता ना जनवादी राज्य आयो। अदिन काजे ओरू जनता तेदना तुकु वेरियंतोर, जनवादी आंदोलन तल वेरियंतोर, ओसो जापान ता प्रतिरोध कियाला काजे सब्बे जनता किन पूर्ण रूप ते गोलबंद कियाला वेरियंतोर। जापान ता निष्क्रिय प्रतिरोध कीयाना ओरा नीति जनता, जनवाद ओसो कम्युनिस्ट पार्टी ता विरोध ता ओरा प्रतिक्रियावादी स्थानीय नीति ता मूल कारण आंदू। ओरू हर समस्या ते रेंडु रकम ता नीतिंग लागू कींतोर। उदारण तुकू उंदी बगिल ओरू जापान ता प्रतिरोध किया मंतोर। दूसरा बगिल निष्क्रियता ता युद्ध नीति अमल कींतोर। ओरू चीन का अर्थव्यवस्था ता विकास कीयाना पोल्लोंग कींतोर मति असल ते तम्मा खुद ता

नौकरशाही-पूँजी इत्तेके बेहरा-बेहरा जमींदार, बेहरा-बेहरा बैंक-मालिक लोर ओसो बेहरा-बेहरा दलाल-पूँजीपतिरा पूँजी ता निर्माण कींतोर। किसान-मजदूर, निम्न पूँजीपति, गैर-इजारेदारी पूँजीपतिरा क्रूर उत्पीड़न किसोरे चीन ता अर्थव्यवस्था ता पिस्वल-स्रोत कुना पोरो तम्मा कब्जा कींतोर। ओरू जनवाद अमल कींतोर अनि “राजसत्ता जनता किन वापस कीयाना” पोल्लोंग कींतोर, मति जनता ना जनवादी आंदोलन पोरो बदलाव हिल्ला लेक्का दमन कींतोर, सुडला-बेहरा जनवादी सुधार कियाला इनकार कींतोर। ओरू “कम्युनिस्ट समस्या उंदी राजननीतिक समस्या आंदू ओसो इदिन किन राजनीतिक रूप तेने हल कीयाना” इंजी इंतोर मति चीनी कम्युनिस्ट पार्टी किन “पहली नंबर ता दुश्मन दर्जा” वेने हींतोर। अनि बदलाव हिल्ला लेक्का अदिना फौजी, राजनीतिक ओसो आर्थिक दमन कींतोर। जापानी आक्रमणकारिर किन सिर्फ “दूसरी नंबर ता दुश्मन दर्जा” हींतोर अनि नरका-पिय्यल गृहयुद्ध शुरू कीयाना तैयारी कींतोर। कम्युनिस्ट पार्टी किन खत्म कीयाना साजिश कितोर। ओरू उंदी “आधुनिक राज्य” राज्य बने कीयाना इंजी इंतोर मति बेहरा-बेहरा बदलाव पूँजीपतिरा सामंति फासीवादी तानाशाही किन निल्पी कीसि तासना पूरा कोशिश कींतोर। ओरू सोवियत संघ संगे व्यवहारिक राजनीतिक संबंध स्थापित कित्ताद मंता मति असल ते ओरू सोवियत संघ पोरो दुश्मनी तासितोर। ओरू जर्मनी ता पिस्वल बेरसी कीयाना इंजी अमेरिका पृथकतावादिरा संगे कलियसी “योरप तुकू मुन्ने एशिया” ता बदलाव पारितोर। इत्तेके हर बदलाव ता फासीवाद ता पिस्वल किन बेरसी कीयाना, तीना लोप्पा चीनी जनता पोरो तम्मा फासीवादी शासन ता पिस्वल किन बेरसी कियानदु वेने मंता। मति तीना संगेने ओरू राजनीतिक षडयंत्र वेने पंडितोर ओसो फासीवाद विरोधी आयना झूठा प्रचार कींतोर। मीटू ओरा इद्रम ता आपसी विरोधी रेंडु रकम ता नीतिंग ना मोदोल ते हत्तेके मीटू सब्बे बेहरा-बेहरा जमींदार, बेहरा-बेहरा बैंक-मालिक ओसो बेहरा-बेहरा दलाल-पूँजीपतिरा सामाजिक समूह ते पैदा आत्ता इंजी पुंदाकिर।

इव सब्बे आतेकाई वेने क्वोमिंगतांग बदे सही राजनीतिक पार्टी हिल्ले। क्वोमिंगतांग पोरो बेहरा-बेहरा जर्मीदार, बेहरा-बेहरा बेंक-मालिक ओसो बेहरा-बेहरा दलाल-पूजीपति समूह ना प्रतिनिधित्व कीयाना प्रतिक्रियावादी गुट ता नियंत्रण ओसो नेतृत्व मत्ता। अदिन पूराए इद गुट संगे अभिन्न रूप ते जुड़ेमातादु समझेमायनायो। उचुन क्वोमिंगतांग नेता लोर इद गुट संगे संबंध तासोर आंतोर, ओरकिन अद गुट तल बाहर कींतोर लेवेके ओरा पोरो दबाव कींतोर। क्वोमिंगतांग ता वेल्ले कार्यकर्ता लोर ओसो साधारण सदस्य ओसो मूंड जन सिद्धांत नौजवान संघ ता बचोनो सदस्य लोर इद गुट ता नेतृत्व तल खुश हिल्लेर, उचुन मुल इदिना विरोध वेने कींतोर। इदे पोल्लो सब्बे प्रतिक्रियावादी गुट ता नियंत्रण मत्ता क्वोमिंगतांग सेनांग, सरकारी संगठन ओसो आर्थिक, सांस्कृतिक प्रचार कुना पोरो वेने लागू आंता। इव सब्बे लोप्पा वेल्लेटवु जनवादी तत्व मंतांग। इदे बदलाव बचोनो प्रतिद्वन्द्वी ग्रुप कुने अलग-अलग आसी मत्ता, संगठित हिल्ला प्रतिक्रियावादी गुट वेने मंता। क्वोमिंगतांग किन प्रतिक्रियावादी गुट लेक्का समझेमायना गलत आयारा।

उंदी अंतर

चीनी जनता मुक्त इलाकांग ओसो क्वोमिंगतांग इलाकांग ना स्पष्ट अंतर किन समझेमाता।

इदु तथ्य वेल्ले स्पष्ट हिल्ले या? मना मुन्ने रेंडु कार्यदिशानग मंतांग। उंदी लोकयुद्ध ता कार्यदिशा ओसो दूसरा लोकयुद्ध ता खिलाफ मत्ता निष्क्रिय प्रतिरोध ता कार्यदिशा। इविना लोप्पा उंदी चीन ता मुक्त इलाकांग ना कठिन परिस्थितिंग ने ओसो बाहरी सहायता बिल्कुले हिल्लेकाई जीत बगिल ओंता। दूसरा क्वोमिंगतांग बदलाव ना वेल्ले अनुकूल परिस्थितिंग ओसो विदेशी सहायता मत्तेकाई हार बगिल ओंता।

क्वोमिंगतांग सरकार तन्ना असफलतांग बदलाव कारण हथियार कुना कमी वेहिंता। मति अदिन किन इव रेंडासी ना लोप्पा बोनगा हथियार कुना कमी मंता इंजी पूछेमायमूडांता, क्वोमिंगतांग फौज लोप्पा या मुक्त

बदलाव ना फौज लोप्पा? चीन ता सब्बे फौज ते मुक्त इलाकांग फौज लोप्पा हथियार कुना सबसे ज्यादा कमी मंता ओरगा सिर्फ दुश्मन तल ऊंदसी तत्तावु ओसो वेल्ले मुश्किल परिस्थिति ते खुद बने कित्ता हथियारके मंतांग।

सीधा क्वोमिंगतांग ता केंद्रीय सरकार दोड़ मत्ता फौजकु प्रांतीय फौज किनकु ज्यादा बेसता हथियार संगे लैस मंता या? मत्तेकाई युद्ध-क्षमता ते ज्यादातर केंद्रीय फौजकु प्रांतीय फौजकिनकु ज्यादा खराब मंतांग।

क्वोमिंगतांग लोप्पा जन शक्ति ता विशाल भंडार मंता, मति फौजी भरती ता बारे ते अदिना गलत नीति मत्तांकु अदिना जनशक्ति तन्ना सेना नुकसान भरपाई कीयाना मुश्किल आंता। दुश्मन उंदी दूसरा तल अलग कीयाना ओसो लगातार युद्ध लोप्पा मत्तेकाई चीनी ता मुक्त इलाकांग असीमित जनशक्ति किन गोलबंद किया परिंतांग, बारांकु इत्तेके जनता ना जरूरत अनुसार मत्ता मिलिशिया ओसो आत्मरक्षा कोर व्यवस्था हर जागा लागू आंता, बारांकु इत्तेके जनशक्ति ता दुरुपयोग कीयाना तुक् बचेमायमूडांता।

क्वोमिंगतांग ता नियंत्रण ते ज्यादा अनाज दोरकना विशाल इलाका मंता ओसो जनता अदिन किन 7 करोड़ तल 10 करोड़ तान अनाज हर साल सप्लाई कींता। मति अदिन सेना लोप्पा हमेशा खुराक ता कमी मंदिंता। अदिन सैनिक लोर वल्ले कमजोर मंदिंतोर, बारांकु इत्तेके ज्यादा अनाज बोरु जमा कींतोर ओरू हड़पे कींतोर। मति दुश्मन पृष्ठभाग ते मत्ता चीन ता ज्यादातर मुक्त इलाकांग दुश्मन ता “सब्बे पोत्ती कीयाना, सब्बे तोर किन हौकना, सब्बे लूटे कीयाना” नीति ता कारण ते नुकसान कुना सामना किया लागिंता। उत्तरी शेनशी लेक्का उच्चुक इलाकांग लोप्पा वेल्ले अनाज वांता, मति माटु खुद मना कोशिश संगे कृषि उत्पादन बेरसी कीसि अनाज ता समस्या सफलतापूर्क हल कित्ता मंता।

क्वोमिंगतांग बदलाव वेल्ले गंभीर आर्थिक संकट ता सामना किया मंता। ज्यादातर उद्योग-धंधा ठप्प आत्तांग, गेत्तेंग लेक्का जरूरी सामान वेने अमरीका तल आयात आया मंता। मति चीन ता मुक्त इलाकांग लोप्पा

गेतेंग ओसो बाकी जरूर सामान ता तन्ना जरूरतकु उद्योग-धंधा ता विकास कीसि खुद पूरा कींता।

क्वोमिंगतांग बदलाव लोप्पा मजदूर, किसान, दुकान-कर्मचारि, सरकारी कर्मचारी, बुद्धिजीवि ओसो सांस्कृतिक कर्मचारि वेल्ले कंगाल आसी मंतोर। मुक्त इलाकांग लोप्पा सब्बे लोकुरा काजे अनाज, गेतेंग ओसो रोजगार हित्ताद मंता।

क्वोमिंगतांग बदलाव ते मुनाफाखोरी लक्ष्य किन पूरा कियाला काजे राष्ट्रीय संकट ता फायदा एतसी अगा अफसर लोरो लज्जा हिल्ला लेक्का व्यापार ओसो पक्का भ्रष्टाचारी बनेमातोर। चीन ता मुक्त इलाकांग लोप्पा अगाटा कार्यकर्ता बदलाव सिम्पल पिस्वल ओसो कठोर परिश्रम ता उदाहरण पेश किसोरे तम्मा नियमित ड्यूटी बदलाव उत्पादन-काम वेने शामिल आंतोर। ईमानदारी ता वेल्ले कदर कींतोर ओसो भ्रष्टाचार ता सख्त मना मंता।

क्वोमिंगतांग इलाकांग लोप्पा जनता किन बदे आजादी हिल्ले। चीन ता मुक्त इलाकांग लोप्पा जनता किन पूरा आजादी दोरकसी मंता।

क्वोमिंगतांग शासक बदलाव मुन्ने मत्ता इव सब्बे समस्यांग ना दोष बोनकिन हियाना? इविना दोष बोराई दूसरोर किन हियाना लेवेके खुद ओरकिने हियाना? दूसरा देशकु क्वोमिंगतांग किन हालनाचोन सहायता हीवोंग लेवेके क्वोमिंगतांग किन सरकार ता तानाशाही शासन, भ्रष्टाचार ओसो अयोग्यता किन दोषी मानेयमायना या? इदिना उत्तर स्पष्ट हिल्ले या?

बोरु “प्रतिरोध युद्ध लोप्पा तोड़फोड़ किया मंतोर अनि राज्य काजे खतरा पैदा किया मंतोर”?

इद सौ गुना सही मत्ता सबूत ता वेहच ते खुद क्वोमिंगतांग सरकारे चीनी जनता ना प्रतिरोध युद्ध किन तहस-नहस किया मंता ओसो बदलाव देश किन खतरा ते वाटसोर मंदानादु सही हिल्ले या? पूरा दस साल एवनल इदु सरकार पूरा गृहयुद्ध तेने लागसी मत्ता अनि इदु राष्ट्रीय प्रतिरक्षा काम

किन बिल्कुल नजरअंदाज किसोर तन्ना बदलाव ता निशाना जनता किन बनेकित्ता। प्रतिरोध बदलाव मंदाना तन्ना नीति संगे उत्तर-पूर्वी ता नालुंग इलाकांग किन भेंट कीसिता। अस्के जापानी आक्रमणकारी लम्बा दिवार ता दक्षिण ते कूच कित्तास्के इदु वेरियसी-वेरियसी प्रतिरोध कित्ता अनि लूकओछयाओ तल जेक क्वेइचओ प्रांत एवनल पेरके गुचता। मति क्वोमिंगतांग “कम्युनिस्ट पार्टी प्रतिरोध युद्ध लोप्पा तोड़फोड़ किया मंता ओसो राज्य काजे खतरा पैदा किया मंता” इंजी इंता (हूड़ाटू क्वोमिंगतांग ता केंद्रीय कार्यकारिणी कमेटी ता सितम्बर 1943 ता ग्यारवी पूर्ण अधिवेशन ता प्रस्ताव)। इदिना सबूत सिर्फ कम्युनिस्ट पार्टी जनता ना सब्बे हिस्सांग संगे एकता कीसि मुक्त इलाकांग ना स्थापना कित्तादे मंता। इवु वेल्ले बहादुरी ते जापान ता प्रतिरोध किया मंतांग। क्वोमिंगतांग ता विचार चीनी जनता ना विचार तुकू अलग मंता। वेल्ले समस्यांग ना बारे ते रेंडासी ना उंदी राय बने मायला असफल आयना तुकू आश्चर्य आयनायो।

इगा रेंडु सवाल मंतांग।

पहली, क्वोमिंगतांग सरकार हेल्युंगच्यांग प्रांत तल लूकओछयाओ एवनल ओसो लूकओछयाओ तल क्वेइचओ एवनल फैलेमाता इचोन बेहरा ओसो इचोन घना आबादी वाले प्रांत किन विड़सताद मंताया? इदिना कारण क्वोमिंगतांग मुन्ने लागू कित्ता जापान ता प्रतिरोध बदलाव मंदाना नीति ओसो निष्क्रिय प्रतिरोध कीयाना नीति ओसो जनता ना विरोध कीयाना स्थानीय नीति किन विड़चसी दूसरा बदे वेने कारण आयो या?

दूसरा, चीन ता मुक्त बदलाव जापान, कठपुतली फौज कु नृशंसतापूर्ण ओसो दीर्घकालीन हमलांग किन तहस-नहस किया परता ओसो राष्ट्रीय दुश्मन ता कैदल इचोन बेहरा प्रांत किन वापस पोया परता अनि इचोन बेहरा आबादी किन मुक्त किया परता कारण बातल आंदू? इदिना कारण मना सही कार्यदिशा, लोकयुद्ध ता कार्यदिशा किन विड़चसी दूसरा बदे वेने मंदा परिंता या?

“सरकारी आदेशकुना ओसो फौजी आदेश कुना अनादर”

क्वोमिंगतांग सरकार चीनी कम्युनिस्ट पार्टी पोरु बार-बार “सरकारी आदेश कुना फौजी आदेश कुना अनादर” कीयाना आरोप वेने वाटा मंता। इदिना बारे ते माटु कम्युनिस्ट लोर चीनी जनता ना सामान्य बुद्धि इस्तेमाल कीसि, निज्जमे इव “सरकारी आदेश कुन ओसो फौजी आदेश कुना” पालन कित्तेके चीनी जनता वेल्ले मुश्किल ते ओसो उंदी बदलाव तन्ना कब्जा ते पोयसी मत्ता मुक्त इलाकांग किन जापानी आक्रमणकारिरा कैदे सौपे कीयाना लेक्का मत्ता आदेश कुने पालन कित्ताद हिल्ले। उदाहरण तुकु 1939 ते जारी कित्ता “दुश्मन पार्टींग ना कार्यवाहिंग किन रोमी कीयाना तरीका”, 1943 ते जारी कित्ता “पूना चौथी सेना किन भंग कीयाना” बारे ते ओसो “पीली डोड्डा ता पाड़ना हरीं ते उत्तर बगिल गुचना” ता बारे ते आदेश, 1944 ते जारी कित्ता “उंदी निश्चित कालम ते सिर्फ दस डिविजन किन विड़चसी बाकी सब्बे फौज कुन भंग कीयाना” ता बारे ते मना किन हिता आदेशकु ओसो क्वोमिंगतांग सरकार ओसो मावा नड़मा ताकता वार्तालाप लोप्पा “उंदी रियायत” ता पोरोल हिता प्रस्ताव लोप्पा माटु मना सशस्त्र सेनांग ओसो स्थानीय सरकार किन क्वोमिंगतांग किन सौपे कीयाना इंजी मांग कित्ताद मत्ता ओसो इदिना बदला ते गठबंधन सरकार ता स्थापना किवा लेवा क्वोमिंगतांग सरकार ता तानाशाही सरकार लोप्पा उचुन बदलाव दोरकी कीयाना इंजी मांग कित्ताद मंता। माटु इद्रम ता चीजकुना मुन्ने तल्ला वरिहताद हिल्ले ओसो इद्रमे चीनी जनता काजे उंदी दुश्मन हिल्ला, सुरक्षित मत्ता प्रांत ओसो उंदी बहादुर जापान विरोधी सेना किन सुरक्षित तासतोम। चीनी जनता इद्रम ता “अनादर” काजे खुद किन बधाई हियानायो या, क्वोमिंगतांग सरकार हेलुंगच्यांग तल क्वेइचओ एवनल फैलेमाता इंदी बेहरा बदलाव, खुद तन्नाए फासीवादी सरकार ता आदेश कु ओसो हारेमाता फौजी आदेश कुना संगे जापानी आक्रमणकारिर किन सौपे कीयानादु बेहरा अपराध आंता इंजी आल्सो या? जापानी आक्रमणकारी ओसो प्रतिक्रियादीर इव “सरकारी आदेश ओसो फौजी आदेश” कुना स्वागत कींतोर, मति बोराई

ईमानदार चीनी देशभक्त इद्रम ता चीज कुना स्वागत किया परितोरा? बस्के एवनल उंदी गठबंधन सरकार, सिर्फ आकार तेने बदलाव असल ते ने फासीवादी तानाशाही बदलाव जनवादी सरकार कियमूडायो अस्के एवनल चीनी जनता कम्युनिस्ट लोर किन बेगाटा जनता स्वतंत्रता दोरकी कित्ता अव मुक्त इलाकांग किन, प्रतिरोध युद्ध लोप्पा असाधारण बदलाव कित्ता जन सेनांग किन उंदी हारेमाता, फासीवादी ओसो तानाशाही सरकार वर्तमान क्वोमिंगतांग सरकार कैदे सौंपे कीयाना अनुमति हींता इंजी आल्सा परमूडांता या? मुक्त इलाकांग ओसो जन सेना बदलाव चीनी जनता ना जापान विरोधी काम नेंडु आयना लेक्का आया परिता या? बोराई चीनी राष्ट्र ता वायना पिस्वल बद्रम मंदियार इंजी आल्सा परितोरा?

गृहयुद्ध ता खतरा

क्वोमिंगतांग ता मुख्य शासक गुट नेंडु वेने तानाशाही ओसो गृहयुद्ध ता तन्ना प्रतिक्रियावादी नीति पोरो नितसी मंता। वेल्ले पोल्लोंग अदु वेल्ले कालम तिंची एकताकारी देश ता कुना सेनांग चीन ता मुख्य भूमि ते बेहरा हिस्सा तल जापानी आक्रमणकारि किन खत्म कित्ता पेरके, तुरंत गृहयुद्ध शुरू कीयाना तैयारी किया मंता इंदाना बगिल इशार कींतांग। क्वोमिंगतांग एकताकारी देश कुना जनरल चीन लोप्पा वेने यूनान लोप्पा ब्रिटिश जनरल स्कोबी³ ना लेक्का भूमिका निभे कियानूर इंजी आल्सा मंतोरा। ओरू स्कोबी ओसो प्रतिक्रियावादी यूनान सरकार कीयाना हत्याकांड किन बेस इंजी वेहितोरा। ओरू चीन किन ओसो उंदी बेरा 1927-37 ता लेक्काने गृहयुद्ध ता उर्रा वेड़ियू नड़मा दोब्बला आल्सा मंतोरा। “राष्ट्रीय एसेम्बली केयना” ओसो “राजनीतिक हल तेंडना” गति कीसि गुप्त रूप ते गृहयुद्ध ता तैयारी किया मंतोरा। मना देशवासिर इद पोल्लो पोरो ध्यान हिवा मत्तेके ओरा स्कीमकुन एक्सपोज किवा मत्तेके ओरा तैयारिग किन रोमी कियवा मत्तेके बदे उंदी दिथ्या ओरकिन गृहयुद्ध ता तोप कुना आवाज केंजा वायर।

समझौता वार्ता

बाकी जनवादी पार्टिंग ना अनुमति एतता पेरके चीनी कम्युनिस्ट पार्टी जापानी आक्रमणकारिरि किन हारे कीयाना, उंदी पूना चीन ता निर्माण कीयाना ओसो गृहयुद्ध किन रोमी कीयाना उद्देश्य ते सितम्बर 1944 ते जन राजनीतिक परिषद ते क्वोमिंगतांग ता एक दलीय तानाशाही किन तुरंत खत्म कीयाना ओसो उंदी जनवादी गठबंधन सरकार निल्पी कीयाना इंजी मांग कित्ता। बदे डावुट हिल्ला इदु उंदी परिस्थिति ता मांग मत्ता ओसो उचुने महीनांग लोप्पा इदिन व्यापक जनता ना समर्थन दोरकता।

एकदलीय तानाशाही किन खत्म कीयाना, गठबंधन सरकार बने कीयाना ओसो जरूरी जनवादी सुधार लागू कीयाना सवाल ता बारे ते माटु क्वोमिंगतांग सरकार संगे बचोनो बेरा समझौता-वार्ता कित्ताद मत्ता, मति अदु मना सब्बे प्रस्ताव किन ठुकरे कीसिता। क्वोमिंगतांग सिर्फ एकदलीय तानाशाही किन खत्म कीसि ओसो गठबंधन सरकार निल्पी कियाला तैयार आयवा बदे वने वेल्ले जरूरी जनवादी सुधार लागू कियाला तैयार हिल्ले। खुफिया पुलिस किन खत्म कीयाना, जनता ना आजादी ता दमन कियावा प्रतिक्रियावादी कानून, आदेश कुन रद्द कीयाना, राजनीतिक बंदी लोर किन रिहा कीयाना, राजनीतिक पार्टिंग ना कानूनी रूप किन मान्यता हियाना, मुख्य इलाकांग किन मान्यता हियाना, मुक्त इलाकांग ना नाकाबंदी कीयाना ओसो अविना पोरो आक्रमण कीयाना फौज किन पेरके गुचिह कीयाना। इदिना कारणते चीन लोप्पा राजनीतिक संबंध वेल्ले कठिन परिस्थिति ते मंतांग।

पूरा परिस्थिति ता वेहच ते ओसो वास्तविक अन्तरराष्ट्रीय, स्थानीय परिस्थिति ता पोरो वेहत्ता विश्लेषण ता वेहच ते, इगा मत्ता हर मानेय होशियार आयना इंजी नन्ना वेहितान। ओरू मावा काम बदे मुश्किल हिल्ला हल्कोए मुन्ने दायार इंजी आल्सनायो इंजी वेहितान। इद्रम बिल्कुले आया परवो। असल इत्तेके रेंडु संभावनांग ओसो रेंडु भविष्य मंतांग, उंदी बेसता ओसो उंदी खराबा। उंदी संभावना ओसो भविष्य फासीवाद

तानाशाही जारी मंदियार ओसो जनवादी सुधार कुना अनुमति हिल्ले, जापानी आक्रमणकारिरा जागा ते जनता ना विरोध कीयाना पोरो जोर हियाना ओसो जापानी आक्रमणकारिर किन हारे कित्ता पेरके वेने गृहयुद्ध शुरू आयार ओसो इद्रमे चीन किन ओसो उंदी बेरा अदे पाइना स्वाधीनता, स्वतंत्रता, जनवाद, एकीकरण, समृद्धि ओसो ताकत हिल्ला मत्ता मुश्किल परिस्थिति ते वाटसियार। इद संभावना ओसो भविष्य ता पिस्वल इंजे वेने मंता। इदु सिर्फ अन्तरराष्ट्रीय परिस्थिति ता अनुकूल मत्तांकु ओसो मना जनता ना राजनीतिक चेतना ते वृद्धि आतांकु अदिना संगठन शक्ति बेरसतांकु खत्म आया परवो ओसो तन्ना-तन्नाए गायब आया परवो। इद संभावना ओसो वायना कालम चीन लोप्पा निज्जमे वायर ओसो अदु देश ते क्वोमिंगतांग लोप्पा मत्ता जन विरोधी गुट ता लोकर ओसो विदेशी साम्राज्यवादी विचार वाले प्रतिक्रियावादी मंदिता। इदु समस्या ता उंदी पहलु आंदू, तीना पोरो ध्यान हियाना।

मति समस्या ना दूसरा पहलू वेने मंता। ओसो उंदी बेरा पूरा परिस्थिति ता वेहच ते ओसो अन्तरराष्ट्रीय, स्थानीय परिस्थिति ता पोरो कित्ता विश्लेषण ता वेहच ते माटु दूसरा संभावना ओसो वायना कालम काजे कोशिश कीयानास्के ज्यादा आत्मविश्वास ओसो साहस किया परिंतोमा संभावना ओसो भविष्य सब्बे कठिन परिस्थितिंग पोरो काबू कीयाना ओसो पूरा चीनी जनता किन एकताबद्ध कीयाना, क्वोमिंगतांग ता फासीवादी तानाशाही किन खत्म कीयाना, जनवादी सुधार कीयाना, जापान-विरोधी ताकत किन सुदृढ़ बने कीयाना अविना विस्तार कीयाना, जापानी आक्रमणकारिरि हारे कीयाना ओसो उंदी स्वाधीन, स्वतंत्र, जनवादी एकीकृत, समृद्ध ओसो शक्तिशाली पूना चीन ता निर्माण कीयानादु मंता। बोरु इद संभावना ओसो भविष्य किन चीन लोप्पा वास्तविक रूप ते वायो इंजी इंतोर ओरू देश ता व्यापक जनता, कम्युनिस्ट पार्टी ओसो बाकी जनवादी पार्टींग, ओसो विदेशी मना संगे समानता ता व्यवहार कीयाना सब्बे राष्ट्र, प्रगतिशील लोकर ओसो व्यापक जनता आंदुर।

माटु कम्युनिस्ट लोर ओसो पूरा चीनी जनता मुन्ने इंजे वेने वेल्ले मुशिकल ओसो बाधांग मंतांग इंजी बेसे पुत्तोम ओसो मनम उंदी लम्बा ओसो विंकोवंको हरीं पोयना इंजी वेने पुत्तोमे। मति संगे माटु पूरा चीनी जनता संगे कलियसी सब्बे मुशिकल ओसो बाधांग किन जरूर वेंडा परिंतोम ओसो इतिहास चीन किन सौंपे कित्ता काम किन पूरा कियाकोम इंजी वेने पुत्तोमे। मना मुन्ने ओसो पूरा जनता मुन्ने पहली संभावना ओसो भविष्य ता पूरा ताकत ते विरोध कीयाना ओसो दूसरा संभावना ओसो भविष्य काजे भरपूर ताकत संगे कोशिश कीयाना उंदी महान काम मंता। अन्तरराष्ट्रीय ओसो स्थानीय परिस्थिति मूल रूप ते माटु कम्युनिस्ट ओसो पूरा चीनी जनता ना अनुकूल मंता। इदु पोल्लो नन्ना मुन्नेने स्पष्ट कित्तानु। माटु क्वोमिंगतांग अधिकारी, दुनिया ता सामान्य रुझान ओसो चीन ता लोकभावना किन हूडसोरे मन्ना वर्तमान गलत नीतिंग किन बदले कीयाना हिम्मत तोहकाल। अस्केने प्रतिरोध युद्ध लोप्पा जीत हासिल आयार, चीनी जनता ना तिप्पल किन कम किया परमूडायर, जल्दिए पूना चीन ता स्थापना किया परमूडायर। हरीं बचोन विंकोवंको मत्तेकोई चीनी जनता तन्ना स्वाधीनता ओसो मुक्ति जरूर दोरकी कियार इंजी समझेमायना ओसो इद्रम कीयाना कालम इंजे वात्ता। हत्ता शताब्दी ते गिनती हिल्लाचोन शहीद लोरा महान इंच्छांग किन पूरा कीयाना जिम्मेदारी मना पीड़ी ता हड्डा पोरो मंता, ओसो मना हरी रोमी कीयाना हर कोशिश विफल आयार।

4. चीनी कम्युनिस्ट पार्टी ता नीति

चीन ता प्रतिरोध युद्ध ता रेंडु नीतिंग कार्यदिशांग ना विश्लेषण नन्ना कित्ताना। इद्रम ता विश्लेषण वेल्ले जरूरी मंता। बारांकु इत्तेके इंजे एवनल वेने वेल्ले चीनी लोकर युद्ध लोप्पा असल ते बाताल आया मंता इंजी पुत्ताद हिल्ले। क्वोमिंगतांग सरकार ता नाकेबंदी किन नीति किन नीति कारण ते क्वोमिंगतांग इलाकांग ओसो विदेश ते बचोनो लोकर इदिना हीकट तेने मंतोर। ओरू चीन ता मुक्त इलाकांग ना बारे ते बस्के एवनल चीनी विदेशी संवाददाता लोरा उदी ग्रूप 1944 ते पर्यवेक्षण-यात्रा ते इगा

वायो अस्के एवनल उचुन वेने बाताले पुनवा मत्तोर। इद ग्रुप वापिस हत्ता इत्तेके क्वोमिंगतांग सरकार मुक्त इलाकांग ना असली परिस्थिति ता जानकारी बाहर ता लोकर एवनल एविंता बहे इंजी वेरियता अनि क्वाड केहची बोरे वेने बाकी संवाददाता किन इगा वायला हीवो आता। इद्रमे अदु क्वोमिंगतांग इलाका ना बारे ते वेने सच्चाई दबे कीसि तासता। अदिन काजे नन्न इव “रेंडु इलाकांग” ना सही चित्र किन परताचोन लोकर मुन्ने पेश कीयाना कर्तव्य मनादे मंता इंजी आल्संताना लोकर चीन ता पूरा परिस्थिति किन स्पष्ट रूप ते हूडानूर अस्केने ओरू चीन ता रेंडु सबसे बेहरा पार्टिंग, कम्युनिस्ट पार्टी ओसो क्वोमिंगतांग ता नीतिक लोप्पा इचोन फर्क बारांकु मंता ओसो इव रेंडासी कार्यदिशांग नडमा इचोन संघर्ष बारांकु ताका मंतो इंजी समझेमाया परनूर। सिर्फ अस्केने लोकर इव रेंडु पार्टिंग नडमा ता विवाद उंदी बेकार, महत्वहीन ओसो लोकर वेहत्ता लेक्का मुन्ने ने तय कीसि मत्तांकु झगडा आयवा उंदी सैद्धांतिक विवाद आंदू, तीना पोरो करोडों जनता ना पिस्वल आधार आसी मंदिता।

चीन ता वर्तमान गंभीर परिस्थिति ने देश ता जनता, जनवादी पार्टिंग ओसो जनवादी मानेय ओसो बाकी देश लोप्पा चीन ता परिस्थिति ता बारे ते वेरियसी मंदाना लोकर सब्बे तोर फूट ता जागा ते एकता वायार ओसो जनवादी सुधार लागू आयर आल्संतोर। वीर सब्बे तोर नेटा बचोनो महत्वपूर्ण समस्यांग किन हल कीयाना ता बारेते चीनी कम्युनिस्ट पार्टी ना नीति बातल मंता इंजी पुंदाला आल्सा मंतोर। बदे डारुट हिल्ला मना पार्टी ता सदस्य लोर इव समस्यांग ना बारे ते ओसो ज्यादा गंभीरता ते ध्यान तासितोर।

युद्ध ताकनास्के जापान विरोधी राष्ट्रीय संयुक्त मोर्चा ता मना नीतिंग हमेशाए बिल्कुल स्पष्ट ओसो निश्चित मत्तांग, युद्ध ता आठ साल लोप्पा अविना जांच किताद मंता। मना कांग्रेस मना वायना कालम ता संघर्ष कुना मार्गदर्शन काजे अविनगडल हल तेंडना।

इगा नन्ना चीन ता समस्यांग किन हल कियाला काजे तय कित्ता मुख्य नीतिंग ना बारे ते मना पार्टी कित्ता बचोको निष्कर्ष कुना बारे ते वेहाकान।

मना आम कार्यक्रम

चीनी जनता किन पूरा जापान विरोधी ताकत कुन गोलबंद, एकताबद्ध कीयाना, जापानी आक्रमणकारिर किन पूराए खत्म कीयाना, उंदी स्वाधीन, स्वतंत्र, जनवादी, एकीकृत, समृद्ध ओसो शक्तिशाली पूना चीन ता निर्माण कीयाना उद्देश्य ते चीनी जनता चीनी कम्युनिस्ट पार्टी ओसो सब्बे जापान विरोधी जनवादी पार्टिंग किन उंदी आम कार्यक्रम ता फौरी जरूरत मंता।

इद्रम ता कार्यक्रम किन रेंडु हिस्सा ने तूसमूडांता, आम कार्यक्रम ओसो ठोस कार्यक्रम। मुन्ने माटु आम कार्यक्रम पोरो विचार कियाकाल ताना पेरके ठोस कार्यक्रम पोरो आल्सकाल।

इद जापानी आक्रमणकारिरा पूर्ण विनाश कीयाना ओसो उंदी पूना चीन ता निर्माण कीयाना मुख्य पोल्लो पोरो आधार मानेमासोरे माटु कम्युनिस्ट लोर ओसो जनता किन बेहरा संख्या मत्ता चीन ता विकास ता वर्तमान मंजिल ते दोड़ रास्ता बुनियादी स्थापनांग ना बारे ते एकमत मंतोमा मुन्ने, चीन लोप्पा बड़े जमींदार वर्ग ओसो बड़े दलाल पूंजीपति वर्ग ता अधिनाकत्व ते मत्ता उंदी सामंती, फासीवादी ओसो जन विरोधी राज्य व्यवस्था मंदानायो, बारांकु इत्तेके क्वोमिंगतांग ता मुख्य शासक गुट ता 18 साल कुना शासन ओरा पूर्ण कमजोरी किन मुन्ने साबित कित्ता। दूसरा चीन लोप्पा परताचोन पाड़ना रकम ता जनवादी अधिनायकत्व उंदी विशुद्ध राष्ट्रीय पूंजीवादी राज्य ता स्थापना किया परमूडायो। अदिन काजे अदु इद्रम कीयाना कोशिश वेने कीयानायो बारांकु इत्तेके उंदी बगिल चीन किन राष्ट्रीय पूंजीपति वर्ग आर्थिक ओसो राजनीतिक दृष्टि ते खुद किन वेल्ले कमजोर साबित कित्ताद मंता अनि दूसरा बगिल वेल्ले कालम तल उंदी पूना तत्व इत्तेके मना नेता चीनी कम्युनिस्ट पार्टी संगे जागृत चीनी

सर्वहारा वर्ग मंता। अदु राजनीतिक मैदान ते वेल्ले क्षमता तोहा मंता ओसो किसान वर्ग, शहरी निम्न-पूँजीपति वर्ग, बुद्धिजीविर ओसो बाकी जनवादी ताकत कुना नेतृत्व ते ताका मंता। तीसरा, इद्रम ता चीनी जनता काजे अदु वर्तमान मंजिल ते उंदी समाजवादी राज्य व्यवस्था ता स्थापना कीयाना संभावना मंता। इंजे वेने अदिना मुन्ने विदेशी ओसो सामंती उत्पीड़न ता मुकाबला कीयाना कार्य मंता ओसो उंदी समाजवादी राज्य काजे जरूरी सामाजिक, आर्थिक परिस्थिति ता कमी इंजे वेने मंता।

अद्रम इत्तेके मना प्रस्ताव बाताल मंता? मना प्रस्ताव जापानी आक्रमणकारिर किन पूराए हारे कित्ता पेरके उंदी पूना रकम ता राज्य व्यवस्था ता स्थापना कीयानादु मंता अदिन किन माटु नवजनवाद इंतोमा इत्तेके मजदूर वर्ग ता नेतृत्व ते संयुक्त मोर्चा ता उंदी जनवादी एकता, इदु वेल्ले जनता ना वेल्ले बेहरा संख्या पोरु आधार आसी मंता।

सिर्फ इद्रम ताए राज्य व्यवस्था चीन ता आबादी ते वेल्ले बेहरा संख्या ता मांग किन सही तरीका ते पूरा कींता। बारांकु इत्तेके अदु मुन्ने दसियों लाख औद्योगिक मजदूर, करोड़ों दस्तकार, खेती-मजदूर। दूसरा, चीन ता आबादी लोप्पा 80 प्रतिशत हिस्सा मत्ता किसान लोर, इत्तेके 45 करोड़ आबादी लोप्पाटल 36 करोड़ मंता। तीसरा, बेहरा संख्या ते मत्ता शहरी निम्न-पूँजीपतिर ओसो संगेने राष्ट्रीय पूँजीपति, जागृत शरीफजादा लोर ओसो बाकी देशभक्त लोरा समर्थन दोरकी किया परिंता।

बदे डायुट हिल्ला इव वर्ग कुना नडमा इंजे वेने अंतरविरोध मंता। विशेष रूप ते श्रम ओसो पूँजी नडमा ता उल्लेखनीय अंतरविरोध मंता। अद्रमसी इविना लोप्पा हर वर्ग ता तन्ना खास मांग मंता। इव अन्तरविरोध ओसो अलग-अलग रकम ता मांग कुना अस्तित्व किन मानेमायवा मंदांना पाखंडपूर्ण ओसो गलत आयार। मति नवजनवाद ता पूरा मंजिल लोप्पा इव अन्तरविरोध, इव अलग-अलग रकम ता मांगकु सब्बे तोरा मांग कुनगडल मुन्ने हन्नोंग आयनुंग ओसो अविन किन इद्रम कियाला हियाना आयो। अविन किन काल्पा परमूडांता। इद्रम कीसि इव वर्ग कु कलियसी

नवजनवादी राज्य ता राजनीतिक, आर्थिक ओसो सांस्कृतिक काम कुन पूरा किया परमूडायार।

माटु कीयाना नवजनवाद ता राजनीति ते विदेशी उत्पीड़न ओसो अंदरूनी सामंती फासीवाद उत्पीड़न ता तख्ता पलट दियाना। ताना पेरके पाड़ना रकम ता जनवादी राजनीतिक व्यवस्थाए आयवा सब्बे जनवादी वर्ग कुना संयुक्त मोर्चा बनेमासी मत्ता राजनीतिक व्यवस्था ता स्थापना कीयाना। मना इव विचारकु डा. सुन यात सेन ना क्रांतिकारी विचार कुना संगे पूर्ण रूप ते कलियंतांग। क्वोमिंगतांग ता प्रथम राष्ट्रीय कांग्रेस ता घोषणापत्र ते डा. सुन यात-सेन रासिस मत्तोर।

आधुनिक राज्य कुना जनवादी व्यवस्था ते सामान्य पूंजीपति वर्ग ता एकाधिकार मंता ओसो इदु सिर्फ आम लोकुर किन उत्पीड़ित कीयाना साधने बनेमासी मंता। तीना उल्टा क्वोमिंगतांग ता जनवाद सिद्धांत इत्तेके सब्बे आम लोकुर हिस्सा मंदाना ओसो सिर्फ उचुने लोकुरा निजी मिलकियत मंदाना जनवाद मंदानायो।

इदु डा. सुन यात सेन ना महान राजनीतिक निर्देश आंदू चीनी जनता, चीनी कम्युनिस्ट पार्टी ओसो बाकी सब्बे जनवादी लोकुर इदिन सम्मान कीयाना, इदिन दृढ़ता ते लागू कीयाना। इदिना उल्लंघन ओसो विरोध कीयाना सब्बे लोकुरा ओसो ग्रूप कुना खिलाफ दृढ़ता ते संघर्ष कीयाना। इद्रमे नवजनवाद ता इद पूर्ण रूप ते सही मत्ता राजनीतिक सिद्धांत ता रक्षा कीयाना ओसो अदिना विकास कीयाना।

नवजनवादी राज्य ता संगठनात्मक सिद्धांत जनवादी केंद्रीयता मंदाना। इदिना लोप्पा विभिन्न स्तर ता जनप्रतिरोध सभाग मुख्य नीतिंग ना निर्णय कीयाना ओसो सरकार कुना चुनाव कीयाना। इदिना लोप्पा जनवाद संगे-संगे केंद्रीयता वेने मंता इत्तेके जनवाद पोरो आधार आसी केंद्रियता मंदिता ओसो केंद्रियता ता मार्गदर्शन ते जनवाद मंदिता। सिर्फ इदे व्यवस्था लोप्पा जनवाद ता पूर्ण अभिव्यक्ति आया परिंता ओसो इंजे सब्बे स्तर ता जन प्रतिनिधि सभाग किन परा सत्ता सौपे कीयाना आंता, संगेने अदिना लोप्पा केंद्रीय प्रशासन ता गारंटी किया परमूडांता। हर स्तर

ता सरकार अविना बराबर ता स्तर ता जन प्रतिनिधि सभाग सौपे कित्ता सब्बे काम कुना केंद्रीकृत प्रबंध कींता। जनता जनवादी पिस्वल काजे जरूरी मत्ता सब्बे चीज कुना रक्षा कींता।

सेना ओसो बाकी सशस्त्र शक्तिंग नव जनवादी राजसत्ता ता मशीनरी ता महत्वपूर्ण अंग मंदिता। इविना लेवा राज्य ता रक्षा कीयाना संभव हिल्ले। सत्ता ता सब्बे संगठन कुनाए लेक्का नवजनवादी राज्य ता सशस्त्र सेना वेने जनता नाए मंदिता अनि जनता नाए रक्षा कींता। सिर्फ मुट्टामेंड मंजी लोकरा ओसो जनता किन उत्पीड़न कीयाना पाड़ना रकम ता सेना, पुलिस लेक्कटविना लोप्पा ओसो जनता ना सेना लोप्पा बदे समानता हिल्ले।

मना नवजनवादी अर्थव्यवस्था वेने डा. सुन यात सेन ना सिद्धांत संगे कलियंता। भूमि ता सवाल ता बारे डा. सुन यात सेन “पुहतानोनके जमीन” ता नारा हित्तोर। उद्योग ओसो व्यापार ता बारे ते डा. सुन यात सेन पोरो वेहत्ता पोल्लोंग घोषणापत्र ते वेहतोर।

इद्रम ता सब्बे निजी कारोबार किन, अवु चीनी आई लेवेके विदेशी आई अविना पोरो एकाधिकार मंता ओसो अविना स्तर वेल्ले बेहरा मंता। अविन किन निजी अधिकार ते तासा परमूडायो इत्तेके- बैंकिंग, रेलवे ओसो हवाई जहाज, सरकार तन्ना कैदे तासियर ओसो निजी पूंजी जनता ना आर्थिक पिस्वल किन नियंत्रित कीयानायो। इदु पूंजी ता नियमन कीयाना उंदी मुख्य नियम मंता।

वर्तमान मंजिल ते माटु आर्थिक सवाल कुना बारे ते डा. सुन ना विचार कुना संगे पूर्ण रूप ते सहमत मंतोम। उचुन मुल चीनी कम्युनिस्ट व्यक्तित्व विकास, निजी पूंजी ता बढ़ोतरी ओसो निजी सम्पत्ति ता रक्षा ता विरोधी कींता इंदी डावुट कींतोर। मति ओरू गलत मंतोर। इदु चीनी जनता ना व्यक्तित्व ता विकास ते इनपड़े जीवा हिल्ला लेक्का वेल्ले बाधांग वाटना, निजी पूंजी ता बढ़ोत्तरी किन रोमी कीयाना ओसो व्यापक जनता ना सम्पत्ति किन नष्ट कीयाना विदेशी उत्पीड़न ओसो सम्पत्ति उत्पीड़ने आंदू। मनम कीयाना नवजवाद ता काम इव बाधांग किन दूर कीयाना

ओसो इद विनाश किन रोमी कीयानादिना गारंटी कीयाना। व्यापक जनता, समाज ता ढांचा लोप्पा मंजी तन्ना व्यक्तित्व ता स्वतंत्र रूप ते विकास कीयाना ओसो उंदी निजी पूंजीवादी अर्थव्यवस्था ता स्वतंत्र रूप ते विकास कीयानादु मंता। इदु “जनता ना आर्थिक पिस्वल किन नियंत्रित” कियवा लेवा अदिना फायदा कींता, अनि निजी संपत्ति ता सब्बे रूप कुना रक्षा कींता।

डा. सुन ना सिद्धांत ओसो चीनी क्रांति ता अनुभव कुना अनुसार, वर्तमान मंजिल ते चीन ता राष्ट्रीय अर्थव्यवस्था लोप्पा राजकीय, निजी ओसो सहकारी क्षेत्र शामिल मंदाना। मति इद्रम ता राज्य किन निश्चित रूप ते उंदी “उचुन मुल ता राज्य आयवा”, उंदी नवजनवादी राज्य लेक्का मंदाना, ताना लोप्पा सर्वहारा वर्ग ता नेतृत्व ते “सब्बे आम लोकुरा हिस्सा” मंदिता।

इद्रम ता नवजनवादी संस्कृति ते “ सब्बे आम लोकुरा हिस्सा” मंदाना, इत्तेके अदिन किन राष्ट्रीय, वैज्ञानिक ओसो जन संस्कृति मंदाना, बदे वेने परिस्थिति ते उंदी “उचुन मुल ता निजी मिलकियत” वाले संस्कृति मंदानायो।

इदु आम ओसो बुनियादी कार्यक्रम आंदू इदिन माटु कम्युनिस्ट लोर वर्तमान मंजिल काजे, पूंजीवादी जनवादी क्रांति ता पूरा मंजिल काजे लागू कींतोमा। इदु समाजवाद ओसो कम्युनिस्ट ता मना वायना कालम ओसो अधिकतम कार्यक्रम तुकू न्यूनतम कार्यक्रम आंदू। इदिन लागू कीयाना चीनी राज्य ओसो चीनी समाज किन उंदी कदम मुन्ने ओयना उंदी औपनिवेशिक, अर्ध-औपनिवेशिक ओसो अर्ध-सामंती राज्य लेवेके समाज तल नवजनवादी राज्य ओसो समाज ते ओयार।

मना कार्यक्रम तय कित्ता सर्वहारा वर्ग ता राजनीतिक नेतृत्व ओसो अर्थव्यवस्था ता सर्वहारा नेतृत्व वाले राजकीय ओसो सहकारी क्षेत्र, समाजवादी तत्व आंदुंगा।

इद कार्यक्रम किन लागू कीतेकाई चीन उंदी समाजवादी समाज ते बदलेमाया परवो।

माटु कम्युनिस्ट लोर मना राजनीतिक विचार कुन बस्के ने मक्किह कीवोमा चीन किन समाजवाद ओसो कम्युनिज्म बगिल ओयनाए मना वायना कालम ता ओसो अधिकतम कार्यक्रम आंदू इंदानादिना लोप्पा बदे डावुट हिल्ले। मना पार्टी ता पारोल मना मार्क्सवादी विश्व-दृष्टिकोण, इव रेंडासीए स्पष्ट रूप ते वायना कालम ते असीमित रूप ते वेहच ते मंदाना वायना कालम ता सर्वोच्च आदर्श पिस्वल बगिल इसारा कीता। पार्टी लोप्पा शामिल आयानास्केटले हर कम्युनिस्ट लोरो गुंडे ते रेंडु स्पष्ट उद्देश्य मंदितांग, वर्तमान कालम ते नवजनवादी क्रांति ओसो वायना कालम ते समाजवाद, कम्युनिज्म ओसो अविना काजे ओरू कम्युनिज्म ता दुश्मन ओरा पोरो दुश्मनी तासतेकाई ओसो वेल्ले अंगडम ता पोल्लोंग कीतेकाई, बुद्धी हिल्ला लेक्का पोंगडिंग किसोरे आरोप वाटतेकाई, लज्जा हिल्ला लेक्का रांगतेकाई ओरा संगे संघर्ष कियानुर ओसो मनम इद्रम तविना दृढ़ता ते मुकाबला कीयाना। बेसतोर मंतोर मति हर जागा डावुट किसोर मंतोर ओरकिन माटु जीवा कीसि ओसो शांतिपूर्वक समझे कीयाना, ओरा पोरो हमला कीयानायो। इदु वेल्ले स्पष्ट ओसो निश्चित निर्विवाद सत्य आंदू।

मति चीन लोप्पा सब्बे कम्युनिस्ट ओसो कम्युनिज्म ता समर्थन कियानोर वर्तमान मंजिल ता उद्देश्य किन पूरा कियाला काजे संघर्ष कीयाना। ओरू विदेशी ओसो सामंती उत्पीड़न ता विरोध कीयाना, चीनी जनता ना तिप्पल औपनिवेशिक, अर्ध-औपनिवेशिक ओसो अर्ध-सामंती परिस्थिति तल मुक्ति दोरकी कीयाना ओसो सर्वहारा वर्ग ता नेतृत्व ते उंदी नवजवादी चीन ता निर्माण कीयाना मंता। इद नवजनवादी चीन ता मुख्य काम किसान लोर किन मुक्त कीयाना, इत्तेके डा. सुन यात-सेन ना क्रांतिकारी मूंड जन सिद्धांत वाले स्वाधीन, स्वतंत्र, जनवादी, एकीकृत, समृद्ध ओसो शक्तिशाली चीन ता स्थापना कियाला काजे संघर्ष कीयानादु मंता। माटु निज्जमे इद्रम किया मंतोमा चीनी जनता ना बेहरा संख्या संगे कलियसी माटु कम्युनिस्ट लोर हत्ता 24 साल तल वेल्ले बहादूरी ते इद उद्देश्य काजे संघर्ष किया मंतोमा।

बोराई कम्युनिस्ट लेवेके बोराई कम्युनिस्ट समर्थक ओसो समाजवाद ओसो कम्युनिज्म ता पोल्लोंग कींतोर मति इद उद्देश्य किन हासिल कियाला काजे संघर्ष कीवा मत्तेके, ओरू इद पूंजीवादी-जनवादी क्रांति ता मूल्य कम कीसि हूडिंतोर, उचुन वेने ढीलापन लेवेके आलस-सुस्ती तोहिंतोर, उचुन वेने लापरवाह ओसो गिर्दा हिल्वा लेक्का मंदिंतोर ओसो तन्ना नेत्तुर पोहला काजे जीवा हियाला काजे पेरके-मुन्ने आंतोर, ओरू पुंजी-पुंजी लेवेके पुनवा लेवाए समाजवाद ओसो कम्युनिज्म तुकू विश्वाघात किया मंतोर। इद्रम तोरा लोप्पा राजनीतिक चेतना ता कमी ओसो निष्ठावान कम्युनिस्ट हिल्ले इंजी पक्का मंता। मार्क्सवाद ता नियम समाजवाद हासिल कियाला काजे सिर्फ जनवाद ता मंजिल पार कियालाए लागिंता इंजी मंता। चीन लोप्पा जनवाद किन हासिल कियाला काजे संघर्ष उंदी दीर्घकालीन संघर्ष मंता। उंदी संयुक्त नवजनवादी राज्य ता स्थापन किवा लेवा, नवजनवादी अर्थव्यवस्था ता राजकीय, निजी पूंजी ओसो सहकारी क्षेत्र ता विकास किवा लेवा, उंदी राष्ट्रीय, वैज्ञानिक ओसो जन संस्कृति इत्तेके उंदी नवजनवादी संस्कृति ता विकास लेवा, संक्षेप ते, कम्युनिस्ट पार्टी ता नेतृत्व ते उंदी पूना रकम ता पूंजीवादी-जनवादी क्रांति लेवा, उंदी औपनिवेशिक, अर्ध-औपनिवेशिक ओसो अर्ध-सामंती व्यवस्था किन खत्म कीसि उंदी समाजवादी समाज ता निर्माण कीयाना कोशिश कीयाना सिर्फ उंदी नाटके कीयानादे मंदिंता।

उचुन मुल पूंजीवाद किन वेरियवा लेवा बदे उंदी विशेष परिस्थिति ते कम्युनिस्ट लोर अदिना विकास ता पक्ष बारांकु एतिंतोर इंजी समझेमायोर आंतोर। मना जवाब एकदम सीधा मंदिंता। विदेशी साम्राज्यवाद ओसो स्थानीय सामंतवाद ता उत्पीड़न ता जागा ते उंदी निश्चित मात्रा ते पूंजीवाद ता विकास सिर्फ उंदी प्रगतिए आयवा इदु उंदी अनिवार्य प्रक्रिया वेने आंदू। अदिनगडल पूंजीपति वर्ग ओसो सर्वहारा वर्ग किन फायदा आंता, सर्वहारा वर्ग किन ज्यादा फायदा आंता बहे। नेंडु चीन ता स्थानीय पूंजीवाद आयवा विदेशी साम्राज्यवाद ओसो स्थानीय सामंतवाद बेकार मंता इदिना जरूरत हिल्ले। असल इत्तेके मनगा पूंजीवाद

वेल्ले कम मंता। चीनी पूंजीपति वर्ग ता उचुन प्रवक्ता पूंजीवादी विकास ता खुलेआम पक्ष एतला पेरकेमुन्ने आंतोर अनि हिकके-हक्केटा चर्चा कींतोर इदु वेल्ले आल्सना लेक्कटा पोल्लो मंता। दूसरा बगिल चीन लोप्पा जरूरत मत्ताचोन पूंजीवादी विकास ता अनुमति हियाना तुकु इनकार कींतोर। अनि सिर्फ उंदे बेरा समाजवाद ते एव्वना ओसो मूंड जन-सिद्धांत ओसो समाजवाद ता काम किन “उंदे बेरा पूरा कीयाना” पोल्लोंग कींतोर। इद्रम ता पोल्लो चीन ता राष्ट्रीय पूंजीपति वर्ग ता कमजोरी किन वेहिंतांग लेवेके जनता किन धोखा हियाला काजे बडे जमींदार वर्ग ओसो बडे पूंजीपति वर्ग ता षडयंत्र मंदिता इंजी स्पष्ट मंता। सामाजिक विकास ता नियम कुना तम्मा मार्क्सवादी जानकारी पोरो आधार आसी माटु कम्युनिस्ट लोर चीन लोप्पा नवजनवाद ता राज्य व्यवस्था लोप्पा सामाजिक प्रगति ता हित ते अर्थव्यवस्था ता राजकीय, मेहनतकश जनता ताकी कीयाना व्यक्तिगत ओसो सहकारी क्षेत्रए आयवा निजी पूंजी वाले क्षेत्र ना विकास ता सुविधांग वेने हियाना अनिवार्य मंता इंजी स्पष्ट समझेमांतोम। मति इदिना लोप्पा जनता ना आर्थिक पिस्वल किन नियंत्रण आयनायो इंजी शर्त मंदिता। बदे वेने अंगडम पोल्लोंग ओसो चालबाजी संगे माटु कम्युनिस्ट लोरा कोंडा ते डुंडुल वाटा परमूडायो।

उचुन मुल माटु कम्युनिस्ट लोर “बव मूंड जन-सिद्धांत कुन नेंडु चीन काजे जरूरत मंता, अविन पूर्ण रूप ते लागू कियाला काजे संघर्ष कियाला मना पार्टी तैयार मंता” ऐलान कींतोर इंजी ड्रावुट कींतोर अस्के माटु निज्जमे इद्रम इंतोम-इदिना कारण 1924 ते क्वोमिंगतांग ता पहली राष्ट्रीय कांग्रेस ता घोषणापत्र लोप्पा वेहत्ता मूंड-जन-सिद्धांत कुना बुनियादी नियम कुन समझेमायवा मंदानादु आंदू इंजी। वर्तमान कालम काजे मना पार्टी ता कार्यक्रम इत्तेके मना न्यूनतम कार्यक्रम लोप्पा तय कित्ता उचुक बुनियादी नियम कुना संगे कलियंतांग। इदु पोल्लो डा. सुन यात-सेन ना मूंड जन सिद्धांत, वर्तमान कालम काजे मना पार्टी पेश कित्ता कार्यक्रम सिर्फ उचुने बुनियादी नियम कुना संगे कलियंतांग, हर पोल्लो संगे आयो। मना पार्टी नवजनवाद ता कार्यक्रम बदे ड्रावुट हिल्ला डा. सुन ना सिद्धांत तुकु बचोने

ज्यादा सर्वांगीण मंता, खासकर डा. सुन डोलता पेरकेटा साल कुना लोप्पा चीनी क्रांति ता विकास संगे-संगे मना पार्टी ता नवजनवादी ता सिद्धांत, कार्यक्रम ओसो व्यवहार वेल्ले विकसित आता ओसो वायना कालम ते ओसो ज्यादा विकास आसोर मंदियार। मति सार रूप ते इव मूंड जन सिद्धांत कुना मुन्ने पाड़ना मूंड जन सिद्धांत कुनगडल अलग नवजनवाद ताए कार्यक्रम मंता। साधारण रूप ते इविनाए “नेटा चीन किन जरूरत मंता” ओसो साधारण रूप ते इविने “पूर्ण रूप ते लागू कियाला काजे संघर्ष कियाला मना पार्टी तैयार मंता।” माटु चीनी कम्युनिस्ट लोर, मना पार्टी ता न्यूनतम कार्यक्रम किन लागू कियाला काजे संघर्ष कीयाना ओसो डा. सुनयत सेन ना क्रांतिकारी ओसो पूना मूंड जन सिद्धांत कुन लागू कियाला काजे संघर्ष कीयाना बुनियादी रूप ते उंदे पोल्लो समझेमांतोमा। अदिन काजे चीनी कम्युनिस्ट लोरा पाड़ना कालम ओसो वर्तमान कालम ता लेक्काने वायना कालम ते वेने क्रांतिकारी मूंड जन-सिद्धांत कुन वेल्ले ईमानदारी ते ओसो सर्वांगीण रूप ते अमल कियाकोमा।

उचुन मुल बेगा उंदी बेरा कम्युनिस्ट पार्टी कैदे सत्ता वायर अगा रूस लेक्का सर्वहारा अधिनायकत्व ओसो एकदलीय व्यवस्था किन लागू कियार इंजी आल्संतोर। तीना पोरो मावा जवाब-जनवादी वर्ग कुना एकता पोर आधार आसी उंदी नवजनवादी राज्य सर्वहारा अधिनायकत्व वाले समाजवादी राज्य संगे सैद्धांतिक रूप ते अलग मंदिता इंजी वेहिंतोमा। मना नवजनवाद ता व्यवस्था ता निर्माण सर्वहारा वर्ग ओसो कम्युनिस्ट पार्टी ता नेतृत्व ते मंदियर इंजी बदे डावुट हिल्ले, मति नवजनवाद ता पूरा मंजिल ते चीन लोप्पा एकदलीय अधिनायकत्व ओसो एकदलीय सरकार ता स्थापन किया परमूडायो अदिन काजे इद्रम कियाला कोशिश कीयानायो। मना मुन्ने मनम सब्बे राजनीतिक पार्टिंग, सामाजिक ग्रूपकु ओसो व्यक्तिगत सहयोग तुकु इनकार कीयाना तुकू बदे कारण हिल्ले। इदिना काजे ओरा रुझान कम्युनिस्ट पार्टी काजे सहयोगपूर्ण मंदाना, दुश्मनी मंदानायो। रूसी व्यवस्था रूप ता इतिहास ता उपज आंदू। रूस लोप्पा मानेय मानेय ना शोषण किन उंदी सामाजिक व्यवस्था रूप ते खत्म कित्ताद

मंता। एकदम पूना रकम ता जनवाद इत्तेके समाजवाद ता राजनीतिक, आर्थिक ओसो सांस्कृतिक व्यवस्था किन लागू कित्ताद मंता। जनता सब्बे समाजवाद-विरोधी राजनीतिक पार्टिंग किन त्याग कीसि सिर्फ बोलशेविक पार्टी ताए समर्थन किया मंतांग। इव सब्बे पोल्लोंग रूसी व्यवस्था किन बने कियाला योगदान हीतांग। इवु अगाटा परिस्थिति ता अनुसार जरूरत मत्तांग। मति बोलशेविक पार्टी सिर्फ उंदी राजनीतिक पार्टी मत्ता रूस लोप्पाटा राजसत्ता ता संगठन कुना लोप्पा इंजे वेने मजदूर, किसान, बुद्धिजीविरा एकता व्यवस्था ओसो पार्टी सदस्य, गैर पार्टी लोकुरा एकता व्यवस्था ता पालन आंता। तीना लोप्पा सरकारी संगठन कुने सिर्फ मजदूर वर्ग ओसो बोलशेविक लोरे काम कीयाना लेक्कटा व्यवस्था आयो। चीन ता वर्तमान मंजिल ते स्थापना कीयाना व्यवस्था चीन इतिहास ता वर्तमान मंजिल ता उपज मंदिता। वायना कालम ते वेल्ले जोम राज्य ओसो राजनीतिक सत्ता ता उंदी विशेष रूप लेक्काने अस्तित्व मंदिता। इदु मना काजे रूसी व्यवस्था तुकू अलग मंदिता मति मना काजे वेल्ले जरूरी मत्तादू मंता, इत्तेके जनवादी वर्ग ता एकता पोरो आधार आसी नवजनवादी राज्य ओसो राजनीतिक सत्ता ता रूप मंदिता।

मना ठोस कार्यक्रम

इदु आम कार्यक्रम पोरो आधार आसी मना पार्टी लोप्पा हर कालम काजे उंदी ठोस कार्यक्रम मंदाना। नवजनवाद ता मना आम कार्यक्रम पूंजीवादी जनवादी क्रांति ता पूरा मंजिल लोप्पा इत्तेके बचोनो दशाब्दिंग एवनल बदलेमायो आंता। मति इद मंजिल लोप्पा हमेशा परिस्थिति बदेमाता लेवेके बदलेमासोर हत्ता, मनम इदिना अनुसार मना ठोस कार्यक्रम लोप्पा बदलाव किया लागिंता इंदानदु साधारणे मंदिता। उदाहरण तुकू नवजनवाद ता मना आम कार्यक्रम उत्तरी अभियान कालम, भूमि-क्रांति युद्ध ता कालम ओसो जापानी आक्रमण विरोधी युद्ध कालम ते परिस्थिति उंदी लेक्का मत्ता, मति मना ठोस कार्यक्रम ते बदलाव आसोरे

मंदिता, बारांकु इतेके इव मूंडु कालम कुना लोप्पा मना दोस्त ओसो दुश्मन उंदी लेक्का मन्नोर आंतोर।

इंजे चीनी जनता ना मुन्ने दोड़ रास्ता परिस्थितिंग मंतांगः

1. जापानी आक्रमणकारीर इंजे हारेमाताद हिल्लेः
2. चीनी जनता काजे जनवादी सुधार कियाला काजे मिलेजुले मासी कोशिश कीयानादु फौरी रूप ते जरूरत मंता। इद्रम कीसि अदु राष्ट्रीय एकता किया परिंता, सब्बे जापान-विरोधी ताकत कुन जल्दी गोलबंद ओसो एककीकृत किया परिंता। तन्ना एकताकारी देशकुना संगे तालमेल कीसि जापानी आक्रमणकारीर किन हारे किया परिंता।
3. क्वोमिंगतांग सरकार राष्ट्रीय एकता किन तहस-नहस किया मंता ओसो इद्रमे जनवादी सुधार ते बाधा वाटा मंता।

इद्रम ता परिस्थिति ते मावा ठोस कार्यक्रम बाताल मंता। दूसरा माटा ने जनता ना फौरी मांग बाताल मंता?

माटु दोड़ रास्ता मांग कु सही ओसो न्यूनतम मंतांग इंजी आल्संतोमः

1. एकताकारी देश कुना संगे तालमेल कीसि जापानी आक्रमणकारीर किन पूर्ण रूप ते हारे कीयाना ओसो अन्तरराष्ट्रीय शांति स्थापित कियाला काजे मत्ता सब्बे ताकत कुन गोलबंद कीमुट,
2. क्वोमिंगतांग ता एकदलीय तानाशाही किन खत्म कीमुट ओसो उंदी जनवादी गठबंधन सरकार ओसो संयुक्त सर्वोच्च कमान ता स्थापना कीमुट,
3. जनता ना विरोध कीयाना ओसो राष्ट्रीय एकता किन तहस-नहस कीयाना जापान-परस्त तत्व, फासीवादिर ओसो पराजयवादिर किन सजा हीमुट अनि एकता कियाला मदद कीमूट।
4. गृहयुद्ध ता खतरा पैदा कीयाना प्रतिक्रियावादिर किन सजा हीमुट अनि अदरूनी शांति ता गारंटी कीमुट,

5. दुश्मन मुन्ने आत्मसमर्पण कीयाना अफसर लोरा खिलाफ सजा हियाना कार्यवाही कीयाना चीनी गद्दर ओसो जापानी एजेंट लोर किन सजा हीमुट,
6. जनता पोरो दमन कीयाना सब्बे प्रतिक्रियावादी खुफिया विभाग कुन ओसो ओरा सब्बे कामकाज किन खत्म कीसिमुट अनि नजरबंदी कैम्प कुन भंग किमुट,
7. जनता ना भाषण, प्रेस, सभा, संगठन, राजनीतिक आस्था, धार्मिक विश्वास ता आजादी ओसो व्यक्तिगत आजादी पोरो दमन कीयाना सब्बे प्रतिक्रियावादी कानून ओसो आदेश कुन खत्म कीयाना अनि जनता कि पूर्ण नागरिक अधिकार हियाना गारंटी हियाना,
8. सब्बे जनवादी पार्टिंग, ग्रूप कुन कानूनी मान्यता हियाना,
9. सब्बे देशभक्त राजनीतिक बंदि लोर किन रिहा कीयाना,
10. चीन ता मुक्त इलाकांग किन घेराव कीसि मत्ता, अविना पोरो हमलांग किसोर मत्ता सब्बे फौज कुन पेरके गुचिह कीसि अविन जापान-विरोधी मोर्चा ते लोहना,
11. चीन ता मुक्त इलाकांग लोप्पटा जापान-विरोधी सशस्त्र सेनांग ओसो जनता चुने कित्ता सरकार कुन मान्यता हियाना,
12. मुक्त इलाकांग ओसो अगाटा सशस्त्र सेनांग किन सुदृढ़ बने कीयाना ओसो अविन विस्तार कीयाना, पोहता सब्बे इलाकांग किन हासिल कीयाना,
13. जापान कब्जा ते मत्ता इलाकांग ना जनता किन सख्त विद्रोह कियाला काजे भूमिगत सशस्त्र सेनांग ना संगठन कियाला मदद कीयाना,
14. चीनी जनता किन खुद किन हथियारबंद कियाला ओसो तम्मा लोहकुने तम्मा देश ता रक्षा कीयाना अनुमति हियाना,
15. लगातार लड़ाईंग लोप्पा हारेमायना, जनता ना उत्पीड़न कीयाना, तन्ना दोड़ हिल्वा सेनांग संगे भेदभाव कीयाना ओसो भीषण हार काजे जिम्मेदार मत्ता कमांडर लोर किन सजा हियाना ओसो

- क्वोमिंगतांग ता सीधा सर्वोच्च कमान दोड़ मत्ता सेनांग ना राजनीतिक, फौजी रूपान्तर कीयाना,
16. फौजी भरती ता व्यवस्था ओसो अफसर, सिपाही लोरा रहन-सहन ता परिस्थिति ते सुधार कीयाना,
 17. प्रतिरोध युद्ध लोप्पा लड़ेमायना सैनिक लोरा परिवार कुना पोरो महत्व हियाना। अस्केने मोर्चा ते तैनात मत्ता अफसर ओसो सिपाही लोर लोता काजे परेशान आयवा युद्ध पोरो ध्यान हियानूर,
 18. घायल आसी कानाल-कूटाल आता सैनिक लोर ओसो देश काजे शहीद आता परिवार कुना पोरो प्राथमिकता हियाना ओसो सेवा मुक्त सैनिक लोरा पिस्वल ता व्यवस्था कियाला मदद कीयाना,
 19. युद्ध किन ताकि कियाला सहायता कियाला काजे युद्ध-उद्योग ता विकाल किया।
 20. एकताकारी देश कुनगडल दोरकना फौजी, वित्तीय सहायता किन भेदभाव हिल्वा प्रतिरोध-युद्ध ते लड़ेमायना सब्बे सेनांग लोप्पा तूसना,
 21. भ्रष्टाचारी अफसर लोर किन सजा हियाना ओसो स्वच्छ शासन ता स्थापना कीयाना,
 22. मध्यम ओसो निम्न स्तर ता सरकारी कर्मचारिरा आमदनी बेरसी कायना,
 23. चीनी जनता किन जनवादी अधिकार हियाना,
 24. उत्पीड़नकारी “पाओ-च्या” व्यवस्था¹ किन खत्म कीयाना,
 25. युद्ध संगे करसना ओसो प्राकृतिक मुश्किल कुनगल परेशान मत्तोर किन सहायता कीयाना-
 26. चीन ता पोहता प्रदेश कुन ओसो दोरकी कित्ता पेरके दुश्मन कब्जा ते मत्तास्के नुकसान तेहता अगाटा लोकर किन व्यापक रूप ते सहायता कियाला काजे हालनाचोन धन हियाना।
 27. ज्यादा टैक्स ओसो रक-रकम ता लेवी किन खत्म कीयाना ओसो एकीकृत वर्तमान टैक्स लागू कीयाना,

28. ग्रामीण ते सुधार लागू कीयाना, लगान ओसो सूद कम कियान, काश्तकारिरा अधिकार कुरना रक्षा कीयाना व्यवस्था कीयाना, कंगाली ता शिकार किसान लोर किन कम ब्याज हीसी कर्ज हियाना ओसो किसान लोर किन संगठित आयला मदद कीयाना, अस्के कृषि-उत्पादन ता विकास आया परिंता,
29. नौकरशाही पूंजी किन अवैध घोषित कीयाना,
30. आर्थिक नियंत्रण ता वर्तमान नीति किन खत्म कीयाना,
31. बेलगान मुद्रा प्रसार ओसो महंगाई किन रोमी कीयाना,
32. निजी उद्योग किन सहायता हियाना ओसो अदिन कर्ज एतला, कच्चा मान अस्सला ओसो तैयार माल किन वम्मला काजे सुविधा कीयाना,
33. मजदूर लोरा पिस्वल ते सुधार कीयाना, बरोजगार मजदूर लोर किन सहायता कीयाना, मजदूर लोर किन संगठित आयला मदद कीयाना। अस्के ने औद्योगिक उत्पादन ता विकास किया परमूडायर,
34. शिक्षा क्षेत्र ते क्वोमिंगतांग सिद्धांत⁵ किन पोरो वाटना बंद कीमुट ओसो उंदी राष्ट्रीय वैज्ञानिक ओसो जन संस्कृति ओसो शिक्षक लोर किन मुन्ने ओयना,
35. शिक्षा विभाग ता अध्याक लोरा ओसो बाकी कर्मचारिरा पिस्वल ता गारंटी कीयाना ओसो विद्याध्ययन संबंध ते स्वतंत्रता ता गारंटी कीयाना,
36. नौजवान, महिला, पिल्ला-पेकोरा अधिकार कुना रक्षा कीयाना। गरीबी ता कारण ते पढ़ेमाया परवा नौजवान, विद्यार्थिरा सहायता कीयाना, जापानी आक्रमण विरोधी युद्ध ओसो सामाजिकत प्रगति ता दृष्टिकोण ते काम वायना सब्बे काम कुना लोप्पा समानता पोरो आधार आसी शामिल आयना उद्देश्य ते नौजवान, महिला लोर किन संगठित आयला मदद कीयाना। मर्मिग कीयाना आजादी ओसो

महिला-पुरुष समानता ता गारंटी कीयाना। नौजवान ओसो पिल्ला-पेकोर किन सही शिक्षा हियाना,

37. चीन ता अल्पसंख्यक जातिंग संगे बेस व्यवहार कीयाना, अविन किन स्वायत्त शासन ता अधिकार हियाना,
38. प्रवासी चीनी लोरा अधिकार कुना रक्षा कीयाना। मातृभूमि ते वापिस वातोरा मदद कीयाना,
39. जापानी उत्पीड़न ता कारण ते चीन लोप्पा वितसी वात्ता विदेशी नागरिक लोरा रक्षा कीयाना ओसो जापानी आक्रमणकारिरा खिलाफ ओरा संघर्ष ता समर्थ कीयाना,
40. चीन-सोवियत संबंध लोप्पा सुधार कीयाना।

इव मांग कुन पूरा कियाला काजे सबसे महत्वपूर्ण काम क्वोमिंगतांग ता एकदलीय तानाशाही किन तुरंत खत्म कीयाना। उंदी जनवादी अस्थाई केन्द्रीय सरकार ता स्थापना कीयाना, उंदी व्यापक राष्ट्रव्यापी समर्थन मत्ता गठबंधन सरकार ता स्थापना कीयाना। तीना लोप्पा जापान विरोधी पार्टिंग ओसो बदे वेने पार्टी संगे संबंध हिल्वा लोकुरा प्रतिनिधित्व शामिल मंदिता। इद शर्त पूरा आयवेके क्वोमिंगतांग क्षेत्र ते ओसो पूरा देश लोप्पा बदे वेने रकम ता असली सुधार आया परवो।

इव मांग कुना लोप्पा चीन ता व्यापक जना ओसो संगे ने एकताकारी देश कुना जनवादी लोकमत ता व्यापक समूह कुना आकांक्षा (इच्छा) किन वेहत्ताद मंता।

इद्रम ता न्यूनतम ठोस कार्यक्रम लोप्पा सब्बे जापान विरोधी जनवादी पार्टिंग सहमत मंदाना वेल्ले जरूरत मंता। पोरो वेहत्ता कार्यक्रम पोरो आधार आसी ओरा संगे सलाह-मशविरा कियाला माटु तैयार मंतोम, अलग-अलग पार्टिंग ना अलग-अलग मांग कु मंदा परिंतांग मति सब्बे पार्टिंग ना राय वाले कार्यक्रम पोरो उंदी राय मंदाना।

क्वोमिंगतांग इलाकांग लोप्पा इद्रम ता कार्यक्रम इंजे वेने जनता नाए मांग ता मंजिल मंदिता, जापान कब्जा ते मत्ता इलाकांग लोप्पा इदु कार्यक्रम किन पूरा कियाला काजे इव इलाकांग किन ओसो उंदी बेरा मना

कब्जा ते कीयाना जरूरत मंता, सिर्फ सशस्त्र विद्रोह काजे भूमिगत ताकत कुना संगठन कीयाना पोल्लो किन विड़चसी, मुक्त इलाकांग लोप्पा इद कार्यक्रम मुन्ने अमल आताद मंता ओसो आया मंता अनि अदु लगातार अमल आसोरे मंदाना।

पोरो वेहत्ता ठोस कार्यक्रम ता रूप ते पेश कित्ता चीनी जनता ना फौरी मांग कुना लोप्पा वेल्ले महत्वपूर्ण युद्धकालीन ओसो युद्धोत्तरकालीन समस्यांग शामिल मंतांगा। अविना ज्यादा स्पष्टिकरण कीयाना। दोड़ इव समस्यांग कुना बारे ते वेहानास्के माटु क्वोमिंगतांग ता मुख्य शासक गुट ता उचुक गलत दृष्टिकोण कुना आलोचना कियाकोम, संगेने बाकी लोकुर तेहता उचुक सवाल कुना जवाब वेने हियाकोम।

1 जापानी आक्रमणकारिर किन पूराए नष्ट कीयाना, नड़माए सुलह-समझौता कीयाना अनुमति बिल्कुले हियानायो

काहिरा सम्मेलन- 6 जापानी आक्रमणकारिर किन बदे शर्त हिल्ला आत्मसमर्पण कियाला काजे मजबूर कीयाना इंजी सही फैसला कित्ता। मति इंजे जापानी आक्रमणकारिर शांति-समझौता कियाला काजे पेरके मंजी कार्यवाही किया मंतोर। असल इत्तेके क्वोमिंगतांग सरकार लोप्पा मत्ता जापान-परास्त तत्व नानकिंग ता कठपुतली सरकार जापान ता गुप्त दूत लोरा संगे सांठगांठ किया मंता, इदिना पोरो उचुन वेने रोमी कित्ताद हिल्ले। अदिन काजे नड़माए सुलह-समझौता कीयाना खतरा इंजे पूराए खत्म आताद हिल्ले। काहिरा सम्मेलन दूसरा फैसला वेने कित्ता, इत्तेके नालुंग उत्तर-पूर्वी प्रान्त ओसो थाइवान, फंगहू द्वीपसमूह कोचीन किन वापिस कीयाना इंजी। मति क्वोमिंगतांग सरकार ता वर्तमान नीतिंग किन हूड़तेके ताना पोरो अदु जेक एवनल इत्तेके यालू डोड्डा एवनल लड़ेमायार ओसो मना पोहता सब्बे प्रदेश कुन वापिस दोरकी कियार इंजी पूरा भरोसा किया परमुड़ायो। इद्रम ता परिस्थिति ते चीनी जनता बाताल कीयाना? अदु क्वोमिंगतांग सरकार किन जापानी आक्रमणकारिर किन पूराए नष्ट कीयाना इंजी मांग कीयाना ओसो अदिना नड़मा सुलह-समझौता कीयाना अनुमति

इनपड़े हियानायो। सुलह-समझौता कीयाना सब्बे साजिश कुन तुरंत बंद कीयाना इंजी मांग कीयाना। चीनी जनता क्वोमिंगतांग सरकार निष्क्रिय प्रतिरोध ता तन्ना वर्तमान नीति किन विडसना अनि तन्ना पूरा फौजी शक्ति किन जापान खिलाफ सक्रिय युद्ध ते वाटना इंजी मांग कीयाना। चीनी जनता तम्मा सशस्त्र सेनांग-आठवीं राह सेना, पूना चौथी सेना ओसो जनता ना बाकी फौजी यूनिटकु ना विस्तार कीयाना ओसो दुश्मन बेगा एवतरो अगा खुद पहलकदमी कीसि बेहरा स्तर ता जापान विरोधी सशस्त्र सेनांग ना विकास कीयाना। अदु एकताकारी देश कुना संगे सीधा तालमेल कीसि युद्ध संगे दुश्मन कैदे मत्ता सब्बे प्रदेश कुन दोरकी कीयाना। बदे वेने परिस्थिति ते अदु क्वोमिंगतांग पोरो पूर्ण रूप ते निर्भर मंदानायो। जापानी आक्रमणकारि किन हारे कीयाना चीनी जनता ना अधिकार आंदू। प्रतिक्रियावादि जनता किन इद अधिकार हीवेके, अदिना जापान विरोधी गतिविधिंंग पोरो दमन कितेके ओसो अदिना शक्ति ता उन्मूलन कीयाना कोशिश कितेके, समझे कीयाना लोप्पा असफल आतास्के चीनी जनता आत्मरक्षा काजे दृढ़ता ते जवाबी हमला कीयाना। बारांकु इत्तेके चीनी प्रतिक्रियावादीरा इद्रम ता राष्ट्रद्रोही कार्यवाही तल सिर्फ जापानी आक्रमणकारि किने मदद दोरकिंता।

2 क्वोमिंगतांग ता एकदलीय तानाशाही किन खत्म कीमूट, जनवादी गठबंधन सरकार निल्पी कीमुट

जापानी आक्रमणकारि किन पूराए खत्म कियाला काजे पूरा देश ते जनवादी सुधार लागू कीयाना जरूरी मंता। मति इदु बस्के एवनल क्वोमिंगतांग ता एकदलीय तानाशाही किन खत्म कियमूडायो ओसो बस्के एवनल उंदी जनवादी गठबंधन सरकार बने कियमूडायो अस्के एवनल इद्रम कीयाना संभव हिल्ले।

क्वोमिंगतांग ता एकदलीय तानाशाही निज्जमे क्वोमिंगतांग लोप्पा मत्ता जन-विरोधी गुट ता तानाशाही आंदू। इदु तानाशाही निज्जमे चीनी ता राष्ट्रीय एकता किन नष्ट कींता, युद्ध लोप्पा क्वोमिंगतांग ता मोर्चा ते

हार पैदा कींता, चीनी जनता ना जापान विरोधी ताकत कुन गोलबंद कीयाना, एकीकृत कीयाना लोप्पा वायना बुनियादी बाधा आंदू। चीनी जनता प्रतिरोध युद्ध ता आठ सालकुन खराब अनुभव कुना संगे इद तानाशाही ता अपराध किन वेल्ले बेस चिन्हित कित्ता अनि अदु प्राकृतिक रूप ते अविन तुरंत खत्म कीयाना मांग कींता। इदु जन-विरोधी तानाशाही गृहयुद्ध ता पोषण वेने कींता, इदिन तुरंत खत्म किवेके इदु ओसो उंदी बेरा चीनी जनता मुन्ने गृहयुद्ध ता संकट तच्ची निल्पी कियारा।

इदु जन विरोधी तानाशाही किन खत्म कीयानादिना पोरो चीनी जनता वेल्ले व्यापक ओसो मोय्योल गुडंजता लेक्का तेदता। अद्रमासी क्वोमिंगतांग अधिकारी खुद वेने खुल्लमखुल्ला इद “राजनीतिक पालन-पोषण किन जल्दी-जल्द खत्म कीयाना” पोल्लो किन मानेमायला मजबूर आतोर। इदिनगडल इद “राजनीतिक पालन-पोषण” ओसो एकदलीय तानाशाही अदिना जन-समर्थक किन ओसो अदिना प्रभाव किन वेल्ले नुकसान कित्ता। चीनी लोप्पा इंजे “राजनीतिक पालन-पोषण” लेवेके एकदलीय तानाशाही बेस मंता, लेवेक अदिन किन भंग कीयानायो इंजी लेवेके खत्म कीयानायो इंदाला हिम्मत कीयाना वरोर वेने मानेय हिल्लेर, इद पोल्लो परिस्थिति ता उंदी बेहरा बदलाव किन तोहिंता।

अदिन किन जरूर “समाप्त” कीयाना इंदाना लोप्पा बदे डावुट हिल्ले। मति इद काम बद्रम कीयाना, इदिना बारे ते अलग-अलग रायकु मंतांग। उचुन मुल अदिन तुर्त समाप्त कीयाना इंजी इंतोर ओसो अस्थाई जनवादी गठबंधन सरकार निल्पी कीयाना इंजी इंतोर। दूसरो उचुन रोमाटु इंतोर, “राष्ट्रीय एसेम्बली” केयाटु अनि “राजसत्ता जनता किन सौंपे कीमुट”, गठबंधन सरकार किन आयो इंतोर।

इद्रम बारांकु इंतोर? इत्तेके काम कीयाना रेंडु तरीकांग मंदितांग, ईमानदारी ता तरीका ओसो बेईमानी ता तरीका।

पहली, ईमानदारी ता तरीका मंता। ईमानदारी ता तरीका क्वोमिंगतांग ता एकदलीय तानाशाही किन खत्म कीयाना इंजी तुरंत ऐलान कीयाना, उंदी अस्थाई केंद्रीय सरकार निल्पी कीयाना, ताना लोप्पा क्वोमिंगतांग,

कम्युनिस्ट पार्टी ओसो जनवादी लीग ओसो बदे वेने पार्टी संगे संबंध हिल्वा लोकुरा प्रतिनिधिर शामिल मंदाना, राजनीतिक कार्यवाहिग ना उंदी जनवादी कार्यक्रम ता ऐलान कीयाना, चीनी जनता ना माटु पोरो वेहत्ता फौरी मांग कुन पेश कित्ता लेक्का, इद कार्यक्रम ता लक्ष्य राष्ट्रीय एकता किन पुनस्थापना कीयाना ओसो जापानी आक्रमणकारिर किन हारे कीयाना। विभिन्न पार्टींग ना ओसो बदे वेने पार्टी संगे संबंध हिल्वा लोकुरा प्रतिनिधिरा उंदी गोलमेज सम्मेलन केयना, तीना लोप्पा इव समस्या ना पोरो चर्चा कीयाना ओसो उंदी राय बने कीयाना। ताना पेरके अदिना अनुसार कार्यवाही कीयाना। उंदी एकता ता हरी, इद हरी ता समर्थन चीनी जनता दृढ़तापूर्वक कियार।

दूसरा, बेइमानी ता तरीका मंता। बेइमानी ता तरीका व्यापक रूप ते जनता ना ओसो सब्बे जनवादी पार्टींग ना मांग कुन नजरअंदाज कीयाना, क्वोमिंगतांग ता जन विरोधी गुट ता मुट्टा ते मत्ता राष्ट्रिय एसेम्बली केयना ओसो अदिन उंदी जनवाद विरोधी “संविधान” किन स्वीकार कियाला काजे मजबूर कीयाना ओसो इद गुट ता तानाशाही किन समर्थन हियार। इदिना लक्ष्य उंदी गैर कानूनी “राष्ट्रीय सरकार” किन इत्तेके सिर्फ मुट्टामेंड क्वोमिंगतांग सदस्य लोर चुने कीसि जनता पोरो थोपे कित्ता ओसो लोकमत ते अदिना बदे बुनियाद हिल्वा सरकार आंदू कानूनी बने कीयाना ओसो इद्रमे “राजसत्ता जनता किन सौंपे कीयाना” नाटक कीयाना अदिन असल ते क्वोमिंगतांग लोप्पा मत्ता जन विरोधी गुट किने “सौंपे कीयाना” आंदू। बोरु इदिना समर्थन कीवोर ओरा पोरो “जनवाद” ओसो “एकीकरण” किन तहस-नहस कीयाना आरोप वाटमूडायर। पेरके ओरा खिलाफ दंडात्मक कार्यवाही कीयाना “कारण” बने मायर। इद फूट वाटना हरी आंदू, चीनी जनता इदिना दृढ़ता ते विरोध कींता।

मना जन विरोधी लोकुर इद फूट-परस्त नीति ता अनुसार बदे कार्यवाही कियाला आल्ससोर मत्तेके ओरू सर्वनाश बगिल दायना लेक्का मंता। ओरू खुद तम्माए गुडंगा ते फांसी वाटा मंतोर, इदु फांसी “राष्ट्रीय एसेम्बली” किन उंदी जादूई छड़ी लेक्का इस्तेमाल कियानुर।

पहली, गठबंधन सरकार ता स्थापना कि रोमी कीयाना, दूसरा खुद ता तानाशाही तत्ताना, तीसरा, गृहयुद्ध किन सही साबित कियाला काजे बदे वेने कारण बने कीयाना। मति इतिहास ता तर्क ओरा विचार तुकु उल्टा ताकिंता। ओरू “बदे बहरा बंडा किन तेहची तन्नाए काल पोरो अरहना” लेक्का मंता। बारांकु इत्तेके इंजे क्वोमिंगतांग इलाका ना जनता किन बदे आजादी दोरकताद हिल्ले इंदाना पोल्लो सब्बे लोकुरा मुन्ने स्पष्ट आताद मंता। जापान कब्जा ते मत्ता इलाकांग ना जनता चुनाव ते भागीदारी आया परवो ओसो आजादी मत्ता मुक्त इलाकांग किन क्वोमिंगतांग मान्यता हीसोर हिल्ले। इद्रम ता परिस्थिति ते राष्ट्रीय प्रतिनिधि बद्रम बनेमाया परितोर? “राष्ट्रीय एसेम्बली” बद्रम मंदा परितो? बद राष्ट्रीय एसेम्बली ता बारे ते कोलार पोय्या मंतोरो अदु नेटुकु आठ साल मुन्नेटा गृहयुद्ध कालमे ते वेल्ले बारीकी ते बद्रमाई कीसि क्वोमिंगतांग तानाशाही कैदे बनेमाता असेम्बली आंदू। इद्रु ता असेम्बली केयतेके पूरा देश ता जनता अनिवार्य रूप ते इदिना खिलाफ तेदियार। मना जन विरोधी लोकुर इद समझेमाया परवा परिस्थिति तल बद्रम बाहर पेसनूर? इंजी सवाल किया परमूडांता। इव सब्बे पोल्लो नल उंदी पोल्लो वांता, अदु वीरु इद बोगस राष्ट्रीय असेम्बली केयसी खुद तम्मा विनाश किन केया मंतोरो।

क्वोमिंगतांग ता एक दलीय तानाशाही किन खत्म कियाला काजे माटु कम्युनिस्ट लोरा सुझाव मानेमासी बदे कदम तेहना। पहली, वर्तमान मंजिल ते सब्बे पार्टिंग ओसो बदे वेने पार्टी संगे संबंध मत्ता लोकुरा प्रतिनिधि लोरा सहमति ते अस्थाई गठबंधन सरकार बने कीयाना। दूसरा, दूसरी मंजिल ते स्वतंत्र ओसो निर्बंध चुनाव संगे राष्ट्रीय असेम्बली केयसी उंदी नियमित गठबंधन सरकार बने कीयाना। रेंडासीए परिस्थिति ने उंदी गठबंधन सरकार बने कीयाना, ताना लोप्पा उंदी जनवादी कार्यक्रम पोरो आधार आसी नेंडु जापान खिलाफ लड़ेमायला काजे ओसो नाड़ी राष्ट्रीय निर्माण काजे एकताबद्ध आसी संघर्ष कीयाना सब्बे वर्ग ओसो राजनीतिक पार्टिंग ना प्रतिनिधि लोर शामिल मंदितोर।

क्वोमिंगतांग लेवेके दूसरा बदे पार्टी, ग्रूप या मानेय ना लक्ष्य बाताले मत्तेकाई, ओरू इद पोल्लो किन विचार कितेकाई, किवेकाई लेवेके इद पोल्लो ता बारे जागृत मत्तेकाई लेवेके हिल्लेकाई चीन सिर्फ इदे हर्ी पोरो ताका परिंता। इदु उंदी ऐतिहासक नियम आंदू। इदिन किन दुनिया ता बदे वेने ताकत रोमी किया परवो।

इदिना संबंध ते जनवादी सुधार संगे संबंध तासना सब्बे बाकी समस्यांग ना बारे ते माटु कम्युनिस्ट लोर क्वोमिंगतांग अधिकारिर इंजे वेने तम्मा गलत नीतिंग पोरो जिद् ते नितसी मंतोर ओसो समझौता-वार्ता ता इस्तेमाल कीयाना ओसो लोकमत किन धोखा हियाला काजे किया मंतोर इंजी ऐलान कीतोमा मति ओरू तम्मा वर्तमान गलत नीतिंग किन विडसला तैयार हिल्लेर ओसो जनवादी सुधारा लागू कियाला तैयार हिल्ले, माटु ओरा समझौता-वार्ता प्रतिरोध, एकता ओसो जनवाद ता आम नियम पोरो आधार आयाना, माटु इद नियम किन नजरअंदाज कीयानाई लेवेके अवु बचोन ज्यादा मत्तेकाई, इद नियम कुन नजरअंदाज कीयाना तरीकांग, योजनांग, अंगडम ता ऐलान कुन मंजूर कीवोम इंजी ऐलान कीतोमा।

इंजे चीनी जनता ना आजादी ता संघर्ष ता प्राथमिक ओसो मुख्य निशाना जापानी आक्रमणकारी मंता। मति क्वोमिंगतांग सरकार अदिन आजादी तिंची जेक कीसि अदिना कै-काल दोहची, अदिन जापानी आक्रमणकारिरा खिलाफ लडेमायना तुकू रोमी कींता। बस्के एवनल इद समस्या हल आयो, अस्के एवनल राष्ट्र किन सब्बे जापान विरोधी ताकत कुन गोलबंध ओसो एकीकृत कीयाना असम्भव आयार। जनता किन बंधन-मुक्त कीसि अदिन जापान ता प्रतिरोध कीयाना, एकताबद्ध आयाना ओसो जनवाद दोरकी कियाला तैयार कियाला काजे मना कार्यक्रम लोप्पा इद्रम ता मांग पेश किताद मंता- एकदलीय तानाशाही किन खत्म कीयाना, गठबंधन सरकार निल्पी कीयाना, खुफिया पुलिस किन भंग कीयाना, जमनकारी कानून ओसो आदेश किन रद्द कीयाना, चीनी गदार, जासूस, जापान-परस्त तत्व, फासीवादी ओसो भ्रष्टाचारी अफसर लोर किन सजा

हियाना, राजनीतिक बंदिर किन रिहा कीयाना, सब्बे जनवादी पार्टिंग, ग्रूप कुन कानूनी मान्यता हियाना, मुक्त इलाकांग किन घेराव कीयाना ओसो अविना पोरो आक्रमण कीयाना फौज कुन वापिस केयना, मुक्त इलाकांग किन मान्यता हियाना, “पाओ-च्या” व्यवस्था किन खत्म कीयाना, अर्थव्यवस्था, संस्कृति ओसो जन आंदोलन संबंधित मांग कु।

आजादी उंदी जनता संघर्ष संगे दोरकी कीयाना चीज आंदू, बिना संघर्ष कियवा लेवा इदिन बेगाटले दोरकी किया परमूडायो। चीन ता मुक्त इलाकांग ना जनता आजादी दोरकी कित्ता, बाकी इलाकांग ना जनता वेने आजादी दीरकी किया परिंता ओसो अदिन आजादी दीरकी कीयाना। चीनी जनता किन बचोन ज्यादा आजादी दोरकियार, अदिना संगठित जनवादी ताकत बचोन ज्यादा मजबूत मंदियार अचोने ज्यादा उंदी एकीकृत ओसो अस्थाई गठबंधन सरकार बने कीयाना संभावना बेरसिंता। बेगा उंदी बेरा इद्रम ता गठबंधन सरकार बनेमायर अगा जनता किन पूराए आजादी दोरकियार, इद्रम अदु तन्ना बुनियाद किन वेने मजबूत कियारा। सिर्फ अस्केने जापानी आक्रमणकारिरा तख्ता पलटे कित्ता पेरके पूरा देश ते उंदी स्वतंत्र ओसो निर्बंध चुनाव कीयाना, उंदी जनवादी राष्ट्रीय असेम्बली बने कीयाना ओसो उंदी एकीकृत ओसो नियमित गठबंधन सरकार बने कीयाना संभव आया परिंता। बस्के एवनल जनता किन आजादी दोरकी कीवो अस्के एवनल जनता चुने कित्ता सही असेम्बली लेवेके सरकार बनेमाया परवो। इदु पोल्लो एकदम स्पष्ट हिल्ले या?

भाषण, प्रेस, सभा संगठन, राजनीतिक आस्था, धार्मिक विश्वास ता आजादी, व्यक्तिगत आजादी जनता ना वेल्ले महत्वपूर्ण आजादी मंता। चीन लोप्पा सिर्फ मुक्त इलाकांग लोप्पाने जनता किन इव आजादिंग पूर्ण रूप ते दोरकताद मंता।

1925 ते डा. सुन यात-सेन तन्ना डोलना कालम तुकू उचुने मुन्ने कित्ता ऐलान दोड़ रास्ता लेक्का मंता,

हत्ता 40 साल कुनल नन्ना चीन काजे आजादी ओसो समानता दोरकी कीयाना उद्देश्य ते राष्ट्रीय क्रांति ता काम किया मंताना। इव चालीस

साल कुना अनुभव तल नाकिन इद उदेश्य किन पूरा कियाला काजे माटु व्यापक जनता किन जागृत कीयाना ओसो दुनिया ता मना संगे समानता ता व्यवहार कीयाना हर राष्ट्र संगे एकता कीसि संघर्ष कीयाना इंजी गंभीरतापूर्वक समझेमाता।

डा. सुन ना धोखेबाज उत्तराधिकारीर व्यापक जनता किन जागृत कीयाना जागा ते ओरा उत्पीड़न कींतोर ओसो भाषण, प्रेस, सभा, संगठन, राजनीतिक आस्था, धार्मिक विश्वास ता आजादिंग ओसो व्यक्तिगत आजादी तल पूराए जेक तासिंतोर। ओरू कम्युनिस्ट पार्टी, आठवीं राह सेना, पूना चौथी सेना ओसो निज्जमे व्यापक जनता किन जागृत कीयाना, अविना आजादी, अधिकार कुना रक्षा कीयाना मुक्त इलाकांग, “गद्दार पार्टी”, “गद्दार सेना” ओसो “गद्दार इलाकांग” ना लेबल वाटितोर। माटु इद सही किन गलत ते बदले कीयाना कामकाज जल्दी खत्म आयार इंजी आशा किया मंतोम। इद्रम कियाला लेट आतेके चीनी जनता तन्ना हिम्मत हारेमायार।

4 जनता ना एकीकरण

जापानी आक्रमणकारि किन नष्ट कीयाना, गृहयुद्ध किन रोमी कीयाना ओसो उंदी पूना चीन ता निर्माण कियाला काजे उंदी विभाजित चीन किन उंदी एकीकृत चीन ते बदले कीयाना जरूरी मंता। चीन जनता ना इदे ऐतिहासिक कार्य आंदू।

मति चीन किन एकीकृत बद्रम कीयाना? उंदी डिक्टेटर ना तानाशाही एकीकरण संगे ओसो जनता ना जनवादी एकीकरण संगे? ख्वान श-खाए ना कालम ते ने उत्तरी युद्ध-सरदार लोर तानाशाही एकीकरण पोरो जोर हियाना। मति इदिना रिजल्ट बाताल पेस्ता? ओरा इच्छा ता विरुद्ध ओरा कैदे एकीकरण आयवा विभाजन वात्ता अद्रमासी आखरी ते ओरकिन तम्मा कैदल सत्ताए हत्ता। ख्वान श-खाए ना काल हरदे ताकसी क्वोमिंगतांग ता जन विरोधी गुट तानाशाही एकीकरण कियाला आल्सता। पूरा दस साल एवनल गृहयुद्ध ताकी कित्ता, इदिना रिजल्ट सिर्फ जापानी

आक्रमणकारिण किन चीन लोप्पा मौका दोरकता अनि खुद पेरके गुचसी अमेइ मेट्टा⁷ पोरो हत्ता। इंजे इद मेट्टा पोरो ओसो उंदी बेरा तानाशाही एकीकरण ता तन्ना सिद्धांत ता कोलार पोयसी प्रचार किया मंता। इद्रम अदु बोना काजे किया मंता? बोराई असली देशभक्त चीनी ओरा पोल्लोंग केंजानुरा? सोलह साल एवनल उत्तरी युद्ध-सरदार लोरा शासन ते ओसो अठारह साल एवनल क्वोमिंगतांग ता तानाशाही शासन ते मत्ता पेरके, जनता किन वेल्ले अनुभव दोरकतांग अदिना लोप्पा जांच-पड़ताल कीयाना ताकत पैदा आता। अदु डिक्टेटर संगे तानाशाही एकीकरण दोरकि कियाला आयवा जनता संगे जनवादी एकीकरण दोरकी कीयाना इंजी आल्लिसंता। वेल्ले कालम मुन्ने 1935 तेने माटु कम्युनिस्ट जापान विरोधी राष्ट्रीय संयुक्त मोर्चा ते नीति पेश कित्ताद मत्ता ओसो अस्केने माटु इदिना स्थापना काजे संघर्ष कीतोम। 1939 ते क्वोमिंगतांग “दुश्मन पार्टिंग ना कार्यवाहिंग किन रोमी कीयाना तरीका” पोरोल ता तन्ना प्रतिक्रियावादी तरीकांग किन लागू किया मंता। इद्रमे आत्मसमर्पण, फूट ओसो प्रतिगमन ता खतरा पैदा किया मंता ओसो तन्ना तानाशाही एकीकरण ता बारे ते कोलार पोय्या मंता। अद्रमासी माटु इद्रम ऐलान कीसि मत्तोम, एकीकरण प्रतिरोध पोरो आधार आसी कीयाना, आत्मसमर्पण पोरो आयो। एकता पोरो आधार आसी कीयाना फूट पोरो आधार आसी आयो। एकीकरण प्रगति पोरो आधार आसी कीयाना प्रतिगमन पोरो आयो। सिर्फ प्रतिरोध, एकता ओसो प्रगति पोरो आधार कित्ता एकीकरणे सही एकीकरण मंता। बदे वेने बाकी रकम ता एकीकरण झूठ मंदिता।⁸ 6 साल आतांग मति इद समस्या मुन्ने बद्रम मत्तायो इंजे वेने अद्रमे मंता।

जनता किन स्वतंत्रता लेवेके जनवाद दोरकी कियवा लेवा एकीकरण किया परमूडायो? जनता किन इव रेंडासी बस्के दोरकुंग अस्के एकीकरण वेने आथार। चीनी जनता स्वतंत्रता, जनवाद ओसो गठबंधन सरकार काजे ताकी कित्ता आंदोलन संगेने एकीकरण काजे ताकी कित्ता आंदोलन वेने आंदू। माटु मना ठोस कार्यक्रम लोप्पा स्वतंत्रता, जनवाद ओसो गठबंध सरकार ता बारे ते वेल्ले मांग कु पेश कीतोम अस्के मना लक्ष्य एकीकरण

कीयाना वेने मंदिता। बस्के एवनल क्वोमिंगतांग ता जन विरोधी गुट ता तानाशाही खत्म आयो, जनवादी गठबंधन सरकार बनेमायो, अस्के एवनल सिर्फ क्वोमिंगतांग इलाकांग लोप्पाने बदे जनवादी सुधार कीयानाए आयवा अगा जापानी आक्रमणकारि किन हारे कियाला काजे सेना ओसो जनता किन गोलबंध कीयाना असंभव आयार ओसो गृहयुद्ध ता संकट ओसो उंदी बेरा पैदा आयार। बारांकु इत्तेके वेल्ले जनवादी लोकर (वीरू बदे वेने पार्टी संगे संबंध तासनोर मत्तेकाई-हिल्लेकाई, वीरा लोप्पो क्वोमिंगतांग ता बचोनो जनवादी लोकर वेने शामिल मंतोर) उंदी लेंग ते गठबंधन सरकार निल्पी कीयाना मांग किया मंतोर। इदिना कारण ओरू वर्तमान संकट तुन स्पष्ट रूप ते चीने माताद मंता ओसो ओरू इदिना पोरो काबू कीयाना दुश्मन खिलाफ एकता कीयाना ओसो राष्ट्रीय निर्माण काजे एकता कीयाना बदे दूसरा हरीं हिल्ले इंजी समझेमांतोर।

5 जन सेना

जनता ना पक्ष ते नितसी मत्ता सेना हिल्ला चीनी जनता काजे आजादी ओसो एकीकरण दोरकी कीयाना, गठबंधन सरकार बने कीयाना, जापानी आक्रमणकारि किन पूर्ण रूप ते हारेम कीयाना ओसो उंदी पूना ता निर्माण कीयाना असंभव मंता। इंजे जनता ना पूर्ण रूप ते पक्षपोषण कियान सेना सिर्फ मुक्त इलाकांग ना आठवीं राह सेना ओसो पूना चौथी सेनाए मंता। इदु हालनाचोन वेल्ले बेहरा सेना हिल्ले। मति क्वोमिंगतांग ता जन विरोधी गुट मुक्त इलाकांग ना सेनांग किन तहस-नहस कीयाना ओसो अविन किन खत्म कियाला काजे लगातार षड्यंत्र किया मंता। 1944 ते क्वोमिंगतांग सरकार मेमोरेण्डम पेश कीसि कम्युनिस्ट पार्टी किन मुक्त इलाकांग ना सशस्त्र सेना ना 4 बटा 5 हिस्सा “उंदी तय कालम लोप्पा भंग कीयाना” मांग कित्ताद मत्ता। 1945 ते इंजेने आता समझौता-वार्ता ताकनास्के अदु कम्युनिस्ट पार्टी मुक्त इलाकांग ना सब्बे सेनांग अदिना कैदे हिता पेरके क्वोमिंगतांग सरकार कम्युनिस्ट पार्टी किन “कानूनी मान्यता” हियार इंजी मांग कित्ता।

ओरू कम्युनिस्ट लोरकिन “मीवा फौज किन मावा कैदे सौपे कीमुट इंतोर, माटु मीकिन आजादी हियाकोम” इंतोर। ओरा इद सिद्धांत ता अनुसार उंदी राजनीतिक पार्टी किन तनगा तन्ना बदे सेना हिल्वेकाई अदिन किन आजादी दोरकना इंजी मंता। मति चीनी कम्युनिस्ट पार्टी 1924-27 ते, तानिगा तन्ना उंदी सुडला सेना मत्तास्केने आजादी दोरकसी मत्ता। मति अदिन किन क्वोमिंगतांग सरकार ता “पार्टी शुद्धी” ओसो कल्लेआम ता नीतिंग ना कारण ते खत्म आता। नेंडु बदे सशस्त्र सेना हिल्वा चीनी जनवादी लीग किन ओसो क्वोमिंगतांग लोप्पा मत्ता जनवादी लोकुर किन बदे आजादी दोरकताद हिल्ले। उचुन क्वोमिंगतांग शासन लोप्पा मत्ता मजदूर, किसान, विद्यार्थि, सांस्कृतिक, शैक्षणिक, औद्योगिक दुनिया ता प्रगतिशील रुझान वाले सब्बे लोकुर किने हूडाटू- हत्ता अठारह साल तल ओरा लोप्पाटल बोनगाए बदे सेना हिल्ले, ओरा लोप्पटल बोनकिने वेने आजादी दोरकताद हिल्ले। पोरो वेहत्ता सब्बे जनवादी पार्टींग ओसो जनता किन आजादी तिंची जेके तास्ता लेक्का मंता। बारांकु इत्तेके ओरू सेना किन संगठित कितोर, “सामंती पृथकतावाद” पोरो अमल कितोर, “गद्दार इलाकांग” ना स्थापना कितोर अनि “सरकारी आदेशकु फौजी आदेश” कुना उल्लंघन कितोर? कीवोर, इद्रम बिल्कुले कीवोर। इदिना उल्टा ओरू इद्रम कित्तादे हिल्ले अदिन काजेए ओरकिन आजादी तले जेक तासमूडाता।

“सेना राज्य ता मंदिता” – इदु पोल्लो निज्जमे, दुनिया ता बदे वेने सेना बदे आई राज्य ताए मंदिता। मति इदु बद रकम ता राज्य मंता? बेहरा-बेहरा जमींदार, बेहरा-बेहरा, बैंक-मालिक ओसो बेहरा-बेहरा दलाल पूंजीपतिरा सामंती, फासीवादी तानाशाही वाले राज्य लेवेके व्यापक जनता ना नवजनवादी राज्य? चीन लोप्पा सिर्फ नवजनवादी राज्यताए स्थापना आयाना, इदिना पोरो आधार आसी चीन किन उंदी नवजनवादी गठबंधन सरकार ता स्थापना क्रियाना: चीन ता सब्बे सेनांग किन इद्रम ता राज्य ता सरकार ता अधिकार लोप्पाने मंदाना, अस्केने अदु जनता ना आजादी ता रक्षा क्रिया पर्रिंता ओसो विदेशी आक्रमणकारिरा संगे कारगर

रूप ते मुकाबला किया परितो। अस्केने चीन ता मुक्त इलाकांग तन्ना सेनांग अदिन किन सौपे कियानुंग। मति इद कालम ते क्वोमिंगतांग किन वेने तन्ना पूरा सेना इदे राज्य कैदे सौपे किया लागिंता।

1924 ते डा. सुन यात-सेन इत्तोर-“नेटा दिव्या किन राष्ट्रीय क्रांति ते उंदी पूना समाज ता शुरूआत ता दिव्या इंजी मानेमायना।.....पहली कदम- जनता संगे सशस्त्र सेना ता एकता। दूसरा कदम- जनता सशस्त्र सेना ते बदलेमायना।” आठवीं राह सेना ओसो पूना चौथी सेना लेक्का इद नीति किन लागू कीयाना। ओरू “जनाता ना सशस्त्र सेना” इत्तेके जन सेना बनेमाता,अदिन काजे अविन जीत हासिल आया परता। उत्तरी अभियान ता शुरूआत ते क्वोमिंगतांग सेनांग डा. सुन यात-सेन तय कित्ता “पहली कदम” तेहता अदिन काजे अवु जीत हासिल कीतांग। उत्तरी अभियान ता आखरी ते अवु “पहली कदम” किन वेने तिलांजली हीतुंग, जन विरोधी दृष्टिबिंदु लागू कीतांग अस्केटल नेंडु एवनल अवु ज्यादा से ज्यादा भ्रष्ट ओसो खत्म आसोर दाया मंतांग: अंदरूनी युद्ध किन अवु वेल्ले बेस लड़ेमांतांग, मति बाहरी युद्ध लड़ेमायनास्के अनिवार्य रूप ते विचार हिल्ला लेक्का आंतांग। क्वोमिंगतांग सेना लोप्पाटा हर ईमानदार देशभक्त अफसर सुन यात-सेन ना भावनांग किन पुनर्जीवित कीयाना ओसो तन्ना फौज किन बदले कीयाना कार्य कीयाना।

पाड़ना सेनांग किन बदले कीयाना काम लोप्पा शिक्षित किया परना सब्बे अफसर लोर किन पूरा शिक्षित कीयाना, अस्केने ओरू तम्मा पाड़ना घिस्सेपिटे दृष्टिकोण तेल बाहर वासी सही दृष्टिकोण लागू कियाला मदद आयार ओसो इद्रम कीसि ओरू जन सेना लोप्पा शामिल आसी अदिन सेवा किया परितोर।

पूरा देश ता जनता ना कर्तव्य चीनी जनता ना सेना ता निर्माण कियाला काजे संघर्ष कीयानादु मंता। जनता नगा उंदी जन सेना हिल्लेके, तानिगा बाताले वेने हिल्ले। इदिना बारे ते झूठा सिद्धांत वेहानायो।

माटु कम्युनिस्ट लोर चीनी सेना किन बदली कीयाना काम ता समर्थन कियाला तैयार मंतोमा। आठवीं राह सेना ओसो पूना चौथी सेना

जनता संगे एकता कियाला ओसो चीन ता मुक्त इलाकांग ना विरोधी कियाना आयावा जापानी आक्रमणकारिरा विरोध कियाला तैयार मत्ता सब्बे सेनांग किन दोस्त सेना समझेमासी अविना पूरा सहायता कियाना।

6 भूमि समस्या

जापानी आक्रमणकारिर किन खत्म कियाना ओसो उंदी पूना चीन ता निर्माण कियाला काजे भूमि व्यवस्था ते सुधार कियाना ओसो किसान लोर मुक्ति दोरकी कियाना जरूरी मंता। डा. सुन यात-सेन ना “पूहतानोनके भूमि” ता स्थापना मना क्रांति ता वर्तमान कालम ते इत्तेके पूंजीवादी जनवादी मत्ता कालम ते एकदम सही मंता।

माटु इद्रम बारांकु इंतोम इत्तेके वर्तमान कालम ते मना क्रांति ता स्वरूप पूंजीवादी जनवादी मंता? इद्रम इत्तेके इद क्रांति ता निशाना साधारण रूप ते पूंजीपति वर्ग आयवा राष्ट्रीय, सामंती उत्पीड़न मंता, इद क्रांति लोप्पा माटु इस्तेमाल कियाना तरीका ना लक्ष्य साधारण रूप ते निजी सम्पत्ति किन खत्म कियाना आयवा अदिना रक्षा कियाना मंदिता। ओसो इद क्रांति ता कारण ते मजदूर वर्ग चीन किन समाजवाद बगिल ओयला काजे तन्ना सेना ता निर्माण किया परितोर, संगेने पूंजीवाद किन वेने वेल्ले लम्बा समय एवनल सही हंदी एवनल बेरसी कियाना मौका हियमूडांता। “पूहतानोनके भूमि” इत्तेके जमीन किन सामंती शोषक लोरगडल ऊंदसी किसान लोर किन सौंपे कियाना। सामंती जमींदार लोरा निजी सम्पत्ति किन किसान लोरा निजी सम्पत्ति ते बदले कियाना अनि किसान लोर किन सामंती भूमि संबध तल मुक्त कियाना। इद्रम कितेके उंदी कृषि-प्रधान देश उंदी औद्योगिक देश लेक्का बदलेमायार। इद्रमे “पूहतानोनके भूमि” ता मांग ता स्वरूप पूंजीवादी-जनवादी मंदिता सर्वहारा-समाजवादी आयो, इव सब्बे क्रांतिकारी जनवादीरा मांग आंदु, सिर्फ माटु कम्युनिस्ट लोराए आयोर। चीन ता परिस्थितिंग लोप्पा सिर्फ माटु कम्युनिस्ट लोकरे इद मांग किन विशेष गंभीरता ते एतितोम, इदिना बारे ते सिर्फ पोल्लोंगे कीवोम आंतोम अदिन किन अमल वेने कीतोमा

जनवादीर ओसो मावा नडमा इदे फर्क मंदिता। क्रांतिकारी जनवादीर बोरु आंदुर? सर्वहारा वर्ग आयवा सबसे ज्यादा क्रांतिकारी जनवादी मत्ता किसान लोकुरे क्रांतिकारी जनवादीर सबसे बेहरा समूह मत्ता। सामंती पृष्ठभूमि मत्ता धनी किसान लोर किन विडचसी, किसान लोरा बेहरा संख्या सक्रियता ते “पूहतानोनके भूमि” ता मांग कींता। शहर ते मंदान निम्न-पूजीपति वर्ग ता लोकुर वेने क्रांतिकारी जनवादी मंतोर ओसो “पूहतानोनेक भूमि” ता मांग ओरा काजे वेने फायदा ता मंदिता। बारांकु इत्तेके कृषि क्षेत्र ते उत्पादन ताकत कुना विकास लोप्पा मदद आंता। राष्ट्रीय पूजीपति वर्ग उंदी दुलमुल वर्ग आंदू। अदु हाटुम ता जरूरत हूडसी “पूहतानोनके भूमि” ता मांग किन मंजूर कींता। मति इद वर्ग ता वेने वेल्ले लोकुर इद नारा हियाला वेरियंतोर बारांकु इत्तेके वीरा लोप्पाटल वेल्ले लोकुरा भूमि सम्पत्ति संगे संबंध मंदिता। डा. सुन यात-सेन चीन ता सबसे पहली क्रांतिकारी जनवादी मत्तोर। राष्ट्रीय पूजीपति वर्ग ओसो किसान लोरा प्रतिनिधित्व किसोरे, ओरू सशस्त्र क्रांति कितोर अनि “जमीन ता मालिका अधिकार ता समानीकरण” ओसो “पूहतानोनके भूमि” ता स्थापना कितोर। मति सत्ता ओरा कैदे मत्तास्के ओरू पहलकदमी कीसि भूमि-व्यवस्था लोप्पा सुधार कित्ताद हिल्ले। क्वोमिंगतांग ता जन विरोधी गुट सत्ता ते वात्तास्के अदु पूराए डा. सुन यात-सेन ना स्थापनांग संगे विश्वासघात कित्ता। इदे गुट नेंडु वेल्ले जिद्द संगे “पूहतानोनके भूमि” मांग ता विरोध किया मंता। बारांकु इत्तेके इदु बेहरा-बेहरा जमींदा, बेहरा-बेहरा बैंक-मालिक ओसो बेहरा-बेहरा दलाल-पूजीपतिरा समूह ता प्रतिनिधित्व कींता। चीन लोप्पा सिर्फ किसान लोरा प्रतिनिधित्व कीयाना बदे राजनीतिक पार्टी हिल्ले। राष्ट्रीय पूजीपति वर्ग ता राजनीतिक पार्टिंग लोप्पा भूमि संबंधित बदे सही कार्यक्रम हिल्ले। अदिन काजे सिर्फ चीनी कम्युनिस्ट पार्टीए भूमि संबंधित उंदी कार्यक्रम बने कित्ता ओसो ताना पोरो अमल कित्ता। किसान लोरा अधिकार काजे ईमानादारी ते संघर्ष कित्ता अदिन काजे किसान लोरा बेहरा संख्या किन महान एकताकारी ता रूप ते

तन्ना पक्ष ते कित्ता, किसान ओसो बाकी सब्बे क्रांतिकारी जनवादिरा नेता बने माता।

1927 तल 1936 एवनल चीनी कम्युनिस्ट पार्टी भूमि-व्यवस्था ते सुधार कियाला काजे बचोनो कदम तेहता ओसो डा. सुन यात-सेन ना “पूहतानोनके भूमि” ता नारा किन लागू कित्ता। इदु क्वोमिंगतांग ता जन विरोधी गुटे डा. सुन यात-सेन ना इदा नारा संगे विश्वासघात कित्ता। अनि डुव्वल लेक्का पलकु ओसो पंजांग तोहचोरे दस साल एवनल “पूहतानोरके भूमि” नारा ता खिलाफ जन विरोधी युद्ध कित्ता।

चीनी कम्युनिस्ट पार्टी जापानी आक्रमण विरोधी युद्ध कालम ते “पूहतानोरके भूमि” नीति ता जागा ते लगान ओसो सूद कम कीयाना नीति लागू कीसि वेल्ले बेहरा छूट हिता। इदु छूट उंदी सही छूट मत्ता बारांकु इत्तेके इदिनगडल क्वोमिंगतांग किन प्रतिरोध युद्ध लोप्पा तत्ताला मदद दोरकता, ओसो मुक्त इलाकांग लोप्पा युद्ध काजे माटु किसान लोर किन गोलबंद कीयानास्के जमींदार लोरा प्रतिरोध लोप्पा वेने कमी वात्ता। बदे विशेष बाधा पुटवेके माटु युद्ध पेरके वेने इद नीति किन जारी तासला तैयार मंतोम, मुन्ने लगान ओसो सूद कम कीयाना नीति किन पूरा देश लोप्पा फैलेकियाकोम ओसो ताना पेरके “पूहतानोरके भूमि” ता नीति किन लागू कियाला काजे तीरम-तीर सही तरिकांग लागू कियाकोम।

मति डा. सुन यात-सेन संगे विश्वासघात कितोर किन, “पूहतानोरके भूमि” ता मांग किने आयवा ओरू लगान ओसो सूद कम कीयाना नीति ता वेने विरोध कींतोर। क्वोमिंगतांग सरकार “लगा लोप्पा 25 प्रतिशत कमी कीयाना” आदेश ओसो इद्रम ताए खदु जारी कित्ता बाकी आदेश कुन वेने लागू कीवो। सिर्फ माटे मुक्त इलाकांग लोप्पा अविन लागू कीतोम, इद गलती काजे मुक्त इलाकांग पोरो “गद्दार इलाका” ता लेबल वाटताद मंता।

जापानी आक्रमण विरोधी युद्ध कालम ते रेंडु मंजिल- उंदी “राष्ट्रीय क्रांति” ता मंजिल ओसो दूसरा, “जनवाद ओसो जनजीविका काजे क्रांति” ता मंजिल ता सिद्धांत मुन्ने वात्ता मति इद सिद्धांत गलत मंता।

“उंदी जबरदस्त दुश्मन ता मुकाबला आतास्के माटु जनवादी सुधार लेवेके जनजीविका ता सवाल तेहानायो, माटु बस्के एवनल जापानी आक्रमणकारि देश तल बाहर पूंडमूडायो अस्के एवनल हरीं हूडानदु बेस आयार” इंदाना अंगडम ता सिद्धांत क्वोमिंगतांग ता जव विरोधी गुट युद्ध लोप्प जीत हासिल कीयाना तुकू रोमी कियाला काजे पेश कीता। इद्रम कीतेकाई उचुन मुल इद सिद्धांत किन पोयसी ताकींतोर अनि अदिना गुलाम बनेमांतोर।

“उंदी जबरदस्त दुश्मन ता मुकाबला आतेके, माटु बस्के एवनल जनवाद ओसो जनजीविका ता सवाल किन हल किवोम अस्के एवनल मना काजे जापानी आक्रमणकारिरा खिलाफ आधार-इलाकांग ना निर्माण कीयाना ओसो ओरा हमलांग ना प्रतिरोध कीयाना असंभव मंता।” इदु पोल्लो चीनी कम्युनिस्ट पार्टी वेहिंता ओसो बारांकु इत्तेके अदु इदिना पोरो अमल कित्ता ओसो जबरदस्त सफलता वेने दोरकी कित्ता।

जापानी आक्रमण विरोधी युद्ध कालम ते लगान ओसो सूद कम कीयाना ओसो दूसरा जनवादी सुधार कीयाना, इव सब्बे काम प्रतिरोध युद्ध काजे फायदा तवु मंतांग। युद्ध कीयाना कोशिश ते जर्मीदार लोरा प्रतिरोध किन कम कियाला काजे माटु जमीन ता मालिकाना अधिकार किन खत्म कीवोम आंतोम, सिर्फ लगान ओसो सून किने कम कीतांद मंता, संगेने ओरू तम्मा पूंजी किन उद्योग कुना लोप्पा वाटना प्रात्साहित कित्ताद मंता। जागृत शरीफजादा लोर किन वेने जनता ओसो बाकी प्रतिनिधिरा संगे-संगे प्रतिरोध युद्ध काजे सार्वजनिक गतिविधिग ओसो सरकारी काम लोप्पा हिस्सा एतना इंजी मौका हित्ताद मंता। धनी किसान लोर किन उत्पादन बेरसी कियाला प्रोत्साहन हित्ताद मंता। सब्बे इलाकांग लोप्पा जनवादी सुधार कीयाना अविचल कार्यदिशा ता हिस्सा लगातार मंदाना जरूरत मंता।

इगा रेंडु कार्यदिशांग मंतांग। उंदी चीनी किसान जनवाद ओसो जनजीविका संबंधित समस्यांग किन हल कियाला काजे कीयाना कोशिश कुना कड़ा विरोध कीयाना। भ्रष्ट, प्रभावहीन ओसो जापान ता मुकाबला

कियाला इनपडे तैयार आयनायो। लेवेके दृढजता ते चीनी किसान लोर किन ओरा कोशिश कुना लोप्पा मदद हियाना ओसो आबादी ता 80 प्रतिशत हिस्सा किन तम्मा सबसे महान एकताकारी बने कीयाना। इद्रमे तन्ना बेहरा जुझारू शक्ति किन वेल्ले मजबूत कीयाना। पहली कार्यदिशा क्वोमिंगतांग सरकार ता मंता ओसो दूसरा कार्यदिशा चीन ता मुक्त इलाका ना कार्यदिशा मंता।

अवसरवादिरा कार्यदिशा इव रेंडासी ना नड़मा डुलमुल मंदाना इत्तेके तोड्डी किसान लोरा समर्थन कीयानादु वेहिंता, मति लगान ओसो सूद कीयाना, किसान लोर किन हथियारबंद कियाला ओसो ग्रामीण इलाकांग लोप्पा जनवादी राजनीतिक सत्ता स्थापना कीयाना ता विरोध कीयाना बगिल मंदिता।

तनगा मत्ता सब्बे ताकत कुना इस्तेमाल कीसि क्वोमिंगतांग ता जन विरोधी गुट चीनी कम्युनिस्ट पार्टी किन खुल्लमखुल्ला ओसो गुप्त सैनिक ओसो राजनीतिक, नेत्तुर पोहना ओसो नेत्तुर पोहवा हमलांग ना निशाना बने कित्ता। सामाजिक स्वरूप ता दृष्टि ते रेंडासी पार्टिंग नड़मा इदु विवाद ग्रामीण समस्यांग कुना संगे संबंध तासिंता। असल इत्तेके क्वोमिंगतांग ता जन विरोधी गुट किन माटु बेगा नुकसान कीतोम? इदिना पोरो ने अदिन किन नुकसान कित्ताद हिल्लेया? इदु समस्या क्वोमिंगतांग ता जन विरोधी गुट जापानी आक्रमणकारि किन वेल्ले सहायता हीसी ओरा सहायक बनेमाताद हिल्ले या, अदु ओरगडल प्रोत्साहन दोरकी कित्ताद हिल्ले या? चीनी कम्युनिस्ट पार्टी पोरो “प्रतिरोध युध ते तोड़फोड़ कीयाना ओसो राज्य काजे खतरा पैदा कीयाना”, “गद्दार पार्टी”, “गद्दार सेना”, “गद्दार इलाका” ओसो “सरकारी आदेश, फौजी आदेश कुन नजरअंदाज” कीयाना आरोप सिर्फ नीति लोप्पा सही राष्ट्र-हित किन ध्यान ते तसिसी ईमानदारी ते काम कीतांकु वाटताद मंता इंदानदु सही हिल्ले या?

वीर किसान लोर चीन ता औद्योगिक मजदूर लोरा स्रोत आंदूरा वायना कालम ते करोड़ों किसान लोर शहर ते वायनुर, कारखानांग लोप्पा काम कियानुर। चीन लोप्पा शक्तिशाली राष्ट्रीय उद्योग ओसो बचोनो बेहरा

आधुनिक शहर कुना स्थापना कित्तेके ग्रामवासिर नगरवासिर लेक्का बनेमायना उंदी लम्बा प्रक्रिया तल वेंडा लागियर।

किसान लोरे चीन ते औद्यागिक उत्पादन कुना मुख्य हाटुम आंदुर। सिर्फ किसान लोरे खाद्यन्ना ओसो कच्चा माल ज्यादा से ज्यादा सप्लाई किया परितोर ओसो ज्यादा से ज्यादा तैयार माल खपत किया परितोर।

किसान लोरे चीनी सेना ता स्रोत आंदुर। मना सैनिक असल इत्तेके जापानी आक्रमणकरारिरा जानी दुश्मन बनेमासी मत्ता फौजी लोर किसान लोरे आंदुर।

किसान लोरे वर्तमान मंजिल ते चीन लोप्पा जनवाद दोरकी कियाला काजे मुख्य राजनीतिक शक्ति आंदुर। चीन ता जनवादी लोकुर बस्के एवनल 36 करोड़ किसान लोरा समर्थन दोरकी अस्के एवनल बाताले दोरकी किया परवोर।

किसान लोराए वर्तमान मंजिल ते चीन ता संस्कृतिक आंदोलन संगे मुख्य संबंध मंदिता। 36 करोड़ किसान लोर किन विडसतेके “अनपढ़ता किन खत्म कीयाना”, “शिक्षा ता प्रचार-प्रसार कीयाना”, “कला-साहित्य ता निर्माण काजे”, “सार्वजनिक स्वास्थ्य” लेक्कटा ज्यादातर पोल्लोंग अंगडम आयो या?

बाकी 9 करोड़ जनता ना राजनीतिक, आर्थिक ओसो सांस्कृतिक महत्व किन नजरअंदाज कीवो ओसो राजनीतिक रूप ते सबसे ज्यादा जागरूक मत्ता मजदूर वर्ग आंदू अदिन काजे पूरा क्रांतिकारी आंदोलन ता नेतृत्व कीयाना लेक्का मंता इंजी इंतोर। इदिना बारे ते बदे गलत समझदारी मंदानायो।

इव पोल्लोंग किन बेस समझेमायना जरूरत सिर्फ चीनी कम्युनिस्ट पार्टी किने आयवा चीन ता सब्बे जनवादी लोकुरा काजे वेने वेल्ले जरूरी मंता।

बस्के ने भूमि व्यवस्था ते सुधार कित्तेके, बस्केने लगान ओसो सूद कम कीयाना लेक्काट शुरूआती सुधार वेने कित्तेके किसान लोर उत्पादन काम ते मुन्ने तूक ज्यादा रुचि तासिंतोर। ताना पेरके किसान लोर तम्मा

मर्जी ते तीरम-तीरम कृषि सहाकरी समितिंग ओसो बाकी सहकारी समितिंग बने कियाला मदद किया लागियर अस्के उत्पादन शक्ति बेरसियार। कृषि सहाकरी समितिंग इंजे सिर्फ सामूहिक ओसो परस्पर सहायता कीयाना श्रम संगठन कुनाए रूप एता परितांगा। इवु व्यक्तिगत किसान अर्थव्यवस्था (किसान लोरा निजी मालिकाना) पोरो आधार आसी मंदितांग-श्रम-विनिमय दल, आपसी सहायता दल ओसो कार्य-विनिमय ग्रूप लेक्का, इद्रम मत्तेकाई श्रम-उत्पादन ओसो उत्पादन लोप्पा आश्चर्य रूप ते विकास आता। चीन ता मुक्त इलाकांग लोप्पा इद्रम संगठन कु व्यापक रूप ते विकास कित्ताद मंता। वायना कालम ते इविना परताचोम ज्यादा प्रचार कियमूड़ायार।

इगा श्रम-विनिमय दल ता लेक्कटा सहकारी संगठन किसान लोरा लोप्पा वेल्ले कालम तिंची ताकसोर वाया मंतांग, मति हत्ता कालम ते अविन किसान लोर तम्मा रोज ता पिस्वल किन सुधरे कीयाना साधन ता रूप ते इस्तेमाल कित्ताद हिल्ले। नेंडु चीन ता मुक्त इलाकांग ना श्रम-विनिमय दल तम्मा बाहरी रूप ओसो अंदरूनी रूप रेंडासी ना दृष्टि ते हत्ता कालम ता श्रम-विनिमय दल तुकु अलग मंता। इव उंदी साधन लेक्का बनेमातांग इविना संगे किसान लोर उत्पादन लोप्पा विकास कींतोर ओसो बेसता पिस्वल पिस्सला कोशिश कींतोर।

आखरी ते बदे वने चीनी राजनीतिक पार्टी ता नीति अदिना व्यवहार ता जनता पोरो सही-गलत, कम-ज्यादा प्रभाव अरतादु- जनता ना उत्पादन शक्तिंग किन विकसित कीयाना लोप्पा सहायता कींता या कीवो, बचोन सहायता कींता लेवेके शक्तिंग किन संकल संगे दोहिंता या लेवेके मुक्त कींता इंदा पोल्लो पोरो आधार आसी निर्णय आंता। चीन ता सामाजिक उत्पादन शक्ति किन सिर्फ जापानी आक्रमणकारिर किन खत्म कीसि, भूमि-सुधार किन लागू कीसि, किसान लोर किन मुक्त कीसि, आधुनिक उद्योग कुना विकास कीसि ओसो उंदी स्वाधीन, स्वतंत्र, जनवादी, एकीकृत, समृद्ध ओसो शक्तिशाली पूना चीन ता स्थापना कीसिए मुक्त किया परमूड़ांता। इदिन किने चीनी जनता ना समर्थन दोरकियार।

इगा ग्रामीण इलाकाने काम कियाला वायना शहरी बुद्धिजीविरा बारे ते वेने वेहतेके बेस आयारा। ग्रामीण इलाका ना विशेषतांग किन समझेमायनादु हल्को हिल्ले, इतेके ग्रामीण इलाकांग इंजे वेने बिखरेमासी मंतांग, पेरेके अरसी मंतांग, व्यक्तिगत अर्थव्यवस्था पोरो आधार आसी मंतांग। इदे आयवा मुक्त इलाकांग किन दुश्मन तोर अस्थाई रूप ते उंदी-दूसरा तल अलग कीसितोर। इव इलाकांग इंजे छापामार युद्ध किया मंतांग। इव सब्बे विशेषतांग किन समझेमायवा मंदानादिना कारण ओरू हमेशा ग्रामीण इलाका ना समस्यांग ओसो ग्रामीण काम किन गलत तरीका ते शहरी जिंदगी ओसो काम ता दृष्टि ते समझेमाया ओसो हल कीयाना कोशिश कींतोर। अद्रमासी ओरू तम्मा किन ग्रामीण पिस्वल ता सच्चाई तिंची अलग कींतोर अनि किसान लोरा संगे कलिया परवोर आंतोर। इद कमी किन शिक्षा संगेने पूरा कीयाना जरूरी मंता।

चीन ता गिनती हिल्लाचोन क्रांतिकारी बुद्धिजीविर किन किसान लोरा संगे कलियसी पिस्वल पिस्सना इंजी जागरूक कीयाना जरूरत मंता। किसान लोर ओरा जरूरत मंता ओसो ओरू ओरा सहायता काजे हरी हूडा मंतोर। ओरू गिर्दा ते नाहकुने दायना, विद्यार्थिरा ड्रेस कुड़िहची वाटसियाना अनि कामरा लेक्का मत्ता ड्रेस करना अनि बदे वेने काम इतेके सुडला आई बेहराई काम कीयाना शुरू कीयाना। ओरू किसान लोरकिन बाता पाहिजे इंजी समझेमायना अनि चीन ता जनवादी क्रांति ता वेल्ले महत्वपूर्ण कार्य मत्ता जनवादी क्रांति किन ग्रामीण इलाकांग लोप्पा पूरा कीयाना संघर्ष ते किसान लोर किन जागृत कीयाना ओसो संगठित कियाला मदद कीयाना।

जापानी आक्रमणकारिर किन नष्ट कित्ता पेरेके माटु ओरा संगे मुख्य चीनी गद्दार लोर कब्जा कित्ता जमीन किन जब्त कीयाना ओसो कम जमीन मंदानोर लेवेके भूमिहीन किसान लोरा लोप्पा तूसना।

7 उद्योग कुना समस्या

जापानी आक्रमणकारीर किन हारे कीसि पूना चीन ता निर्माण कियाला काजे उद्योग कुना विकासा कीयाना जरूरत मंता। मति क्वोमिंगतांग सरकार ता शासन ते हर चीज काजे विदेश पोरो निर्भर आसी मंदा लागिंता। अदिन वित्तीय नीति, आर्थिक नीति जनता ना आर्थिक पिस्वल किन बरबाद किया मंता। सिर्फ उचुके सुडला उद्योगिक कारोबार क्वोमिंगतांग इलाकांग लोप्पा मंतांग, अविना लोप्पा ज्यादातर कारोबार ठप आताद मंता लेवेके पूराए खत्म आताद मंता। राजनीतिक सुधार कुना कमी मत्तांकु सब्बे उत्पादन शक्तिंग नष्ट आया मंतांग, इदु पोल्लो कृषि ओसो उद्योग रेंडासी ना लोप्पा लागू आंता।

कुलमिले कीसि बस्के एवनल चीनी उंदी स्वाधीन, स्वतंत्र, जनवादी ओसो एकीकृत राष्ट्र बनेमायो अस्के एवनल उद्योग कुना विकास कीयाना असंभव मंता। जापानी आक्रमणकारि किन खत्म कीयाना इत्तेके स्वाधीनता दोरकी कीयाना आंदू। क्वोमिंगतांग ता एकदलीय तानाशाही किन खत्म कीयाना उंदी जनवादी ओसो एकीकृत गठबंधन सरकार बने कीयाना, चीन ता सब्बे फौज किन जनता ना सशस्त्र सेना ते बदले कीयाना, भूमि सुधार ता काम कीसि किसान लोरिन मुक्त कीयाना इत्तेके स्वतंत्रता, जनवाद ओसो एकीकरण दोरकी कीयाना आंदू। स्वाधीनता, स्वतंत्रता, जनवाद ओसो एकीकरण लेवा सही ओसो बेहरा स्तर ते उद्योग कुना स्थापना कीयाना असंभव मंता। उद्योग कु हिल्वेके सुदृढ़ राष्ट्रीय प्रतिरक्षा आया परवो, जनता ना रहन-सहन ते सुधार आया परवो ओसो राष्ट्र किन समृद्ध ओसो शक्तिशाली बने किया परमूडायो। 1840 ते अफीम-युद्ध परेके 105 साल ओसो खासकर क्वोमिंगतांग सत्ता ते वात्ता परेकेटा 18 साल कुना इतिहास इद महत्वपूर्ण पोल्लो किन चीनी जनता ना मुन्ने पूराए स्पष्ट कित्ता। उंदी कमजोर, गरीब चीन आयवा समृद्ध ओसो शक्तिशाली चीन मंदाना, इत्तेके उंदी औपनिवेशिक लेवेके अर्ध औपनिवेशिक चीन आयवा उंदी स्वाधीन चीन मंदाना। अर्ध सामंती आयवा स्वतंत्र ओसो जनवाद चीन मंदाना, अलग-अलग आसी मत्तादु आयवा एकीकृत आसी मत्ता

चीन मंदाना अर्ध-औपनिवेशिक, अर्ध सामंती ओसो अलग-अलग आसी मत्ता चीन लोप्पा वेल्ले लोकुर वेल्ले सालकुनल औद्योगिक विकास, राष्ट्रीय प्रतिरक्षा ता निर्माण ओसो जन कल्याण, समृद्ध, शक्तिशाली राष्ट्र काजे कंजका मंतोर। मति ओरांग सब्बे कंजकडकु डुंडुल आया मंतांगा वेल्ले बेसता शिक्षक लोर, वैज्ञानिक, विद्यार्थिर तम्माए काम ते ओसो अध्ययन किया मंतोर ओरू राजनीति ते बदे गिर्दा तोहताद हिल्ले, वीरू तम्मा ज्ञान संगे देश ता सेवा किया परितोर इंजी आलसतोर मति इदु वेने उंदी कंजकड लेक्काने आता, अद्रमासी ओरा सब्बे कंजकडकु डुंडु बनेमातांगा निज्जमे इदु वेल्ले बेसता पोल्लो ता निशानी आंदू, बारांकु इत्तेके इव अंगडमता कंजकडकुना गुंडा पोयनदु चीन ता समृद्ध ओसो शक्तिशाली बनेमायना हरदे मुन्ने दायनादिना शुरूआत आंदू। चीनी जनता प्रतिरोध युद्ध लोप्पा वेल्ले पोल्लोंग करियाता। अदु जापानी आक्रमणकारिर किन हारे कित्ता पेरके उंदी नवजनवादी चीन ता निर्माण कीयाना इंजी बेसे पुत्ता। ताना लोप्पा स्वाधीनता, स्वतंत्रता, जनवाद, एकीकरण, समृद्ध ओसो शक्ति सब्बे मंदितांग, इव सब्बे उंदी दूसरा संगे जुड़ेमासी ओसो अनिवार्य मंदितांग। चीनी जनता इद्रम कित्तेके चीन ता वायना कालम वेहच ते मंदियार। पूरा चीन लोप्पा नवजनवादी राजनीतिक व्यवस्था स्थापित आता पेरके ने चीनी जनता लोप्पा मत्ता उत्पादक शक्तिंग बंधन मुक्त आयनुंग ओसो अविना परताचोन विकास आयारा ज्यादा से ज्यादा लेकुर हर दिया इद पोल्लो किन समझेमासोर दाया मंतोर।

नवजनवादी राजनीतिक व्यवस्था स्थापित आतेके चीनी जनता ओसो अदिन सारा किन बचोनो साल एवनल तीरम-तीरम सुडला-बेहरा उद्योग कुना निर्माण कियाला काजे ओसो चीन किन उंदी कृषि प्रधान देश तल उंदी औद्योगिक देश बने कियाला काजे व्यवहारिक कदम तेहा लागियर। नवजनवाद वाले राज्य कुन बस्के एवनल ठोस अर्थ व्यवस्था पोरो आधार आयोंग, अविनगा बेसता कृषि व्यवस्था मन्नो आंता अविना राष्ट्रीय अर्थव्यवस्था लोप्पा प्रमुख स्थान मत्ता ओसो तम्मा मारवाचोन

संचार, वाणिज्य ओसो वित्त संगे भरपूर मत्ता बेहरा स्तर ता उद्योग मन्नो आंता अस्के एवनल सुदृढ़ ने किया परमूड़ायो।

माटु कम्युनिस्ट लोर इद उद्देश्य किन पूरा कियाला काजे देशमेटा सब्बे जनवादी पार्टिंग ओसो औद्योगिक दुनिया संगे कलियसी संघर्ष कियाला तैयार मंतोमा इद जिम्मेदारी किन पूरा कियाला चीनी मजदूर वर्ग उंदी महान भूमिका निभे कींता।

पहली विश्व युद्ध तले चीनी मजदूर लोर जागरूक आसी चीन ता स्वाधीनता ओसो मुक्ति काजे संघर्ष कितोर। 1921 ते मजदूर वर्ग ता हिरावल दस्ता चीनी कम्युनिस्ट पार्टी पुटता। ताना पेरके चीन ता मुक्ति संघर उंदी पूना मंजिल ते एवता। उत्तरी अभियान, भूमि-क्रांति युद्ध ओसो जापानी आक्रमण विरोधी युद्ध इव मूंडासी कालम कुना लोप्पा चीनी मजदूर वर्ग ओसो चीनी कम्युनिस्ट पार्टी चीनी जनता ना मुक्ति काजे वेल्ल मेहनत ते काम कित्ता अनि ताना बहुमूल्य योगदान हिता। जापानी आक्रमणकारीर किन आखरी हार तीहाला काजे संघर्ष लोप्पा (विशेष रूप ते बेहरा शहरकु ओसो महत्वपूर्ण संचार-पंक्ति(कम्युनिकेशन लाईन) किन दुश्मन तल वापिस पोय्यना संघर्ष लोप्पा) चीनी मजदूर वर्ग उंदी वेल्ले महत्वपूर्ण भूमिका निभे कींता। जापानी आक्रमण विरोधी युद्ध पेरके चीनी मजदूर वर्ग ता कोशिशकु ओसो अदिना योगदान ओसो ज्यादा महत्वपूर्ण मंदियार इंजी मुन्ने वेहा परंतोमा। चीनी मजदूर वर्ग ता काम सिर्फ उंदी नवजनवादी राज्य ता स्थापना कियाला काजे संघर्ष कीयानादे आयो, अदिन काम चीन ता औद्योगीकरण कीयाना ओसो अदिन कृषि ता आधुनिकीकरण कियाला काजे वेने संघर्ष किया लागिता।

श्रम ओसो पूंजी ता हित किन काल्पना नीति नवजनवाद वाले राज्य व्यवस्था लोप्पा लागू आयार। उंदी बगिल इद नीति मजदूर लोरा हित कुना रक्षा कियार, परिस्थिति ता अनुसार 8 तल 10 घंटांग काम ता दिव्यांग मंदाना इंजी नियम बने कियार, बरोजगार लोर किन आराम हियाला काजे ओसो सामाजिक बीमा कीयाना व्यवस्था कियार ओसो ट्रेड यूनियन अधिकारकुना रक्षा कियार। दूसरा बगिल इद नीति सही तरीका ते

संचालित कीयाना राजकीय, निजी ओसो सहकारी कारोबार कुन न्यायपूर्वक मुनाफा ता गारंटी कियार। अस्केने सार्वजनिक ओसो निजी क्षेत्र लोप्पा श्रम ओसो पूंजी रेंडासी कलियसी औद्योगिक उत्पादन ता विकास कीयाना कोशिश किया परितंगा।

जापान ता हार पेरके जापानी आक्रमणकारिर ओसो मुख्य चीनी गद्दार लोर चीन ते मत्ता सब्बे कारोबार ओसो ओरा पूरा सम्पत्ति किन जब्त कीसि सरकार किन सौपे कियमूझायर।

8 संस्कृति, शिक्षा ओसो बुद्धिजीविरा समस्यांग

विदेशी ओसो सामंती उत्पीड़न संगे चीनी जनता पोरो वाटता मुश्किल कु मना राष्ट्रीय संस्कृति किन वेने नुकसान कीतांगा। प्रगतिशील सांस्कृतिक, शैक्षणिक संस्थांग ओसो प्रगतिशील सांस्कृतिक कार्यकर्ता, शिक्षक लोर इदिना शिकार आतोर। विदेशी ओसो सामंती उत्पीड़न किन खत्म कीयाना ओसो उंदी नवजनवादी चीन ता निर्माण कियाला काजे माटु जनता काजे बेहरा संख्या ते शिक्षाक, अध्यापक, जनसेवी वैज्ञानिक, इंजीनियर, तकनीशियन, डॉक्टर, पत्रकार, लेखक लोर, साहित्यकार, कलाकार ओसो साधारण सांस्कृतिक कार्यकर्ता लोरा जरूरत मंता। ओरा लोप्पा जनसेवा ता भावना निंडसी मंदाना ओसो ओरू कठीन परिश्रम कियाला तैयार मंदाना। सब्बे बुद्धिजीविरा सम्मान कीयाना ओसो ओरकिन बहुमूल्य राष्ट्रीय ओसो सामाजिक सम्पत्ति समझेमायना, मति ओरू जनता ना बेस सेवा किसोर मंदाना। बुद्धिजीविरा समस्या चीन लोप्पो वेल्ले महत्वपूर्ण मंता बारांकु इत्तेके विदेशी ओसो सामंती उत्पीड़न ता कारण ते सांस्कृतिक रूप ते पेरके अरसी मंता ओसो जनता ना मुक्त संघर्ष लोप्पा बुद्धिजीविरा फौजी जरूरत मंता। व्यापाक क्रांतिकारी बुद्धिजीविर जनता ना पेरके अर्ता अर्ध-शताब्दी ता मुक्ति संघर्ष लोप्पा, 4 मई 1919 ता आंदोलन तल पोयसी बचोनो संघर्ष कुना लोप्पा ओसो 8 साल कुना जापानी आक्रमण विरोधी युद्ध लोप्पा वेल्ले महत्वपूर्ण भूमिका निभे कित्ता। मुन्ने वायना संघर्ष ते इदिनकु वेने ज्यादा महत्वपूर्ण भूमिक निभे

कियानूर। अदिन काजे जन सरकार ता काम जनता ना लाईन ते हर रकम ता बौद्धिक कार्यकर्ता लोर किन योजनाबद्ध रूप ते ओसो तैयार कीयाना ओसो संगेने इंजे मत्ता सब्बे उपयोगी बुद्धिजीविरा संगे एकता कीयाना ओरकिन पुनर्शिक्षित कीयाना काम पोरो ध्यान हियाना मंता।

80 प्रतिशत आबादी ता अनपढ़ता किन दूर कीयाना पूना चीन निर्माण कियाला काजे सही ओसो सुदृढ़ कदम तेहाना।

जनता लोप्पा फैलेमाता स्थानीय ओसो दूसरा बीमारिंग किन रोमी कीयाना ओसो इलाज कियाला काजे जोरदार कोशिश कीयाना। जनता ना चिकित्सा स्वास्थ्य सेवा ना प्रचार कीयाना।

पाड़ना रकम ता सांस्कृतिक, शैक्षणिक कार्यकर्ता लोर ओसो डाक्टर लोर किन पूर्ण रूप ते पुनर्शिक्षित कीयाना, अस्केने ओरू जनता ना सेवा कियाला काजे पूना दृष्टिकोण ओसो पूना तरीका किन लागू कियानूर।

चीनी जनता ना संस्कृति, शिक्षा ता स्वरूप नवजनवादी मंदाना, इत्के चीन तन्ना पूना राष्ट्रीय, वैज्ञानिक, जन संस्कृति, शिक्षा ता स्थापना कीयाना।

विदेशी संस्कृति काजे तन्ना कीवाड़ केहना गलत आयार, ओसो ताना लोप्पा मत्ता प्रगतिशील पोल्लोंग किन परचोन चीन ता पूना संस्कृति लोप्पा लागू कीयाना वेने गलत आयार। इदिना उल्टा चीन जनता ना वास्तविक जरूरत किन पूरा कियालाकाजे अदिना गुण-दोष विवेचन कीसिए अदिन लागू कीयाना। सोवियत संघ लोप्पा निर्माण कित्ता पूना संस्कृति किन मना जन संस्कृति ता निर्माण कीयाना ता नमूना समझेमायना। अद्रमे प्राचीन चीनी संस्कृति ता वेने पूराए त्याग कीयानायो ओसो आल्सवा अदिन लागू वेने कीयानायो। अदिना लोप्पा सही-गलत ता जांच कित्ता पेरके ने लागू कीयाना, इद्रम कीसि चीन ता पूना संस्कृति ता प्रगति लोप्पा मदद आंता।

9 अल्पसंख्यक जातिंग ना समस्यांग

क्वोमिंगतांग जन विरोधी गुट चीन लोप्पा वेल्ले जातिंग मंतांग इंदाना पोल्लो किन मानेमासोर हिल्ले, अदु हान जाति किन विडचसी बाकी सब्बे जातिंग किन “कबीला” पोरोल हींता।¹⁰ अल्पसंख्यक जातिंग ना बारे ते इद गुट छिंग वंश ओसो उत्तरी युद्ध-सरदार लोरा सरकार ता प्रतिक्रियावादी नीति किने लागू कित्ता अनि हर रकम ता उत्पीडन ओसो शोषण किया मंता। 1943 ते इखचओ लीग लोप्पा मंगोल जाति ता लोकुरा कल्लेआम, 1944 तल नेंड एवनल सिनच्यांग ता अल्पसंख्यक जातिंग ना सशस्त्र दमन ओसो इंजेटा उचुक साल कुना लोप्पा कानसू प्रान्त ते ह्वेइ जाति ता लोकुरा कल्लेआम कु इदिना उदाहरणकु मंतांग। इव सब्बे हान-शोविनिज्म पोरो आधार आसी गलत विचारधारा ओसो गलत नीति ता कारण ते आतांग।

1924 ते क्वोमिंगतांग ता पहली राष्ट्रीय कांग्रेस ता घोषणापत्र ते डा. सुन यात-सेन रासिस मत्तोर- “क्वोमिंगतांग ता राष्ट्रवादी नियम ता रेंडु अर्थ मंता, पहली चीनी राष्ट्र ता मुक्ति ओसो दूसरा, चीन ते मंदाना सब्बे जातिंग ना समानता” ओसो “क्वोमिंगतांग गंभीरतापूर्वक चीन ते मंदाना सब्बे जातिंग ना आत्म-निर्णय आधिकार किन मानेमांता ओसो साम्राज्यवाद विरोधी, युद्ध-सरदार विरोधी क्रांति ता जीत आता पेरके उंदी स्वतंत्र संघ ता स्थापना कियमूडायर इंजी ऐलान कींता।”

जातिंग ना बारे ते डा. सुन यात-सेन ना पोरो वेहत्ता जाति नीति तल चीनी कम्युनिस्ट पार्टी पूराए सहमत मंता। कम्युनिस्ट लोर इद उद्देश्य किन पूरा कियाला काजे सब्बे अल्पसंख्यक जातिंग ना जनता कीयाना संघर्ष कुना लोप्पा सक्रियता ते सहायता कीयाना। सब्बे अल्पसंख्यत जातिंग ना जनता ओसो जनता संगे गहरा संबंध मत्ता सब्बे नेता लोर राजनीतिक, आर्थिक, सांस्कृतिक आजादी ओसो विकस काजे कीयाना संघर्ष कुना लोप्पा मदद कीयाना। जनता ना अधिकार कुना रक्षा कियाला काजे ओरा सेनांग बने कियाला मदद कीयाना। ओरा बोली, लिपि, ओरा रहन-सहन, रिति-रिवाज ओसो धार्मिक विश्वास कुना सम्मान कीयाना।

मंगोल जाति ओसो ह्वेइ जाति ता बारे ते शेनशी-कानसू-निंगश्या हंदी इलाका ओसो उत्तरी चीन ता मुक्त इलाकांग लोप्पा बचोनो लोक्तर इदे सही रुझान लागू कितोर। ओरा नडमा कित्ता काम वेने सही सफलता दोरकता।

10 विदेश नीति ता समस्या

चीनी कम्युनिस्ट पार्टी अटलान्टिक चार्टर, मास्को, काहिरा, तेहरान ओसो क्रीमिया ते आता अन्तरराष्ट्रीय सम्मेलन¹¹ कुना लोप्पा कित्ता निर्णय सकुना संगे सहमत मंता। बारांकु इत्तेके इव सब्बे निर्णय फासीवादी आक्रमणकारि किन हारे कियाला ओसो विश्व शांति काजे योगदान हीतांग।

चीनी कम्युनिस्ट पार्टी पेश कित्ता विदेश नीति ता बुनियादी नियम इगा रास्ता लेक्का मंता, चीन सब्बे देश कुना संगे रातनीतिक संबंध स्थापित कियार ओसो अविन किन मजबूत कियार। आपसी अधिकार संबंधित सवालकु इत्तेके युद्ध लोप्पा फौजी कार्यवाहिंग नडमा तालमेल कीयाना, शांति सम्मेलन ओसो व्यापार, पूंजी-विनियोग संबंधित सवाल कुन हल कियार। इदिना काजे जापानी आक्रमणकारि किन पूराए हारे कीयाना किन पूराए हारे कीयाना ओसो विश्व शांति बचे कीसि तासना, उंदी-दूसरा ता राष्ट्रीय स्वाधीनता ओसो समानता ता सम्मान कीयाना, विभिन्न राज्य कु ओसो जनगण ता आपसी अधिकार ओसो ओरा नडमा गोती बेरसी कीयाना शर्त मंदियार।

चीनी कम्युनिस्ट पार्टी, युद्ध पेरके अन्तरराष्ट्रीय शांति ओसो सुरक्षा ता रक्षा काजे उंदी संगठन ता स्थापना कियमूडायर इंजी डम्बार्टन ओक्स सम्मेलन ता प्रस्तावकु ओसो क्रीमिया सम्मेलन ते कित्ता निर्णय कुना संगे पूराए सहमत मंता। अदु सान फ्रांसिस्को लोप्पा अन्तरराष्ट्रीय संगठन ता बारे ते आता संयुक्त राष्ट्र सम्मेलन ता स्वागत कीता। इद सम्मेलन ते चीनी जनता ना आकांक्षा किन प्रकट कियाला काजे अदु चीन तल लोहता प्रतिनिधि मंडल ते तन्ना प्रतिनिधिन वेने चुने कित्ता।¹²

मना राय क्वोमिंगतांग सरकार सेवियत संघ पोरो मत्त दुश्मनी रुझान किन खत्म कीयाना ओसो चीन-सोवियत संबंध कुन तुरंत सुधरे कीयाना इंजी मंता। सोवियत संघ असमान समझौतांग किन रद्द कित्ता ओसो चीन संगे पूना समान समझौता पोरो हस्ताक्षर कित्ता पहला देश मत्ता। 1924 ते डा. सुन यात-सेन केयसी मत्ता, क्वोमिंगतांग ता पहली राष्ट्रीय कांग्रेस ताकतनास्के ओसो ताना पेरके उत्तरी अभियान ताकनास्के सिर्फ सोवियत संघे चीन ता मुक्ति संघर्ष ता सहायता कीयाना देश मत्ता। 1937 ते जापानी आक्रमण विरोधी युद्ध शुरू आतास्के सोवियत संघ जापानी आक्रमणकारिरा खिलाफ चीन ता मदद कीयाना पहली देश मत्ता। सोवियत सरकार ओसो सोवियत जनता ना इद सहायता काजे चीन जनता अदिना आभारी मंता। बस्के एवनल सोवियत संघ इद काम लोप्पा शामिल आयो अस्के एवनल प्रशान्त माहासागर इलाका ता समस्यांग किन बद्रमाई कीसि सम्पूर्ण हल किया परवोम इंजी माकिन विश्वास मंता।

एकताकारी देश कुना सब्बे सरकारकु सबसे मुन्ने अमेरिका, ब्रिटिश ता सरकार कुनगडल चीनी जनता बगिल गंभीरतापूर्वक ध्यान हियाना, जनता ना इच्छा विरुद्ध मत्ता विदेशी नीति किन लागू कीसि अदिन संगे तन्ना गोती किन नुकसान कीयानायो इंजी मांग कीतोमा। बदे वेने विदेशी सरकार चीनी प्रतिक्रियावादीरा मदद कित्तेके ओसो चीनी जनता ना जनवादी काम किन विरोध कित्तेके, अदु वेल्ले बेहरा गलती कीता इंजी माटु आल्सिंतोमा।

बचोनो विदेशी सरकार कु चीन संगे तम्मा असमान समझौता किन रद्द कीयाना ओसो पूना समान समझौता कियाला काजे कदम तेहतांग, अविन चीनी जनता स्वागत कीता। मति सिर्फ समान समझौता कीयाना इत्ते चीन लोप्पा निज्जमे असली समानता हासिल कीयाना इंजी आयो। सही ओसो असली समानता बस्के वने विदेशी सरकार तल उपहार ता रूप ते दोरकवा लेवा अदिन किन चीनी जनता खुद तन्ना कोशिस संगे हासिल किया लागियर ओसो अदिन किन हासिल कीयाना हरी राजनीतिक, आर्थिक, सांस्कृतिक रूप ते नवजनवादी चीन ता निर्माण

कियानदु मंता। लेवेके सिर्फ पोरोल तुके स्वाधीनता ओसो समानता दोरकी किया परिता, निज्जतादु आयो। इत्तेके क्वोमिंगतांग सरकार ता वर्तमान नीति पोरो ताकसी चीन सही स्वाधीनता ओसो समानता इनपड़े दोरकी किया परवो।

जापानी आक्रमणकारिरा हार आयना ओसो ओरू बदे शर्त वायवा आत्मसमर्पण कित्ता पेरके, माटु जापानी जनता किन सब्बे जनवादी ताकत कुन ओरा जनवादी व्यवस्था निल्पी कियाला काजे मदद कीयाना जरूरत आयारा। अस्केने जापानी फासीवाद ओसो सेनावाद किन ओरा राजनीतिक, आर्थिक, सामाजिक मोदोल किन पूराए खत्म किया परमूडायारा। बस्के एवनल जापानी जनता उंदी जनवादी व्यवस्था बने कीवो अस्के एवनल जापानी फासीवाद ओसो सेनावाद किन पूराए खत्म कीयाना ओसो प्रशान्त महासागर इलाका लोप्पा शांति तासना गारंटी कायना असंभव मंता।

कोरिया ता स्वाधीनता ता बारे ते काहिरा सम्मेलन ता फैसला सही मंता इंजी आल्संतोमा चीनी जनता कोरियाई जनता ना मुक्ति दोरकी कियाला काजे मदद कीयाना।

भारत ता स्वाधीनता दोरकी कियार इंजी आशा किया मंतोमा बारांकु इत्तेके उंदी स्वाधीन ओसो जनवादी भारत ता सिर्फ भारतीय जनता किने जरूरत हिल्वा इदु विश्व शांति काजे वेने अनिवार्य मंता।

दक्षिण-पूर्वी एशिया ता देशकु –बर्मा, मलाया, इंडोनेशिया, वियतनाम ओसो फिलिपीन्स लेक्काटवु जापानी आक्रमणकारिरा हार आता पेरके इवु देश कुना जनता तम्मा स्वाधीन ओसो जनवादी राज्य कुना स्थापना ता अधिकार किन दोरकी कियानुंगा। ओसो थाइलैंड संगे इत्तेके योरोप लोप्पा फासीवाद पिछलग्गू देश कुना संगे आता लेक्का व्यवहार आयना।

इदु सब्बे मावा ठोस कार्यक्रम ता मुख्य पोल्लोंग आंदुंगा।

नन्ना ओसो उंदी बेरा इद ठोस कार्यक्रम ता उंदी वेने मुद्दा किन राष्ट्रव्यापी स्तर ते सफलता पूर्वक लागू कीयाना इत्तेके पूरा राष्ट्र ता समर्थन

मत्ता उंदी जनवादी गठबंधन सरकार ता स्थापना किया लागिंगता हिल्लेके अविन किन लागू किया परमूडायो।

चीनी जनता ना मुक्ति काजे चौबीस साल एवनल संघर्ष कित्ता पेरके चीनी कम्युनिस्ट पार्टी ता बारे ते बदे वेने राजनीतिक पार्टी लेवेके सामाजिक ग्रुप, बोराई चीनी लेवेके विदेशी मानेय चीन ता बारे ते कम्युनिस्ट पार्टी ता राय किन नजरअंदाज कित्तेके ओरू वेल्ले गंभीर गलती कियानूर ओसो जरूर असफल आयनूर, अचोन बेहरा दर्जा हासिल कित्ता। मना राय किन नजरअंदाज कियानोर ओसो खुद ता हरदे जिद् पोयसी ताकनोर मुन्ने वेने मत्तोर ओसो इंजे वेने मंतोरा। मति ओरू सब्बे तोर उंदी हीकट पोयता हरदे ताका मंतोरा। इद्रम बारांकु आता? सिर्फ मना राय चीनी जनता ना अधिकार कुना संगे कलियंता अदिन काजे या? चीनी कम्युनिस्ट पार्टी चीनी जनता ना सबसे ज्यादा ईमानदार प्रवक्ता मंता, बोरी जनता ना सम्मान कीवोर ओरू निज्जमे चीनी जनता ना सम्मान कीवोर ओसो इद्रम तोरा हारेमायनदु अनिवार्य मंता।

क्वोमिंगतांग इलाका ना काम

इंजे नन्ना मना पार्टी ता आम ओसो ठोस कार्यक्रम किन विस्तार ते वेहकाना। आखरी ते इद कार्यक्रम पूराए चीन पोरो लागू आंता इंदानदिना पोरो बदे डावुट हिल्ले। अन्तरराष्ट्रीय ओसो स्थानीय परिस्थिति ते चीनी जनता मुन्ने इगा रास्ता रूप रेखा पेश कित्ताद मंता। मति इंजे क्वोमिंगतांग इलाकांग, जापान-कब्जा ते मत्ता इलाकांग ओसो मुक्त इलाकांग ना परिस्थिति उंदी दूसरा तुक अलग मंता। मना कार्यक्रम किन लागू कीयानास्के इद अन्तर किन समझेमायना जरूरी मंता। अलग-अलग परिस्थिति ते अलग-अलग काम मंदिंता। इविना लोप्पा उचुक काम कुना बारे ते पोरो वेहत्ताद मंता ओसो दूसरा काम कुना स्पष्टीकरण कीयाना इंजे वेने जरूरत मंता।

क्वोमिंगतांग इलाकांग लोप्पा जनता किन देशभक्तिपूर्ण गतिविधिग लोप्पा वाटना आजादी हिल्ले, जनवादी आंदोलन किन गैरकानूनी

समझेमाया मंता। मति विभिन्न सामाजिक समूह, जनवादी पार्टिंग ओसो लोकर परताचोन सक्रिय आया मंतोर। चीनी जनवादी लीग इयेंड जनवरी ते उंदी घोषणापत्र जारी कित्ता, ताना लोप्पा क्वोमिंगतांग ता एकदलीय तानाशाही किन समाप्त कीयाना ओसो गठबंधन सरकार ता स्थापना कीयाना मांग कित्ताद मंता। जनता ना वेल्ले समूह इद्रमे ऐलान कीतांग। क्वोमिंगतांग लोप्पा वेल्ले लोकर तम्मा खुद ता पार्टी नेतृत्वकारी संस्थांग ना नीति ता बारे ते ज्यादा से ज्यादा डावुट ओसो होंग आया मंतोर। तम्मा पार्टी ता व्यापक जनता तल अलगाव आयना खतरा तुकू सतर्क आसोर दाया मंतोर, अदिन काजे परिस्थिति ता अनुकूल जनवादी सुधार ता मांग किया मंतोर। छुंगकिंग ओसो दूसरा जागा ने जनवादी आंदोलन मजदूर, किसान, सांस्कृतिक दुनिया, विद्यार्थी, शैक्षणिक दुनिया, महिला, उद्योग-वाणिज्य दुनिया, सरकारी कर्मचारि ओसो उचुन सैनिक अफसर लोरा नडमा वेने फैलेमाया मंतोर। इविनगल सब्बे उत्पीडित समूह ता जनवादी आंदोलन तीरम-तीरम उंदी उद्देश्य काजे आपस ते उंदी दूसरा लोप्पा कलियसोर दाया मंता इंजी समझेमासोर मंता। वर्तमान आंदोलन ता उंदी कमजोरी मंता। अदु समाज ता बुनियादी समूह इंजे वेने बेहरा स्तर ते इव आंदोलन कुना लोप्पा शामिल आताद हिल्ले, सबसे महत्वपूर्ण ताकत इत्तेके किसान, मजदूर, सैनिक ओसो दोड़ स्तर ता इत्तेके घोर उत्पीडन ता शिकार आसोर मत्ता सरकारी कर्मचारि, अध्यापक लोर, इंजे एवनल संगठित आताद हिल्ले। दूसरा कमजोरी आंदोलन लोप्पा वेल्ले जनवादी लोकर बुनियादी नीति ता बारे ते इत्तेके जनवादी नियम कुना पोरु आधार आसी संघर्ष कित्तेके ने परिस्थिति लोप्पा बदलाव तत्ता परमूडांता इंदानदिना बारे ते इंजे वेने स्पष्ट आताद हिल्ले। ओरू डुलमुल आया मंतोर। मति असली परिस्थिति सब्बे उत्पीडित समूह, राजनीतिक पार्टिंग ओसो सामाजिक ग्रूप कुन तीरम-तीरम जागृत ओसो एकताबद्ध आयला कजे मजबूर किया मंतांग। क्वोमिंगतांग सरकार कित्ता बदे वेने दमन इद आंदोलन किन मुन्ने दायाला रोमी कीवो आया।

क्वोमिंगतांग इलाका ता सब्बे उत्पीड़ित समूह, राजनीतिक पार्टिंग ओसो सामाजिक ग्रूप किन तम्मा जनवादी आंदोलन बेहरा स्तर ते मुन्ने ओयना ओसो हमेशा तम्मा विखरेमासी मत्ता ताकत कुन उंदी कीयाना। अस्केने राष्ट्रीय एकता बने कियाला, गठबंधन सरकार ता स्थापना कियाला, जापानी आक्रमणकारिर किन हारे कियाला उंदी पूना चीन ता निर्माण कियाला काजे संघर्ष किया परमूडायरा। चीनी कम्युनिस्ट पार्टी ओसो मुक्त इलाकांग ना जनता किन किन हर संभव सहायत कीयाना।

क्वोमिंगतांग इलाका लोप्पा कम्युनिस्ट लोर उंदी व्यापक जापान विरोधी राष्ट्रीय संयुक्त मोर्चा ता नीति किन लागू कीयाना। तम्मा लक्ष्य किन हासिल कियाला काजे संघर्ष कीयानास्के, मनम नाड़ी मना विरोधी बनेमातेकाई ओरू नेंडु मना विरोध किसोर हिल्ला मत्ता हर मानेय संगे सहयोग कीयाना।

जापान कब्जा ते मत्ता इलाकांग लोप्पा काम

जापान कब्जा ते मत्ता इलाकांग लोप्पा, कम्युनिस्ट लोर जापान प्रतिरोध कीयाना सब्बे लोकर किन फ्रांस ओसो इटली ता उदाहरण कुन लागू कीयाना ओसो सशस्त्र विद्रोहता तैयारी काजे संगठन बने कीयाना ओसो भूमिगत सेना किन एकजुट कीयाना इंजी आह्वान कीयाना। इद्रम कीसि वायना कालम ते ओरू बाहर तल आक्रमण कीयाना सेना संगे तालमेल कीसि लोप्पाटना संगे कार्यवाहिंग किया परितोर ओसो इद्रमे जापानी आक्रमणकारिर किन खत्म किया परितोर। जापान कब्जा ते मत्ता इलाकांग लोप्पा जापानी आक्रमणकारिर ओसो ओरा पिछलग्गू लोरा कैदे मना हेलोस्कु-तम्मोर किन बद अत्याचार, लूट-खसोट, बलात्कार ओसो अपमान सहन किया लागिंतायो अदु पूरा चीनवासिरा लोप्पा होंग ता किस्स पोत्ती कित्ता अनि इंजे बदला एतना टाईम वेल्ले जल्दी वाया मंता। योरप ता युद्ध भूमि ते दोरकी कित्ता जीत ओसो मना आठवीं राह सेना ओसो पूना चौथी सेना दोरकी ता जीतकु जापान कब्जा ते मत्ता इलाकांग ना जनता लोप्पा जापान विरोधी विचार किन उजागर कित्ता ओसो वेल्ले

बेरसी कित्ता। अदु तुरंत संगठित आसी जल्दी मुक्ति दोरकी कियाला आल्सा मंता। अदिन काजे माटु जापान कब्जा ते मत्ता इलाकांग लोप्पा मना काम ता महत्व कुन बेरसी कीसि मुक्त इलाका ने मत्ता काम ता स्तर एवनल एवसी कीयाना। मना कार्यकर्ता लोरिन बेहरा संख्या ते अगा लोहना। अगटा जनता नड़मा मत्ता सक्रिय लोकुर किन बेहरा संख्या ते ट्रेनिंग हियाना। ओसो ओरा पदोन्नति कीयाना, ओरू स्थानीय कार्य लोप्पा वेने भाग एतना। माटु बाकी इलाका तुकु ज्यादा कालम एवनल जापान कब्जा ते मत्ता, ओसो उद्योग, सेना-केंद्रीकरण ता रूप ते जापानी आक्रमणकारिरा काजे प्रधान इलाकांग मत्ता नालुंग उत्तर-पूर्वी प्रांत कुना लोप्पा वेने मना भूमिगत काम बेरसी कीयाना। इव पोहता इलाकांग किन दुबारा दोरकी कियाला काजे माटु उत्तर-पूर्व किन विड़चसी लम्बा दिवार ता दक्षिण ते वातोरा संगे सुदृढ़ एकता कीयाना।

कम्युनिस्ट लोर सब्बे जापानी कब्जा ते मत्ता इलाकांग लोप्पा व्यापक रूप ते जापान वुरोधी राष्ट्रीय संयुक्त मोर्चा निल्पी कीयाना नीति लागू कीयाना। तन्ना दुश्मन ता तखता पलट कियाला काजे ओरू जापानी आक्रमणकारिर ओसो ओरा पिछलग्गू लोरा विरोध कीयाना हर मानेय ना संगे एकता कीयाना।

माटु सब्बे कठपुतली फौज, कठपुतली पुलिस ओसो दुश्मन ता मदद कीयाना बाकी लोकुर ओसो देशवासिरा विरोध कियानोर किन, ओरू तुरंत तम्मा कार्यवाहिंग ना अपराधपूर्ण स्वरूप किन समझेमाया अनि गलती मानेमायना इंजी ओसो दुश्मन खिलाफ तम्मा देशबंधु लोरा मदद कीसि तम्मा गलती सुधरे कीयाना इंजी चेतावनी हियाना। हिल्वेके बस्के दुश्मन तोर खत्म आयनुर अस्के राष्ट्र इद्रम तोरा संगे जरूर बदला एतियारा।

कम्युनिस्ट लोर जनता किन तम्मा पेरके वाटना सब्बे कठपुतली संगठन कुना नड़मा प्रचार काम कीसि समझे कीयाना कोशिश कीयाना। इद्रम कीसि भटकेमाता जनता किन राष्ट्रीय दुश्मन ता खिलाफ तन्ना पक्ष कीयाना। संगे ने वेल्ले गंभीर अपराध कित्ता ओसो तम्मा अपराध किन मानेमासी सुधार कियवा मंदाना चीनी गद्दार लोरा खिलाफ सबूत जमा

कीयाना अनि पोहत्ता प्रदेश कुन दुबारा दोरकी कित्ता पेरके ओरकिन अदालत नड्मा निल्पी कीयाना।

चीनी जनता, चीनी कम्युनिस्ट पार्टी, आठवीं राह सेना, पूना चौथी सेना ओसो जनता ना बाकी सेनांग खिलाफ चीनी गद्दार लोर किन संगठित कीसि राष्ट्र संगे विश्वासघात कीयाना क्वोमिंगतांग प्रतिक्रियावादिर किन तम्मा अपराध कुन मानेमासी सुधार कीयाना इंजी चेतावनी हियाना। लेवेके पोहत्ता इलाकांग किन वापिस पोयसी ओरकिन वेने चीनी गद्दार लोरा संगे-संगे ओरा अपराध कुना सजा हियला काजे उचुन वेने पेरके-मुने आयमूडायो आयारा।

मुक्त इलाकांग लोप्पा काम

मुक्त इलाकांग लोप्पा मना पार्टी पूरा नवजनवादी कार्यक्रम किन उल्लेखनीय सफलता संगे सफल कित्ता। अद्रमे जापान विरोधी बेहरा ताकत किन जमा कित्ता, इंजे इद ताकत किन पूरा विकास ओसो सुदृढ़ कीयाना।

वर्तमान परिस्थिति ते मुक्त इलाकांग ना फौज कु जापानी ओसो कठपुतली शासक लोरा कब्जा ते मत्ता इलाकांग पोरो व्यापक आक्रमण कीसि मुक्त इलाकांग ना विस्तार किया ओसो जापान कब्जा ते मत्ता इलाकांग किन घटे कीयाना।

मति संगे दुश्मन इंजे वेने शक्तिशाली मंतोर ओसो मुक्त इलाकांग पोरो ओसो हमला किया परितोर इंजी सुरता तासना। मना इलाका ता सेना ओसो जनता दुश्मन ता हमलांग किन विफल कियाला काजे इव इलाकांग किन सुदृढ़ बने कीयाना काम कीयाना।

मनम मुक्त इलाका ना फौज, छापामार यूनिट, मिलिशिया ओसो आत्मरक्षा कोर विस्तार कीयाना। अविन किन ट्रेनिंग हियाना ओसो मजबूत कारम ता रफ्तार बेरसी कीसि अविना युद्ध-क्षमता किन बेरसी कीयाना। अस्के ने आक्रमणकारि किन आखरी हार तीहला काजे परताचोन ताकत बेरसी किया परमूडांता।

मुक्त इलाकांग ना सेना सरकार ता समर्थन कीयाना ओसो जनता संगे संबंध बेरसी कीयाना, ओसो जनवादी सरकार कु सेना ता समर्थन कीयाना ओसो जापान खिलाफ लड़ेमायना सैनिक परिवार कुन महत्व हियाला जनता लोप्पा नेतृत्व कीयाना। इद्रमे सेना ओसो जनता नड़मा ता संबंध ओसो ज्यादा बेस आंता।

स्थानीय गठबंधन सरकार ओसो जन संगठन कुना काम ते कम्युनिस्ट लोर नवजनवादी कार्यक्रम पोरो आधार आसी सब्बे जापान विरोधी जनवादी लोकुरा संगे घनिष्ठ रूप ते एकता कीयाना।

अद्रमे फौजी कार्य ते वेने कम्युनिस्ट लोर, मना संगे एकता कियाला तैयार मत्ता मुक्ता इलाका ता फौजी सदस्य मत्तेकाई हिल्वेकाई सब्बे जापान विरोधी जनवादी लोकुरा संगे घनिष्ठ एकता कीयाना।

मजदूर, किसान ओसो बाकी मेहनतकश लोकुरा लोप्पा प्रतिरोध युद्ध ओसो उत्पादन ता गिर्दा किन बेरसी कियाला काजे माटु लगान ओसो सूद कम कीयाना अनि मजदूर, दफ्तर ता कर्मचारिरा आमदनी बेरसी कीयाना नीति किन सही तरीका ते लागू कीयाना। मुक्त इलाका ना कार्यकर्ता लोर मेहनत ते आर्थिक काम कियाला करियाना। कृषि, उद्योग ओसो व्यापार ता बेहरा स्तर ते विकास कीयाना ओसो सैनिक, जनता ना रहन-सहन लोप्पा सुधार कियाला काजे मत्ता सब्बे शक्तिंग किन गोलबंद कीयाना। इद उद्देश्य किन दोरकी कियाला काजे श्रम-होड़ आंदोलन ताकी कीयाना अनि श्रमवीर लोर किन आदर्श कार्यकर्ता लोर किन पुरस्कार हियाना। जापानी आक्रमणकारिर किन शहर तल पूंडतास्के मना कार्यकर्ता लोर किन शहर ता आर्थिक काम कियाला वेल्ले स्पीड ते करिया लागियरा।

मना सांस्कृतिक, शैक्षणिक कार्य ता विकास कीयाना। अस्केने मुक्त इलाकांग ना जनता ओसो सबसे मुन्ने मजदूर, किसान, ओसो सैनिक लोरा व्यापक जन समूदाय ता राजनीतिक चेतना ता स्तर बेरसी कीयाना आता ओसो कार्यकर्ता लोर किन बेहरा संख्या ते ट्रेनिंग हिया परमूड़ांता। इदु काम कीयानास्के टाईम मत्तास्के ने अगा काम कीयाना लोकुर ग्रामीण लोप्पा

मत्ता परिस्थितिंग ओसो ग्रामीण ता जनता ना जरूरत, इच्छांग ना अनुसार बाहरी रूप ओसो विषय-वस्तू किन लागू कीयाना।

मुक्त इलाकांग लोप्पा मना सब्बे काम कुना लोप्पा जनशक्ति ओसो भौतिक साधन-स्रोत कुन वेल्ले बचत किंसोरे इस्तेमाल कीयाना ओसो काम ता हर जागा ते दीर्घकालीन योजनांग बने कीयाना, अविना दूरुपयोग कीयानायो। जापानी आक्रमणकारिं किन हारे कीयाना ओसो पूना चीन ता निर्माण कीयाना रेंडासी काम कुना काजे इदिना जरूरत मंता।

मुक्त इलाकांग लोप्पा मना सब्बे काम लोप्पा मनम स्थानीय समस्यांग ना प्रशासन स्थानीय लोकुरे ताकी कीयाना इंजी मदद कीयाना ओसो बेसता स्थानीय लोकुरा नडमा वेल्ले स्थानीय कार्यकर्ता लोर कीयाना पोरो खास ध्यान हियाना। बस्के एवनल बाहर तल वात्ता कामरेड्स स्थानीय लोकुर संगे कलियोर आंतोर, ओसो स्थानीय कार्यकर्ता लोर वेल्ले ग्रिदा ते मेहनत ते ओसो ठोस परिस्थिति ता अनुसार तरीका संगे मदद कीवोर ओसो बस्के एवनल ओरू स्थानीय कार्यकर्ता लोर किन तम्मा हेलोस्कु-तम्मोर लेक्का जीवा कीवोर अस्के एवनल ग्रामीण इलाकांग लोप्पा जनवादी क्रांति ता महान काम कि पूरा कीयाना असंभव आयार।

आठवीं राह सेना, पूना चौथी सेना ओसो जनता ना बाकी सशस्त्र सेना किन बदे यूनिटकु बेगनाई हत्तेके अदिन तुरंत स्थानीय कार्यकर्ता लोरा नेतृत्व ते काम कीयाना सेना किन (तीना लोप्पा सिर्फ मिलिशिया ओसो आत्मरक्षा कोर आयवा स्थानीय फौज ओसो क्षेत्रीय फौजी फारमेशन वेने शामिल मंता) संगठित कियाला स्थानीय लोकुरा मदद कीयाना। इद्रम कित्तेके पेरेके स्थानीय लोकुरा नेतृत्व ते काम कीयाना नियमित सेना ओसो नियमित फौजी फारमेशन ता निर्माण संभव आंता। इदु उंदी वेल्ले महत्वपूर्ण काम आंदू। बस्के एवनल इदिन पूरा कियमूडायो अस्के एवनल माटु स्थाई जापान विरोधी आधार इलाका ना निर्माण किया परवोम ओसो जन सेना ता विस्तार वेने किया परवोम।

बदे डावुट हिल्ला स्थानीय लोकर तम्मा बगिल तल दूसरा जागा तल वात्ता क्रांतिकारी कार्यकर्ता लोर ओसो जन सेना ता हार्दिक स्वागत कीयाना ओसो ओरा मदद कीयाना।

राष्ट्रीय काम ता गुप्त रूप ते ध्वंस कीयाना तत्व संगे मुकाबला कीयाना सवाल ता बारे ते हर मानेय सतर्क मंदाना। बारांकु इत्तेके खुला दुश्मन ओसो राष्ट्रीय काम ता खुल्लमखुल्ला विध्वंस कियानोरा बारे ते पुंदाना ओसो ओरा मुकाबला कीयाना हल्को आंता, मति गुप्त काम कियानोरा बारे ते पुंदाना ओसो ओरा संगे मुकाबला कीयाना वेल्ले मुश्किल मंता। अदिन काजे इद समस्या किन वेल्ले गंभीरता ते कैदे पोयना, संगेने इद्रम ता लोकरा संगे मुकाबला कीयानास्के वेल्ले सतर्क मंदाना।

चीन ता मुक्त इलाकांग लोप्पा धार्मिक विश्वास ता आजादी ता नियम अनुसार सब्बे धर्म किन मानेमायना अनुमति मंता। प्रोटेस्टेन्ट, कैथोलिक, इस्लाम, बौद्ध ओसो बाकी धर्म कुना सब्बे लोकर बस्के एवनल जन सरकार ता कानून पालन कींतोर अस्के एवनल ओरा रक्षा किसोर मंदिता। हर मानेय किन धार्मिक विश्वास तासना लेवेके तासवा मंदाना आजादी मंता। जबरदस्ती कीयाना ओसो भेदभाव कीयाना अधिकार बोनकिने हिल्ले।

मना कांग्रेस चीन ता मुक्त इलाका ना जनता ना सम्मेलन परताचोन जल्दी येनान लोप्पा केयना इंजी मुक्त इलाकांग ना जनता मुन्ने इद प्रस्ताव किन तासना। तीना लोप्पा विभिन्न मुक्त इलाकांग ना गतिविधिग नड्मा तालमेल कीयाना, प्रतिरोध युद्ध लोप्पा ओरा काम किन सुदृढ़ बने कीयाना, क्वोमिंगतांग इलाकांग लोप्पा जनता ना जापान विरोधी जनवादी आंदोलन किन मदद कीयाना, जापान कब्जा ते मत्ता इलाकांग ना जनता ना भूमिगत सेना किन मदद कीयाना, राष्ट्रीय एकता ओसो गठबंधन सरकार ता स्थापना वाले काम किन मुन्ने ओयना सवाल कुना बारे ते विचार कीयाना इंजी।¹³ इंडु चीन ता मुक्कत इलाकांग जापान ता प्रतिरोध कियाला ओसो राष्ट्र किन बचे कीयाना राष्ट्रव्यापी जन संघर्ष ता गुरुत्व-केंद्र बनेमाताद मंता मति पूरा जोश ता व्यापक जनता ना आशा मावा पोरो

मंता माटु जनता किन निराश कीयानायो। इद्रम ता सम्मेलन चीनी जनता ना राष्ट्रीय मुक्ति काम किन वेल्ले प्रोत्साहित कियार।

पूरा पार्टी उंदी आयना ओसो तन्ना काम किन पूरा कियाला काजे संघर्ष कीयाना

कामरेड्स! इंजे माटु मना काम ओसो अविन पूरा कियाला काजे तय कित्ता नीतिंग किन समझेमाताद मंता, मति इव नीतिंग किन लागू कीयानास्के इव काम किन पूरा कीयानास्के मना रुझान बद्रम मंदाणा?

वर्तमान अन्तरराष्ट्रीय ओसो स्थानीय परिस्थिति मना काजे ओसो चीनी जनता काजे वेहच ते मत्ता पिस्वल काजे हरीं तेरियता अनि अभूतपूर्व परिस्थितिंग पुट्टी कित्ता। तीनी पेरके बदे वेने रकम ता डावुट मत्ता लेक्का हिल्ले। मति इंजे वेने उचुक गंभीर मुश्किलकु मंतांग। बोरु सिर्फ वेहच ते मत्ता पिस्वल किने हूडितोर, मुश्किल कुन आयो, ओरू पार्टी तय कित्ता काम कुन पूरा कियाला काजे कारगर रूप ते काम किया परवोर।

चीनी जनता संगे कलियसी मना पार्टी तन्ना इतिहास ता 24 साल लोप्पा- अविना लोप्पा जापान आक्रमण विरोधी युद्ध ता आठ सालकु वेने शामिल मंतांग। चीनी राष्ट्र लोप्पा वेल्ले शक्ति निर्माण आता। मना काम ता सफलता एकदम स्पष्ट मंता ओसो इदिना बारेते बदे वेने रकम ता डावुट हिल्ले। मति मना काम लोप्पा इंजे वेने कमजोरिंग मंतांग। बोरु सिर्फ सफलतांग ना पक्ष किने हूडितोर कमजोरिंग किन आयो, ओरू पार्टी तय कित्ता काम किन पूरा कियाला काजे कारगर रूप ते संघर्ष किया परवोर।

1921 ते जन्म आता पेरके 24 साल लोप्पा चीनी कम्युनिस्ट पार्टी मूंड महान संघर्ष कित्ता- उत्तरी अभियान, भूमि-क्रांति ओसो इंजे वेने जारी मत्ता जापानी आक्रमण विरोधी युद्ध। मना पार्टी शुरू तले मार्क्सवादी लेनिनवादी दुनिया ता सर्वहारा वर्ग ता सबसे ज्यादा सही ओसो सबसे ज्यादा क्रांतिकारी वैज्ञानिक विचारधारा ता निचोड़ आंदू। मार्क्सवाद-लेनिनवाद ता सर्वव्यापी सच्चाई किन चीनी क्रांति ता ठोस अमल संगे काल्पतेके चीनी क्रांति उंदी पूना रूप धारण कित्ता अनि नवजनवाद ता

उंदी पना ऐतिहासिक मंजिल ता उदय आता। मार्क्सवाद-लेनिनवाद सिद्धांत ओसो विचारधारा संगे लैस आसी चीनी कम्युनिस्ट पार्टी चीनी जनता काजे उंदी पूना कार्यशैली ता खोज कित्ता। इद कार्यशैली मुख्य रूप ते सिद्धांत किन व्यवहार संगे काल्पिता, जनता संगे घनिष्ठ सम्पर्क बने कींता ओसो आत्मालोचना ता तरीका किन अमल कींता।

मार्क्सवाद-लेनिनवाद ता सर्वव्यापी सच्चाई किन पूरा दुनिया ता सर्वहारा वर्ग संघर्ष ता व्यवहार किन प्रतिबिम्बित कींता। चीनी सर्वहारा वर्ग ओसो विशाल जनता ना क्रांतिकारी संघर्ष ता ठोस अमल संगे काल्पतेके अदु चीनी जनता काजे उंदी सफल शस्त्र बनेमांता। इदु परिस्थिति चीनी कम्युनिस्ट पार्टी दोरकी कित्ताद मंता। मना पार्टी इद नियम ता खिलाफ मत्ता हर रकम ता कठमुल्लावाद ओसो अनुभववाद ता खिलाफ दृढ़ता ते संघर्ष कीसि विकसित आता अनि मुन्ने हत्ता। कठमुल्लावाद ठोस व्यवहार संगे संबंध देहिंता ओसो अनुभववाद आंशिक अनुभव किन सर्वव्यापी सच्चाई समझेमांता। इव रेंडासी रकम ता अवसरवादी विचारकु मार्क्सवाद ता विपरीत मंतांग। मना पार्ट तन्ना 24 साल कुना संघर्ष लोप्पा इद्रम ता गलत विचार कुना खिलाफ सफलतापूर्वक संघर्ष ताकी कित्ता ओसो इंजे वेने इदु संघर्ष ताका मंता। इद्रम अदु खुद किन विचाराधारात्मक रूप ते ज्यादा से ज्यादा सुदृढ़ बने किसोर दांता। इंजे मना पार्टी सदस्य लोरा संख्या 12, 10,000 आता। इदिना लोप्पा बेहरा संख्या प्रतिरोध युद्ध ताकनास्के पार्टी ते शामिल आताद मंता। ओरा विचारधारा लोप्पा विभिन्न रकम ता दोष मंतांग। इद पोल्लो प्रतिरोध युद्ध तुकू मुन्ने पार्टी ते वात्तोर पोरो वेने लागू आंता। हत्ता उचुक सालकुना लोप्पा कित्ता दोष-निवारण आंदोलन ता काम वेल्ले सफल आता। ओसो मत्ता दोष कुन दूर कियाला काजे वेल्ले सफलता दोरकता। इद काम किन जारी तासना, “गलतिंग कीयाना तुकू बचेमायला काजे पाड़ना गलतिंग लोप्पाटल सबक एतना” ओसो “पेसैंट किन बचे कियाला काजे ओना बीमारी ता इलाज कीयाना” विचार संगे पार्टी लोप्पा विचारधारात्मक शिक्षा ता ओसो ज्यादा व्यापक रूप ते विकास कीयाना।

माटु पार्टी ता सब्बे स्तर ते काम कीयाना नेतृत्वकारी कार्यकर्ता लोर सिद्धांत ओसो व्यवहार ता घनिष्ठ संबंध ता विशेषता मंता इदु मना पार्टी किन बाकी सब्बे राजनीतिक पार्टी नगडल अलग किंता इंजी समझे कीयाना। अदिनकाजे विचारधारात्मक शिक्षाए महान राजनीतिक संघर्ष काजे पूरा पार्टी किन एकताबद्ध कीयानास्के मजबूत पोयसी तासना कड़ी आंदू। बस्के एवनल इद्रम कियोम अस्के एवनले पार्टी तन्ना बदे वेने राजनीतिक काम किन पूरा किया परवो।

ओसो उंदी दूसरा विशेषता- मना पार्टी किन बाकी सब्बे राजनीतिक पार्टींग नगडल अद किसिंता। इदिन व्यापक रूप ते जनता संगे माटु वेल्ले घनिष्ठ संबंध किताद मंता। मना प्रस्थान-बिंदु-तन-मन ते जनता ना सेवा कीयाना ओसो जनता उचुन वेने अलग आयनायो, सब्बे समस्यांग लोप्पा सिर्फ जनता ना अधिकार किने आधार बने कीयाना, व्यक्तिगत अधिकार लेवेके बदे सुडल ग्रुप ता अधिकार कुन आयो। जनता ना जिम्मेदारी, पार्टी ता नेतृत्वकारी संगठन कुना जिम्मेदारी किन उंदी रूप हियाना। कम्युनिस्ट लोर हमेशा सच्चाई ता साथ हियाला काजे तैयार मंदाना। बारांकु इत्तेक हर सच्चाई जनता ना अधिकार ते मंदिता। कम्युनिस्ट लोर हमेशा तम्मा गलतिंग सुधरे कियाला काजे तैयार मंदाना। बारांकु इत्तेके गलतिंग जनता ना अधिकार कुना विरुद्ध मंदितांग। हत्ता 24 साल कुना अनुभव माकिन सही काम, सही नीति, सही कार्यशैली उंदी सही टाईम ओसो जागा ते अनिवार्य रूप ते जनता संगे मना संबंध किन सुदृढ़ कींता इंजी करिंहता। गलत काम, गलत नीति, गलत कार्यशैली उंदी सही टाईम ओसो जाग ते अनिवार्य रूप ते जनता ना मांग कुना अनुसार आयवा अनिवार्य रूप ते जनता नगडल अलग किसिंतांग। कठमुल्लावाद, अनुभववाद, फरमानशाही, दुमछल्लावाद, संकीर्णतावाद, नौकरशाही ओसो कामा कीयानास्के अहंकारपूर्ण रुझान लागू कीयाना लेक्काटवु गलत रुझान कु नुकसान बारांकु कींतांग। ओसो इव रुझान कुना शिकार आता लोकुर इविन किन बारांकु दूर कीयाना, बारांकु इत्तेके इव गलतिंग मनाकिन जनता तल अलग कींतांग। मना कांग्रेस पूरा पार्टी किन सतर्क मंदाना ओसो बदे

वेने पद ते काम कीयाना बोरे वेने कामरेड जनता तल अलग आयनायो इंजी ध्यान हियाना इंजी आह्वान कींता। पार्टी हर कामरेड किन जनता पोरो जीवा कीयाना ओसो जनता पोल्लोंग ध्यान हीसी केंजना इंजी करिहना। बेगा हत्तेकाई जनता संगे कलियसी मंदाना ओसो जनता पोरो आयवा जनता नड्मा कलियसी मंदाना। ओरा वर्तमान स्तर किन ध्यान ते तासिसी जागृत कीयाना ओना राजनीतिक चेतना किन बेरसी कीयाना। तीरम-तीरम अद कालम ते ओसो अद जागा ता अंदरूनी ओसो बाहरी परिस्थिति ता अनुसार ताकला मदद कीयाना। फरमानशाही पोरो अमल कीयाना सब्बे रकम ता काम गलत मंतांग, बारांकु इत्तेके जनता ना राजनीतिक चेतना ता स्तर तुकू मुन्ने व्यक्तिगत नियम कुना उल्लंघन कियाला रुझान जल्दबाजी ता बीमारी किन तोहिंता। मना कामरेड्स ओरू बद पोल्लो किन खुद समझेमांतोरो अवु पोल्लोंग किन जनता वेने समझेमांता इंजी आल्सानायो। आम जनता अव पोल्लोंग किन समझेमांता लेवेक मायो, अदु कार्यवाही काजे तैयार मंता हिल्वे हिल्ले, अदिना जानकारी सिर्फ जनता नड्मा हत्तास्के ओसो जांच-पड़ताल कित्तास्कने दोरकिंता। माटु इद्रम कित्तेके माटे फरमानशाही बनेमायना तुकू बचेमांतोम। बदे वेने काम लोप्पा तोकर पोयसी ताकना रुझान लागू कीयाना वेने गलत मंता, बारांकु इत्तेके जनता ना राजनीतिक चेतना ता स्तर तल पेरके अरना ओसो जनता किन मुन्ने नेतृत्व कीयाना नियम ता उल्लंघन कीयाना रुझान सुस्ती ता बीमारी किन तोहिंता। मना कामरेड्स तम्मा इंजे एवनल समझेमायवा मत्ता पोल्लोंग किन वेने जनता समझेमांता इंजी आल्सनायो। हमेशा जनता माकिनकु मुन्ने मंदिता अनि ओसो उंदी डाका मुन्ने दायना लालच कियाला तैयार मंदिता। इद्रम आतेकाई मना कामरेड्स जनता ना नेता लोरा भूमिका निभेकिया परबोर आंतोर। उचुन पेरके अरता तत्व कुना तोकर पोयसी तार्कीतोर, ओराए विचार कुन लागू कींतोर, इदे आयवा ओराए विचार कुन व्यापक जनता ना विचार समझेमायना गलती वेने कींतोर। संक्षिप्त ते वेहाना इत्तेके हर कामरेड, वरोर कम्युनिस्ट ना पोल्लोंग ओसो काम ता सबसे बेहरा परीक्षा ओरू जनता मा बेहरा संख्या ता सर्वोच्च अधिकार कुना अनुसार

मंता या हिल्ले, लेवेके जनता ओरा बेहरा संख्या ते समर्थन कींता या कीवो इंदाना पोल्लो पोरो आधार आसी इंजी समझेमायना। हर कामरेड किन माटु जनता पोरो भरोसा कीयाना, ओसो जनता ना असीमित सृजन-शक्ति पोरो पक्का विश्वास कियकाल, माटु जनता पोरो विश्वास कित्तेके ओसो अदिना संगे कलियसी मत्तेके माटु हर मुश्किल पोरो काबू किया परितोम, माकिन बदे वने दुश्मन पेरके अरहा परवो ओसो माटु हर दुश्मन किन पेरके अरहितोम इंजी समझेमायला काजे मदद कीयाना।

जीवा लोप्पाटल आत्मालोचना कीयाना उंदी दूसरा विशेषता मंता। इदु मना पार्टी ओसो बाकी सब्बे राजनीतिक पार्टिंग नडमा ता अंतर किन तोहिंता। माटु वेहत्ता लेक्का, बदे कोली ते नियमित रूप ते विचार हैयना ओसो साफ-सफाई कीयाना जरूरत मंदिता। उंदी हट्टो मंता “पोंगना एरु बस्केने जाबुर पोय्यो ओसो कीवाड ता कब्जा किन बस्केने एल्लुम पोय्यो”। इत्तेके बद चीज लगातार गतिशील मंदिता अदिना लोप्पा किटाणु ओसो दूसरा बदे जीव-जंतु ता घुसपैठ आया परवो। मना काम ता नियमित रूप ते जांच किसोर मंदाना, इद प्रक्रिया ते उंदी जनवादी कार्यशैली ता विकास कीयाना, आलोचना-आत्मालोचना तल वेरियानायो। इद्रम ता लोकुरा लोप्पा इस्तेमाल आसोर मत्ता चीनी हट्टोंग किन लागू कीयाना- “निम्मा बातल पुत्तिनो अदु पेरके-मुन्ने आयवा लेवा सब्बे वेहा”, “वेहानोर किन दोषी इनवा लेवा ओना पोल्ल्लोंग किन उंदी चेतावनी समझेमायना”, “निम्मा गलती कित्तेके अविन सुधरे कीयाना ओसो निम्मा गलती कीवेके अविनगडल बचेमायना”- सिर्फ इदे तरीका संगे माटु मना कामरेड्स लोरा विचार ओसो मना पार्टी-संगठन किन सब्बे रकम राजनीतिक डुंडुल ओसो किटाणु तल बचे किया परितोम। दोष-निवारण आंदोलन ता लक्ष्य “मुन्ने आयना गलतिंगनिगडल बचेमायला केज अद बीमारी ता इलाज कीयाना” आंदू इदु वेल्ले ज्यादा कारगर साबित आता बारांकु इत्तेके तीना लोप्पा आलोचना ओसो आत्मालोचना जीवा कीसि ओसो ईमानदारी ते कित्ताद मंता, पोरो-पोरो ओसो तोड़-मरोड़ कीसि कित्ताद हिल्ले। माटु चीनी कम्युनिस्ट लोर मना सब्बे कार्यवाहिंग पोरो आधार आसी व्यापक

रूप ते चीनी जनता ना सर्वोच्च अधिकार कुन बने कीतोम। मना काम उंदी पूर्ण न्यायिक काम आंदु इंजी विश्वास कीतोम, इद्रम माटु बदे वेने रकम ता व्यक्तिगत कुरबानी हियाला पेरके मन्मोम आंतोम ओसो मना काम काजे हमेशा मना जीवा हियाला तैयार मंतोम। अदिन काजे जनता जरूरत अनुसार हिलवा विचार, दृष्टिकोण लेवेके तरीकांग किन त्याग कियाला काजे माटु बद्रम पेरके-मुन्ने आयोम? माटु बद्रम राजनीतिक दुंडुल ओसो किटाणुंग संगे मना साफ मोक्कम किन गंदा कीयाना लेवेके मना स्वास्थ्य किन नुकसान कीयाना? गिनती हिलवाचोन क्रांतिकारी शहीद लोर जनता ना अधिकार काजे तम्मा जीवा ता बलिदान हित्ताद मंता ओसो माटु पिस्ता लोकर किन बस्के ओरा सुरता वांता अस्के मावा जीवा वेल्ल दुक्कम संगे निंडिता-इद्रम ता परिस्थिति ते माटु मना निजी अधिकार किन बलिदान बद्रम कीवोम ओसो मना गलतिंग किन दूर बद्रम कीवोम?

कामरेड्स! इद कांग्रेस समाप्त आयार अस्के माटु युद्ध मोर्चा ते दायकोम, इद कांग्रेस ता फैसलांग ना मार्गदर्शन ते जापानी आक्रमणकारिर कि आखरी हार तीहची उंदी पूना चीन ता निर्माण कियाला काजे संघर्ष कियाकोम। इद उद्देश्य किन पूरा कियाला काजे माटु मना देश ता पूरा जनता संगे एकता कियाकोम। नन्ना ओसो उंदी बेरा दुहरे कियाला आल्सा मंतान, माटु बदे वेने वर्ग, बदे वेने राजनीतिक पार्टी, बदे वेने सामाजिक ग्रुप लेवेके मानेय ना संगे एकता कियाला तैयार मंतोम। मति तीना काजे अदु जापानी आक्रमणकारिर किन हारे कियाला काजे, उंदी पूना चीन ता निर्माण कीयाना दिना पक्षपोषण कीयाना। इद उद्देश्य किन पूरा कियाला काजे माटु संगठन ओसो अनुशासन ता जनवादी केंद्रीयतावादी नियम कुना पोरो आधार आसी मना पार्टी ता सब्बे ताकत कुन मजबूती ते एकताबद्ध कीयाना। माटु पार्टी कार्यक्रम, संविधान ओसो निर्णय कुना पालन कीयाना सब्बे कामरेड्स संगे एकता कीयाना। उत्तरी अभियान ता कालम ते मना पार्टी सदस्य लोरा संख्या 60,000 तुक कम मत्ता। तीना लोप्पाटल ज्यादातर लोकर किन पेरके दुश्मन तो तितर-बितर कीसितोर। भूमि-क्रांति युद्ध कालम ते मना सदस्य लोरा संख्या 3,00,000

तुकू मत्ता, ओसो ओरा लोप्पाटल वेने ज्यादातर लोकर किन दुश्मन तोर तितर-बितर कीसितोर। इंजे मना सदस्य लोरा संख्या 12,00,000 तुकू ज्यादा मंता। इंजे माटु बदे वेने परिस्थिति ते दुश्मन किन मना लोकर कुन तितर-बितर कियाला हियानायो। माटु इव मूंड कालम कुना अनुभव तल फायदा एता परतेके, माटु नम्र मंदाना घमंड तल जेक मंदाना, पार्टी लोप्पा सब्बे कामरेड्स संगे एकता किन ओसो पार्टी तुकू बाहर पूरा जनता ना संगे मना एकता किन सुदृढ बने कीयाना लोप्पा कामयाबी दोरकी कितेके माटु जरूर जापानी आक्रमणकारि ओसो ओरा तोकर पोयसी ताकना पालतू नैकुन दृढतापूर्वक, सर्वांगीण रूप ते, समग्र रूप ते ओसो सम्पूर्ण रूप ते नष्ट किया परितोम अनि उंदी नवजनवादी चीन ता निर्माण किया परितोम।

मूंड क्रांतिकारी कालमकु ओसो खासकर जापानी आक्रमण विरोधी युद्ध कालम ता अनुभव संगे माटु ओसो मना पूरा चीनी जनता, चीनी कम्युनिस्ट पार्टी ता कोशिश लेवा ओसो चीनी कम्युनिस्ट लोरा चीनी जनता ना मुख्य समर्थन हिल्ला चीन तन्ना स्वाधीनता ओसो मुक्ति इनपडे दोरकी किया परवो इंजी ओसो तन्ना औद्योगिक ओसो कृषि आधुनिकीकरण बिल्कुल किया परो इंजी पक्का विश्वास मंता।

कामरेड्स! मूंड क्रांतिकारी कालम कुना अनुभव कुना संगे लैस मत्ता चीनी कम्युनिस्ट पार्टी मत्ताचोन जोम माटु मना महान राजनीतिक काम कि जरूर पूरा किया परितोम इंजी नाकिन पक्का विश्वास मंता।

हजारो शहीद लोर वेल्ले बहादूरी ते जनता काजे तन्ना पिस्वल ता बलिदान हित्ताद मंता। वाटु मनम ओरा झंडा पोरो तेहकाला ओसो ओरा नेत्तुर संगे पंडता हरींते ताकसोरे मुन्ने दायकाल!

जल्दिए उंदी नवजनवादी चीन ता जन्म आयार। वाटू मनम अद महान दिव्या ता अभिनंदन कियाकाल!

नोट

1. चीन राष्ट्रीय मुक्ति हिरावल कोर, इदिन किन संक्षिप्त रूप ते “राष्ट्रीय हिरावल कोर” पोरोल हितोर, इदु उंदी क्रांतिकारी नौजवान संगठन मत्ता। इदिन किन चीनी कम्युनिस्ट पार्टी ता नेतृत्व ते 9 दिसम्बर 1935 ता आंदोलन ते शामिल आता प्रगतिशील नौजवान लोर 1936 ते गठन कीसि मत्तोर। प्रतिरोध युद्ध शुरू आता पेरेके इदिना वेल्ले सदस्य लोर फौजी कार्यवाहिंग लोप्पा शामिल आतोर अनि दुश्मन ता मोर्चा ता पृष्ठभाग ता आधार इलाकांग ना स्थापना कियाला काजे काम कित्तोर। क्वोमिंगतांग इलाकांग लोप्पा राष्ट्रीय हिरावल कोर ता संगठन किन च्यांग कार्ई-शेक सरकार 1938 ते जबरन भंग कित्ता। मुक्त इलाका ने मत्ता संगठन कुन, इदिनकुन वेने बेहरा स्तर ते मत्ता देशोद्धार नौजवान संघ लोप्पा काल्पसितोर।
2. मूंड कम्युनिस्ट विरोधी हमलांग ना विस्तृ विवरण काजे इदे ग्रन्थ लोप्पा “क्वोमिंगतांग ता केंद्रीय कार्यकारिणी कमेटी ता ग्यारवीं पूर्ण अधिवेशन ओसो तीसरी जन राजनीतिक परिषद ता दूसरा अधिवेशन ता बारे ते उंदी टिप्पणी” हूडाटू।
3. स्कोबी यूनान ते ब्रिटिश साम्राज्यवादीरा आक्रमणकारी सेनांग ना कमांडर मत्तोर। अक्तूबर 1944 ते जर्मन आक्रमणकारि योरप महाद्वीप ते हारेमासी पेरेके गुचतोर, अद कालम ते स्कोबी ना फौज यूनान ते नेंगता अनि संगेने देश तुकू बाहर लंडन ते बने कित्ता प्रतिक्रियावादी यूनानी सरकार किन वेने ओता। स्कोबी जर्मन आक्रमणकारिा खिलाफ दीर्घकालीन वीरतापूर्वक संघर्ष कित्ता यूनान ता जन-मुक्ति सेना पोरो आक्रमण कियाला ओसो यूनानी देशभक्त लोरा कत्लेआम कियाला सरकार ता निर्देश कित्तोर अनि सहायता कित्तोर, इद्रमे यूनान लोप्पा नेतुर डोड्डांग पोंगी कित्तोर।
4. “पाओ-च्या” उंदी रकम ता प्रशासनिक व्यवस्था मत्ता तीना संगे क्वोमिंगतांग प्रतिक्रियावादी गुट बुनियादी स्तर ते तम्मा फासीवादी शासन किन लागू कियानदु। 1 अगस्त 1932 ते च्यांग कार्ई-शेक हनान, हुपे ओसो आनह्वेइ इव मूंड इलाकांग लोप्पा “काउंटिंग लोप्पा ‘पाओ’ ओसो ‘च्या’ किन संगठित कीयाना अनि जनगणना कीयाना नियम” कुन जारी कित्तोर। इव “नियम” कुना लोप्पा “‘पाओ’ ओसो ‘च्या’ किन परिवार पोरो आधार आसी संगठित कीयाना व्यवस्था मत्ता। हर परिवार ता हर ‘च्या’ तीना लोप्पा दस परिवार मंदितांग, ओसो हर ‘पाओ’ तीना लोप्पा दस ‘च्या’ मंदितांग, वरोर मुखियाल मंदाना” इंजी मत्ता। पडोसी लोर वरोर-दूसरो ना पोरो कोंडा वाटसी तासना ओसो ओरा जानकारी अधिकारि किन हियाना इंजी मांगा कियानोर, ओरा लोप्पाटल वरोर वेने अपराधी साबित आतेके सब्बेतोर किन सजा दोरकनादु। बेगार कीयाना प्रतिक्रांतिकारी तरीका वेने तय कित्ता

मत्ता। 7 नवम्बर 1934 ते क्वोमिंगतांग सरकार अधिकारिक रूप ते फासीवादी शासन ता इद व्यवस्था शासन लोप्पा मत्ता सब्बे प्रान्त ओसो म्युनिसिपलटिंग लोप्पा लागू कीयाना इंजी घोषणा कित्ता।

5. इगा क्वोमिंगतांग सरकार लागू कित्ता सामंती ओसो दलाल-पूंजीवादी फासीवादी शिक्षा ता बारे ते वेहत्ताद मंता।
6. चीन, अमेरिका ओसो ब्रिटिश नवम्बर 1943 ते कित्ता काहिरा सम्मेल काहिरा घोषणा चारी कित्ता ताना लोप्पा स्पष्ट रूप ते थाइवान ओसो उचुक प्रदेश कु चीन किन वापिस कीयाना इंजी वेहत्ताद मत्ता। जून 1950 ते अमेरिका सरकार इद समझौता किन खुल्लमखुल्ला उल्लंघन किसोरे तन्ना नौबेडा थाइवान पोरो कब्जा कियाला लोहता। इद्रम चीन किन थाइवान पोरो कब्जा कीयाना कोशिश किन विफल कीयाना कोशिश कित्ता।
7. अमेइ मेट्टा सखवान प्रांत ता दक्षिण-पश्चिम हिस्सा ने उंदी प्रसिद्ध मेट्टा मंता। इगा सखवान प्रान्त ता उंदी मेट्टा इलाका ता बारे ते रास्ताद मंता। इदु जापानी आक्रमण विरोधी युद्ध लोप्पा च्यांग काई-शेक गुट काजे आखरी डेरा लेक्का काम कित्ता।
8. “माओ त्सेतुंग ना संकलित रचनांग” ग्रन्थ 2 ता लेख “प्रतिक्रियावादीर किन सजा हिया लागियर”, “सब्बे जापान विरोधी ताकत कुन एकताबद्ध कीयाना ओसो कम्युनिस्ट-विरोधी कट्टरतावादिरा खिलाफ संघर्ष कीयाना”, “क्वोमिंगतांग तिंची दस मांगकु” हूडाटू।
9. डा. सुन यात-सेन ना 10 नवम्बर 1924 ता “उत्तर बगिल दायाना ता बारे ते स्टेटमेंट” तल पोयताद मंता।
10. इगा च्यांग काई-शेक ना प्रतिक्रांतिकारी पुस्तक “चीन ता पिस्वल” लोप्पा रास्ता अंगडम कुना बारे ते वेहत्ताद मंता।
11. अटलान्टिक चार्टर अमेरिका ओसो ब्रिटिश अगस्त 1941 ते अटलान्टिक सम्मेलन समाप्त आता पेरके जारी कित्ता। मास्को सम्मेलन अक्तूबर 1942 ते सोवियत संघ, अमेरिका ओसो ब्रिटिश ता विदेश मंत्रि कित्तादु आंदू। सोवियत संघ, अमेरिका ओसो क्रीमिया सम्मेलन फरवरी 1945 ते याल्टा लोप्पा कित्तादु मत्ता। इव सब्बे अन्तरराष्ट्रीय सम्मेलन कुन लोप्पा शामिल आयना पक्ष तम्मा समझौतांग लोप्पा अवु फासीवादी जर्मन ओसो जापान संगे कलियसी मंजी हारे कियानुंग ओसो युद्ध पेरके आक्रमणकारी ताकत ओसो फासीवाद ता पिस्ता कुना पुनरुत्थान किन रोमी कियानुंग, विश्व-शांति बने कियानुंग, सब्बे देश कुना जनता किन स्वाधीनता, जनवाद ता इच्छांग किन पूरा कियाला मदद कियानुंग इंजी संकल्प एतद मंता। मति युद्ध तुकु तुरंत पेरके अमेरिका ओसो ब्रिटिश ता सरकारकु इव सब्बे अन्तर्राष्ट्रीय समझौतांग कुना उल्लंघन कीतांग।

12. चीन ता मुक्त इलाकांग ना प्रतिनिधि ना रूप ते कामरेड तुंग पी-ऊ अन्तरराष्ट्रीय संगठन ता बारे ते संयुक्त राष्ट्र सम्मेलन लोप्पा शामिल आतोर। इदु सम्मेलन अप्रैल तल जून 1945 एवनल सान फ्रांसिस्को ते केयताद मत्ता ओसो तीना लोप्पा 50 देश कुना प्रतिनिधि लोर शामिल आसी मत्तोर। मास्को ओसो तेहरान सम्मेलन कुना निर्णय अनुसार अगस्त अक्तुबर 1944 एवनल सोवियत संघ, अमेरिका, ब्रिटिश ओसो चीन ता प्रतिनिधि लोर अमेरिका ता डम्बार्टन ओक्स पोरोल ता जागा ते संयुक्त राष्ट्र संघ ता संगठन ता बारे ते प्रस्ताव ता मसौदा तैयार कीसि मत्तोर।
13. चीनी कम्युनिस्ट पार्टी ता सातवीं राष्ट्रीय कांग्रेस पेरके येनान लोप्पा चीन ता मुक्त इलाकांग ना जनता ना सम्मेलन केयला काजे उंदी तैयारी कमेटी बने कित्ताद मत्ता। अदु उंदी उदघाटन अधिवेशन वेने कित्ता ताना लोप्पा सब्बे मुक्त इलाकांग ना प्रतिनिधि शामिल आतोर। मति जापान ता आत्मसमर्पण पेरके परिस्थिति बदलेमाता अनि चीन ता मुक्त इलाकांग ना जनता ना सम्मेलन कैसल आता।

बकवल मुयतोर, मेट्टांग कारतोर

11 जून 1945

इदु चीनी कम्युनिस्ट पार्टी ता सातवीं राष्ट्रीय कांग्रेस लोप्पा कामरेड माओ त्सेतुंग हित्ता समापन भाषण आंदू!

मना कांग्रेस वेल्ले बेस सफल आता। माटु मूंड काम कितोम। पहली, माटु पार्टी कार्यदिशा तय कीतोम- अदु मना पार्टी ता नेतृत्व ते जापानी आक्रमणकारि किन हारे किया परना इंजी साहस संगे जनता किन गोलबंद कीयाना, जनशक्ति ता विस्तार कीयाना, पूरा जनता किन मुक्त कीयाना ओसो उंदी नवजनवादी चीन ता स्थापना कीयाना। दूसरा, माटु पार्टी ता पूना संविधान स्वीकार कित्ता मंता। तीसरा, माटु पार्टी ता नेतृत्वकारी संस्था-केंद्रीय कमेटी किन चुने कित्ताद मंता। इंजेटल मना काम पार्टी ता कार्यदिशा किन लागू कीयाना ओसो सब्बे सदस्य लोरा नेतृत्व कीयानादु मंता। मना कांग्रेस जीत कांग्रेस आंदू, मना कांग्रेस एकता ता कांग्रेस आंदू। प्रतिनिधि लोर मूंड रिपोर्ट कुना पोरो बेसता विचार पेश कित्तोर। वेल्ले कामरेड्स आत्मालोचना कित्तोर, एकता ता उद्देश्य किन ध्यान ते तासिसी आत्मालोचना कित्तोर। इद उद्देश्य किन ध्यान ते तासिसी आत्मालोचना संगे एकता दोरकी कित्ताद मंता। इद कांग्रेस एकता किन आत्मालोचना किन ओसो पार्टी लोप्पा जनवाद लागू कीयाना आदर्श बने कित्ता।

इद कांग्रेस ता समाप्त आता पेरके वेल्ले कामरेड्स तम्मा काम कीयाना जागा ने ओसो विभिन्ना उद्ध मोर्चांग ने दायनुर। कामरेड्स माटू बेगाग हतेकाई, कांग्रेस ता कार्यदिशा ता प्रचार कीयाना ओसो पार्टी सदस्य लोरा संगे व्यापक जनता किन समझेकीयाना।

इद कांग्रेस ता कार्यदिशा ता प्रचार कियाला मन्ना उद्देश्य मना पार्टी ओसो पूरा जनता लोप्पा क्रांति ता निश्चित जीत पोरो विश्वास पैदा कीयानादु मंता। सबसे मुन्ने माटु दृढ़ संकल्प ओसो कुरबानी तुकू वेरियवा लेवा हर रकम ता मुश्किल कुन दूर किसोरे जीत हासिल किया परना लेक्का हिरावल दस्ता ता राजनीतिक चेतना किन बेरसी कीयाना। मति इदे हालो, माटु पूरा जनता ना राजनीतिक चेतनाकिन वेने जागृत कीयाना अस्केने अदु जीत काजे तन्ना मर्जी ते ओसो खुशी-खुशी ते मना संगे कै संगे कै काल्पसी लड़ेमायरा। माटु पूरा जनता किन चीन चीनी जनताना आंदू, प्रतिक्रियावादिरादु आयो इंजी विश्वास संगे वेहना। प्राचीन कालम ते चीन लोप्पा उंदी नीतिकथा मत्ता अदिना हेडिंग “बकवल मुयतोर मेड्वांग कारतोर” इंजी मत्ता। इदु नीतिकथा पाड़ना काल ते वरोर मुयतोर मानेय ना बारे ते वेहा मंता, वीरु उत्तरी चीन लोप्पा मंदानोर, सब्बे तोर वीन किन “उत्तरी मेड्वा ता बकवल मुयतोर” इंदोनोर। ओनो लोता किवाड़ दक्षिण बगिल मत्ता। ताना मुन्ने थाएहांग, वांगऊ पोरोल ता रेंडु बेहरा मेड्वांग मत्तांगा इवु अद हरदे वेल्ले बाधा वाटनवु। उंदी दिया ओरू तन्ना पकोर किन केयतोर अनि कैदे पावड़ा पोयसी दृढ़ निश्चय संगे रेंडासी मेड्वांग किन कारना शुरू कितोर। वरोर दूसरोर मुयतोर मत्तोर ओनकिन अगा सब्बे तोरो “बुद्धिमान मुयतोर” इंदानोर। ओरकिन हूडसी मजाक उड़े किसोरे इत्तोर:- “मीटु बचोन बकवल मंतिर अदिनके इद काम किया मंतिर! मीटु इव रेंडु मेड्वांग किन कारा परविरा।” बकवल मुयतोर जवाब हीतोर: “नन्ना डोलता पेरके नावा मर्री इद काम कियानुर, नावा मर्री ना पेरके नावा पोतालोर ओरा पेरके परपोता लोर इद्रमे पीड़ी-पीड़ी इद काम किन जारी तासनू। इव मेड्वा वेल्ले बेहरा मंतांग मति इदिनकु बेहरा आया परवांग, माटु इविन बचोन कारसोर दायकोम अचोने इवु सुडला आसोर दायनुंगा। इद्रम कित्तेके माटु इविन किन बद्रम कारा परवोम?” बुद्धिमान मुयतोर ना गलत विचार कुना खंडन कित्ता पेरके ओरू रोज अव मेड्वांग किन कारना जारी तासतोर। तन्ना विश्वास लोप्पा उचुन वेने कमी वायला हीवोर। इदिना हूडसी भगवान वेल्ले प्रभावित आतोर ओरू इरवुर देवदूत लोर किन लोहतोर। अवु रेंडासी मेड्वांग

किन तम्मा मोरकुल पोरो तेहसी ओतांगा।¹ नेंडु चीनी जनता ना पोरो वेने रेंडु वेल्ले बेहरा मेड्वांग मंतांगा। इविना पोरोल साम्राज्यवाद ओसो दूसरा सामंतवाद। चीनी कम्युनिस्ट पार्टी वेल्ले मुन्ने इव रेंडासी मेड्वा किन तेहकसी वाटना पक्का लक्ष्य बने कित्ता। माटु मना लक्ष्य पोरो डटेमासी मंदाना ओसो लगातर काम किसोर मंदाना अस्के माटु वेने भगवान किन प्रभावित किया परितोमा। मावा भगवान चीनी जनताए आंदू दूसरा बदे आयो। अदु तेदतेके मना संगे इव मेड्वांग किन तरवतेके माटु वने इविन बारांकु गुचिह किया परवोम?

निन्ने अमेरिका दायना इरवुर अमेरिकी लोरा संगे पोल्लोंग कीयानास्के इतान अमेरिका सरकार मावा मोदोल कोय्यना कोशिश किया मंता, अदिन किन इद्रम कीयाना ता अनुमति हिल्ले। कम्युनिस्ट लोरा विरुद्ध च्यांग काई-शेक ना मदद कीयाना अमेरिका सरकार ता नीति ता माटु विरोध कीतोमा। मति माकिन अमेरिका जनता ओसो अमेरिका सरकार नडना ओसो दूसरा अमेरिका सरकार लोप्पा नीति-निर्माता ओसो अविना अनुसार आम कार्मचारिरा नडमा कीयाना जरूरत मंता। नन्ना वीर इरवुरासी अमेरिकन लोरकिन इतान, “मीटु मीवा सरकार ता नीति-निर्माता लोरकिन वेहाटु - माटु मीटु अमेरिकन लोर किन मुक्त इलाकांग लोप्पा दायना अनुमति मीटु मीवा नीति कम्युनिस्ट लोरा विरुद्ध च्यांग काई-शेक ना मदद कीयाना मंता ओसो माकिन सतर्क मंदा लागिंगता इंजी हीवोमा। मीटु मुक्त इलाकांग लोप्पा दाया परितंर मंति ताना काजे मीवा लक्ष्य जापान खिलाफ लडेमायनदु मंदाना। मति इदिना काजे सबसे मुन्ने उंदी समझौता किया लागियर। माटु मीकिन हिके-हके वेलियना अनुमति हिवोमा। पैट्रिक जे. हरले चीनी कम्युनिस्ट पार्टी संगे एकता कीयानायो इंजी खुलेआम ऐलान कित्तोर।² मति मीटु मावा मुक्त इलाकांग लोप्पा वासी हिके-हके बारांकु वेलिया मंतिर?”

कम्युनिस्ट लोरा विरुद्ध च्यांग काई-शेक ना मदद कीयाना अमेरिका सरकार ता नीति तल अमेरिका प्रतिक्रियावादीर बचोन लज्जा हिल्वोर मंतोरो दिसिंता। मति चीनी ओसो विदेशी प्रतिक्रियावादिरा चीनी जनता

किन जीत हासिल कियाला रोमी कीयाना सब्बे षड्यंत्र जरूर विफल आयनुंगा। वर्तमान दुनिया ता जनवादी ताकत कुना धाराए मुख्य धारा मंता। ओसो जनवाद-विरोधी प्रतिक्रियावादी धारा सिर्फ उंदी प्रतिकूल धारा आंदू प्रतिक्रियावादी प्रतिकूल धारा राष्ट्रीय स्वाधीनता ओसो जनता ना लोकशाही ता मुख्य धारा किन पोहहना कोशिश किया मंता मति अदु मुख्य धारा बस्केने बनेमाया परवो। नेंडु वेने स्टालिन बचोनो मुन्ने वेहत्ता लेक्कटा परिस्थितिए मंता, इत्तेके पाड़ना दुनिया ता मूंड बेहरा अन्तरविरोध कु मंतांग, पहला, साम्राज्यवाद देश कुना लोप्पा सर्वहारा वर्ग ओसो पूंजीपति वर्ग नड़मा ता अन्तरविरोध, दूसरा विभिन्न साम्राज्यवादी देश कुना नड़मा ता अन्तरविरोध, तीसरा, उपनिवेश ओसो अर्ध-उपनिवेश ओसो अविना पोरो अधिकार कीयाना साम्राज्यवादी देश कुना नड़मा ता अन्तरविरोधा³ इव मूंडासी बेहरा अन्तरविरोध कु मंतांग इंजीए आयो इवु परताचोन तीव्र रूप ते विस्तृत वेने आया मंतांग। इव अन्तरविरोध मत्तेके, इविना विकास आतेके नेंडु वेने सोवियत संघ-विरोधी, कम्युनिस्ट-विरोधी ओसो जनवाद-विरोधी प्रतिक्रियावादी प्रतिकूल मत्ता धारा विलीन आयारा।

नेंडु चीन लोप्पा रेंडु कांग्रेस ताकी कीयाना प्लानिंग ताका मंता। उंदी क्वोमिंगतांग ता छठी राष्ट्रीय कांग्रेस ओसो दूसरा कम्युनिस्ट पार्टी ता सातवी राष्ट्रीय कांग्रेस। इव रेंडासी ना उद्देश्य बिल्कुल अलग मंता, उंदी ता उद्देश्य कम्युनिस्ट पार्टी ओसो चीन ता जनवादी ताकत कुन खत्म कीयाना ओसो चीन किन हीकट ते वाटसियाना मंता। दूसरा ता उद्देश्य जापानी साम्राज्यवाद ओसो अदिना तोकर पोयसी ताकना- चीनी सामंती ताकत कुना तख्ता पलट कीसि उंदी नवजनवादी चीन ता निर्माण कीयाना अनि चीन किन वेहच ते ओयनादु मंता। इव रेंडासी कार्यदिशांग नड़मा टकराव मंता। माकिन चीनी जनता, चीनी कम्युनिस्ट पार्टी ता नेतृत्व ते ओसो चीनी कम्युनिस्ट पार्टी ता सातवी कांग्रेस ता कार्यदिशा ता मार्गदर्शन ते पूर्ण जीत हासिल कियार अनि क्वोमिंगतांग ता प्रतिक्रांतिकारी कार्यदिशा अनिवार्य रूप ते विफल आयार इंजी पक्का विश्वास मंता।

नोट

1. इदु नीतिकथा “ल्ये चि” पोरोल ता पुस्तक ते रासिस मंता।
2. पैट्रिक जे. हरले अमेरिकी रिपब्लिकन पार्टी ता प्रतिक्रियावादी रानीतिकार मत्तोर। वीरु 1944 ता आखरी ते चीन लोप्पा अमेरिका राजदूत चुनेमातोर। च्यांग काई-शेक ना कम्युनिस्ट-विरोधी नीति ता समर्थ कित्ता कारण ते ओनकिन चीनी जनता ना दृढ़ विरोध ता सामना क्रिया लागता ओसो नवम्बर 1945 ते जबरन त्यागपत्र हिया लागता। चीनी कम्युनिस्ट पार्टी संगे एकता कीयानायो इंजी 2 अप्रैल 1945 ते वाशिंगटन ते अमेरिका विदेश विभाग ता प्रेस सम्मेलन ते हरले कीसि मत्तोर। इद घोषणा ता बारे ते विस्तृत जानकारी दोरकी कियाला काजे इदे ग्रन्थ ता “हरले ओसो च्यांग ना युगल-अभिनय ता टाय-टाय फिस” हेडिंग वाले लेख किन हूडाटू।
3. जे. वी. स्टालिन, “लेनिनवाद ता आधारभूत सिद्धांत” ता पहला भाग, “लेनिनवाद ता ऐतिहासिक स्रोत”।

सेना आत्मनिर्भरता काजे कीयाना उत्पादन ता बारे ते अनि दोष-निवारण ओसो उत्पादन ता महान आंदोलन ता महत्व ता बारे ते

27 अप्रैल 1945

इदु सम्पादकीय कामरेड माओ त्सेतुंग येनान ता "मुक्ति दैनिक" काजे रासिस मत्तोरा

वर्तमान परिस्थिति ते मना सेना किन वेल्ले कठिन परिस्थिति ता सामना किया लागा मंता। अदु विकेंद्रीकृत फौजी कार्यवाहिंग कीयानास्के नेतृत्वकारी सेना राशन जमा कीयाना पूरा जिम्मेदारी तन्ना पोरो एतना इंजी अनुमति हियमूड़ायो, बारांकु इत्तेके इद्रम कीतेक सिर्फ दोड़ ता स्तर ता व्यापक अफसर, सैनिक लोरा पहलकदमी लोप्पा बाधाए आयवा ओरा जरूरतकु वेने पूरा आया परवोंग आयनुंग। माटु इगा "वाटु, कामरेड्स! माटु सब्बे तोर हमला ता मैदान डेयकाल ओसो मना मुश्किल कुन पार कियाकाल इंजी इंदाना।" मना पोरो स्तर ता नेतृत्व मना काम किन कुशलतापूर्वक तय कित्तेके ओसो अदिना अनुसार खुद ता मुश्किल कुन खुद पोरो एतना खुल्ला छूट हीतेके निज्जमे वेल्ले संतोषजनक तरीका ते समस्या हल आया। मति इद्रम कियवा लेवा पोरो स्तर ता नेतृत्व इद्रम ता सब्बे बोजा हमेशा खुद ता हट्टा पोरो कांजिस मत्तेके, अदु इविन निज्जमे तेहा परवो आया। अदु आत्मनिर्भर आसी मुश्किल कुन पार कीयाना छूट हीवेके ओसो व्यापक जनता लोप्पा आत्मनिर्भर आयला गिर्दा कीवेके, पोरो स्तर ता नेतृत्व ओसो अदिना दोड़ काम कियानोर, इरवुरासी खुद किन वेल्ले मुश्किल परिस्थिति ते फंसे कियनुर, वर्तमान परिस्थिति ते समस्या बस्के वेने हल आया परवो आया अनि इद्रमे पोरो स्तर ता

नेतृत्वकारीरा सब्बे कोशिशकु विफल आयनुंग। हत्ता साल ता अनुभव इद पोल्लो किन पूरा साबित कीता। “एकीकृत नेतृत्व ओसो विकेंद्रित व्यवस्था” ता नियम वर्तमान परिस्थिति ते मना मुक्त इलाकांग ना पूरा आर्थिक पिस्वल किन संगठित कीयाना सही नियम साबित आता।

मुक्त इलाकांगना सशस्त्र सेना लोप्पा सैनिक लोरा संख्या 9,00,000 तुकू ज्यादा मंता। जापानी आक्रमणकारिर किन हारे कियाला काजे माटु इद संख्या किन इंजे बचोनो गुना ज्यादा बेरसी किया लागियर। मति इंजे एवनल माटु बदे वेने बाहरी सहायता दोरकताद हिल्ले। वायना कालमे ते इदु सहायता दोरकतेकाई पिस्वल ता साधन इत्तेके माकिन खुदे परहका लागियर। इदिना बारे ते उचुन वेने मनोगतवाद वायला हियानायो। वायना कालम ते माटु मना जरूर मत्ताचोन फौजी फारमेशन कुन विकेंद्रिकृत फौजी कार्यवाहिंग ताकना इलाकानल गुचिह कीसि दुश्मन सामरिक लक्ष्य कुना पोरो हमला कियाला काजे केंद्रित किया लागियर। केंद्रित कार्यवाही काजे बने कित्ता इद्रम ता बेहरा फारमेशन तन्ना आत्म-निर्भरता काजे उत्पादन काम किया परवो, इदिनकु वेने ज्यादा बेहरा पोल्लो ओरकिन वेल्ले बेहरा मात्रा ते राशन सप्लाई कियाला वेने लागियर। सिर्फ पेरके मत्ता स्थानीय फौजी यूनिटकु ओसो प्रादेशिक फौजी फारमेशनकु (अविना संख्या वेल्ले बेहरा मंदियार) मुन्ने लेक्काने रेंडासी काम किसोर मंदितंग-लडेमायना ओसो उत्पादन कीयाना। इद्रम कीयानास्के मना सेना लोप्पा लड़ाई ओसो ट्रेनिंग ते बाधा वांता अदिन काजे मना सेना उत्पादन संगे आंशिक रूप ते आत्मनिर्भर बने मायना काम कलियाला काजे मत्ता मौका ता इस्तेमाल कीयाना?

मना परिस्थिति ते, आत्मनिर्भर काजे खुद सेना कैदे उत्पादन काम कीयानादु बाहरी दृष्टिकोण ते पेरके अरता अविकसित मंदियर मति सार रूप ते अदु प्रगतिशील मंता अदिन काजे इदिना ऐतिहासिक महत्व वेल्ले मंदिता। पोरो-पोरो हूडतेके माटु श्रम-विभाजन ता नियम ता उल्लंघन किया मंतोम। मति मना परिस्थितिंग इत्तेके देश ता गरीबी ओसो फूट (क्वोमिंगतांग ता मुख्य शासक गुट ता अपराध कुना कारण पैदा आता)

किन हूडसी ओसो दीर्घकालीन रूप ते ताकसोर मत्ता विकेंद्रिकृत छापामार युद्ध किन हूडसी माटु इंजे कीयाना काम प्रगतिशील मंता। उचुन ध्यान हीमुट, क्वोमिंगतांग सैनिक बचोन सुस्त ओसो कमजोर मंतोर अनि मुक्त इलाकांग ना मना सेना बद्रम हट्टा-कट्टा ओसो मजबूत मंता! तीना पोरो वेने ध्यान हीमुट- तन्ना आत्मनिर्भरता काजे उत्पादन काम शुरू कीयाना मुन्ने खुद माटु वेने बचोन मुश्किनल कुना सामना कीतोम ओसो उत्पादन काम कित्ता पेरके माटु बचोन ज्यादा बेसता पिस्वल पिस्सा मंतोम! वाटु, बदे रेंडु सेना किन इतेके बदे रेंडु कम्पनिंग- अवु इव रेंडासी तरीकांग लोप्पाटल बद तरीका चुने कियनुंग इंजी पूछेमायकाल। उंदी अविना पिस्वल काजे सब्बे साधन कुना जुगाड़ पोरो स्तर ता नेतृत्व कीयाना ओसो दूसरा पोरो स्तर ता नेतृत्व मीकिन बाताले हीवा मंदाना लेवेके उचुन-उचुन ओसो जरूरत ता हर चीज लेवेके जरूरत मत्ता चीजकुना ज्यादा हिस्सा या आधा तुकू आधा तुकु वेने कम खुद पैदा कियाला हियाना। बेसता रिजल्ट बद तरीका तल वायर? बद तरीका किन लागू कियाला काजे ज्यादा आल्सकिर? आत्मनिर्भरता काजे उत्पादन-कार्य कीयाना साल मेटा गंभीर अनुभव पेरके इद सवाल ता जवाब ते बेसता रिजल्ट दूसरा तरीका तले वायार। अद्रमासी दूसरा तरीका किन लागू कियाला आल्सकोमा। पहली तरीका ता रिजल्ट दूसरा तरीका तुकू ज्यादा बेकार मंदितांग अदिन काजे पहली तरीका लागू कियाला आल्सोमु। बारांकु इतेके दूसरा तरीका मना सेना ता हर मानेय ना पिस्वल किन सुधरे किया परिंता, अनि पहली तरीका वर्तमान कठिन परिस्थितिंंग ना जरूरत किन वेने पूरा किया परवो। अदु पोरो स्तर ता नेतृत्व बचोन जोर वाटसी लागू कियाला आल्सतेकाई अदिनगडल बेसता रिजल्ट पेसा परवो आंता। माटु पोरो हूडतेके “पेरके अरता” ओसो “अविकसित” तरीका लागू किया मंतोम, अदिन काजे मना सेना ता पिस्वल ता साधन कुना कमी दूर कीयाना ओसो मना रहन-सहन ता परिस्थिति किन सुधार किया परिंतोम। अदिना कारण ते हर सैनिक इंजे हट्टा-कट्टा ओसो मजबूत मंतोर, अद्रमासीए माटु खुद वेने मुश्किल ते मत्ता जनता ना कर ता बोजा हल्को किया परतोम ओसो इद्रमे जनता ना समर्थन

दोरकी कित्ताद मंता। माटु इद दीर्घकालीन युद्ध किन जारी तासना ओसो मना सशस्त्र सेनांग किन विस्तार किया परिंतोम। दुश्मन कब्जा ते मत्ता इलाकांग ना एरिया घटेकियाकोम ओसो अंतिम रूप ते आक्रमणकारि किन नाश कीयाना, चीन किन मुक्त कीयाना मना लक्ष्य किन पूरा कियाकोम। इदु पोल्लो उंदी महान ऐतिहासिक महत्व ता पोल्लो आयो या?

सेना आत्मनिर्भरता काजे कीयाना उत्पादन काम तल सिर्फ सेना ता रहन-सहन लोप्पा सुधार आतादु, जनता ना बोजा हल्को आतादु, सेना ता ओसो ज्यादा विस्तार आयना संभव आतादे आयवा तीना संगे इदिना वेल्ले सहायक सफलतांग वेने दोरकतांग। अवु दोड़ रास्ता लेक्का मंतांग।

अफसर ओसो सैनिक लोरा आपसी संबंध लोप्पा सुधारा। अफसर ओसो सैनिक लोर कलियसी मंजी उत्पादन कार्य कींतोर अनि ओरा लेप्पा भाईचारा पैदा आंता।

श्रम पोरो बेसता रुझान- इंजेटा मना फौजी भरती ता व्यवस्था पाड़ना रकम ता किराया ता सेना वाले व्यवस्था आयो ओसो अनिवार्य भरती ता व्यवस्था वेने आयो। मना व्यवस्था उदी तीसरा रकम ता व्यवस्था आंदू, इत्तेके स्वयंसेवक लामबंदी ता व्यवस्था। किराया ता सेना व्यवस्था तल इदु बेस मंता। बारांकु इत्तेके इदु ज्यादा लोकुर किन वेहो। मति अनिवार्य भरती ता व्यवस्था तुकू उचुन कम मंता। मति मना वर्तमान परिस्थितिंग माकिन स्वयंसेवक लोरकिन लामाबंदी ता व्यवस्था लागू कियालाए अनुमति मंता, अनिवार्य भरती ता व्यवस्था लागू कीयाना अनुमति हिल्ले। स्वयंसेवक रूप ते जमा कित्ता सैनिक लोर किन वेल्ले कालम एवनल सैनिक पिस्वल पिस्सा लागिंता, अदिन काजे श्रम पोरो ओरा रुझान बिगडेमाया परिंता। अद्रमासी ओरा उचुन मुल लम्पट बनेमाया परिंतोर लेवेके युद्ध-सरदार लोरा सेना लोप्पा मत्ता गलत आदत कु ओरा लोप्पा वेने वाया परिंतांग। मति सेना आत्मनिर्भर काजे उत्पादन काम शुरू कित्तास्केटल श्रम पोरो बेसता रुझान लागू आया मंता ओसो लम्पट रुझान पोरो काबू कित्ताद मंता।

अनुशासन लोप्पा दृढ़ता। उत्पादन कीयानास्के लागू कीयाना श्रम-अनुशासन लडाईं ता अनुशासन ओसो सैनिक पिस्वल ता अनुशासन किन कमजोर किवा लेवा अदिन किन ओसो ज्यादा मजबूत कीता।

सेना ओसो जनता नडमा ता संबंध लोप्पा सुधार। बेगा उंदी सशस्त्र सेना खुद तन्ना “आत्मनिर्भर” बनेमांता अगा जनता ना सम्पत्ति लोप्पा हस्तक्षेप वेल्ले कम आंता, लेवेके इनपडे आयो आंता। उत्पादन कार्य लोप्पा सेना ओसो जनता श्रम ता आदान-प्रदान कींतोर ओसो वरोर दूसरो ना मदद कींतोर अदिन काजे ओरा आपस ता गोती सुदृढ़ बनेमांता।

सेना लोप्पा सरकार ता शिकायतकु कम दांतांग अनि रेंडासी ना आपसी संबंधकुना लोप्पा सुधार आंता।

जनता ना महान उत्पादन आंदोलन किन प्रोत्साहन हियाना। बेगा उंदी बेरा सेना उत्पादन काम कीयाना शुरू कींता अगा सरकारी संगठनकु ओसो बाकी संगठन कु वेने उत्पादन काम कीयाना जरूरत ओसो ज्यादा स्पष्ट आंता ओसो अवु ज्यादा सक्रियता ते इद काम कींतांग। संगे ने उत्पादन बेरसी कियाला काजे पूरा जनता व्यापक आंदोलन ताकी कीयाना जरूरत वेने स्वाभाविक रूप ते ज्यादा स्पष्ट आंता ओसो आंदोलन वने ज्यादा सक्रियता ते ताकिंता।

दोष-निवारण काजे ओसो उत्पादन काम काजे व्यापक आंदोलन क्रमशः 1942 ओसो 1943 ते शुरूआता। अवु उंदी निर्णायक भूमिका निभे कीतांग अनि नेंड एवनल वेने अदे निर्णायक भूमिका निभे किया मंतांग। दोष-निवारण आंदोलन ता निर्णायक भूमिका मना विचाराधारात्मक पिस्वल ओसो उत्पादन आंदोलन ता निर्णायक भूमिका मना भौतिक पिस्वल ते निभे कींता ओसो इंजे वेने किया मंता। इव रेंडासी कडिंग किन माटु सही टाईम ते चिन्हित किवेके माटु क्रांति ता पूरा चैन किन पोयला वेने परवोम आंतोम। इद्रम आतेके मना संघर्ष मुन्ने दाया परवो आंता।

माटु पुत्ता लेक्का 1937 तुकू मुन्ने पार्टी लोप्पा शामिल आतोर इंजे दसियों हजार लोकुर मंतोर। इंजे मना पार्टी सदस्य लोरा संख्या 12 लाख

तुकू ज्यादा मंता ओसो ज्यादातर किसान लोर, निम्न-पूंजीपति वर्ग ता बाकी हिस्सा नल वातोर मंतोर। वीर कामरेड्स ना क्रांतिकारी जोश वेल्ले बेस मंता ओसो मार्क्सवादी प्रशिक्षण दोरकी कीयाना विचार वेने वीरा लोप्पा मंता। मति वीर कामरेड्स तम्मा संगे मार्क्सवाद संगे मेल तिनवा रुझान कु वेने तत्तोर इंदानदु वने निज्जमें। 1937 तुकू मुन्ने पार्टी ते वातोर पोरो वेने इदे पोल्लो लागू आंता। इदु वेल्ले गंभीर अन्तरविरोध आंदु, उंदी वेल्ले बेहरा मुश्किल आंदू। इद्रम ता परिस्थिति ते मार्क्सवादी शिक्षण ता व्यापक आंदोलन इत्तेके दोष-निवारण आंदोलन माटु ताकी किवा मत्तेके माटु परताचोन स्पीड ते मुन्ने दाया परसी मन्ने मा? बदे डावुट हिल्ला इनपडे मुन्ने दाया परवोमा। मति माटु कार्यकर्ता लोरा उंदी बेहरा संख्या नडमा इद अन्तरविरोध किन पार्टी लोप्पा मत्ता सर्वहारा विचारधारा ओसो गैर-सर्वहारा विचारधारांग (इविना लोप्पा निम्न-पूंजीपति वर्ग, पूंजीपति वर्ग ओसो जमींदार वर्ग ता विचारधारा वेने, मति मुख्य रूप ते निम्न पूंजीपति वर्ग ता विचारधारा शामिल मंता) नडमा ता अन्तरविरोध किन इत्तेके मार्क्सवादी विचाराधारा ओसो गैर-मार्क्सवादी विचारधारांग नडमा ता अन्तरविरोध किन हल कित्ताद मंता लेवेके हल कीयाना कामा इंजे शुरू मंता। अदिन काजे पार्टी उंदी अभूतपूर्व (सम्पूर्ण आयो) विचारधारात्मक, राजनीतिक ओसो संगठनात्मक एकताबद्ध आसी दीर्घकालीन ओसो मजबूत डाका वाटसोरे मुन्ने दाया परिंता। इंजेटले मना पार्टी ता विकास ओसो ज्यादा आयना अनि मार्क्सवादी विचारधारा ता नियम कुना मार्गदर्शन ते माटु मना पार्टी ता ओसो वेने कारगर तरीका ते मुन्ने विकास किया परिंतोमा।

दूसरा कड़ी उत्पादन काजे कित्ता आंदोनला प्रतिरोध युद्ध आठ साल तल ताका मंता। इद युद्ध शुरू आतास्के मनगा अनाज केरना गेत्तेंग मत्तांगा। मति पेरेंके परिस्थिति बिगड़ेमासोर हत्ता अनि माटु वेल्ले मुश्किल परिस्थिति ते नेंगतोमा। अनाज ता कमी, तिंदाना-निय, होवोर-मिर्या, हूंजना जागा, केरला गेत्तेंग, धन ता कमी आता। इदु वेल्ले बेहरा मुश्किल ओसो गंभीर अन्तरविरोध 1940-43 नडना जापान कित्ता बेहरा आक्रमणकु

ओसो क्वोमिंगांग सरकार ता बेहरा स्तर ता मूंड जन विरोधी हमालांग
 (“कम्युनिस्ट विरोधी हमलांग” ना तुरंत पेरको पैदा आता। माटु इद
 मुशिकल पोरु काबू किवा मत्तेके इदु अन्तरविरोध किन हल किवा मत्तेके
 इदु कड़ी किन मजबूती ते चिन्हित किवा मत्तेके मना जापान विरोधी संघर्ष
 मुन्ने हंजी मनवरे? बिल्कुले मुन्ने दाया परवो आसी मनवर। मति माटु
 उत्पादन कियाल करियतोम ओसो नेंडु वेने करिया मंतोर, अदिन काजे
 माटु सजीव ओसो उंदी ताकतवर पिस्वल पिस्सा मंतोम। उचुके सालकुने
 माटु वेने बदे वेने दुश्मन तल वेरिया लेवा सब्बे रकम ता दुश्मन तल जीत
 हासिल किया परितोम।

इद्रमे दोष-निवारण ओसो उत्पादन काजे शुरू कित्ता रेंडु महान
 आंदोनल कुना ऐतिहासिक महत्व ता बारे ते बदे रकम ता डायुट मंदा परवो
 आंता।

माटु, मनम उंदी डाका मुन्ने दायाकाल मना संघर्ष ता दूसरा काम कुन
 पूरा कीयाना आधार-शिला ता रूप ते इव रेंडासी आंदोलन कुन नालुंग
 बगिल फैले कियाकाल। माटु इद काम किया परतेके चीनी जनता ना पूर्ण
 मुक्ति ता गारंटी आयार।

इंजे वसंत कालम ते विज्जा वीतना टाईम वात्ता। हर मुक्त इलाका
 लोप्पा सब्बे नेतृत्वकारी कामरेड्स, कार्यकर्ता लोर ओसो जनता उत्पादन
 ता कड़ी किन टाईम मत्तास्केने गट्टिंग पोयसी हत्ता साल तुकु वेने ज्यादा
 सफलता दोरकी कीयाना कोशिश कींतोर इंजी आशा कींतोम। खासकर
 बव इलाका ना लोकुर उत्पादन किन विकसित कियाला करियताद हिल्ले
 अगा इयेंड ज्यादा बेहरा कोशिश कु किया लागियार।

हरले ओसो च्यांग जोड़ी ता नाटक फेल आत्ता

10 जुलाई 1945

इद टिप्पणी कामरेड माओ त्सेतुंग शिनद्धा समाचार-एजेन्सी काजे रासिस मत्तोर।

च्यांग कार्ड-शेक ना तानाशाही शासन पोरो पर्दा वाटला काजे चौथी जन राजनीतिक परिषद अधिवेशन ता उद्घाटन 7 जुलाई ते छुंगकिंग लोप्पा ताकता। इदु इंजे एवनल ता सबसे सुडला उद्घाटन-अधिवेशन मत्ता। तीना लोप्पा सिर्फ चीनी कम्युनिस्ट पार्टी ता सदस्य लोरे आयवा परिषद लोप्पा बाकी ग्रूप कुना प्रतिनिधित्व कीयाना सदस्य लोर वेने वायवा मत्तोर। परिषद ता कुल 290 सदस्य लोरा लोप्पाटल सिर्फ 180 सदस्य लोरे शामिल मत्तोर। च्यांग कार्ड-शेक उद्घाटन-अधिवेशन ते दोड़ रास्ता लेक्का वड़कतोर।

राष्ट्रीय असेम्बली केयाना संबंधित सवाल कुना बारे ते सरकार बदे ठोस प्रस्ताव पेश किसोर हिल्ले, अदिन काजे मीटु सब्बेतोर इव सवाल कुना पोरो पूराए विचार-विमर्श किया परितोर। सरकार इव सब्बे सवाल कुना बारे ते मीवा राय किन पूरा सच्चाई ओसो ईमानदारी ते केंजला तैयार मंता।

इयेंड 12 नम्बर ते राष्ट्रीय एसेम्बली समाप्त आयारा। साम्राज्यवाद पैट्रिक जे. हरले मुन्ने च्यांग कार्ड-शेक किन इद्रम कियाला काजे वेल्ले प्रोत्साहन हित्तोर। अद्रमासी च्यांग कार्ड-शेक ना पूना साल ता मौका ते भाषण¹ ते उचुन कड़ापन वात्ता अदिन बचोनो ज्यादा कड़ापन ओना 1 मार्च ता भाषण² ते वासी मत्ता, ताना लोप्पा ओरू 12 नवम्बर ते “राजसत्ता जनता किन सौंपे कियानुर” इंजी ओना संकल्प ता ऐलान कित्तोर। तन्ना 1

मार्च ता भाषण लोप्पा ओरू चीनी कम्युनिस्ट पार्टी ता चीनी जनता ना आम संकल्प पेश कीसि मत्ता प्रस्ताव किन बिल्कुले ठुकेरे कित्तोर अनि सब्बे पार्टिंग ना सम्मेलन केयसी उंदी गठबंधन सरकार ता स्थापना कीयाना इतोर। ओरू चीनी कम्युनिस्ट पार्टी ता सशस्त्र सेनांग ना “पुनर्गठन” कियाला काजे, वरोर अमेरिकी किन काल्पसी मुव्वुर मानेय ना उंदी कमेटी बने कीयाना विचार किन जोश-खरोश संगे पेश कित्तोर। ओरू चीनी कम्युनिस्ट पार्टी किन “कानूनी मान्यता” हियाना इत्तेके चीनी कम्युनिस्ट पार्टी तन्ना सेना किन ओना कैदे सौंपे कीयाना इंजी वेने इंतोर। इव सब्बे पोल्लोंग लोप्पा पैट्रिक जे. हरले साहेब ना पक्ष ता निर्णयात्मक महत्व मंता। 2 अप्रैल ते वाशिंगटन ते हित्ता स्टेटमेंट लोप्पा हरले चीनी कम्युनिस्ट पार्टी ता भूमिक तुकू इनकार कित्तोर, अदिना कामकाज पोलो आरोप वाटना असहयोग ता ऐलान कीयाना अनि इद्रमताए बाकी साम्राज्यवादी अंगडम ता पोल्लोंग कीयाना विडचसी च्यांग काई-शेक ना “राष्ट्रीय असेम्बली” ओसो इद्रम ताए बाकी दुष्टतापूर्ण स्किन कुन बेरसी कियाला पूरा कोशिश कित्तोर। इद्रमे अमेरिका ता हारले ओसो चीन ता च्यांग काई-शेक ना युगल-अभियान ता उद्देश्य चीनी जनता ना क्रूरतापूर्क बली हियानादु मत्ता। अस्केटल इद नाटक ता टांय-टांय फिस आसोर मत्तादु दिस्सा मंता। हर जागा ते इदिन विरोध कियाला काजे गिनती हिल्वाचोन लोकुर तेदा मंतोर, चीनी, विदेशी लोकुरा लोप्पा क्वोमिंगतांग लोप्पा ओसो बाहर रेंडासी जागा ने बदे पार्टी ते शामिल मत्ता लोकर ओसो निर्दलीय लोकुरा लोप्पाडल इदिन विरोध आया मंता। इदिना कारण सिर्फ हरले-च्यांग बचोन तिरहची-तिरहची पोल्लोंग कीतेकाई ओरा असली लक्ष्य चीनी जनता ना अधिकार कुन कुरबान कीयाना, चीनी जनता ना एकता किन तहन-नहस कीयाना ओसो चीन लोप्पा बेहरा स्तर ते गृहयुद्ध शुरू कीयाना, भूमिगत माइन वाटना, फासीवाद विरोधी युद्ध लोप्पा ओसो युद्ध पेरके शांतिपूर्ण परिस्थिति थे मत्ता अमेरिका ओसो बाकी एकताकारी देश कुना जनता ना अधिकार कुन नष्ट कीयानादे मंता। इंजे हरले उचुन कालम काजे बेगाने मकसी बाताल किया मंतोर पुन्नोम अदिन काजेए

च्यांग कार्ड-शेक किन जन राजनीतिक परिषद मुन्ने अंगडम ता कहानी बने किया लागा मंता। मुन्ने 1 मार्च च्यांग कार्ड-शेक इद्रम इत्तोर।

मना देश ता परिस्थिति बाकी देशकुना परिस्थिति तुकू अलग मंता। राष्ट्रीय असेम्बली केयना तुकू मुन्ने, मनगा जनता प्रतिनिधित्व कीयाना लेक्का, सरकार जनता तल सलाह-मशविरा कीसि अदिना राय एतना लेक्का बदे वेने जिम्मेदार संगठन हिल्ला मत्ता।

अद्रम इत्तेके मना पत्रकार साहब लोर “राय” “केंजला” काजे जन राजनीतिक परिषद ते बारांकु वांतोर? ओना अनुसार पूरा चीन लोप्पा “जनता तल सलाह-मशविरा कीसि ओना राय एतना लेक्कटा” बदे वेने “जिम्मेदार संगठन” हिल्ले। तीना लोप्पटल जन राजनीतिक परिषद उंदी “संगठन” ता रूप ते सिर्फ तिंदना-उंडलाकाजे मंता इंजी समझेमांता, ओसो जनरलिज्मो साबह लोर इद संगठन ता पोल्लोग “केंजना” बदे कानूनी आधार हिल्ले इंजी समझेमांता। इद्रम मत्तेकाई जन राजनीतिक परिषद बोगस “राष्ट्रीय” असेम्बली रोमी कीयाना ता बारे ते उंदी वेने पोल्लो वेहो, इदिन बेसे समझेमायमूडायर। मति इद्रम कीसि अदु 1 मार्च ता “शाही हुक्म” ता उल्लंघन कित्ता ओसो “राजद्रोह” ता अपराधी बनेमायर। बदे डायुट हिल्ला जन राजनीतिक परिषद पोरो टीका-टिप्पणी कीयाना सही टाईम इंजे वात्ताद हिल्ले, बारांकु इत्तेके जनरलिज्मो किन “केंजी” कियाला काजे बाताल पुटी किंता इंदानदु हूडला काजे मना किन उचुक दिय्यांग हरीं हूडा लागियर। मति चीनी जनता इद राष्ट्रीय असेम्बली खिलाफ बुलंद विरोध कीयाना शुरू कित्तास्केटल “वैधानिक राजतंत्र” ता मांग कीयाना लोकर वेने मना “बादशाह” ता बारे ते आल्सा मंतोर, अनि अदिनकिन “पडिंग ना संसद”³ केयसी तन्ना गुडंगा ते फांसी वाटना सलाह हिया मंतोर, इदिना परिस्थिति वेने य्वान श-खाए लेक्काने आयो बाहा बोरो पुत्तोर मना “बादशाह” इदिना कारण कै पिंडंगानूर लेवेके पिंडंगोर इंजी? मति इदिना उचुन पोहहा लाग तेके मना “बादशाह” ओसो ओरा नौकर-चाकर लोर जनता किन उचुन सत्ता हासिल किया हीवो आयनुर इंदानदु पक्का मंता।

इद पोल्लो ता फौरी सबूत “बादशाह सलामत” जनता ना परताचोन आलोचना किन “बेलगाम हमलांग” ना पोरोल हित्तोर। ओरू इत्तोर।

...युद्ध ता परिस्थिति ते जापान कब्जा ते मत्ता इलाकांग लोप्पा आम जनता चुनाव कीयाना असंभव मंता। इद्रम मत्तेकाई रेंडु साल मुने क्वोमिंगतांग ता केंद्रीय कार्यकारिणी कमेटी ता पूर्ण अधिवेशन ते युद्ध समाप्त आता पेरके दो साल लोप्पा राष्ट्रीय असेम्बली केयना ओसो वैधानिक सरकार ता स्थापना कीयाना इंजी फैसला आता। मति उचुक पक्ष अस्के बेलगाम हमला कीतांग।

अनि इव हमलांग ना कारण अदु तारीख वेल्ले जेक मत्तादु मत्ता। “बादशाह सलामत” ताना पेरके “युद्ध ता आखरी निर्णय ते लेट आया परिंता इंदानदु हूइसी ओसो युद्ध समाप्त आता पेरके वेने हर जागा जल्दी पुनस्थापित किया परमूडायो, युद्ध परिस्थिति स्थिर आता तुरंत पेरके राष्ट्रीय असेम्बली केयमूडायार इत्तोर।” ओरू वीर लोकुर ओसो उंदी बेरा “बेलगाम हमलांग” कियानूर इंजी आल्सवा मत्तोर। इदिनगडल “बादशाह सलामत” वेल्ले परेशान आतोर। मति चीनी जनता च्यांग काई-शेक ओसो ग्रूप किन पक्का सबक एतिह कीयाना। अनि ओरकिन वेहाना मीटु बाताल इत्तेकाई, बाताल कीतेकाई जनता ना इच्छा ना उल्लंघन कीयाना मीवा बदे वेने चाल किन इनपड़े सहेमायमूडायो इंजी। चीनी जनता बद चीज ता मांग कींता अदु तुरंत जनवादी सुधार कीयाना, इत्तेके राजनीतिक कैदिर किन रिहा कियाला, खुफिया विभाग किन खत्म कीयाना, जनता किन आजादी हियाना ओसो राजनीतिक पार्टिंग किन कानूनी मान्यता हियानादु मंता। माटू इविना लोप्पाटल बदे वेने काम कित्ताद हिल्ले। “राष्ट्रीय असेम्बली” केयना तारीख ता वेने झूठा प्रचार किया मंतिंर। इदिनगडल बदे पाल उंडाना पिल्ला किन वेने धोखा हिया परमूडायो। बस्के एवनल न्यूनतम सत्ता जनवादी सुधार कियमूडायो अस्के एवनल मीवा केयना असेम्बलिंग, अवु बचोन बेहरा-सुडला मत्तेकाई कड़ियता चिकला गुमिया ते वाटसिमूडायार। इदिन मीट “बेलगाम हमलांग” ना पोरोल हीतेकाई इद्रम ता हर धोखाधड़ी ता दृढ़तापूर्वक, सर्वांगीण रूप ते समग्र रूप ते ओसो

सम्पूर्ण रूप ते पर्दाफाश कीयाना। अदिन किन पूराए खत्म कीसियाना। अदिना कारण सिर्फ इद धोखाधड़ीए मंता। उंदी राष्ट्रीय असेम्बली मंदाना लेवेके हिल्ला मंदाना उंदी पोल्लो ओसो न्यूनतम जनवादी सुधार मंदाना ओसो हिल्ला मंदानादु बिल्कुल दूसरा पोल्लो आंदू। इंजे पहली पोल्लो लेवा काम ताका परिंता मति दूसरा पोल्लो किन तुरंत लगू कीयाना। च्यांग काई-शेक ओसो ओना सरकार “जल्दीए रासत्ता जनता किन सौंपे कियाला” तैयार आतेके ओरू “जल्दिए” न्यूनतम जनवादी सुधार कियाला तैयार बारांकु आयोर? क्वोमिंगतांग ता साहेबान! मीटु इव आखरी लाईन पढ़ेमातेके मीकिन चीनी कम्युनिस्ट बद्रमाई मीवा पोरो “बेलगाम हमलांग” किसोर हिल्लेर ओरू सिर्फ उंदी सुडला सवाल पूछेमाया मंतोर। माटु मीकिन उंदी सवाल किया परिंतोमा? मीटु मावा सवाल ता जवाब हियाला पेरके-मुन्ने आयविर बाह? बद सवाल ता जवाब मीटु हियानादु मंता अदु इद्रम मंता। मीटु “राजसत्ता जनता किन सौंपे कियाला” तैयार मंतिर मति जनवादी सुधार कियाला तैयार बारांकु हिल्लिवर?

नोट

1. इदु च्यांग काई-शेक ना 1 जनवरी 1945 ते हिता रेडियो-भाषण आंदू तीनी लोप्पा हत्ता साल जापानी आक्रमणकारिरा कैदे क्वोमिंगतांग फौज कुना हार ता बारे तेने आयवा मनमानी तरिका ते जनता पोरो अंगड़म ता आरोप वाटना ओसो क्वोमिंगतांग ता एकदलीय तानाशाही खत्म कीयाना ओसो उंदी गठबंधन सरकार ता स्थापना ओसो संयुक्त सर्वोच्च कमान बने कियाला काजे देश ता पूरा जनता ओसो पूरा जापान विरोधी पार्टींग ना समर्थन दोरकसी मत्ता प्रस्ताव ता विरोध कितोर। अद्रमासी क्वोमिंगतांग ता एकदलीय तानाशाही किन जारी तासना जिद कितोर, जनता ना आलोचना तल बचेमायला काजे उंदी ढाल ता रूप ते देश ता पूर जनता होंग ते हूड़ना क्वोमिंगतांग नियंत्रित “राष्ट्रीय असेम्बली” केयना पोल्लोंग कितोर।
2. 1 मार्च ते च्यांग काई-शेक छुंगकिंग लोप्पा वैधानिक सरकार स्थापना संघ मुन्ने भाषण हितोर। ताना लोप्पा च्यांग काई-शेक तन्ना “नववर्ष-दिवस

भाषण” लोप्पा वेहत्ता प्रतिक्रियावादी विचार कुना पोरो गड्डिग नितसी मनवा लेवा मुव्वुर लोकुरा कमेटी बने कीयाना ओसो ताना लोप्पा वरोर अमेरिकी प्रतिनिधि वेने मंदांना इंजी वेने प्रस्तावा तासितोरा। इदिन आठवीं राह सेना ओसो पूना चौथी सेना ता “पुनर्गठन” कियाला काजे सौंपे कित्तोरा। इत्तेके अमेरिकी साम्राज्यावादीर किन चीन ता स्थानीय समस्या लोप्पा हस्ताक्षेप कियाला काजे खुल्लमखुल्ला मौका हियांना आंदू।

3. 1923 ते उत्तरी युद्ध-सरदार छाओ खुन हर संसद-सदस्य किन 5,000 चांदी ता डालर रिश्वत हीसी खुद किन “चीन गणराज्य ता प्रेसिडेंट” घोषित कित्तोरा। ओरू रिश्वत हीसी चुनमायना प्रेसिडेंट ना रूप ते बदनाम आतोर अनि बोर संसद-सदस्य लोरकिन रिश्वत हित्तोर ओरकिन “पद्दिग ना संसद ता सदस्य” लोर इंजी केयना शुरू आता। कामरेड माओ त्सेतुंग क्वोमिंगतांग ता बोगस “राष्ट्रीय असेम्बली” ता तुलना “पद्दिग ना संसद” संगे कित्तोरा।

हरले ना नीति ता खतरा ता बारे ते

12 जुलाई 1945

इदु टिप्पणी कामरेड माओ त्सेतुंग शिनह्वा समाचार-एजेन्सी काजे रासिर मत्तोर।

चीन ते मत्ता अमेरिकी राजदूत पैट्रिके जे. हरले प्रतिनिधित्व कीयाना अमेरिका नीति चीन लोप्पा गृहयुद्ध ता संकट पैदा किया मंता। तन्ना प्रतिक्रियावादी नीतिंग किन विडसवा लेवे क्वोमिंगतांग सरकार नेटुक 18 साल मुन्ने तन्ना पुटतास्केटले गृहयुद्ध ता सहारा एतसोर वात्ता। सिर्फ 1936 ते शीआन घटनातास्के ओसो 1937 ता लम्बा दीवार ता दक्षिण ते जापानी आक्रमण कालम ते अदिन किन मजबूर आसी उचुन जोम देशव्यापी गृहयुद्ध किन विडसा लागता। मति 1939 तल स्थानीय स्तर ते गृहयुद्ध वेंडे ताकी कीयाना शुरू कित्ता ताना पेरके बस्केने रोमी कित्ताद हिल्ले। मुन्ने “कम्युनिस्ट लोरा संगे टक्कराव” ता नारा क्वोमिंगतांग सरकार ता तन्ना लोकुरा संगठन काजे इस्तेमाल कीयाना नारा आंदू। अदु जापान प्रतिरोध कीयाना काम किन गौण स्थान हित्ता। इंजे अदु तन्ना पूरा सेना किन जापानी आक्रमणकारिरा प्रतिरोध कियाला आयवा चीन ता मुक्त इलाकांग निगडल “पोहता इलाकांग किन वापिस पोयना” ओसो चीनी कम्युनिस्ट पार्टी किन खत्म कीयाना काम लोप्पा केंद्रित किया मंता। इद परिस्थिति ते प्रतिरोध-युद्ध लोप्पा जीत हासिल कीयाना संघर्ष ओसो युद्ध पेरके शांति निर्माण कीयाना संघर्ष, इव रेंडासी ना दृष्टिकोण ते माटु गंभीरता ते ध्यान हियाना। शहीद प्रसिडेन्ट रूजवेल्ट इद पोल्लो पोरो ध्यान हीसी मत्तोर। अद्रमासी अमेरिका ता हित ते ओरू चीनी कम्युनिस्ट पार्टी पोरो सशस्त्र आक्रमण कीयाना लोप्पा क्वोमिंगतांग किन मदद हियाना

नीति लागू कीयाना तुकू पेरके गुचतोर। नवम्बर 1944 ते हरले रूजवेल्ट ना निजी प्रतिनिधि ना रूप ते येनान ता यात्रा कीस मतोर, अस्के ओरू क्वोमिंगतांग किन एकदलीय तानाशाही किन खत्म कियाला ओसो उंदी जनवादी गठबंधन सरकार ता स्थापन कीयाना ता बारे ते चीनी कम्युनिस्ट पार्टी ता योजना तुकू सहमति पेश कित्तोर। मति पेरके ओरू तन्ना रुझान बदले कित्तोर अनि येनान लोप्पा बाताल इत्तोर अदिनगडल पेरके गुचतोर। इदु बदलाव 2 अप्रैल ते ओना वाशिंगटन ते हिता स्टेटमेंट लोप्पा स्पष्ट रूप ते दिस्ता। इदे नडमा हरले ना पोल्लोंग अनुसार, च्यांग काई-शेक प्रतिनिधित्व कीयाना क्वोमिंगतांग सरकार हीरो बनेमाता ओसो चीनी कम्युनिस्ट पार्टी उंदी राक्षस पार्टी लेक्का बदलेमाता। ओरू अमेरिका सिर्फ च्यांग काई-शेक ना संगे एकता कियार, चीनी कम्युनिस्ट पार्टी संगे आयो इंजी ऐलान कित्तोर। इद विचार सिर्फ हरले ना खुद ता विचार आयवा अमेरिका सरकार ता उंदी पूरा ग्रूप ता लोकुरा विचार आंदू इंदानदिना पोरो बदे डावुट हिल्ले। इदु उंदी गलत ओसो खतरनाक विचार आंदू इंजे रूजवेल्ट डोलतोर अनि हरले वेल्ले गिर्दा ते छुंगकिंग ते मत्ता अमेरिका दूतावास ते मलसी वातोर। हरले प्रतिनिधित्व किसोर मत्ता अमेरिका ता चीन संबंधित नीति क्वोमिंगतांग सरकार किन ओसो ज्यादा प्रतिक्रियावादी बने मायला बढ़ावा हींता ओसो चीन ता गृहयुद्ध ता संकट किन बेरसी कीयाना खतरा पैदा कींता। हरले ना इद नीति जारी मत्तेके अमेरिका सरकार चीनी प्रतिक्रियावाद ता कड़ियता चिकला संगे निंडसी मत्ता गुमिया ते अरिंता अनि इगडल बाहर तेंडना मुश्किल मंता। अदु दसियो करोड़ जागृत ओसो जागृत आसोर मत्ता जनता संगे दुश्मनी एतियार अनि वर्तमान कालम ते जापानी आक्रमण विरोध युद्ध काजे ओसो वायना कालम ते विश्वशांति काजे बाधा बनेमासोर दायार। अनिवार्य रूप ते इद्रमे आयार इंजी स्पष्ट दिससोर हिल्ले या? अमेरिका लोकमत ता उंदी अंश किन चीन ता वायना कालम ता बारे ते इत्तेके चीनी जनता ना स्वाधीनता, आजादी ओसो एकता ता मांग वाले ताकत कु रोमताद हिल्ले ओसो अवु अनिवार्य रूप ते प्रस्फुटित आयनुंग अनि विदेशी ओसो सामंती उत्पीड़न

पोरो जीत हासिल कियानुंग इंजी स्पष्ट रूप ते दिस्सा मंता। इवु ताकतकु चीन पोरो लागू आसोर मत्ता हरले नीति ता खतरा तुकू परेशान आसी मंतांग अनि अदिन किन बदले कियाला आल्सा मंतांग। इंजे माटु अमेरिका नीति बदलेमायर लेवेके मायो इंदा परितोमा मति माटु चीन ता जन विरोधी ताकत कुना सहायता हियाला ओसो सह हियाला, व्यापक चीनी जनता संगे दुश्मनी मोल एतना हरले नीति बदे बदलाव लेवा जारी मत्तेके अमेरिका ता सरकार ओसो जनता पोरो वेल्ले बोजा आयार हंदी हिल्ला मुशिकलकुने मुडुंदियार इंजी जरूर इंदा परितोमा इंजी अमेरिका जनता किन समझे कीयाना।

कामरेड विलियम जेड. फोस्टर ना पोरोल ते चिट्ठी

29 जुलाई 1945

कामरेज विलियम जेड. फोस्टर ओसो संयुक्त राज्य अमेरिका ता कम्युनिस्ट पार्टी ता राष्ट्रीय कमेटी:

माकिन अमेरिकी कम्युनिस्ट राजनीतिक संघता विशेष सम्मेलन लोप्पा ब्राउडर ना संशोधनवादी इतेके आत्मसमर्पणवादी कार्यदिशा¹ ता परित्याग कीयाना ओसो मार्क्सवादी नेतृत्व ता पुनर्स्थापना कीयाना इंजी फैसला कित्ता अनि अमेरिका कम्युनिस्ट पार्टी ता पुनरुद्धार कित्ताद मंता इंजी केंजसी वेल्ले खुशी आता। अमेरिका ता मजदूर वर्ग ओसो मार्क्सवादी आंदोलन ता इद महान जीत पोरो माटु मीकिन हार्दिक बधाई हींतोमा ब्राउडर ना पूरा संशोधनवादी-आत्मसमर्पणवादी कार्यदिशा (ओना पुस्तक “तेहरान” ते पूरा रासिस मंता) सार रूप ते अमेरिका ता मजदूर आंदोलन पोरो प्रतिक्रियावादी अमेरिकी पूंजीपति ग्रूप कुना प्रभाव किन तोहिंता कींता। इव ग्रुप इंजे तम्मा प्रभाव चीन लोप्पा वेने फैले कीयाना कोशिश किया मंतांग। इव ग्रूपकु क्वोमिंगतांग लोप्पा मत्ता प्रतिक्रियावादी गुट ता राष्ट्र ओसो जनता ना हितकुना विरुद्ध मत्ता गलत नीति ता समर्थन कींता। इद्रमे चीनी जनता मुन्ने गृहयुद्ध ता गंभीर खतरा पुट्टी किया मंतांग अनि मना रेंडासी महान देशकु चीन ओसो अमेरिका ता जनता ना हितकुन नुकसान किया मंतांग। अमेरिका मजदूर वर्ग ओसो अदिना हिरावल दस्ता अमेरिका कम्युनिस्ट पार्टी ब्राउडर ना संशोधनवादी-आत्मसमर्पणवादी कार्यदिशा खिलाफ दोरकी कित्ता जीत चीनी जनता ओसो अमेरिका जनता ना जापान खिलाफ युद्ध जारी ताना

ओसो युद्ध पेरके उंदी शांतीपूर्ण परिस्थिति ओसो जनवादी दुनिया ता निर्माण कीयाना महान काम लोप्पा उल्लेखनीय योगदान कीयार।

नोट

1. अर्ल ब्राउडर 1930 तल 1944 एवनल संयुक्त राज्य अमेरिका ता कम्युनिस्ट पार्टी ता महासचिव मत्तोर। दूसरा विश्वयुद्ध ताकनास्के, अमेरिका कम्युनिस्ट पार्टी लोप्पा ब्राउडर प्रतिनिधित्व कीयाना दक्षिणपंथी विचार उंदी मार्क्सवाद-विरोधी संशोधनवादी-आत्मसमर्पणवादी कार्यदिशा ते विकसित आतांगा। दिसम्बर 1943 तल ब्राउडर तन्ना बचोनो भाषणकु, लेखकुना लोप्पा इदु कार्यदिशा ता बारे ते वेहतोर। अप्रैल 1944 ते ओरू तन्ना दक्षिणपंथी अवसरवादी प्रोग्राम ता रूप ते “तेहरान” पुस्तक प्रकाशित कित्तोर। इदु बुनियादी लेनिनवादी स्थापना लोप्पा साम्राज्यवाद इजारेजार, कड़ियता-पुड़ियता ओसो डोल्लसोरे मत्ता पूंजीवाद आंदू इंजी ओसो अमेरिकी पूंजीवाद ता स्वरूप साम्राज्यवाद आंदू इंदानदिन अस्वीकार कीयाना लेक्काटा संशोधन कीसि, ब्राउडर अमेरिका पूंजीवाद लोप्पा “उंदी युवा पूंजीवाद ता उचुन विशेषतांग इंजे वेने मंतांग” (“युवा” शब्द किन ब्राउडर इटेलिक्स ते तासतोर), अनि अमेरिका ता सर्वहारा वर्ग ओसो बड़े पूंजीपति वर्ग नड़मा “आम हित” कु मंतांगा। इद्रम ओरू इजारेदार ट्रस्ट कुना व्यवस्था ता रक्षा कीयाना पोल्लोंग कीसि ओरू वर्ग-समन्वय संगे अमेरिका पूंजीवाद किन तन्ना अनिवार्य संकट तल बचे कीयाना सपना हूड़ना शुरू कित्तोर। अमेरिकास पूंजीवाद ता बारे ते ओना इदु अंगड़म ता मूल्यांकन कि आधार बने कीसि ओसो इजारेदार पूंजी ता संगे वर्ग-समन्वय कीयाना तन्ना आत्मसमर्पणवादी कार्यदिशा किन लागू कित्तोर, ब्राउडर मई 1944 ते अमेरिका सर्वहारा वर्ग ता पार्टी-अमेरिका कम्युनिस्ट पार्टी किन भंग कीयाना कार्यवाही ता अध्यक्ष जिम्मेदारी एततोर अनि अमेरिका कम्युनिस्ट राजनीतिक संघ पोरोल ते उंदी गैरपार्टी संगठन ता स्थापना कित्तोर। ब्राउडर ना गलत कार्यदिशा ता अमेरिका कम्युनिस्ट पार्टी ता बचोनो सदस्य लोर कामरेड विलियम जेड. फोस्टर ना नेतृत्व ते शुरू तले विरोध कित्तोर। कामरेड फोस्टर ना नेतृत्व ते कम्युनिस्ट राजनीतिक संघ जून 1945 ते उंदी प्रस्ताव स्वीकार कित्ता ताना लोप्पा ब्राउडर ना कार्यदिशा ता निंदा कित्ताद मंता। जुलाई ते इद संघ उंदी विशेष राष्ट्रीय सम्मेलन केयसी इद कार्यदिशा किन पूराए खत्म कीयाना अनि अमेरिकी कम्युनिस्ट पार्टी ता पुनर्स्थापना कीयाना इंजी फैसला कित्ता। फरवरी 1946 ते ब्राउडर किन पार्टी तल तेंडसिताद मंता बारांकु इत्तेके ओरू तन्ना सर्वहारा वर्ग तुकु गद्दारी कित्ता दृष्टिबिंदु तेने नितसी मत्तोर। बारांकु इत्तेके ओरू ट्रूमैन सरकार ता साम्राज्यवादी नीति ता खुल्लमखुल्ला समर्थन कित्तोर अनि पार्टी ता खिलाफ गुटपरस्ती ता कार्यवाहिंग कित्तोर।

जापानी आक्रमणकारिरा खिलाफ आखरी युद्ध

9 अगस्त 1945

सोवियत संघ सरकार 8 अगस्त ते जापान खिलाफ युद्ध ता ऐलान कीतांकु चीनी जनता हार्दिक स्वागत कीता। सोवियत संघ ता इद कार्यवाही तल जापान विरोधी युद्ध ता कालम वेल्ले कम आयरा। इदु युद्ध तन्ना आखरी कालम ते एवताद मता, जापानी आक्रमणकारिर ओसो ओरा सब्बे पालतू नेयकु ना आखरी रूप ते हारेमायना काल एवता। इद्रम ता परिस्थिति ते चीनी जनता ना पूरा जापान विरोधी ताकतकु सोवियत संघ ओसो बाकी एकताकारी देश कुना फौजी संगे घनिष्ठ ओसो कारगर तालमेल किसोरे उंदी राष्ट्रव्यापी प्रत्याक्रमण शुरू कीयाना। आठवीं राह सेना, पूना चौथी सेना ओसो जनता ना सब्बे सशस्त्र सेनांग हर मौका ता फायदा एतसी आत्मसमर्पण कियाला इनकार कीयाना, दुश्मन ता ताकत कुन नष्ट कीयाना, वीरा हथियार, सामग्री कि तम्मा कब्जा ते तासना, पूरा जोर वाटसी मुक्त इलाकांग ना विस्तार कीयाना ओसो दुश्मन कब्जा कीसि मत्ता इलाकांग किन घटे कीयाना सब्बे आक्रमणकारिर ओसो ओरा पालतू नेयकुना पोरो व्यापक रूप ते हमला कीयाना। मनम साहस संगे सशस्त्र कार्यदल संगठित कीयाना, सैकड़ों-हजारों संख्या ते दुश्मन ता पृष्ठभाग ता पेरकेटा इलाकांग लोप्पा नेंगना, जनता किन संगठित कीयाना, दुश्मन ता संचार-पंक्ति किन तहस-नहस कीयाना अनि नियमित सेना संगे तालमेल कीसि युद्ध कीयाना। मनम साहस संगे दुश्मन कब्जा कित्ता इलाकांग ना कोटि-कोटी जनता किन जागृत कीयाना, तुरंत भूमिगत सेना किन संगठित कीयाना। अस्केने सशस्त्र विद्रोह ता तैयारी किया परमूड़ांता बाहर तेल हमला कीयाना सेनांग संगे तालमेल कीसि दुश्मन किन खत्म किया परमूड़ांता। इदे नड़मा मुक्त इलाकांग किन सुदृढ़ कीयाना काम किन वेने

नजरअंदाज कीयानायो। मुक्त इलाकांग ना 10 करोड़ जनता नड़मा ओसो मुक्त आयना बाकी सब्बे इलाकांग ना जनता नड़मा, इयेटा इरंगम ते ओसो पेरेटा वसंत कालम ता व्यापक रूप ते लगान ओसो सूद कम कीयाना, उत्पादन बेरसी कीयाना, जनता ना राजनीतिक सत्ता ओसो जनता ना सशस्त्र सेना ता निर्माण कीयाना, मिलिशिया काम लोप्पा बढ़ोतरी कीयाना, सेना ता अनुशासन कि मजबूत कीयाना, सब्बे समूह ना जनता ना संयुक्त मोर्चा बनेकीयाना दृढ़ता ते विकास कीयाना। जन-बल ओसो भौतिक साधन-स्रोत कुना दुरुपयोग कीयाना तुकू बचेमायना। इव सब्बे पोल्लो ना उद्देश्य मना सेना दुश्मन पोरो कीयाना आक्रमण कुना लोप्पा ओसो ज्यादा जोश पुट्टी कियानदु मंता।

पूरा देश ता जनता सतर्क आसी गृहयुद्ध ता खतरा किन रोमी कीयाना ओसो उंदी जनवादी गठबंधन सरकार बनेकीयाना कोशिश कीयाना। चीन ता राष्ट्रीय मुक्ति युद्ध उंदी पूना मंजिल ते एवता अनि पूरा देश ता जनता तन्ना एकता किन मजबूत कीसि आखरी जीत काजे संघर्ष कीयाना।



**SELECTED WORKS OF
MAO Tse Tung
VOL. III**

GONDI
Translation by
JANI

2022

Jangom
press 